

MATEUS TỸ RÁ

*Jesus jóg'jóg ve ag
(Lc 3.23-28)*

¹ Jesus Cristo jóg'jóg ve ag rán ke vễ. Jesus Cristo vỹ tỹ Davi krẽ'krẽ nĩ, kỹ Davi vỹ tỹ Abraão krẽ'krẽ nĩ.

² Abraão vỹ Isaque han. Kỹ Isaque vỹ Jacó han. Kỹ Jacó vỹ Judá han, ti mré ke ag ke gé.

³ Kỹ Judá vỹ Peres han. Zera ti ke gé. ã prũ tỹ Tamar fi ki tóg ag hyn han, Judá ti. Kỹ Peres vỹ Esrom han. Kỹ Esrom vỹ Arão han.

⁴ Kỹ Arão vỹ Aminadabe han. Kỹ Aminadabe vỹ Nasom han. Kỹ Nasom vỹ Salmom han.

⁵ Kỹ Salmom vỹ Boaz han, ã prũ tỹ Raabe fi ki. Kỹ Boaz vỹ Obede han, ã prũ tỹ Rute fi ki. Kỹ Obede vỹ Jessé han.

⁶ Kỹ Jessé vỹ pã'i mág tỹ Davi ẽn han.

Kỹ pã'i mág tỹ Davi vỹ Salomão han, ã prũ ẽn fi ki, ù tỹ Urias prũ ja nĩ ẽn fi ki.

⁷ Kỹ Salomão vỹ Roboão han. Kỹ Roboão vỹ Abias han. Kỹ Abias vỹ Asa han.

⁸ Kỹ Asa vỹ Josafá han. Kỹ Josafá vỹ Jorão han. Kỹ Jorão vỹ Uzias han.

⁹ Kỹ Uzias vỹ Jotão han. Kỹ Jotão vỹ Acáz han. Kỹ Acáz vỹ Ezequias han.

¹⁰ Kỹ Ezequias vỹ Manassés han. Kỹ Manassés vỹ Amom han. Kỹ Amom vỹ Josias han.

11 Kÿ Josias vÿ Jeconias han, ti jãvy ag ke gé. Israel ag tÿ cidade Babilônia ra mũ ãn kã tóg ag hyn han, Israel ag tÿ sigse kÿ mũ ãn kã.

12 Ag tÿ cidade ãn tá vÿnvÿn ke kar kÿ Jeconias vÿ Salatiel han. Kÿ Salatiel vÿ Zorobabel han.

13 Kÿ Zorobabel vÿ Abiúde han. Kÿ Abiúde vÿ Eliaquim han. Kÿ Eliaquim vÿ Azor han.

14 Kÿ Azor vÿ Sadoque han. Kÿ Sadoque vÿ Aquim han. Kÿ Aquim vÿ Eliúde han.

15 Kÿ Eliúde vÿ Eleazar han. Kÿ Eleazar vÿ Matã han. Kÿ Matã vÿ Jacó han.

16 Kÿ Jacó vÿ José han, Maria fi mén ãn ti. Maria ãn fi ki Jesus tóg mur ja nĩ, hã vÿ: Cristo, he mũ.

17 Hã kÿ ag tóg 14 (ke) nÿtĩ, Abraão krẽ'krẽ ag, Davi mré nĩgrén kÿ. Kÿ Davi krẽ'krẽ ag tóg 14 (ke) nÿtĩ gé, ag tÿ ag sigse kÿ nÿtĩ tá ag nĩgrén kÿ, ag tÿ cidade tÿ Babilônia tá sigse kÿ nÿtĩ tá ag nĩgrén kÿ. Tag pãte ag krẽ'krẽ vÿ 14 (ke) nÿtĩ gé, Cristo mré nĩgrén kÿ. Cristo jóg'jóg ve ag hã vẽ.

*Jesus Cristo mur
(Lc 2.1-7)*

18 Jesus Cristo mur vÿ ge nĩ, ha mẽ. Ti mÿnh fi vÿ tÿ José prũnh ke fi nĩ, hã ra fag tóg ver jagnẽ mré nÿ ja tũ nĩ. ãn kã fi tóg kufy nĩ ha. Topẽ kuprĩg tÿ fi mÿ gĩr han jan hã vẽ.

19 Kÿ José tóg mẽg mũ sir, fi tÿ kufy nĩ ti, kÿ tóg ti mÿ e tí. ãn jykré kuryj vẽ mÿr, José ti, hã kÿ tóg fi mÿ'ãg han sór tũ nĩ, kÿ tóg fi to vĩ tũ nĩ sir. Hã ra tóg fi pin kÿ fi mÿ: “kÿ inh hÿn ã tÿ prũ nĩnh ke tũ nĩ ha.” he sór mũ sir.

20 Ti tÿ ver fi tovãnh to jykrén kÿ Topẽ tÿ jẽnẽ jafã tóg ti mÿ vẽn ven mũ sir, ti vẽnh péti kÿ. Kÿ tóg ti

mỹ: “José,” he mũ. “Tỹ ã Davi krẽ'krẽ ag kã ù nĩ,” he tóg. “Maria fi to jykrén kónãn tũg nĩ. Jatun mỹ fi tỹ prũg nĩ, fi tovãnh tũg nĩ. Ủ tũ pijé', fi kósin ti. Topẽ kuprĩg tỹ fi mỹ han ja vễ.

²¹ Ti mur kỹ tóg gré nỹnh mũ, ha vemnĩ. Kỹ ti mỹ: Jesus, hemnĩ. ã povo krenkren han jé tóg ke mũ, ag tỹ Topẽ vĩ mranh mũ ra,” he tóg, José mỹ, Topẽ tỹ jẽnẽ jafã ti.

²² Hã ra Topẽ vĩ vãsỹ ã vĩ tó tĩ ù mỹ tag tó ja nĩ, ha mẽ.

²³ “Ủn mén ja tũ fi vĩ kufy nĩnh mũ,” he ja tóg nĩ. “Fi kósin fi kí mur ken kỹ ag tóg ti to: Emanuel, henh ke mũ,” he ja tóg nĩ, Topẽ vĩ tỹ rán kỹ nĩ kí. Emanuel to ke vễ, hã vĩ: “Topẽ vĩ ẽg kí rĩr há han mũ,” he mũ, ẽg vĩ kí, hã vĩ: Emanuel, he mũ. José vĩ Topẽ vĩ tag ve ja nĩ.

²⁴ Kỹ José tóg rĩr mũ sir, ti vễnh péti kar kỹ. Kỹ tóg Topẽ tỹ jẽnẽ jafã ẽn vĩ kí króm mũ sir. Vễnh prũg han tóg mũ, Maria fi mré.

²⁵ Hã ra tóg ver fi mré nỹ tũ nĩgtĩ. Kejẽn fi tóg ã kósin vég mũ. Kỹ José tóg ti jijin kỹ ti mỹ: Jesus, he mũ. Fi tỹ ti ve kar kỹ tóg vãhã fi mré nỹ mũ sir.

2

Pã'i ag tỹ Jesus venh kãmũ

¹ Fi tỹ Jesus ve ẽn kã fag tóg cidade tỹ Belém tá nỹtĩ, ga tỹ Judéia tá. Herodes vĩ tỹ pã'i tỹ rei nĩ, fi tỹ ti ve ja ẽn kurã kí. Kỹ kejẽn ù ag tóg Jerusalém tá junjun mũ. Kuvar há tá ag tóg kãmũ ja nĩ, rã jur ja tá, ãjag jamã tá. Ủn estudo mág han mũ ag vễ, krĩg to ag tóg estudar he mág han tĩ.

² Ag tỹ Jerusalém tá junjun kỹ ag tóg sir: “ũ tỹ ũri mur mũ vỹ tỹ Israel ag pã'i mág nĩnh mũ,” he mũ. “Ti kri ěg krĩg vé, ěg tỹ ěg jamã tá nỹtĩn kỹ, rã jur ja tá nỹtĩn kỹ. ěg tỹ ti venh kãmũ vễ, ěg tỹ ti mỹ nén ũ há vin sór vễ. ěg hỹn hẽ tá ti venh ke mũ?” he ag tóg, ũ tỹ kuvar há tá kãmũ mũ ěn ag.

³ Ag vỹ tag vỹ pã'i tỹ Herodes mỹ e tĩ, kỹ tóg krĩ kufy nĩ sir. Jerusalém tá ke kar ag mỹ tóg e tĩ gé.

⁴ Kỹ Herodes tóg Topẽ tũ ki rĩr tĩ to pã'i ag jé prěr mũ sir, Topẽ vỹ to professor ag ke gé. Kỹ tóg ag mỹ: “Cristo hỹn hẽ tá mur ke mũ nẽji?” he mũ.

⁵ Kỹ ag tóg ti mỹ: “Belém tá ke nẽji, ga tỹ Judéia tá,” he mũ. “Topẽ vỹ tó tĩ ũ vỹ vãsỹ ti to tag rán ja nĩ, ha mẽ,” he ag tóg.

⁶ “Sĩ ti nĩ, cidade tỹ Belém ti, ga tỹ Judéia tá, he ja tóg nĩ. Ti sĩ nĩ ra tóg cidade mág ag kar kãfór kar nĩ, pã'i mág ěn tỹ tá mur kenh ke tigrĩn. Pã'i mág ěn vỹ tỹ ěg povo tỹ Israel kri pã'i mág jẽnh ke mũ, ũ tỹ Belém tá mur ke mũ ěn ti, he ja tóg nĩ, Topẽ vỹ tỹ rán kỹ nĩ ki,” he ag tóg, professor ag, Herodes mỹ. “Hã kỹ tóg Belém tá mur ke mũ, Cristo ti,” he ag tóg, professor ag.

⁷ Kỹ Herodes tóg vẽn h pēju kỹ fóg ěn ag mré vēmén mũ sir, ũ tỹ krĩg to estudo mág han mũ ěn ag mré. Kỹ tóg ag mỹ: “kurã tỹ hẽ ki ãjag krĩg ěn ve vén?” he mũ.

⁸ Ag tỹ ti mỹ kurã tó kỹ tóg Belém ra ag jẽgnẽg mũ sir. “Ãjag tỹ tá junjun kỹ ti jãvãnh nĩ,” he tóg. “Vẽn kar ki ti jẽmẽmnĩ. ãjag tỹ ti ve kỹ inh mỹ tónh kãmũmnĩ. Kỹ sóg ti venh tĩg sór mũ gé, sỹ ti mỹ nén ũ há nĩm jé,” he tóg, Herodes ti.

⁹ Ag tỹ pã'i ěn vỹ mẽ kar kỹ ag tóg mũ mũ sir,

Belém ra. Ag mũ ěn ki ag tóg krĩg ěn ve mǎn mũ gé sir, ag tỹ rǎ jur ja tá krĩg vég mũ ěn. Krĩg ěn vỹ ag jo tĩ mũ. Ag tỹ Belém tá junjun kỹ krĩg tóg ũn sĩ nĩgja kri hǎ sa nĩ sir.

¹⁰ Ag tỹ krĩg ěn ve kỹ ag fe tóg mrin ke mũ sir.

¹¹ Īn kǎra ge kỹ ag tóg ũn sĩ ti vég mũ, ti mỹnh fi ke gé. Kỹ ag tóg ti krēm grĩnhgrĩnh ke mũ, ti mỹ: “tỹ ǎ Topě kósin nĩ,” he jé. Kỹ ag tóg sir ti mỹ ǎjag tũ ti vin mũ, ouro ti, ka jěnjjo tỹ incenso ti ke gé, ěg tỹ ti pũn kỹ ger há han jafǎ ěn, kar kỹ ka tỹ mirra jěnjjo ke gé, ěg tỹ ti pũn kỹ ger há han jafǎ ũ vē gé.

¹² Hǎ ra Topě tóg, ag věnh péti ki (tóg) ag mỹ: “Herodes mỹ tó tũg nĩ,” he mũ sir. Hǎ kỹ ag tóg ěpry ũ jagma mũ mũ, ěmĩn ũ jagma mũ kỹ ag tóg ǎjag jamǎ ra vỹnvỹn ke mũ sir, rǎ jur ja ra.

José fag tỹ věnh pigju

¹³ Ag mũ kar kỹ José tóg kejěn Topě tỹ jěně jafǎ vég mũ, ti věnh péti kỹ. Kỹ Topě tỹ jěně jafǎ tóg ti mỹ: “nĩ ra,” he mũ. “Ũn sĩ va tĩg, ga tỹ Egito ra, ti mỹnh fi mré. Herodes vỹ ũn sĩ tag tén sór mũ. Hǎ kỹ věnh péju kỹ Egito ra tĩg. Kejěn sóg ǎ mỹ: ha vỹn ké, henh ke mũ. Egito tá inh vỹ jǎvǎnh nĩ,” he tóg, Topě tỹ jěně jafǎ ti, José mỹ. Ti věnh péti kỹ tóg ti mỹ ke mũ.

¹⁴ Kỹ José tóg kuty ěn kǎ jěgně kỹ fag tatĩn tĩ mũ sir, ga tỹ Egito ra, věnh péju jé.

¹⁵ Tá tóg nĩ nĩ. Herodes tỹ kejěn ter kỹ tóg tá vỹn ke mũ. Hǎ ra ti tĩg ja tag vỹ rán kỹ nĩ gé. Vǎsỹ Topě tóg ǎ vỹ tó tĩ ũ mỹ: “tag rán ra,” he ja nĩ, hǎ vỹ: “ga tỹ Egito ra sóg věnh vỹ jěně, inh kósin tỹ tá vỹn ke jé,” he mũ.

Herodes tỹ gĩr ag kygrẽn

¹⁶ Hã ra Herodes tóg fagrĩnh mỹ fóg ẽn ag jãvãnh ja nĩ, ùn estudo mág han mũ ẽn ag. Vãhã tóg: “ag tỹ inh mỹ tó tũg hỹn,” he mũ. Kỹ ti fe tóg gỹm ke mũ sir. Kỹ tóg ã pã'i ag mỹ: “ha mũ jẽg, Belém ra,” he mũ. “Tá gĩr ag kygrẽn kãn nĩ, ùn gré ag, ùn kri prỹg tỹ 2 anos tá krỹg tũ ẽn ag,” he tóg, ag mỹ. Ag mỹ tóg 2 anos tó, fóg ag tỹ ti mỹ: “1 ano kãfór ti nĩ ha, ẽg tỹ ti kri krĩg ve ja ti,” hen kỹ. Kỹ polícia ag tóg gĩr ag kãgtén mũ mũ sir.

¹⁷ Hã ra tag tóg rãn kỹ nĩ gé. Vãsỹ Topẽ vĩ tó tĩ tóg tag rãn ja nĩgtĩ, ti jiji hã vỹ: Jeremias, he mũ. Ẽn tóg tag rãn ja nĩ, ha mẽ:

¹⁸ “cidade tỹ Ramá tá ẽg tóg vẽnh kygfỹ mẽg mũ, vėsỹrẻnh mág ke gé. Raquel fi vỹ vėsỹrẻnh mũ, fi krẻ ag jẻ. Ag tỹ fi mỹ: fỹ tũg nĩ, he mũ ra fi tóg vėsỹrẻnh mũ. Fi krẻ ag vỹ tũ' he kãn, hã kỹ fi tóg fỹ mũ, vėsỹrẻnh mũ,” he ja tóg nĩ, Jeremias ti. Hã ra tóg tag ri ke nĩ, polícia ag tỹ gĩr ag kygrẽn mũ ti.

José fag tỹ Egito tá vỹn ke

¹⁹ Kejẽn Herodes ẽn vỹ ter mũ gé sir, pã'i ti. Kỹ Topẽ tỹ jẻnẻ jafã vỹ José mỹ vẻnh ven mũ, ti vẻnh pẻti kỹ. Ga tỹ Egito tá tóg ti mỹ vẻnh ven mũ. Tá fag tóg nỹtĩ nĩ, ga tỹ Egito tá. Tá tóg ti mỹ vẻnh ven mũ, José mỹ, Topẽ tỹ jẻnẻ jafã ti.

²⁰ Kỹ tóg ti mỹ: “nĩ ra,” he mũ. “Gĩr va tĩg, ti mỹnh fi pẻre tĩg gé, ga tỹ Israel ra. Ừ tỹ fi kósin tẻn sỏr mũ ẽn vỹ hur ter,” he tóg, Topẽ tỹ jẻnẻ jafã ti, José mỹ.

²¹ Kỹ tóg jẻgnẻ kỹ tĩ mũ sir. Gĩr va tóg tĩ mũ, ti mỹnh fi pẻre tóg tĩ mũ gé. Kỹ fag tóg Israel ag ga ra mũ mũ sir.

²² Tá jun kÿ tóg pã'i mág tãg jyjy jëmëg mũ, José ti. Hã ra tóg tÿ Arquelau nĩ. Ti panh tÿ Herodes ri kén tóg tÿ pã'i tÿ rei nĩ, ga tÿ Judéia tá. Kÿ tóg ti kamëg mũ. Kÿ Topë tóg ti vënh péti kÿ ti mÿ: “ga tÿ Judéia tá nĩ mãn sór tũg,” he mũ. Kÿ tóg tĩg mãn kÿ ga tÿ Galiléia ra tĩ mũ sir.

²³ Kÿ tóg cidade tÿ Nazaré tá jamãn mũ sir. Hã ra tóg rán kÿ nĩ gé, Nazaré ti. Vãsÿ Topë vĩ tó tĩ ù tóg tag rán ja nĩ gé, kÿ tóg: “ti to ag tóg: Nazaré tá ke vë, henh ke mũ,” he ja tóg nĩ, Topë vĩ tÿ rán kÿ nĩ ki, Jesus to. Hã ra tóg ge nĩ.

3

João Batista tÿ ag jyvën

(Mc 1.1-8; Lc 3.1-18; Jo 1.19-28)

¹ Kejën João tóg ëmã tũg ja ra tĩ mũ, ga tÿ Judéia tá ga kórég ra. João Batista ën vë. Ga kórég tá jë kÿ tóg ag jyvën mũ sir.

² “Ajag jykre tovãnh nĩ, ù tÿ kanhkã tá nĩ ën tÿ tÿ ajag pã'i nĩ jé,” he tóg, João ti.

³ João ën to tóg tag rán ja nĩ, vãsÿ Topë vĩ tó tĩ ën ti, Isaías he mũ ën, ha mẽ. “Ëmã tũg ja tá tóg jënh ke mũ, ga kórég tá,” he ja tóg nĩ. “Tá tóg ag mÿ jamã hár(a) ke mũ sir. “Ëg Senhor kãtĩg ke jo vënh jãnhkrigkrig nĩ,” he jé tóg ke mũ. “Ëpÿ kurég ajag tóg tĩ, ëmĩn kuryñh ajag tóg tĩ gé, ajag pã'i mág jun ken kÿ. Kÿ tag ri ke han nĩ, ajag jykre pãno togvãnh nĩ, ëg Senhor kãtĩg ken jo,” he jé tóg ke mũ,” he ja tóg nĩ, Isaías ti, João to.

⁴ Jo João ën kur tóg tÿ cavalo pãnĩ sór kyki tÿ há nĩ. Nén ù fár tÿ tóg vësógfĩn ja han tĩ gé. Ópã hã ko ti tĩ, mÿg mré hã, João ti.

⁵ Kÿ ag tóg ti tá junjun kãn mũ sir, cidade tÿ Jerusalém tá kãmũ kÿ, ga tÿ Judéia kar tá kãmũ kÿ, goj tÿ Jordão tá ke kar ag ke gé. João tá ag tóg junjun kãn mũ sir.

⁶ Kÿ tóg ag kygpég mũ sir, goj tÿ Jordão ki, ag tÿ: “Topê vÿ mranh ja sóg nĩgtĩ,” hen kÿ.

⁷ Kÿ ù tÿ Fariseu he mũ ag vÿ ti tá junjun mũ gé sir, ù tÿ Saduceu he mũ ag ke gé, pã'i ag. Ón kÿ ag tóg ti to kãmũ mũ, ti tÿ ag kygpe jé. Kÿ tóg ag jyvẽn tar han mũ sir, João ti. “Pÿn ri ke ãjag tóg nÿtĩ, ãjag jykre pãno tãvĩ nĩn kÿ,” he tóg ag mÿ. “Û nÿ ãjag mÿ: “Topê jũ venh ke tũ ãjag nĩ,” he tĩ’?

⁸ ãjag jykre si tovãnh nĩ, ãjag tÿ ti jũ ve jãvãnh tĩn kÿ. Vẽn h jykre há han nĩ, ěg tÿ ãjag jykre tãg hã ve jé.

⁹ Hã ra ãjag tóg jagnẽ mÿ: “Abraão vÿ tÿ ěg jóg'jóg ve nĩ, kÿ Topê hÿn tóg ěg to jũnh ke tũ nĩ, ěg tÿ tÿ Abraão krẽ'krẽ nÿtĩn tugrĩn,” he tĩ. Ke tũ vẽ hã ra. ãjag jykre kórég ěn to ãjag tóg jagtar ke mũ, ha vemnĩ. Topê vÿ Abraão krẽ'krẽ hÿn han ki kanhró nĩ, pó tag tÿ mÿr, ti tÿ Abraão krẽ'krẽ ve sór kÿ, Topê ti.

¹⁰ Hã ra tóg ãjag tÿ tũ' henh ke mũ, ãjag tÿ ãjag jykre kórég tovãnh tũ nĩn kÿ. ěg tÿ ka gÿn ri ke tóg nĩ. Ti kanẽn vãnh kÿ ěg tóg ti gÿn tĩ, ti tÿ pĩ han jé. Ri ke han jé tóg ke mũ, Topê ti, ãjag tÿ vẽn h jykre há han sór tũ nĩn kÿ. Kÿ tóg pĩ ki ãjag vãm ke mũ, Topê ti,” he tóg ag mÿ, João ti, Fariseu ag mÿ, Saduceu ag mÿ ke gé.

¹¹ Kÿ João tóg vẽn h kar mÿ: “goj hã tÿ sóg ãjag kygpég tĩ, ãjag tÿ ãjag jykre tovãnh kÿ,” he mũ. “Inh nón tóg kãtĩg mũ hã ra, Cristo ti. Inh kãfór ti nĩ. Tÿ

sóg ti camarada nĩ jãvãnh nĩ, sỹ tỹ ti krêm ke pẽ jẽn kỹ. Ëg camarada ag vỹ ãg pẽn né gé mũgtĩ, ãg pẽn to ró ti. Sỹ ti mỹ gé tĩg ke vễ vễ, hã ra sóg tỹ ti krêm ke pẽ nĩ, ti tỹ inh kãfór nĩn kỹ. Ën hã tóg Topẽ kuprĩg tỹ ãjag jagrẽ han ke mũ. Kỹ tóg tỹ pĩ nĩ ve nĩ. Ti tỹ ãjag kygpenh ken hã vễ,” he tóg, João ti, Jesus to.

¹² “Ti kãtĩg vỹ ãg tỹ rãgró rẽn ri ke nĩ. Ti rẽn kar kỹ ãg tóg ti fãr pũn tĩ. Ti kanẽ hã vin han ãg tóg tĩ. Cristo kãtĩg ken kỹ tóg ge nĩnh mũ. Ti to há nỹtĩ ag mỹ tóg: “ha kãmũ jẽg,” henh ke mũ. Ti to há nỹtĩ tũ ag vãm jé tóg ke mũ, pĩ ki, hã ra tóg nhyn kenh ke tũ pẽ nĩ,” he tóg, João ti.

João tỹ Jesus kypé
(Mc 1.9-11; Lc 3.21-22)

¹³ Ën kã kejẽn Jesus tóg João tá jun mũ gé sir, goj tỹ Jordão tá. Ga tỹ Galiléia tá tóg kãtĩ mũ. Kỹ tóg João mỹ: “ha inh kypé gé,” he mũ sir.

¹⁴ Hã ra tóg João mỹ e tĩ, kỹ tóg ti mỹ: “ã hã tỹ inh kypenh ke vễ vễ,” he mũ. “Inh mỹ tóg e tĩ, ã tỹ inh mỹ: ha inh kypé, hen kỹ,” he tóg mũ, João ti, Jesus mỹ.

¹⁵ Hã ra Jesus tóg ti mỹ: “hỹ,” he mũ. Hã ra tóg isỹ vẽn jykre kuryj han kãn há tĩ,” he tóg, João mỹ. Kỹ tóg ti kypég mũ sir.

¹⁶ Ti tỹ Jesus kype kar kỹ ag tóg goj kãtã kãpa mũ sir. Kỹ Jesus tóg kanhkã nor nĩ ãn vég mũ, ha mẽ, kỹ tóg Topẽ kuprĩg kãtère ãn vég mũ. Sórãg ri ke tóg nĩ, ti kãtère ti. Jesus kri tóg kãtère mũ.

¹⁷ Kỹ vẽn vĩ tóg mẽ há tĩ, kanhkã tá, kỹ tóg: “inh kósin pir vëgtĩ,” he mũ. “Inh fe pẽ vëgtĩ,” he tóg, ã tỹ kanhkã tá vĩ mũ ti.

4

*Japo tỹ Jesus krĩn kónãn sór
(Mc 1.12-13; Lc 4.1-13)*

¹ Kĩ Topẽ kuprĩg vỹ Jesus mỹ: “ẽmã tũgja ra tĩg,” he mũ. Kĩ tóg tĩ mũ. Ẽmã tũgja tá nĩn kĩ Japo vỹ ti tỹ ã jóg vỹ mranh han sór mũ, hã ra Jesus tóg ke jãvãnh nĩ.

² Kurã tỹ 40 (ke) han tóg, ẽmã tũgja tá nĩn ki. Kĩ tóg jẽg tũ nĩ, kurã tỹ 40 (ke) ẽn ki, kuty mré ke gé. Kar kĩ tóg sir kókĩr mũ, vễjẽn tũ nĩn kĩ.

³ Kĩ Japo tóg ti to kãtĩ mũ sir, ù tỹ ẽg tỹ Topẽ vỹ mranh han sór mũ ẽn ti. Kĩ tóg Jesus mỹ: “Topẽ kósin vỹ tỹ ã nĩ,” he mũ. “Ã tỹ tỹ Topẽ kósin nĩn kĩ pó tag tỹ ẽmĩ han, ã tỹ kon jé,” he tóg ti mỹ, Nén-Kórég ti, Jesus mỹ.

⁴ Kĩ Jesus tóg ti mỹ: “hã ra tag tóg rãn kĩ nĩ, ha mẽ,” he mũ. “Ẽg pi(jé) ẽmĩ tãvĩ jamẽn kĩ rĩnrĩr mũgtĩ’, hã ra ẽg tóg Topẽ vỹ hã jamẽn kĩ rĩnrĩr mũgtĩ, he tóg, Topẽ vỹ tỹ rãn kĩ nĩ ki. Kĩ tóg isỹ ti vỹ mranh jãvãnh tĩ, ẽmĩ to,” he tóg, Jesus ti, Nén-Kórég mỹ.

⁵ Kĩ Japo vỹ ti pére tĩ mũ, Jerusalém ra, cidade mág ẽn ra. Tá ag tóg Topẽ jo ãn kri nỹtĩnh mũ mũ. Hã ra kãgnó tóg tá nĩ, Topẽ jo ãn mã tá.

⁶ Kĩ Japo tóg Jesus mỹ: “ã hã ne tóg tỹ Topẽ kósin nĩ,” he mũ. “Ha kema ki hũm,” he tóg. “Topẽ vỹ ki tag tóg rãn kĩ nĩ, hã vỹ: ã tỹ jẽgnẽ jafã ag mỹ tóg tónh mũ, Topẽ ti, kĩ ag tóg ã jy nĩgãn mũ, he mũ. Kĩ ã tóg rỹj ke tũ nĩ. Ẽ pẽn vỹ rỹj ke tũ nĩ, ag tỹ ã ki rĩr kĩ, he tóg, Topẽ vỹ tỹ rãn kĩ nĩ ki. Kĩ ki kema hũm,” he tóg, Japo ti. “Rỹj ke tũ ã nĩ ã tỹ tỹ Topẽ kósin nĩn kĩ,” he tóg, Nén-Kórég ti, Jesus mỹ.

⁷ Kĩ Jesus tóg ti mĩ: “kĩ tag vỹ rán kĩ nĩ gé, ha mẽ,” he mũ. “Topẽ mĩ: ã mĩ ã tỹ tó ja ẽn han mũ vỹ? he tũg nĩ, he tóg mũ gé, Topẽ vỹ tỹ rán kĩ nĩ ki. Hã kĩ sóg ti tỹ inh mĩ nèn to: “han ra,” he mũ ẽn hã han tĩ, kĩ sóg hũm ke tũ nĩ,” he tóg, Jesus ti, Nén-Kórég mĩ.

⁸ Kĩ Japo tóg ti mré tĩg mǎn mũ. Pǎnónh téj ra ag tóg mũ mũ sir. Kĩ Japo tóg ti mĩ ga kar ven kǎn mũ, ga kri mũ kar ag ke gé. Ti sǐnvĩ kar ẽn ven tóg ti mĩ.

⁹ Kĩ tóg ti mĩ ke mũ. “Isũ vẽ, tag kar ti,” he tóg. “Hã ra sóg ã mĩ tovǎnh kǎn sór mũ, ã tỹ ã jakrĩ tỹ krỹ’ hen kĩ, inh krẽm, inh mĩ: Topẽ vỹ tỹ ã nĩ, he jé,” he tóg, Nén-Kórég ti, Jesus mĩ.

¹⁰ Kĩ Jesus tóg ti mĩ: “ha tĩg, Satanás,” he mũ. “Ëg pǎ’i tỹ Topẽ hã krẽm ẽg tóg ẽg jakrĩ tỹ krỹ’ he tĩ, ti hã to ẽg tóg: Topẽ vẽ, he tĩ, hã kĩ tóg rán kĩ nĩ, Topẽ vỹ tỹ rán kĩ nĩ ki,” he tóg, Jesus ti, Nén-Kórég mĩ.

¹¹ Kĩ Japo vỹ tóg sir tĩ mũ, ti tovǎnh kĩ. Kĩ Topẽ tỹ jẽgnẽ jafã ag tóg sir ti tá junjun mũ, Jesus ki rĩr jé. ã jóg vỹ mranh ja tũ tóg nĩ.

*Jesus tỹ Galiléia tá Topẽ vỹ tó
(Mc 1.14-15; Lc 4.14-15)*

¹² Kejẽn ag tóg João ség mũ sir, kĩ Jesus tóg mẽg mũ, ag tỹ ti se ti. Kĩ tóg ga tỹ Galiléia ra tĩ mũ, vẽnh péju jé.

¹³ Cidade tỹ Nazaré tá kǎkutẽ kĩ tóg cidade tỹ Cafarnaum ra tĩ mũ, tá nĩ jé, goj nig tá, Zebulom ag jamã tá, Naftali ag jamã tá.

¹⁴ Hã ra tag tóg rán kĩ nĩ gé. Vǎsỹ Topẽ vỹ tó tĩ tóg tag rán ja nĩ, Isaías ti, kĩ tóg:

¹⁵ “Zebulom ag jamã tá ti nĩnh mũ, Naftali ag jamã tá, goj nig tá, goj tỹ Jordão mã tá. Fóg ag jamã

tá ti nĩnh mũ, Israel tũ ag jamã tá, ù tỹ Topẽ ki kagtĩg ag jamã tá, goj nig tỹ Galiléia fyr ki.

¹⁶ Tá ag tóg Topẽ ki kagtĩg nỹtĩ, hã kỹ tóg tá ag kri kuty ri ke nĩ. Ti tỹ tá jun kỹ tóg ag kri kurãg ên ri ke han mũ, ag kanhrãn kỹ. Ag kãgter ke vê vê, hã ra tóg ag kanhrãn mũ ag krenkren jé,” he tóg, Topẽ vĩ rán ki. Kỹ tóg ge nĩ, Jesus tỹ tá nĩn kỹ.

¹⁷ Ga ên tá nĩ kỹ tóg ag jyvẽn mũ, kỹ tóg ag mỹ: “ãjag jykre si tovãnh ra,” he mũ, “ãjag tỹ ùri ù tỹ kanhkã tá nĩ ên tỹ tỹ êg pã'i nĩ ve jé,” he tóg, Jesus ti. Ti tỹ ù tỹ ki kagtĩg ag mỹ Topẽ vĩ tón hã vê.

Jesus tỹ ã mré mũ tĩ ag jé prěr

(Mc 1.16-20; Lc 5.1-11)

¹⁸ Kỹ tóg kejẽn goj nig tỹ Galiléia ên fyr jagma tĩ mũ. Kỹ tóg tá ùn régre ag vég mũ. Û vỹ tỹ Simão nĩ, ag tỹ ù to: Pedro, he mũ tag ti. Kỹ ti jãvy vỹ tỹ André nĩ. Kur tỹ pirã kugmĩ jafã tỹ ag tóg goj kãki fón mũ, pirã kugmĩ jé. Ag rãnrãj vê, pirã kugmĩg tĩ ag vê.

¹⁹ Kỹ Jesus tóg ag ve kỹ (tóg) ag to tĩ mũ sir. Kỹ tóg ag mré vĩ mũ. “Inh mré kãmũjêg,” he tóg mũ ag mỹ. “Pirã kugmĩ há ãjag nỹtĩ. ãjag kanhrãn jé sóg ke mũ, ãjag tỹ êprã ke ag tỹ inh ki ge han jé,” he tóg ag mỹ, Jesus ti.

²⁰ Kỹ ag tóg vêsỹmér ãjag tỹ nén tovãnh kỹ mũ mũ, ti mré, Pedro ti, André ti ke gé.

²¹ Kỹ ag tóg mũ mũ, goj fyr jagma. Ag mũ sĩ han mũ ra Jesus tóg ùn régre ù ag ve mãn mũ gé. Tỹ ti Tiago nĩ, Zebedeu kósin, kỹ ti jãvy vỹ tỹ João nĩ gé. Canoa kãki ag nỹtĩ, kur tỹ pirã kugmĩ jafã ki ag tóg han nỹtĩ nĩ. Ag panh vỹ ag mré nĩ nĩ. Kỹ Jesus tóg ag jé prěr mũ sir.

²² Kÿ ag tóg vêsÿmér (ag tóg) ãjag tÿ nén tovãnh kÿ ti to kãmũ mũ, canoa tovãnh kÿ, ãjag panh ti tovãnh kÿ ke gé. Jesus mré ag tóg mũ mũ, Tiago ti, ti jãvy tÿ João ti ke gé.

Jesus tÿ ag tÿ há' he
(Lc 6.17-19)

²³ Kÿ Jesus tóg ga tÿ Galiléia kar mũ tĩ mũ sir, ag mré. Judeu ag vënh kanhrãn jafã krëm tóg ag kanhrãn mũ. Ag mẽ tóg Topẽ ví sér tó mũ, ù tÿ kanhkã tá nĩ tÿ tÿ êg pã'i nĩ tĩ. Ûn kagyga kar ag hyn han tóg, fag kar ke gé, gÿr kar ke gé.

²⁴ Hã kÿ ti kãme tóg vënh kar kri rùm mũ sir, ga tÿ Síria tá ke kar kri. Kÿ ag tóg sir ùn kagyga ag tatĩn kãmũ mũ, ti to, vënh kaga vënhmÿ han mũ ag mré hã, kÿ tóg ag tÿ há' he kãn mũ sir. Vënh jagrê kórég ag pan kãn tóg mũ gé. Û tÿ ter tĩ han mũ ag tÿ hághá' he tóg mũ gé, ùn grĩngrĩn kÿ nÿtĩ ag tÿ ke gé, fag kar tÿ ke gé.

²⁵ Hã kÿ ùn tÿ hën ri ke ag tóg ti mré mũ mũ sir. Û ag tóg ga tÿ Galiléia tá kãmũ mũ, kÿ ù ag tóg cidade tÿ Decápolis tá kãmũ mũ gé, cidade tÿ Jerusalém tá ke gé, ga tÿ Judéia tá ke gé, goj tÿ Jordão mã tá ke gé.

5

Jesus tÿ ag kanhrãn
(Lc 6.20-23)

¹ Ûn e ag tÿ Jesus venh kãmũ kÿ tóg ag mré pãnónh ra tãpyr mũ. Tá tóg nĩ mũ, kÿ ti mré mũ tĩ ag tóg ti mré nĩgnĩ mũ, ti rã hã.

² Kÿ tóg sir ag kanhrãn mũ, ag mẽ kãmén kÿ. Kÿ tóg ag mẽ tag tó mũ, ha mẽ.

3 “Topě vỹ ãjag ve há han mũ, ãjag tỹ: kórég inh nĩ, hen kỹ. Sỹ Topě kuprĩg tỹ jagrẽn kỹ nĩ tũ nĩ ra sóg tỹ ùn kórég nĩnh mũ vè, hemnĩ. Kỹ Topě vỹ ãjag ve há han mũ. Kỹ ãjag tóg ti tỹ tỹ ãg pã'i nĩ venh ke mũ, kanhkã tá,” he tóg, Jesus ti.

4 “Topě vỹ ãjag ve há han mũ, ãjag fỹn kỹ. Kỹ tóg ãjag fỹ ãn tỹ tũ' henh ke mũ,” he tóg.

5 “Topě vỹ ãjag ve há han mũ, ãjag tỹ vẽn kar mẽ koměr hã vĩn kỹ. Kỹ ãjag tóg ga kar kri tỹ pã'i nỹtĩnh ke mũ, ùn mág pẽ,” he tóg.

6 “Topě vỹ ãjag ve há han mũ, ãjag tỹ vẽn jykre kuryj ve sór nỹtĩn kỹ, ti tỹ ãjag mẽ ãjag kókĩr ri ke tĩn kỹ, ãjag tỹ vẽn jykre kuryj ve sór nĩn kỹ. Kỹ ãjag tóg venh ke mũ,” he tóg.

7 “Topě vỹ ãjag ve há han mũ, ãjag tỹ jagně jagãgtãn kỹ. Kỹ Topě vỹ ãjag jagãgtãn ke mũ gé,” he tóg.

8 “Topě vỹ ãjag ve há han mũ, ãjag jãnhkri nỹtĩn kỹ. Kỹ ãjag tóg Topě venh mũ, ãjag jãnhkri nỹtĩn kỹ,” he tóg.

9 “Topě vỹ ãjag ve há han mũ, ãjag tỹ jagně krĩ tỹ kãnhvy' hen kỹ. Kỹ Topě tóg ãjag to: “inh krẽ ag vè,” henh ke mũ, ãjag tỹ jagně krĩ tỹ kãnhvy' hen kỹ,” he tóg.

10 “Topě vỹ ãjag ve há han mũ, ag tỹ vẽn jykre kuryj to ãjag vóg kónãn mũ ra. Topě vỹ tỹ kanhkã tá ãjag pã'i nĩnh mũ, ag tỹ ti tugrĩn ãjag vóg kónãn mũ ra,” he tóg.

11 “Topě vỹ ãjag ve há han mũ, ag tỹ isugrĩn ãjag mẽ vĩ kónãn mũ ra, ag tỹ ãjag vóg kónãn mũ ra. Ag tỹ ón kỹ ãjag to vĩ vĩ he kỹ tóg há tĩ, ag tỹ ón kỹ ãjag jykre pãno tó mũ ra, isugrĩn.

12 Mý sér nýtímnĩ, ājag fe tỹ há' hemnĩ, ag tỹ ón kỹ ājag kato vĩn kỹ. Kanhkã tá ājag tóg nén kar há venh ke mũ, vėnh kato. Ge ja ag tóg nĩgtĩ vāsỹ, Topě vĩ tó tĩ ag mỹ, ājag jo ke ag mỹ. Ag ri kén ājag tóg tag venh ke mũ,” he tóg, Jesus ti.

Sa to comparação

(Mc 9.50; Lc 14.34-35)

13 “Sa ri ke ājag nýtĩ, ājag tỹ ga kri mũn kỹ. Sa kãhór nĩn kỹ ěg tóg ti tỹ sa há han mãn ki kagtĩg nýtĩ. Kórég ti nĩgtĩ, ti kãhór nĩn kỹ. Kỹ ěg tóg ti vãm tĩ sir, kỹ tóg tũ' he tĩ sir,” he tóg, Jesus ti. Ti tỹ ěg tỹ ti jykre tovãnh ke tũ kãmén hã vė.

Jěngrě kãme

(Mc 4.21-23; Lc 8.16-17)

14 “Ga kri mũn kỹ ājag tóg jěngrě ri ke nýtĩ, ājag tỹ vėnh jykre há han kỹ, ag tỹ ājag ki ve jé, Topě jykre há ti. Cidade mág vỹ ve há tĩgtĩ, kuvar há tá jě kỹ, ti tỹ pãnónh kri nỹn kỹ. Ti pi(jé) vėnh péju kỹ nỹ'.

15 Ri ke ti nĩ, néj gru ti. ěg tỹ ti grug kỹ ěg pi(jé) lata krēm ti fěg tĩ'. Ti fěg jafã kri ěg tóg ti fěg tĩ. Kỹ vėnh kar tóg ěn vėg tĩ sir, ĩn kãtã nýtĩ kar ěn ti.

16 Gemnĩ, néj gru ri ke nýtímnĩ. Topě jykre han nĩ, vėnh kar tỹ ājag ki ve jé, ājag jykre há ti. Hã kỹ ag tóg ěg jóg tỹ Topě mỹ vĩ há han mũ, ěg jóg tỹ kanhkã tá nĩ ěn mỹ,” he tóg, Jesus ti.

Topě tỹ Moisés mỹ vėnh jykre nĩv

17 “Ājag hỹn iso: ti hã ne tóg Moisés tỹ ěg mỹ nén tó ja tỹ tũ' he sór mũ', he mũ, ti hã ne tóg Topě jykre ěn tỹ tũ' he sór mũ', he ājag hỹn tĩ. Vāsỹ Topě vĩ tó tĩ ag vỹ ěg mỹ tó ja nĩgtĩ, Topě jykre ěn ti, hã ra tóg tỹ tũ' he sór mũ', he ājag hỹn tĩ iso. Hã tũ vė. Sỹ ki

króm kân sór vĕ, Moisés tỹ nĕn tó ja ěn ki, sỹ ki króm kỹ sóg tỹ ājag kanhrānrān kân ke mũ,” he tóg.

18 “Topĕ vỹ ā jykre ěn tỹ tũ' henh ke tũ nĩ, ha mĕ. Ga tỹ ver kanhkā mré nỹn kỹ tóg ā jykre tỹ tũ' henh ke tũ nĩ, ga tỹ ver tũ' he tũ nĩn kỹ. Sỹ ki króm kân ke vĕ, kỹ tóg ki krov kân kỹ nỹnh mũ, Topĕ jykre kar ti mỹr, ha mĕ,” he tóg.

19 “Kỹ ājag tỹ tỹ tũ' he sór kỹ tóg kórég nỹ, ājag tỹ ti vĩ pir tỹ tũ' he sór kỹ. Ājag tỹ ti vĩ pir to ũ mỹ: han tũg nĩ, hen kỹ ājag tóg tỹ ũn kāsir nỹtĩnh mũ, vĕnh kar krĕm, kanhkā ki. Ājag tỹ hā ra han kân kỹ ājag tóg tỹ ũn mág nỹtĩnh mũ, ājag tỹ vĕnh kar mỹ: “ki króm kân sórmnĩ,” hen kỹ. Kỹ ājag tóg tỹ ũn mág nỹtĩnh mũ, kanhkā tá,” he tóg, Jesus ti.

20 “Fariseu ag ri ke nỹtĩ sór tũg nĩ. Topĕ vĩ to professor ag ri ke nỹtĩ sór tũg nĩ gé. Ón kỹ ag tóg Topĕ vĩ ki króm tĩ, hā ra ag tóg ki króm há han tũ nĩgtĩ. Ag jykre pi(jé) kuryj nỹ'. Ājag tỹ kanhkā ve sór nỹtĩn kỹ vĕnh jykre kuryj han nĩ,” he tóg, Jesus ti.

Ĕg tỹ jagnĕ to há nỹtĩnh ke to vĕnh jykre

21 “Topĕ tỹ vāsỹ ěg si ag jyvĕn mĕ ājag huri, hā vỹ: ũ tén tũg nĩ, he mũ. Ā tỹ ũ tén kỹ ag tóg ā senh ke mũ, ā tỹ ti mré ter jé, he ja tóg nĩ, Topĕ vĩ tỹ rán kỹ nĩ ki.

22 Sỹ ũri ājag jyvĕn hā vĕ, ha mĕ. Ā régre to ā fe tỹ gỹm ke tũg nĩ. Ā tỹ ā régre to ā fe tỹ gỹm ke kỹ tóg ā tỹ ti tén ri ke nĩ. Kỹ tóg inh mỹ há tĩnh mũ, ag tỹ tag to ā se kỹ. Kỹ ā régre mỹ vĩ kónān tũg nĩ gé. Ā tỹ ā régre mỹ vĩ kónān kỹ tóg inh mỹ há tĩnh mũ, ag tỹ tag to pā'i mág mỹ ā ven kỹ. Kỹ ā régre mỹ féfén tũg

nĩ gé. ã tỹ ã régre mỹ féfén kỹ ã tóg nũgme ki kutěnh ke mũ, inferno ki, pĩ ěn ki,” he tóg, Jesus ti.

²³ “Tag to jykrén nĩ, ã tỹ Topě mỹ nén ũ pũn sór kỹ. Topě jo ĩn krěm. ã tỹ tá jěnh kỹ ã régre kar mĩ ěkrén nĩ. “Ũ mỹ iso jykrén kónãnh tũ nĩ vỹ?” he jé ã tóg ke mũ. “Inh mỹ ũ jũ han tũ nĩ vỹ?” he jé ã tóg ke mũ.

²⁴ Ũ tỹ ã to jykrén kónãnh kỹ ti venh tũg nĩ ver, Topě mỹ nén ũ pũn tovãnh nĩ ver. ã régre ěn mỹ: “inh mỹ věnh pãte fón nĩ,” hemnĩ ver. Kar kỹ Topě mỹ nén ũ pũn sórmnĩ sir, ã tỹ ã régre mré vĩ kar kỹ,” he tóg, Jesus ti.

²⁵ “Kejěnh ã tóg ã mré ke ũ mỹ név(e) jě, kỹ tóg pã'i ag mỹ ã kãmén tũg ke mũ. Ti tỹ pã'i ag mỹ tónh tũg ke mũ ěn ti to hã ti mré vĩmnĩ, ti mỹ: “kajãm jé sóg ke mũ,” hemnĩ. Ke tũ nĩ (mũ) ra pã'i vỹ ã jykre pãno venh ke mũ, kỹ tóg polícia mỹ: “ti se ra,” henh ke mũ sir, kỹ tóg sir ã senh mũ.

²⁶ Ha mẽ, ki hã sóg tó mũ. Tá ã kãnhmar kãkutě mãn ke tũ nĩ. ã tỹ kajãm kãn kar ã tóg kãkutě mãn mũ, tá, hěnh ri ke mũn,” he tóg, Jesus ti.

Ã prũ tũ fi mré nỹ tũ to věnh jykre

²⁷ “Topě tỹ ěg si ag jyvěnh ũ tag mẽ ãjag huri, ke gé, hã vỹ: “ã prũ tũ fi mré nỹ tũg nĩ,” he mũ.

²⁸ Sỹ ũri ãjag jyvěnh hã vě, ha mẽ: ã tỹ ũn týtá ũ fi ki vě'ĩ kỹ tóg ã tỹ fi mré nỹ sỹ han ěn ri ke nĩ sir, ã tỹ fi ki vě'ĩ mũ ti. ã tỹ ũn týtá ũ fi mrě nũr sór kỹ tóg ã tỹ fi mrě nũr ri ke nĩ sir, ã tỹ fi to ěn mũ ti. Ke tũg nĩ.

²⁹ ã tỹ nén ũ ki vě'ĩ tũgrĩn Topě vĩ mranh kỹ ã kaně tỹ nám kemnĩ, ã tỹ ki vě'ĩ jagy han mãn tũ nĩ

je. A kyvó nĩn ky tóg jagy tĩ gé vė vė. A tỹ hã ra nũgme ki kutẽ ky tóg jagy kãfór nĩ. Jagy pẽ ti nĩ, ã tỹ inferno ki kutẽ ti. Ky tag hã ve sór tũg nĩ.

³⁰ A tỹ ã nĩgé tỹ nén ũ kórég han ky ã nĩgnó kym nĩ, ã tỹ ke mãn tũ nĩ je. A nĩgnó pir nĩn ky tóg jagy tĩ gé. A tỹ hã ra nũgme ki kutẽ ky tóg jagy kãfór nĩ sir, ky tag hã kamẽg nĩ,” he tóg, Jesus ti.

A prũ fón tũ to vėnh jykre

(Mt 19.9; Mc 10.11-12; Lc 16.18)

³¹ “Tope tỹ ěg si ag jyvėn ũ hã vỹ nỹ gé, hã vỹ: “ã tỹ ã prũ fi fón sór nĩn ky tóg há tũ nỹ,” he mũ. “A tỹ ge ra fi fón sór nĩn ky fi mỹ vėnh rán ky nĩm nĩ, fi tỹ vėnh rán ma tĩg je,” he ja tóg nĩ.

³² Sỹ ũri ãjag jyvėn hã vė, ha mẽ: ãjag prũ fón tũg nĩ. A tỹ fi fón ky fi tỹ ũ mré nỹ mãn ky fi tóg ã tugrĩn Topẽ vĩ mranh mũ sir, ã tỹ tỹ fi mén pẽ ra. Fi tỹ ã jãvo vėsóg ki ũ mré nỹ ja nĩn ky tóg há sĩ nỹ, ã tỹ fi mỹ: ha tĩg, hen ky. Ky fi mén tỹ fi fón ky fi tỹ prũg sór tũg nĩ gé. A prũ tũ fi vė, fi mén tỹ fi fón ja nĩn ky,” he tóg, Jesus ti.

Jagnė to ón ke tũ to vėnh jykre

³³ “Vãsỹ Topẽ tỹ ěg si ag jyvėn ũ tag mẽ ãjag tóg huri ke gé, hã vỹ: “jagnė mỹ ón tũg nĩ,” he mũ. “A tỹ ũ mỹ: Topẽ vỹ ki kanhró nĩ, hen ky ti mỹ ón sór tũg nĩ. Ky hã han nĩ gé, ã tỹ Topẽ mỹ: tag hã han je sóg ke mũ, hen ky. Ón ky vĩ tũg nĩ,” he ja tóg nĩ, ěg si ag mỹ, Topẽ ti.

³⁴ Sỹ ũri ãjag jyvėn hã vė, ha mẽ: “Topẽ vỹ ki kanhró nĩ,” he sór tũg nĩ, ón ky. “Ũ tỹ kanhkã tá

nĩ ên vỹ ki kanhró nĩ,” he sór tũg nĩ gé, ón kỹ. Topẽ nĩgja vễ, kanhkã tá, kỹ ón kỹ tag tó sór tũg nĩ.

³⁵ Kỹ: “ũ tỹ ga kri ke ên vỹ ki kanhró nĩ,” he tũg nĩ gé. Topẽ tũ vễ, ga ti, hã kỹ ón kỹ tag tó sór tũg nĩ. Kỹ: “ũ tỹ Jerusalém tá ke ag ki rĩr tĩ ên vỹ ki kanhró nĩ,” he tũg nĩ gé. Êg pã'i mág tũ vễ mỹr, Jerusalém ti, hã kỹ ón kỹ tag tó sór tũg nĩ.

³⁶ Kỹ: “ũ tỹ inh krĩ han mũ ên vỹ ki kanhró nĩ,” he tũg nĩ gé. Ǻ tỹ Ǻ gãnh kuprig sór mũ ra Ǻ tóg Ǻ tỹ nén tỹ Ǻ gãnh kuprig ke mũ ên ki kagtĩg nĩ, Ǻ tỹ Ǻ gãnh sán sór mũ ra Ǻ tóg Ǻ tỹ nén tỹ sán ke mũ ên ki kagtĩg nĩ gé. Hã kỹ ón kỹ tag tó sór tũg nĩ gé.

³⁷ Ki hã tómnĩ, jagnẽ mỹ, ón sór tũg nĩ. Ón kỹ Topẽ jiji tó sór tũg nĩ gé. Ừ tỹ Ǻ mỹ ki hã tó kỹ: hỹ, hemnĩ. Ti tỹ ki hã ke tũ nĩn kỹ: vó, hemnĩ gé. Ǻ tỹ han ke nĩn kỹ: hej, hemnĩ. Ǻ tỹ han ke tũ nĩn kỹ: nejé, hemnĩ. Ki hã tómnĩ, jagnẽ mỹ. Ǻ tỹ ón sór kỹ Ǻ tóg Nén-Kórég jykre hã han ke mũ. Ke tũg nĩ,” he tóg, Jesus ti.

*Êg tỹ vễnh kajãm ke tũ to vễnh jykre
(Lc 6.29-30)*

³⁸ “Topẽ tỹ êg si ag jyvẽn ù tag mẽ Ǻjag huri, hã vỹ: “ũ tỹ Ǻ kanẽ pir ki tãnh kỹ vễnh kato ti kanẽ pir ù ki tãnh nĩ gé,” he ja tóg nĩ. “Ừ tỹ Ǻ jã pir ki tãnh kỹ mranh kỹ vễnh kato ti jã pir ki tãnh kỹ mranh nĩ gé. Pátén tũg nĩ,” he ja tóg nĩ, Topẽ ti.

³⁹ Sỹ ừi Ǻjag jyvẽn mũn hã vễ, ha mẽ: ù tỹ Ǻ vóg mũ ra ti vóg tũg nĩ. Ti tỹ Ǻ jamẽ ki tãnh kỹ ti mỹ Ǻ jamẽ ù ti ven nĩ, ti tỹ Ǻ mỹ ki tãnh jé gé.

⁴⁰ Ti tỹ Ǻ palitó mãn sór kỹ ti mỹ Ǻ camisa mré nĩm nĩ gé.

41 Ti tỹ ã mỹ: “mũ nỹ, tag tá, kakó ja tá inh fón nĩ,” hen kỹ ti mré tĩg nĩ, hã ra ti mỹ: “kór há tá inh ã fón tĩg mũ ha,” hemnĩ.

42 Ti tỹ ã mỹ nén ù to: “inh mỹ nĩm,” hen kỹ ti mỹ nĩm nĩ. Ti tỹ ã mỹ: “inh mỹ prestar hemnĩ,” hen kỹ ti mỹ: vó, he tũg nĩ,” he tóg, Jesus ti.

*Ëg tỹ ãg kato vãsãn mũ ag tó há nỹtĩnh ke
(Lc 6.27-28, 32-36)*

43 “Topẽ tỹ ãg si ag jyvẽn ù mẽ ãjag huri, hã vỹ: “ã mré ke ag to há nĩmnĩ, kỹ ù tỹ ã kato vãsãnsãn mũ ag to jũ nĩmnĩ gé,” he ja tóg nĩ, Topẽ ti.

44 Isỹ ùri ãjag jyvẽn hã vễ, ha mẽ: ù tỹ ãjag kato vãsãnsãn mũ ag to há nỹtĩmnĩ, ù tỹ ãjag vóg kónãn mũ ag to Topẽ mré vĩmnĩ.

45 Hã ki ãjag tóg tỹ Topẽ krẽ nỹtĩ, ti ri ke han kỹ, ãjag jóg tỹ kanhkã tá nĩ ẽn ri ke han kỹ. Ti hã ne tóg rã han', ti tỹ vẽn kar kri jẽngrẽg kỹ san jé, ùn jykre kuryj ag kri, ùn jykre pãno ag kri ke gé. Ta han ti ke gé, ti tỹ vẽn kar há han jé, ùn jykre kuryj ag, ùn jykre pãno ag ke gé. Ver tóg vẽn kar to há nĩ, Topẽ ti,” he tóg, Jesus ti.

46 “Ãjag mré ke ù ag tóg ãjag to há nỹtĩ. ãjag tỹ tag ag hã to há nỹtĩn kỹ tóg tỹ nén ù tũ tĩ ver. ùn jykre kórég ag vỹ ge nỹtĩgtĩ gé, governo mỹ jãnkamy mǎg tĩ ag. ù tỹ ãjag to há nỹtĩ ag hã to ag tóg há nỹtĩ, vẽn kato. Há ti nĩ, hã ra tóg tỹ nén ù tũ nĩ ver.

47 Kỹ ãjag tỹ ãjag mré ke ag hã mỹ: ã mỹ há? hen kỹ tóg tỹ nén ù tũ nĩ gé ver. ù tỹ Topẽ vĩ ki kagtĩg ag vỹ ge nỹtĩgtĩ gé. ãjag mré ke ag hã mỹ ag tóg: ã mỹ há? he tĩ gé, hã ra tóg tỹ nén ù tũ nĩ ver.

48 Hã kÿ vënh kar to vënh jykre kuryj han kÿ nÿtĩmnĩ, ù tÿ ãjag kato vãsãnsãn mũ ag mré hã, ãg jóg tÿ kanhkã tá nĩ ên ri ke han nĩ. Ti hã ne tóg vënh kar to vënh jykre kuryj han kÿ nĩ nĩ'. Ti ri ke han nĩ," he tóg, Jesus ti.

6

Ëg tÿ ù jagãgtãn ke to vënh jykre

1 "Kÿ ãjag tÿ Topẽ jykre han sór kÿ ù tÿ vënh jykre pãno han mũ ag jykre ri ke han tũg nĩ. Ón kÿ ag tóg vënh kar rĩnve Topẽ jykre han sór tĩ, vënh kar tÿ ag ve jé, ag tÿ Topẽ jykre han mũ ên ti. Kar kÿ ag tóg hã ra hã tũ han tĩ sir. Kÿ ag ri ke han tũg nĩ, ke tũ nĩ (mũ) ra ãg jóg tÿ kanhkã tá nĩ ên vÿ tóg ãjag mÿ ven ke tũ nĩ, ãjag tÿ ãg jóg jykre han mũ ên kaja ti," he tóg.

2 "Hã kÿ ãjag tÿ ùn jagãgtar ag jagãgtãn kÿ ù mÿ: "ag jagãgtãn inh tĩ," he tũg nĩ. Û tÿ vënh jykre régre han mũ ag jykre ri ke han tũg nĩ. Ag tÿ ón kÿ ù jagãgtãn kÿ ag tóg ãg jagma mũ kÿ (ag tóg) vënh kar mÿ: "ag jagãgtãn inh tĩ," he tĩ. Ëg vënh kanhrãn jafã jo ãn krêm ag tóg tag tó tĩ gé. Ag tÿ ãg jé ke ag tÿ ag mÿ vĩ há han ve sór vë, hã jé ag tóg ón kÿ ùn jagtar ag jagãgtãn tĩ. Ag ganho hã vë, ãg jé ke ag tÿ ag mÿ vënh vĩ há tó mũ ên ti. Kanhkã tá ag ganho ù ve mãn ke tũ nĩ ha. ãjag mÿ sóg ki hã tó mũ, ha mẽ," he tóg, Jesus ti.

3 "Ag ri ke han tũg nĩ. Ûn jagtar ag jagãgtãn nĩ. Û mÿ tó tũg nĩ, ãjag tÿ ùn jagãgtãn mũ ên ti, ãjag mré ke fag mÿ tó tũg nĩ gé.

4 Kÿ ãjag tÿ ag jagãgtãn kÿ ãg jóg tÿ kanhkã tá nĩ ên tóg ãjag vég mũ sir, kÿ tóg ãjag mÿ nĩm ke mũ sir,

ãjag ganho ti. Ëg tỹ vënh vatánh tá nén han mũ ãn ve kân tóg tĩ (mỹr), Topẽ ti,” he tóg, Jesus ti.

*Ëg tỹ Topẽ mré vëmén to vënh jykre
(Lc 11.2-4)*

⁵ “Kỹ ãjag tỹ Topẽ mré vëmén kỹ ù tỹ vënh jykre régre han mũ ãn ag jykre ri ke han tũg nĩ gé. Ag tỹ ón kỹ Topẽ mré vĩ kỹ ag tóg ãg vënh kanhrãn jafã jo ãn kãki jëgjë kỹ nỹtĩ, ke tũ nĩ kỹ ãmĩn kri, ãn to hã. Kỹ vënh kar vĩ ag tỹ Topẽ mré vĩ mũ tag vég mũ sir. Kanhkã tá ag tóg ganho ù ve mãn ke tũ nĩ ha. ãjag mỹ sóg ki hã tó mũ, ha mẽ.

⁶ Ag jãvo ãjag tỹ Topẽ mré vëmén kỹ ãjag ãn kãra gemnĩ. Kỹ jãnkã nĩfénh nĩ. Kỹ tá Topẽ mré vĩmĩnĩ sir, ãg jóg mré, ãg tỹ ùn vég tũ ãn mré. Kỹ tóg kanhkã tá ãjag mỹ nĩm ke mũ, ãjag ganho ti. Ëg tỹ vënh vatánh tá nén han mũ ãn vég tóg tĩ (mỹr), Topẽ ti,” he tóg, Jesus ti.

⁷ “ãjag tỹ ti mré vëmén kỹ fagrĩnh mỹ ti mré vëmén mág han tũg nĩ. ù tỹ Topẽ vĩ ki kagtĩg ag ri ke han tũg nĩ. ãjag jãnjãn kỹ ag tóg ón kỹ vĩ mág han tũ. “Ëg tỹ vĩ mág han kỹ ti hỹn ãg vĩ mẽg mũ,” he ag tóg tĩ, ón kỹ.

⁸ Ag ri ke han tũg nĩ. Ëg jóg vĩ nén kar ki kanhró nĩ, ãjag tỹ ti mỹ tó tũ ra tóg ki kanhró nĩ,” he tóg.

⁹ “ãjag tỹ Topẽ mré vĩ kỹ tag tómnĩ, ha mẽ:

“Ëg jóg mág, kanhkã tá ã tóg nĩ nĩ.

ã jiji tó ãg tóg tĩ, kỹ vënh kar jé ã tỹ tỹ ùn mág nĩ vé.

¹⁰ Ëg jé kãnhmar ã tỹ tỹ ãg pã'i nĩ vé.

Vënh kar jé ã tỹ nén to jykren mũ ãn han sór, ga tá ke kar, ag jé kanhkã tá ke kar ag ri ke han.

¹¹ Ëg mỹ ùri ãg jën ti nĩm, ãg tỹ kurã kar ki ko tĩ ãn.

12 Kÿ ãg mÿ vãnh pãte fón nĩ, ãg tÿ ã vĩ mranh ja ti.
Hã jé ãg tóg ãg tÿ jagnẽ to jũ tÿ jagnẽ mÿ vãnh pãte
fón ke mũ gé.

13 Kÿ ãg tÿ ã vĩ mranh sór kÿ ãg kren han nĩ, ãg tÿn
mranh tũ nĩ jé.

Nén-Kórég jo ãg vemnĩ.

Ã hã ne tóg tar nĩ'.

Ã hã ne tóg mág nĩ inhhã'.

Ã jykre tóg tũ' henh ke tũ nĩ,"

hemnĩ, Topẽ mÿ," he tóg, Jesus ti.

14 "Hÿ, ge ti nĩ," he tóg. "Ủ tÿ ãjag to jũ kÿ ti mÿ
vãnh pãte fón nĩ. Ủ tÿ ãjag mÿ vĩ kónãn kÿ ti mÿ vãnh
pãte fón nĩ gé. ãjag tÿ gen kÿ ãg jóg vÿ ãjag mÿ vãnh
pãte fón ke mũ gé.

15 ãjag tÿ tag han tũ nĩn kÿ, kÿ ãg jóg tóg ãjag mÿ
vãnh pãte fón ke tũ nĩ gé, ãjag tÿ ti vĩ mranh ja ti,"
he tóg, Jesus ti.

Ëg vãkre to vãnh jykre

16 "Kÿ ãjag vãkre kÿ fe ù nÿtĩ tũg nĩ, ãjag tÿ Topẽ
mÿ há nÿtĩ jé jég tũ nÿtĩn kÿ. Vãkre ki ù tÿ vãnh jykre
régre han mũ ag jykre ri ke han tũg nĩ. Ag tÿ ón
kÿ vãkre kÿ ag tóg fe ù nÿtĩnh mũ sir, vãnh kar tÿ
ag vãkre ve jé. Ag ganho hã vễ. Kanhkã tá ag tóg
ganho ù vãnh ke tũ nĩ ha. ãjag mÿ sóg ki hã tó mũ,
ha mẽ.

17 ãjag vãkre kÿ ãjag gãnh tãg nĩ, ãjag jamẽ ku-
pemnĩ, festa han nÿtĩ ve nĩmnĩ, ãjag vãkren kÿ.

18 Hã kÿ ag tóg vég tũ nĩ, ãjag vãkrég mũ ti. Ëg
jóg hã ne vég mũ inhhã', ãg tÿ ùn vég tũ ãn hã vÿ
vég mũ. Kÿ tóg kanhkã tá ãjag mÿ nĩm ke mũ, ãjag

ganho ti. Ëg tỹ vĕnh vatánh tá nĕn han mũ vĕg tóg tĩ (mỹr), Topĕ tĩ,” he tóg, Jesus ti.

Ëg rico to vĕnh jykre
(Lc 12.33-34)

¹⁹ “Ga kri mũn kỹ ricon ke to vāsān sór tũg nĩ. Ga vỹ ājag tỹ nĕn kar ti konh ke mũ, ājag tỹ rico hā to vāsān mũ ra. Kỹ ājag jānkamy vỹ vĕso jāgfanh ke mũ gé sir, ti e nỹtĩn kỹ. Kỹ ag tóg pigju kỹ ma mũnh ke mũ gé sir, ājag tỹ nĕn ti, ti e nỹtĩn kỹ.

²⁰ Ājag tỹ inhhā kanhkā tá tũ mág pĕ nỹtĩn kỹ tóg inhhā ājag mỹ há tĩnh mũ. Tá ti pi(jé) tỹ ga nĩ', ājag tũ ti, tá ti pi(jé) vĕso jāgfanh mũ'. Tá ag pi(jé) péju kỹ ma mũnh mũ'. Hā kỹ tá ājag tũ vin han sórmnĩ.

²¹ Ājag tỹ ga kri tỹ nĕn ũ mág nỹtĩn kỹ ājag tóg ga kri mũ mág sór mũ. Ājag tỹ hā ra kanhkā tá tỹ nĕn ũ mág nỹtĩn kỹ ājag tóg kanhkā ra mũ sór mũ, kỹ tag hā ne há nĩ',” he tóg, Jesus ti.

Ëg kanĕ tỹ ĕg mỹ kurā han
(Lc 11.34-36)

²² “Ëg kanĕ tỹ ĕg vĕg tĩ. Kỹ tóg tỹ ĕg mỹ kurā ri ke nĩ, ĕg kanĕ ti, ti há nĩn kỹ. Tỹ ĕg tóg kurā ve há han tĩ, ĕg kanĕ há nĩn kỹ.

²³ Ëg kanĕ kórég nỹtĩn kỹ tóg ĕg mỹ kuty tĩnh mũ. Kỹ tóg ĕg mỹ kurā vĕg tĩ ĕn mỹ (tóg) kuty nĩ sir, kỹ kuty tag vỹ kuty kar káfór nĩ. Ge ti nĩ, ĕg jykre kórég nĩn kỹ. Ëg kanĕ kórég ri ke vĕ sir, ĕg jykre kórég ti,” he tóg, Jesus ti.

Ëg tỹ ga kri rico to vāsān sór ke tũ
(Lc 16.13; 12.22-31)

24 “Ă jagrĕ régre nĭn kŷ tóg vĕnhmŷ tĭ. Ă tŷ Topĕ hă tŷ jagrĕ nĭn kŷ jănkamy tân ěn tŷ jagrĕ nĭ sór tŷg nĭ. Ă tŷ jănkamy e ve sór kŷ ti hă mĭ ěkrĕn kŷ ti hă vŷ tŷ ģ jagrĕ nĭnh mŷ. Kŷ ěg tóg Topĕ tŷ ěg mŷ nĕn tó mŷ ěn to jykrĕn há han tŷ nĭgtĭ. Ă tŷ Topĕ to há nĭn kŷ ģ tóg sir ga kri rico to văsăn sór ke tŷ nĭ. Ă tŷ ga kri rico nĭ sór kŷ ģ tóg Topĕ mĭ ěkrĕg tŷ nĭ, hă vemnĭ,” he tóg, Jesus ti.

25 “Hă kŷ sóg ģjag mŷ tó mŷ. Ąjag tŷ nĕn ve sór mág mŷ to krĭ kufy han tŷg nĭ. “Inh hŷn ũri ne konh mŷ', inh hŷn ne tunh mŷ'?” he tŷg nĭ. Topĕ tŷ ěg han ja vĕ mŷr, ěg tŷ ga kri mŷ jé. Hă kŷ tóg ěg mŷ ěg jĕn ki rĭr mŷ gé sir, ěg kur ki ke gé, Topĕ ti.

26 Sĕsĭ to jykrĕn nĭ. Ag mŷ ěkrăn tĭ? Vó. Ag mŷ păjó krĕm vin tĭ? Vó, ke tŷ ag tóg nĭgtĭ. Ge ra ěg jóg tŷ kanhkă tá nĭ ěn tóg ag ki rĭr nĭ nĭ. Ąjag mŷ jĕsĭ kăfór tŷ nŷtĭ', Topĕ mŷ'? Vó, sĕsĭ kăfór ģjag tóg nŷtĭ.

27 Topĕ tŷ ěg kă ũ jé prĕr kŷ ěg tóg ter ke mŷ, ěg ter sór tŷ ra. Ter jé ěg tóg ke mŷ gé, ěg tŷ to krĭ kufy han mŷ ra. Ęg krĭ kufy ěn pi(jé) ěg kren han mŷ'.

28 Kŷ kur to krĭ kufy han tŷg nĭ gé. Ka fej hă to jykrĕn nĭ. Jatun mŷ tóg mog tĭ. Rănrăj tŷ tóg nĭgtĭ, kur han tŷ tóg nĭgtĭ.

29 Hă ra tóg sĭnvĭ nŷtĭ, ka fej ti. Kŷ pă'i mág tŷ Salomăo kur tóg ri ke tŷ nĭgtĭ, ti sĭnvĭ ra, vĕnh kar kur sĭnvĭ kăfór ti nĭ, Salomăo kur ti. Hă ra tóg ka fej sĭnvĭ ri ke tŷ nĭ. Ki hă sóg tó mŷ mŷr.

30 Topĕ hă ne ka fej sĭnvĭ han, tŷ tóg kur sĭnvĭ ri ke nĭ, ka fej ti. Hă ra tóg kănhmar kăgter tĭ, ka fej ti, ti sĭnvĭ ra. Ũri tóg há nŷtĭ. Kŷ tóg vaj kŷ kógungun kŷ pŭr mŷ sir, re mré. Hă kŷ Topĕ tóg ģjag ki rĭr

kãfór han mũ, ãjag kur mré hã. Hã kÿ Topẽ ki ge kÿ nÿtĩmnĩ, ti vĩ kri fi kÿ.

³¹ Krĩ kufy han tũg nĩ. “Inh hÿn ne konh mũ’? Inh hÿn ne kron mũ’? Inh hÿn ne tunh mũ’?” he tũg nĩ.

³² Û tÿ Topẽ vĩ ki kagtĩg ag vÿ tag to jykrén mág tĩ, hã ra ãg jóg tÿ Topẽ vÿ ãg vég tĩ, ãg tÿ nén ve sór mág mũ ti. Kÿ to krĩ kufy han tũg nĩ. Ti hã ne ãg vég mũ, ãg jóg tÿ Topẽ ti.

³³ Topẽ tÿ tÿ ãg pã’i nĩ ãn hã ve sórmnĩ. Kÿ tag hã to vãsãn nĩ. Ti jykre kuryj tag hã to vãsãn nĩ. Kÿ tóg ãjag mÿ ãjag tÿ nén ve sór mág mũ ãn tÿ ãjag mÿ vin ke mũ sir.

³⁴ Hã kÿ ãjag tÿ vaj kÿ nén venh ke to krĩ kufy han tũg nĩ. Vaj kÿ ãjag tóg venh ke mũ, kÿ ãjag tóg to jykrén ke mũ sir. Ûri ãjag tÿ nén tÿ ùri vég mũ hã to jykrén há han nĩ. ãjag tÿ ùri nén ù jagy vég mũ vÿ há nĩ, kÿ ãjag tÿ vaj kÿ nén venh ke to jykrén tũg nĩ, ùri,” he tóg, Jesus ti.

7

Ëg tÿ ù to jykrén kónãn ke tũ

(Lc 6.37-38, 41-42)

¹ “Ã régre to jykrén kónãn tũg nĩ, ti jykre kórég ra. Kÿ Topẽ vÿ ã to jykrén kónãn ke tũ nĩ gé.

² ã tÿ ù to jykrén mũ ãn ri ke han jé tóg ke mũ, Topẽ ti, ã mÿ. ã tÿ ù mÿ kãmun mũ ri ke han jé tóg ke mũ, ã mÿ, Topẽ ti.

³ Jykre kórég mág ã tóg nĩ gé, hã ra ã régre jykre pãno sí ãn ne ã mÿ kórég nÿ’.

⁴ Kÿ ã hã ne tóg ã régre mÿ: ã jykre kórég kurynh jé sóg ke mũ, he mũ’, ã tÿ ã jykre pãno tãvĩ ãn kurynh jãvãnh (hã) ra’.

⁵ Ke tũg nĩ. Ke tũ nĩ (mũ) ra ã tóg jykre régre nýtĩ. ã jykre kuryinh vén nĩ. Kar kũ ã tóg sir ã régre jykre kuryinh há han mũ,” he tóg, Jesus ti.

⁶ “Hã ra cachorro jykre ri ke ag mũ Topẽ jykre sĩnvĩ tó tũg nĩ. Porco jykre ri ke ag mũ Topẽ jykre sĩnvĩ ên tó tũg nĩ gé. Jykre kavéj ag nýtĩ, hã kũ ag tóg Topẽ jykre to é henh ke mũ. Ti tỹ tũ' he sór ag tóg tũ, ti sãn kũ, Topẽ jykre sĩnvĩ ên ti. Kar kũ ag tóg sir ã mré vènh génh sór mũ gé, ha vemnĩ, ã tỹ ag mũ Topẽ jykre sĩnvĩ ên tó kũ,” he tóg, Jesus ti.

Topẽ tỹ tỹ ùn vĩ há nĩ
(Lc 11.9-13)

⁷ “Topẽ mũ nén kar to vĩmnĩ, kũ tóg ãjag mũ han mũ. ãjag tỹ ti mũ nén ù to vĩ mũ ên jãvãnh nĩ, kũ ãjag tóg venh ke mũ. Ti mré vĩ kũ êg tỹ ti jãnkã tỹ tórón tórón ke ên ri ke han nĩ. Kũ tóg ãjag mũ nón ri ke han mũ sir, ti tỹ ãjag mũ ãjag tỹ nén to vĩ mũ ên han kũ.

⁸ Hỹ, hã vè. ãjag tỹ ti mũ nén (ũ) to vĩn kũ tóg ãjag mũ han mũ sir. ãjag tỹ ti jãvãnh kũ ãjag tóg ti venh mũ sir. ãjag tỹ êg tỹ jãnkã tỹ tórón tórón ke ri ke han kũ tóg ãjag mũ nón ri ke han mũ sir,” he tóg.

⁹ “Kejẽn ãjag kósin tóg ãjag mũ êmĩ to vĩ mũ. Kũ ãjag pi(jé) ti mũ pó nĩm ke mũ'. Ti mũ ãjag tóg êmĩ hã nĩm ke mũ.

¹⁰ ãjag kósin tỹ ãjag mũ pirã to vĩn kũ, kũ ãjag pi(jé) ti mũ pỹn nĩm ke mũ'. Pirã hã nĩm jé ãjag tóg ke mũ.

¹¹ Jykre pãno ãjag nýtĩ. Ge ra ãjag tóg ãjag krẽ mũ nén ù há vin tĩ. Ge ti nĩ gé, ãjag tỹ Topẽ mũ nén ù to vĩn kũ. Nén ù há hã nĩm jé tóg ke mũ. Hã ra tóg ãjag kãfór han tĩ, êg jóg tỹ kanhkã tá nĩ ti. ãjag tỹ ti

mỹ nén (ũ) to vñh kỹ tóg ãjag mỹ nén ù há tãvĩ han tĩ mÿr,” he tóg.

¹² “Ãjag tÿ ãjag mré ke ù to: “ti tÿ ãg mỹ tag han há tóg tĩ vễ,” he mũ ra ãg hã tóg ti mÿ han ke mũ. Moisés tÿ ãg jyvẽn hã vễ, Topẽ vĩ tó tĩ ag tÿ ãg jyvẽn hã vễ,” he tóg, Jesus ti.

Jãnkã régre
(Lc 13.24)

¹³ “Û tÿ inh ki rã mũ vÿ tÿ jãnkã sĩ fĩn rãm ke ri ke nĩ. Jãnkã sĩ fĩn rãm jé ãg tóg vãsãn tĩ. Ri ke ti nĩ, ù tÿ inh ki rãnh ke mũ ti. Jãnkã mág vÿ nĩ gé. Hã ra ù tÿ fĩn rãm ke mũ ag vÿ kãgter pẽ han ke mũ. ãjag tÿ jãnkã mág ên fĩn rãm sór kÿ tóg ver jagy tũ nĩ, fĩn rãm há tóg tĩ. Kÿ nũgme to ãpÿry jagma tũg, pĩ to ãmĩn jagma tũg pi(jé) jagy tĩ', ti mág pẽ nĩn kÿ. Hã kÿ ù tÿ hên ri ke ag vÿ jagma mũ mũ. Kar kÿ ag tóg kãgter pẽ han mũ sir, pĩ ki vár kÿ.

¹⁴ Ag jãvo jãnkã sĩ ên fĩn rãm nĩ, ãjag tÿ rĩr krÿg ja tũ ve jé. Sĩ ti nĩ, kanhkã to ãpÿry ti, kanhkã to ãmĩn ti. Ûn pipir ag vÿ jagma mũnh mũ. ã sĩ san kÿ tóg vég tũ sag tĩ, hã kÿ ù tÿ jagma mũnh ke mũ ag vÿ pipir nÿtĩ,” he tóg, Jesus ti.

Ón kÿ Topẽ vĩ tó tĩ ag
(Lc 6.43-44)

¹⁵ “Ón kÿ Topẽ vĩ tó tĩ ên ag vĩ kri fig tũg nĩ. Há nÿtĩ ve ag tóg nÿtĩ, hã ra ag tóg ãjag kókén sór nÿtĩ. ãjag kókén sór to ag tóg mĩg jũ ên ri ke nÿtĩ, mÿr, ha mẽ.

¹⁶ ãjag tÿ ag jykre tugnÿm kÿ ãjag tóg ag tÿ Topẽ vĩ mranh mũ ên ki kanhró nÿtĩ. Ha vé, vãn h tÿ jóhó ki

ẽg tóg uva vég tũ nĩgtĩ m̃r. Kĩ ẽg tóg sónh ki pẽnva vég tũ nĩgtĩ gé.

17 Ka vỹ ge nỹgtĩ. Ti há nĩn kũ tóg kanẽ há han tĩ, kũ ẽg tóg ko tĩ. Ti kórég nĩn kũ tóg kanẽ kórég han tĩ, kũ ẽg pi(jé) ko tĩ!

18 Ka há vỹ kanẽn kónãn ki kagtĩg nĩ, kũ ka kórég vỹ kanẽ há han ki kagtĩg nĩ gé.

19 Kũ ẽg tóg ka kórég ẽn gỹn tĩ, tỹ ẽg pĩ han tĩ. Ka tỹ kanẽ há han vãn ẽn tỹ ẽg pĩnh ti.

20 Ge ti nĩgtĩ, ón kũ Topẽ vĩ tó tĩ ag tỹ. Ag tỹ Topẽ vĩ mrynhmranh kũ ag tóg ón kũ Topẽ vĩ tó tĩ. Ag tỹ nén han mũ ki ẽg tóg ag jykre kórég vég mũ,” he tóg, Jesus ti.

*Ëg tỹ Topẽ vĩ ki króm ke
(Lc 13.25-27)*

21 “Vẽn kar tóg iso: “pã'i vẽn, pã'i vẽn,” he tĩ. Hã ra ã ag tóg Topẽ tỹ nén tó mũ ẽn han vãn nỹtĩgtĩ. Hã kũ ag tóg Topẽ tỹ tỹ ẽg pã'i mág nĩ venh ke tũ nĩ. ã tỹ inh jóg vĩ han mũ ẽn ag hã vỹ Topẽ tỹ tỹ ẽg pã'i nĩ venh ke mũ.

22 Kurã ẽn kã, isỹ vẽn kar jykre tugnỹm ke kurã ẽn kã ag tóg inh mỹ tag tónh mũ, ha mẽ. “Senhor, Senhor, ã jykre tó ẽg m̃r,” he jé ag tóg ke mũ. “ã jykre hã ki ẽkrén kũ ẽg tóg ẽg tỹ nén han vãn han ja nĩgtĩ m̃r. ã jykre hã tỹ ẽg tóg vẽn jagrẽ kórég pan m̃r,” he jé ag tóg ke mũ, inh mỹ.

23 Hã ra sóg ag mỹ: “ãjag pi(jé) tỹ inh mré ke nỹtĩ!,” henh ke mũ. “ãjag ki kagtĩg sóg nĩ m̃r. Ha mũ jẽg. Jykre kórég ãjag tóg nỹtĩ,” he jé sóg ke mũ, ã tỹ inh panh vĩ han vãn ẽn ag mỹ,” he tóg, Jesus ti.

Īn nūna gunh gunh kāme
(Lc 6.47-49)

²⁴ “Ha mē, inh vī mēg ājag tóg nýtī,” he tóg. “Ājag tỹ inh vī ki króm kỹ ājag tóg sir ũn há ri ke nýtī. Īn han ken kỹ tóg to jykrén mū. To jykrén há nĩn kỹ tóg ga kũm kỹ pāró kri ĩn nūna ka fēg mū sir.

²⁵ Kỹ vāhā ta tóg kutē mū, kỹ goj vỹ var mū sir. Kóho jũ vỹ kātī mū, ĩn to, hā ra tóg kutē tũ nĩ sir, ĩn ti. Pāró kri tóg nýtī, ti nūna ti, hā kỹ tóg kutē tũ nĩ. Ge ti nĩ, ājag tỹ inh vī kri fi kỹ.

²⁶ Ājag tỹ inh vī mēg mū ra ki króm tũ nĩn kỹ ājag tóg ũn jykre kórég ri ke nýtī. Īn han ken kỹ tóg to jykrén kónān mū, kỹ tóg ga tỹ rỹnrỹj hā ki ka fēg mū, krīg mỹ, ĩn nūna ti.

²⁷ Kỹ ta tóg kutē mū, kỹ goj vỹ var mū sir. Kóho jũ vỹ kātī mū gé, ĩn to, kỹ ĩn tóg vom ke tére kỹ kutē mū sir. Mrāj kān tóg mū sir, ĩn ti. Ge ti nĩ, ājag tỹ inh vī kri fig tũ nĩn kỹ,” he tóg, Jesus ti.

Jesus vī tỹ vēnh kar vī kǎfór nĩ

²⁸ Hā ki Jesus tóg krỹg he mū sir, ag kanhrān ki. Kỹ tóg vēnh kar mỹ e tĩ sir, ti vī ti.

²⁹ Tĩ vī tóg vēnh kar vī kǎfór nĩ, Topē vī to profesor ag vī kǎfór ti nĩ, kỹ tóg pǎ'i vī kǎfór pē nĩ gé, ti vī ti. Hā kỹ tóg ki hā tó mū. Kỹ tóg ag mỹ e tĩ sir.

8

Jesus tỹ ũn kaga kren vānh tỹ há' he
(Mc 1.40-45; Lc 5.12-16)

¹ Jesus tỹ ag mỹ tó kǎn kỹ tóg pānónh ěn to tére mū sir. Kỹ ũn e ěn ag tóg ti nón mū mū sir.

² Kĩ vāhã ù tóg ti tá jun mũ. Vēnh kaga kren vānh han kĩ tóg nĩ, vēnh kaga tỹ lepra he mũ ěn, ù tỹ tá jun mũ ti. Kĩ tóg ti krēm grĩnh ke kĩ ã jakrĩ tỹ jê nĩ, kĩ tóg ti mỹ: “Senhor,” he mũ. “Ă mỹ isỹ há' he sór tũ nĩ? Ă hã tóg isỹ há henh mũ, ã tỹ isỹ há' he sór kĩ,” he tóg ti mỹ.

³ Kĩ Jesus tóg ti mỹ: “hej,” he mũ. “To há sóg nĩ, há' he ja há ã tóg nĩ,” he tóg ti mỹ, Jesus ti. Kĩ tóg ti kaga kren vānh ěn tỹ kren han mũ vēsỹmér. Jānhkri tóg nĩ, ti fár ti.

⁴ Kĩ Jesus tóg ti mỹ: “ker ù mỹ tó hẽ', ã han tag ti,” he mũ. “Ha tĩg, Topẽ tũ ki rĩr tĩ to. Ti hã mỹ tómnĩ. Kĩ ti mỹ nén ù nĩm nĩ, ti tỹ Topẽ mỹ pũn jé, Moisés tỹ vāsỹ ěg mỹ nén tó ja ěn ti. Hã tugrĩn vēnh kar vỹ ã tỹ há' he mũ tag ki kanhrãn mũ,” he tóg ti mỹ, Jesus ti. Kĩ tóg tĩ mũ, há' hen kĩ.

*Jesus tỹ pã'i mág camarada tỹ há' he
(Lc 7.1-10)*

⁵ Kĩ Jesus tóg kejēn cidade tỹ Cafarnaum tá jun mũ. Kĩ fóg tỹ capitão tóg ti venh kãtĩ mũ, ti mỹ nén ù to vĩ jé.

⁶ Kĩ tóg ti mỹ: “Senhor,” he mũ. “Inh camarada tóg nỹ nĩ, inh ĩn tá. Kãnhgrĩn kãn kĩ tóg nỹ nĩ, hã ra tóg kaga jagy nỹ,” he tóg ti mỹ, capitão ti, Jesus mỹ.

⁷ Kĩ Jesus tóg ti mỹ: “kỹ inh hỹn tóg ti venh tĩg ha, ã mré, sỹ ã mỹ ti han jé,” he mũ.

⁸ Hã ra capitão tóg Jesus mỹ ke mãn mũ. “Ă mỹn hỹn jagy nĩ, ã tỹ inh ĩn kãki sãn ke ti, isỹ tỹ fóg nĩn kĩ,” he tóg ti mỹ. “Ă vĩ pir ki inh camarada vỹ há' henh mũ. Ă vĩ hã tỹ ã tóg ti tỹ há' henh ke mũ,” he tóg, capitão ti.

⁹ “Ha vé, tỹ sóg pã'i krēm ke nĩ gé, kỹ soldado ag tóg tỹ inh krēm ke nỹtĩ gé. Hã kỹ sóg pã'i jykre ki kanhró nĩ. Isỹ soldado ù mỹ: kutĩg, hen kỹ tóg tĩ mũ. Sỹ ti mỹ: kunĩg, hen kỹ tóg kãtĩ mũ gé. Isỹ inh camarada mỹ: tag han ra, hen kỹ tóg han mũ. Inh vĩ tỹ sóg ag jěgněg tĩ. Hã kỹ sóg ki kanhró nĩ. Ā vĩ tỹ ã tóg inh camarada tỹ há' he há nĩ,” he tóg, capitão ti, Jesus mỹ.

¹⁰ Kỹ tóg Jesus mỹ e tĩ, ti vĩ tag ti. Kỹ tóg ã mré mũ ag mỹ: “ha mẽ, Israel ag vỹ ti ri ke tũ nỹtĩ,” he mũ. “Ki kanhró tóg nĩ (mỹr), kỹ tóg inh ki rã kỹ jě. Ge ve ja tũ sóg nĩ,” he tóg.

¹¹ “Ha vé, ù tỹ hěn ri ke ag vỹ kãmũnh ke mũ, rã jur ja tá ag kãmũnh mũ, rã pur ja tá ke gé. Abraão mré ag tóg ù tỹ kanhkã tá nĩ ěn tỹ tỹ ěg pã'i nĩ venh ke mũ, Isaque mré, Jacó mré ke gé, Topê tóg ag ki rĩr ke mũ.

¹² Ag jãvo Israel krě'krě ag tóg kuty ki vár ke mũ. Ag tỹ ù tỹ kanhkã tá nĩ ěn tỹ tỹ ěg pã'i nĩ venh ke vễ vễ, hã ra ag tóg venh ke tũ nĩ. Kỹ ag tóg vėsỹrénh ke mũ, ãjag jã tỹ ag gángán ke mũ, tỹ gangan ke mũ, veso jũn kỹ,” he tóg, Jesus ti. Ā mré nỹtĩ ag mỹ tóg ke mũ.

¹³ Kỹ tóg capitão mỹ: “ha tĩg ge,” he mũ. “Inh ki rã kỹ ã tóg jě nĩ, hã kỹ ã tóg venh ke mũ sir, ã tỹ nén ve sór mũ ti. Ā camarada tỹ inh hur há' hẽ,” he tóg, Jesus ti, capitão mỹ. Kỹ tóg tĩ mũ sir. Hã ra ti camarada tóg há' he mũ. Hora ěn ki tóg há' he mũ, Jesus tỹ hora ki tó mũ ěn ki.

*Jesus tỹ ùn kagyga ag tỹ hághá' he
(Mc 1.29-34; Lc 4.38-41)*

14 Kÿ Jesus tóg sir Pedro ãn kãra rã mũ. Kÿ tóg ti prũ fi mÿnh fi vég mũ. Kaga fi tóg nÿ nĩ, rÿg kÿ.

15 Kÿ tóg fi nĩgé mÿg mũ sir. Kÿ fi rÿg ên tóg tũ' he mũ sir. Kÿ fi tóg nĩ kÿ ag ki rĩr mũ sir.

16 Kutÿ ên kã ag tóg ãn jagrẽ kórég ag tatĩn kãmũ mũ ti to. Kÿ tóg ag mÿ vĩ mũ, kÿ ag tóg pa kãn mũ sir, vÿnh jagrẽ kórég ag. Ûn kagyga ag hÿn han tóg mũ gé sir, Jesus ti.

17 Hã ra tag tóg rán kÿ nĩ gé. Vãsÿ Topẽ vĩ tó tĩ tÿ Isaías vÿ tag rán ja nĩ, ha mÿ: “êg kaga nÿtĩn kÿ tóg êg han, kÿ êg tóg há' he kãn mũ, ti tÿ êg jagfÿ jagtar tÿgrĩn,” he ja tóg nĩ, Isaías ti. Hã ra tóg ge nĩ.

*Û tÿ Jesus mré mũ sór mũ ag
(Lc 9.57-62)*

18 Kejÿn ag tóg Jesus pénĩn e nÿtĩ, kÿ Jesus tóg ag ve kÿ: “mũ jé ha,” he mũ, ã mré mũ tĩ ag mÿ. “Gøj kafã ù ra êg mũnh mũ,” he tóg.

19 Ag mũnh ke to hã Topẽ vĩ to professor ù tóg ti mré vĩnh kãtĩ mũ. “Senhor,” he tóg. “Sÿ ã mré tĩg há tóg tĩ. ã tÿ hẽ ra tĩg kÿ sóg ã mré tĩ mũ,” he tóg.

20 Hã ra Jesus tóg ti mÿ: “hã ra tóg jagy tĩ,” he mũ. “Ûn tũ sóg nĩ,” he tóg. “Mĩg vÿ kré nÿtĩgtĩ. Sẽsĩ vÿ jagfe nÿtĩgtĩ gé. Ag jãvo isÿ hẽ tá nũr ke tóg tũ tĩ. Tÿ sóg êprã ke fi kósĩn nĩ,” he tóg, Jesus ti.

21 Kÿ Jesus mré tĩ ù tóg Jesus mÿ vĩ mũ gé. “ã mré sóg tĩ mũ, hã ra sóg ver inh panh tÿ ga ki ti fón sór mũ,” he tóg, Jesus mÿ.

22 Kÿ Jesus tóg ti mÿ: “vó,” he mũ. “Ti kénh tĩ tũg,” he tóg. “Inh mré kãtĩg,” he tóg. “Inh ki ge tũ ag vÿ ã panh ti kej han mũnh mũ. ã tÿ inhhã inh mré kãtĩg há tóg tĩ,” he tóg, Jesus ti.

23 Kĩ tóg sir canoa kãki rã mũ. Kĩ ti mré mũ tĩ ag tóg ti mré ki ge mũ gé sir, goj kafã ù ra mũ jé.

Jesus tỹ kóho jũ tỹ tũ' he

(Mc 4.35-41; Lc 8.22-25)

24 Ag tỹ goj kãmĩ mũ (hã) ra kóho jũ tóg sir krog he mũ, ha mẽ. Kĩ goj tóg canoa kãki krém krém ke mũ, ti fãn sór tóg mũ. Hã ra Jesus tóg nũr kũ nũ nĩ.

25 Kĩ ag tóg ti rĩn kũ ti mỹ: “Senhor,” he mũ. “Ëg kren han nĩ,” he ag tóg. “Ëg kãgter ha mẽ tóg tĩ,” he ag tóg.

26 Kĩ Jesus tóg ag mỹ: “ãjag tỹ nejé mũmẽgmẽg nẽ?” he mũ. “Ãjag mỹ inh ki ge há han tũ'?” he tóg. Kĩ tóg nĩ kũ jẽgnẽ mũ sir, kũ tóg goj mỹ vĩ mũ sir, kóho mỹ. Kĩ tóg tũ' he mũ sir. Katy' he tóg mũ, katy tãvĩ tóg tĩ mỹr, ha mẽ.

27 Kĩ tóg vẽn̄h kar mỹ e tĩ. “Ti jykre tóg ãg mỹ e tĩ,” he ag tóg mũ. “Kóho tóg ti vĩ han, goj ti ke gé,” he ag tóg.

Jesus tỹ vẽn̄h jagrẽ kórég pan

(Mc 5.1-20; Lc 8.26-39)

28 Kĩ tóg goj fĩn rãm kũ nig kafã ù tá jun mũ sir, Gadara tá, Jesus tĩ, ti mré mũ tĩ ag ke gé. Kĩ ùn régre ag tóg ti kato tẽgtẽ mũ, ùn jagrẽ kórég ag. Vẽn̄h kej tá ag tóg kãmũ mũ. Ag jamã vẽn̄, vẽn̄h kej tĩ. Jũ mẽ ag tóg nỹtĩ, kũ ù ag tóg hẽn ra mũ vãn̄h nỹtĩ, ag kamẽg kũ.

29 Jesus kato ag tóg kãmũ mũ, ùn jagrẽ kórég ẽn̄ ag. Ti ve kũ ag tóg sir prẽn̄ mũ, ha mẽ. “!..Ã hỹn ãg tỹ hẽ ri kenh mũ ha, Topẽ kósin!..!” he ag tóg mũ. “!..Ã mỹ ãg vóg kónãn sór mũ ha, ãg kurã to hã..!” he ag tóg. Jesus mỹ.

³⁰ Hã ra porco tóg ki e nýtĩ. Kakó tá ag tóg jëg nýtĩ.

³¹ Kĩ Nén-Kórég ag tóg Jesus mÿ: “ã tÿ ãg pan kÿ ã tÿ porco to ãg jëgnënh há tóg tĩ,” he mũ.

³² Kĩ tóg ag mÿ: “hej,” he mũ. “Ha mũ jëg ge,” he tóg. Kĩ ag tóg ãn ag togvãnh kÿ porco ki ge mũ sir, Nén-Kórég ag. Kĩ vãhã porco ag tóg rán ki re kãn mũ sir, goj nig ki ag tóg vár kãn mũ. Nãgnãr kãn ag tóg mũ sir, tũ! he ag tóg mũ sir, porco ãn ag, mÿr, ha mẽ.

³³ Kĩ porco ki rĩr tĩ ag tóg pétë kãn mũ sir, cidade ra, kamëg kÿ. Tá ag tóg kãmén kãn mũ. Nén-Kórég tÿ jagrë ja ãn ag tó ag tóg mũ sir, Jesus tÿ ag pan ãn tĩ.

³⁴ Kĩ vãhã cidade tá ke kar ag tóg sir Jesus venh kãmũ mũ. Kãmũ kãn ag tóg mũ. Kÿ ag tóg tá junjun kÿ (ag tóg) Jesus mÿ to vĩ mũ, ti tÿ tá kutë jé, ti tÿ ag rã hã nĩ tũ nĩ jé, hã kÿ tóg tĩ mũ.

9

*Jesus tÿ ãn kãnhgrĩn kÿ nÿ tÿ há' he
(Mc 2.1-12; Lc 5.17-26)*

¹ Kĩ Jesus tóg canoa ki rã kÿ goj nig kafã ã ra tĩg mãn mũ. Kĩ tóg ã jamã tá jun mũ.

² Ti tÿ ã jamã tá jun kÿ vãhã ag tóg ti mÿ ã vyn kÿ junjun mũ, ãn kónhgrĩn kÿ nÿ ãn, ha mẽ. ã cama kri tóg nÿ nĩ. Kĩ Jesus tóg ag tÿ ti ki ge mũ vég mũ sir. Hã kÿ tóg ãn kãnhgrĩ mÿ: “inh kósin’,” he mũ. “ã fe tÿ há' hé. ã tÿ Topë vĩ mranh ja ãn tÿ tũ! hen hã vë ha,” he tóg, ti mÿ, ãn kónhgrĩ mÿ.

³ Hã ra Topë vĩ to professor ag vÿ tá nýtĩ gé. Ti vĩ mẽ kÿ ag tóg to jykrén mũ. “Topë to vĩ kónãn tóg mũ mÿr. Vësÿ tóg Topë han mũ mÿr,” he ag tóg mũ,

Jesus to, ti tỹ ti mỹ: “ã tỹ Topẽ vĩ mranh ja ên tỹ tũ' hen hã vễ,” hen kỹ. Kỹ tóg ag mỹ tỹ ù nỹ, ti jykre ti.

⁴ Hã ra Jesus tóg ki kanhró nĩ, ag tỹ nén to jykrén mũn ki. Kỹ tóg ag mỹ: “ãjag ne tog nén ù vễnhmỹ to jykrén mũ',” he mũ.

⁵ “Ne nỹ ãjag mỹ vễnhmỹ nỹ?” he tóg. “Ủn tĩg vãnh tag mỹ sóg: “ã tỹ Topẽ vĩ mranh ja ên tỹ tũ' hen hã vễ ha,” he mũ mỹr. Kỹn mỹ ãjag mỹ vễnhmỹ?” he tóg. “Sỹ ti mỹ: “nĩ ra, tĩg ra,” henh ke vễ gé. Kỹn mỹ ãjag mỹ vễnhmỹ ke gé’?” he tóg.

⁶ “Hã ra isỹ ãjag mỹ inh jykre ven sór vễ. Tỹ sóg êprã ke fi kósin nĩ. Tá sóg krỹg ke mũ, Topẽ vĩ mranh tỹ vễnh pãte fón ke tá, ùn kãnhgrĩ tag mỹ. Sỹ tá krỹg mũ ven jé sóg ke mũ, ãjag mỹ,” he tóg.

Hã kỹ tóg ùn kónhgrĩ mỹ: “nĩ ra, jẽg ra, ã kur gé (g) tĩg ra, ã ãn ra,” he mũ.

⁷ Kỹ tóg vym ke nĩ mũ, kỹ tóg sir jẽgnẽ kỹ tĩ mũ. ã ãn ra tóg tĩ mũ (mỹr) sir, ha mẽ.

⁸ Kỹ vễnh kar ag tóg vég mũ. Kỹ tóg ag mỹ e tãvĩ tĩ. Topẽ mỹ ag tóg vĩ há han mũ, ti tỹ Jesus mỹ vễnh jykre há nĩm kỹ. Êg mré ke vễ mỹr, Jesus ti, êprã ke, hã ra Topẽ tóg ti tar han, hã kỹ tóg ti tỹ há' he mũ.

*Jesus tỹ Mateus mré vĩ
(Mc 2.13-17; Lc 5.27-32)*

⁹ Kỹ Jesus tóg ã jamã tá kã kutẽ kỹ tĩ mũ sir. Kỹ tóg Mateus vég mũ sir. Governo mỹ tóg jãnkamy mãng tĩ, imposto kaja ti, kỹ tóg ã rãnhrãj han kỹ nĩ nĩ. Kỹ Jesus tóg ti mỹ: “inh mré kãtĩg,” he mũ, Mateus mỹ. Kỹ tóg jẽgnẽ kỹ ti mré tĩ mũ sir.

¹⁰ Kỹ tóg kejẽn ti mré jẽg mũ, Jesus ti. Kỹ ù tỹ hẽn ri ke ag tóg tá vễnh mãn mũ, ti ãn krẽm, governo mỹ

jãnkamy mǎg tĩ ag, Topẽ vĩ mranh tĩ ag. Jesus mré ag tóg jêg jêg mũ, Jesus mré mũ tĩ ag mré ke gé.

¹¹ Kĩ Fariseu ag tóg vég mũ. Kĩ ag tóg ti mré mũ tĩ ag mĩ vĩ mũ. “Ăjag pã'i ne tóg ag mré jêg mũ', governo mĩ jãnkamy mǎg tĩ ag mré. Topẽ vĩ mranh tĩ ag mré hã tóg jêg mũ',” he ag tóg, Fariseu ag, Jesus mré mũ tĩ ag mĩ.

¹² Hã ra Jesus tóg mêg mũ, ag vĩ ti. Kĩ tóg ag mĩ kãmén mũ, ha mẽ. “Ûn kagyga tũ ag vỹ médico venh mũ tũ nĩgtĩ,” he tóg. “Hã ra ùn kagyga ag hã vỹ ti venh mũ tĩ,” he tóg.

¹³ “Ha vé, tag to jykrén, Topẽ vĩ tag to, ha mẽ. “Ăjag tỹ jagnê jagãgtãn kỹ tóg inh mĩ há tĩ inhhã,” he tóg, Topẽ ti. “Ăjag tỹ inh mĩ nén ù pũn kãfór tóg nĩ, ãjag tỹ jagnê jagãgtãn mũ ti,” he tóg, Topẽ ti. Hã kỹ jagnê jagãgtãn nĩ, ag to vĩ tũg nĩ,” he tóg, Jesus ti. “Inh pi(jé) ù tỹ vênh jykre kuryj han mũ ag mỹ: “ăjag jykre tovãnh nĩ,” he sór tĩ'. Û tỹ Topẽ vĩ mranh ja nĩ ên ag hã mỹ sóg: “ăjag jykre kórég tovãnh nĩ,” he sór tĩ. Hã jé sóg ãjag mỹ vênh ven,” he tóg, Jesus ti.

*Jesus tỹ êg vãkre kãmén
(Mc 2.18-22; Lc 5.33-39)*

¹⁴ Kĩ João mré mũ tĩ ag tóg ti tá junjun mũ sir, Jesus tá. Kĩ ag tóg ti ki jêmêg mũ. “Êg hã ne tóg vãkrég tĩ', Fariseu mré ke ag ke gé. Êg jãvo ã mré mũ tĩ ag tóg vãkre vãnh nỹtĩgtĩ. Hẽ ri ke jé?” he ag tóg, Jesus mỹ, João mré mũ tĩ ag.

¹⁵ Kĩ Jesus tóg ag mỹ: “hỹ,” he mũ. “Vênh kyprũg to kãmũ ag pi(jé) vãkrég tĩ',” he tóg. “Festa vẽ mỹr, vênh prũgprũg ti, kỹ ti mré ke ag tóg ùn prũg mũ ên

venh kãmũ tĩ. Hã ra sóg ãn prũg mũ ên ri ke nĩ, hã kỹ tóg inh mré mũ tĩ ag mỹ sér ti ver,” he tóg. “Vãhã tóg jun mũ, inh kurã ti. Kĩ hã ag tóg inh pére mũnh mũ. Ên kã hã ag tóg ãjag vãkrenh ke venh mũ, kurã ên kã, inh mré mũ tĩ ag,” he tóg, Jesus ti.

¹⁶ “Ti si fag pi(jé) vãfe kygnej tũ tỹ kur si jar ki hyn han tĩ ja nỹtĩgtĩ'. ãn kygnej tũ tỹ ki hyn han mũ ra tóg jaran kenh mũ. Kĩ kur si jar ên tóg mág mũ. ãn kygnej hã tỹ fag tóg ki han han tĩ, kỹ tóg jaran ke tũ nĩ,” he tóg, Jesus ti. Ti tỹ ã jykre tãg tón hã vẽ, hã ra tóg kur kygnej ja tũ ri ke nĩ.

¹⁷ Kĩ tóg ag mỹ: “kỹ vinho vỹ ge nĩgtĩ gé,” he mũ gé. “Êg pi(jé) vinho kajãg mũ tỹ ti fár si tỹ saco ki kujẽg tĩ'. Ke tũ nĩ (mũ) ra tóg kunãnh kỹ jaran ke mũ, kógnãj kỹ. Kĩ vinho ên tóg tũ' he mũ, saco ke gé. Vinho kajã tỹ ti fár tãg tỹ ki kujẽn ke vẽ mỹr',” he tóg, Jesus ti. Ti tỹ ã jykre tãg tó vẽ, hã ra tóg vinho kajãg mũ ri ke nĩ gé.

*Jesus tỹ ãn kagyga fag tỹ há' he
(Mc 5.21-43; Lc 8.40-56)*

¹⁸ Ti tỹ ver ag mré vēmén kỹ pã'i ã tóg tá jun mũ, ha mẽ. Ti krēm tóg grĩnh ke mũ. Kĩ tóg ti mỹ: “ha vé,” he mũ. “Inh kósin fi tóg ter ke mũ. Fi venh kãtĩg. ã tỹ ã nĩgé tỹ fi mẽ kỹ fi fe tóg mrin kenh ke mũ, ha vemnĩ,” he tóg, pã'i ti, Jesus mỹ.

¹⁹ Kĩ Jesus tóg jẽgnẽ kỹ ti mré tĩ mũ sir. Jesus mré mũ tĩ ag vỹ ti mré mũ mũ gé sir.

²⁰ Ti tỹ ti mré tĩg mũ ra ã fi tóg ti tá jun mũ, ãn kaga ã fi. Kyvénh krỹg ja tũ han kỹ fi tóg nĩ, prỹg tỹ 12 (ke) ki. Jesus vatánh tá fi tóg ti kur mẽg mũ sir, ti kur mráj ki.

21 “Sỹ hẽn ri ke mũn ti kur mẽ kỹ inh hỹn han mũ,” he fi tóg, to jykrén kỹ. Hã kỹ fi tóg ti kur mẽnh kãtĩ mũ.

22 Hã ra Jesus tóg vĩrĩn ke kỹ fi vэг mũ. Kỹ tóg fi mỹ: “inh kósin’,” he mũ. “Kamẽg tũg nĩ,” he tóg mũ. “Ấ tỹ inh ki rã hã kỹ ã tóg há’ he mũ,” he tóg. Kỹ fi tóg há’ he mũ sir vēsỹmér, ha mẽ.

23 Kỹ tóg tũg mãn mũ, Jesus ti. Kỹ ag tóg pã’i ẽn ãn tá junjun mũ sir. Kỹ tóg tá fór nĩ, ùn kygfỹ mũ fag tỹ, ag tỹ ẽg jẽnky tỹ vākыр ẽn kynkyn tĩ ag tỹ ke gé, ti kósin fi ter kỹ. Kỹ Jesus tóg fag vэг mũ.

24 Kỹ tóg: “ha mũ jẽg,” he mũ. “Gĩr sĩ fi vỹ ter tũ nĩ. Nũr fi nỹ nĩ,” he tóg. Hã ra fag tóg ti nyg mũ.

25 Hã ra tóg fag pan kãn mũ sir. Kỹ tóg gĩr fi nĩgẽ kãgmĩg mũ sir. Kỹ fi tóg nĩ mũ sir.

26 Kỹ tag kãme tóg vẽn kar kri rũm ke mũ, ga ẽn kar mĩ hã, Jesus tỹ fi rĩn mãn mũ ti.

Jesus tỹ ùn kyvó ag tỹ ẽvãnh há hyn han

27 Kỹ Jesus tóg tá kãkutẽ mũ sir. Kỹ ùn kyvó régre ag tóg ti nón mũ mũ. Ti nón mũ kỹ ag tóg ti jé prẽr mũ: “!..Davi kósin’..!” he ag tóg. “!..Ëg jagãgtãn ra..!” he ag tóg, prẽnprẽr kỹ.

28 Kỹ Jesus tóg ãn kãra rã mũ sir. Kỹ ùn kyvó ẽn ag tóg ti nón ge mũ gé sir, ãn kãra. Kỹ Jesus tóg ag mỹ: “inh mỹ ãjag mỹ ãjag hyn han há nĩ’?” he mũ. Kỹ ag tóg ti mỹ: “hỹ,” he mũ.

29 Kỹ Jesus tóg ag kanẽ mẽg mũ sir, ã nĩgẽ tỹ. Kỹ tóg ag mỹ: “ãjag tỹ inh ki ge kỹ nỹtĩn kỹ ãjag tóg há’ henh mũ,” he mũ.

30 Kỹ ag kanẽ tóg mrin ke mũ sir. Ếvãnh há’ he ag tóg mũ. Kỹ Jesus tóg ag mỹ vĩ tar han mũ. “Ker ù mỹ tó hẽ’,” he tóg ag mỹ.

31 Hã ra ag tóg mũ kỹ (ag tóg) vãnh kar mỷ tugtó mũ. Kỹ ti kãme ên tóg vãnh kar kri rùm ke mũ sir.

Jesus tỹ ùn vĩ vãnh vĩn

32 Kỹ ag mũ kỹ ù tóg ti tá jun mũ gé, ùn jagrẽ kórég. Ti jagrẽ tóg ti vĩ vãnh han.

33 Kỹ Jesus tóg ti jagrẽ kórég kutêm mũ sir. Ti tỹ ti kutêm kỹ tóg sir vĩ há han mũ sir, ùn vĩ vãnh ja ên ti. Kỹ tóg vãnh kar mỷ e tĩ. “Ge ve ja tũ ãg tóg nỹtĩ, ãg povo tỹ Israel kãmĩ,” he ag tóg mũ.

34 Hã ra Fariseu ag tóg mễg mũ. Kỹ ag tóg ón kỹ Jesus to vĩ kónãn mũ. “Vãnh jagrẽ kórég pan há tóg nĩgtĩ. Hã ra tóg vãnh jagrẽ kórég ag pã'i jykre tỹ ag pan tĩ nĩ, ti tỹ tỹ Japo mré ke nĩn kỹ,” he ag tóg, ón kỹ, Fariseu ag. Ag tỹ Jesus to ón hã vễ.

Jesus mỷ ùn jagtar ag

35 Kỹ Jesus tóg cidade kar mĩ tĩ mũ, ãmã kar ên mĩ. ãg vãnh kanhrãn jafã krêm tóg ag kanhrãn tĩ. Ag mỷ tóg ù tỹ kanhkã tá nĩ ên tỹ tỹ ãg pã'i nĩ ên tó tĩ sir. Kỹ tóg ùn kagyga ag hyn han tĩ gé sir.

36 Vãnh e ên tóg ti mỷ jagãgtar nỹtĩ. ù tỹ ag ki rĩr há han ke tóg tũ tũgtĩ, jo ag tóg vãnh ki rĩr há han ki kagtĩg nỹtĩ gé. Ti tỹ ag ve kỹ tóg carneiro tỹ mễg mĩ êkrég mũ sir. ù tỹ carneiro tỹ mễg ki rĩr tũ nĩn kỹ ag tóg véké mũgtĩ. Tag ri ke ag tóg nỹtĩ, Jesus mỷ, ùn e ên ag.

37 Kỹ tóg ã mré mũ tĩ ag mỷ: “sỹ ag ve kỹ sóg ãg jakré mĩ êkrég tĩ,” he mũ. “Tĩ e nĩn kỹ ãg tóg kejẽn kre kãn tũ nĩgtĩ, ãg pir nỹtĩn kỹ. Ge ti nĩgtĩ. ùn e ag tóg inh ki ge to há nỹtĩ, hã ra tóg ver ù tỹ ag mỷ tónh ke tóg tũ tĩ,” he tóg, Jesus ti.

38 “Hã kÿ Topẽ mré vî, ti tÿ ù jëgnë jé, ag tÿ ag mÿ ti vî tó jé,” he tóg, Jesus ti, ã mré mÿ tÿ ag mÿ.

10

*Jesus tÿ apóstolo ag kuprëg mÿ
(Mc 3.13-16; Lc 6.12-16)*

¹ Kÿ Jesus tóg ùn tÿ 12 (ke) ag jé prër mÿ sir, ti mré mÿ tÿ ên ag jé. Kÿ tóg ag mÿ vënh jykre nÿm mÿ, ag tÿ vënh jagrë kórég pan jé, ag tÿ ùn kagyga ag hyn han jé ke gé. Vënh kaga kar tÿ ag tóg hë ri ke mÿ sir, ti tÿ ag mÿ tag to vënh jykre nÿm kÿ.

² Û tÿ 12 (ke) ag jijin hã vë, ha mē, Jesus tÿ ùn vin mÿ ag jygjyn hã vë, ha mē. Ûn ve vÿ tÿ Simão nÿ, kÿ ti jiji ù hã vÿ: Pedro, he mÿ. Kar kÿ ti jãvy vÿ nÿ gé, hã vÿ: André, he mÿ, Tiago ke gé, Zebedeu kósin tag ti, ti jãvy tÿ João ke gé,

³ Filipe ke gé, Bartolomeu ke gé, Tomás ke gé, Mateus ke gé, governo mÿ jãnkamy mäg tÿ tag ti, Tiago ù ke gé, Alfeu kósin tag ti, Tadeu ke gé,

⁴ Simão ke gé, ag tÿ ù to: Zelote, he mÿ tag ti, kar kÿ Judas Iscariotes ke gé, Jesus vatánh tá pã'i ag mÿ ti kãmén ke tag ti.

*Jesus tÿ apóstolo ag jëgnë
(Mc 6.7-13; Lc 9.1-6)*

⁵ Ên ag jëgnëg tóg mÿ sir, Jesus ti, ag tÿ vënh kar mÿ Topẽ kãmén jé. Û tÿ 12 (ke) ên ag jëgnëg tóg mÿ, Jesus tÿ ùn kuprëg ja ên ag. Kÿ tóg ag mÿ: “ver fóg ag mÿ inh kãmén mÿ tÿg nÿ, kanhgág ag mÿ kãmén tÿg nÿ gé ver,” he mÿ. “Kÿ Samaria tá ke ag jamã ki ge tÿg nÿ gé,” he tóg.

6 “Israel ag tãvĩ mÿ tómnĩ inhhã. Topẽ mÿ ag tóg tÿ carneiro vãfor ri ke nÿtĩ, kÿ ag hã mÿ tómnĩ ver,” he tóg.

7 “Ajag tÿ ag mÿ tó kÿ tag tómnĩ, ha mẽ. Û tÿ kanhkã tá nĩ ên tÿ tÿ ajag pã'i nĩnh ke vẽ ùri, hemnĩ, ag mÿ.

8 Ûn kagyga ag hyn han nĩ gé. Ûn kãgter mÿ ag rĩnrĩn mãn nĩ. Ûn kaga kren vãnẽ ên kren han nĩ. Vẽnẽ jagrẽ kórég ag pan nĩ. Ajag mÿ sóg ge ra inh jykre nĩm mÿ, kÿ ge ra ag mÿ han nĩ gé. Ag mÿ: inh mÿ kajãm, he tũg nĩ.

9 Kÿ jãnkamy ma mÿ tũg nĩ, jãnkamy mág, jãnkamy sĩ ke gé.

10 Kÿ sacco ma mÿ tũg nĩ gé, bolso ên. Kur tÿ vẽnẽ kri rĩnh tũg nĩ, pẽn né ù gé mÿ tũg nĩ gé, pẽn to ró ên. Kÿ vãtó vyn tũg nĩ gé, kãtó ti. Inh rãnrãj han ajag tóg mÿ. Kÿ ag tóg to ajag jẽn ke mÿ, vẽnẽ kato, ha vemnĩ,” he tóg, Jesus ti.

11 “Kÿ ajag tóg kejẽn êmã ù tá junjun ke mÿ. Tá ùn jykre há jãvãnẽ nĩ. Kÿ ên ãn ra gemnĩ. Ên ãn krẽm ajag tÿ kurã ki kã panh ke ên tá krÿg nĩ.

12 Kÿ ãn ên krẽm nÿtĩ fag mÿ: “Topẽ jé ajag ki rĩr, kÿ ajag jé jatun mÿ nÿtĩ nĩ,” hemnĩ.

13 Fag tÿ ajag mÿ vĩ há han kÿ fag tóg jatun mÿ nÿtĩ. Fag tÿ ajag mÿ vĩ há han tũ nĩn kÿ fag tóg jatun mÿ nÿtĩ tũ nĩ. Fag javo ajag tóg jatun mÿ nÿtĩ.

14 Kejẽn ù tóg ajag mÿ: “kãge jẽg ra,” henh ke tũ nĩ, êmã ù tá. Kÿ tá kãpamnĩ, ag tÿ ajag vĩ mẽ jãvãnẽ nÿtĩn kÿ. Tá kãpa kÿ ajag pẽn hã kykũnh nĩ. Kÿ ag tóg ki kanhró nÿtĩ, Topẽ tÿ ag to kórég nĩ ti.

15 Ha mẽ, ki hã sóg tó mÿ. Kurã tÿ êgno ki, isÿ vẽnẽ kar jykre tugnÿm ke kurã ên ki ag tóg jagãgtar

nýtĩnh mũ sir, ag tỹ ãjag vĩ mẽ jãvãnh nýtĩn kỹ. Cidade tỹ Sodoma tá ke ag tóg jykre pãno nýtĩ ja nĩgtĩ, cidade tỹ Gomorra tá ke ag ke gé. Kỹ ag tóg jagãgtar nýtĩnh mũ gé, kurã ên kã. Hã ra ùn tỹ ãjag vĩ mẽ jãvãnh ên ag tóg ag jagãgtar kãfór han ke mũ (mỹr), ha mẽ,” he tóg, Jesus ti.

*Ag tỹ Jesus tigrĩn ãg to jũnh ke
(Mc 13.9-13; Lc 21.12-17; 12.11-12)*

¹⁶ “Carneiro vĩ vẽnħ jy nĩgãn han ki kagtĩg nýtĩ, mĩg tỹ ag mãn sór nĩn kỹ. Carneiro ri ke ãjag nýtĩ, hã ra sóg ãjag jẽgnẽg mũ, ù tỹ mĩg ri ke ag to, kỹ Topẽ hã tóg ãjag jy nĩgãn ke mũ sir. Hã kỹ vẽnħ ki rĩr há han nĩ. Pỹn jykre han nĩ. Vãjig ti tĩ, pỹn ti, kỹ ãg tóg kãnhmar ti tỹ hẽ ri ke tũ nĩgtĩ. Pỹn ri ke han nĩ. Kỹ sórãg jykre han nĩ gé. Jũ vãnħ pẽ ti nĩ, nén ù vẽnħmỹ han tũ ti nĩ. Kỹ sórãg ri ke han nĩ gé.

¹⁷ Êprã ke ag tóg ãjag vóg kónãn ke mũ, isugrĩn. ãjag pã'i ag mỹ ag tóg ãjag kãmén ke mũ, ag tỹ ãjag vóg kónãn jé. ãjag vẽnħ kanhrãnrãn jafã krẽm ag tóg ãjag mrãnmrãn ke mũ. Hã kỹ vẽnħ ki rĩr há han nĩ.

¹⁸ Fóg tỹ pã'i mág mỹ ag tóg ãjag ven ke mũ, pã'i mág ù ag mỹ ke gé. Isugrĩn ãjag tóg vẽnħ jagtar tag venħ ke mũ, ãjag tỹ ag mỹ inh vĩ ti tó jé, fóg ag kar mỹ ke gé, kanhgág ag mỹ ke gé.

¹⁹ Pã'i ag tỹ ãjag jé ke kỹ to jykrén tũg nĩ, ãjag tỹ ag mỹ nén tónħ ke mũ ên ti to. Topẽ kuprĩg hã ne ãjag krĩn ke mũ', kỹ ãjag tóg ti tỹ ãjag mỹ nén tó mũ ên hã tónħ ke mũ, hora ên kã.

²⁰ Hã kỹ ãjag tỹ tó tũ vẽnħ sir. ãg jóg kuprĩg tỹ ãjag tỹ vẽnħ hã vẽnħ,” he tóg.

21 “Hã ra ù ag tóg ãjag mré pafa mũ fag kãmén ke mũ, pã'i ag mÿ, ag tÿ fag kãgtén jé. Kÿ ù ag tóg ãjag krê kãmén ke mũ gé. Kÿ ù ag tóg ãjag han mũ fag kãmén ke mũ gé, pã'i ag mÿ, ag tÿ fag kãgtén jé, mÿr, ha mẽ.

22 Vênh kar vÿ ãjag to jũ kÿ ãjag vóg sór nÿtĩ, isugrĩn. Hã ra ù tÿ isovãnh tũ ên hã krenkren ke mũ, kurã tÿ êgno ki,” he tóg, Jesus ti.

23 “Ag tÿ cidade ù tá ãjag vóg kónãn kÿ, kÿ cidade ù ra pétẽmnĩ. Ki hã sóg tó mũ, ha mẽ. Israel ag cidade fĩn rãm kãn ke tũ ãjag nĩ, kurã ên kã. Sĩ ti nĩ, ag tÿ ãjag vóg kónãn ke kurã ti. Kãtĩg jé sóg ke mũ, ag tÿ ge kÿ ãjag vóg kÿ, mÿr, ha mẽ. Tÿ sóg êprã ke fi kósin nĩ, mÿr, ha mẽ.

24 Aluno pi(jé) ã professor kãfór nĩ'. Ûn camarada pi(jé) ã patrão kãfór nĩ'.

25 Aluno tÿ ã professor ri ke nĩn kÿ tóg há tĩ. Ûn camarada tÿ ã patrão ri ke nĩn kÿ tóg há tĩ gé. Iso ag tóg: Belzebu, he ja nĩgtĩ, inh kato vãsãnsãn mũ ag, hã vÿ: Japo, he mũ, hã vÿ: Belzebu, he mũ. Tÿ sóg ãjag professor ri ke nĩ, ãjag patrão ri ke. Ag tÿ iso: Japo, hen kÿ ag tóg ãjag to vĩ kónãn ke mũ gé, ha vemnĩ, ãjag tÿ inh jykre hã han ti kÿ,” he tóg, Jesus ti.

*Ëg tÿ Topẽ hã kamẽg ke
(Lc 12.2-7)*

26 “Ge ra ag kamẽg tũg nĩ, pã'i ag. Ëg tÿ péju kÿ nén han mũ tóg vênh ven kãn ke mũ, êg tÿ vênh kar vatánh tá nén to jykrén mũ tóg vênh ven kãn ke mũ.

27 Isÿ vênh kar vatánh tá ãjag mÿ nén tó mũ tag tÿ vênh kar mÿ tó kãn nĩ. Isÿ komẽr hã ãjag mÿ nén tó mũ tag tÿ vênh kar mÿ jamã há ra tómnĩ.

28 Mũmẽg tũg nĩ, ag kamẽg tũg nĩ, pã'i ag. Ëg tén há ag nỹtĩ, hã ra ag tóg nũgme ki ãg vãm ke kagtĩg nỹtĩ, pã'i ag. Ûn pir kamẽg nĩ, hã vỹ: Topẽ, he mũ. Ti hã ne ãg tén kar kỹ nũgme ki ãg vãm ki kanhró nĩ', inferno ki, kỹ ti hã kamẽg nĩ.

29 Ha vé. Sēsĩ vender he ag tĩ, jãnkamy to, kỹ ag tóg ùn régre to jãnkamy pir mãg tĩ. Hã ra Topẽ tóg jēsĩ ag ki rĩr tĩgtĩ. Ti tỹ: “hej,” hen kỹ ãg tóg ag pin tĩ, ke tũ nĩn kỹ ãg tóg ag krenkren tĩ.

30 Hã ki Topẽ tóg ag ki rĩr tĩgtĩ, sēsĩ ag ki. Ëg ki rĩr tóg tĩ gé, Topẽ ti. Ëg tỹ nén vég mũ kar ki kanhró tóg nĩ. Hã kỹ tóg ãg gãnh kar nĩgrén ja nĩ gé, Topẽ ti.

31 Hã kỹ pã'i ag kamẽg tũg nĩ. Jēsĩ kãfór ãjag tóg nỹtĩ, Topẽ mỹ. ãjag kãmĩ ùn pir tóg sēsĩ e kãfór nĩ, ti mỹ,” he tóg, Jesus ti.

*Ëg tỹ Jesus kãmén ke
(Lc 12.8-9)*

32 “Hã kỹ inh kãmén nĩ, ãprã ke ag mỹ. ãjag tỹ ag kamẽg tũ nĩn kỹ ag mỹ inh kãmén kỹ sóg inh jóg tỹ kanhkã tá nĩ ãn mỹ ãjag kãmén ke mũ gé, kurã ãn kã.

33 ãjag tỹ hã ra inh kãmén tũ nĩn kỹ sóg inh jóg tỹ kanhkã tá nĩ ãn mỹ ãjag kãmén ke tũ nĩ gé, kurã ãn kã, ãjag tỹ iso: “ti ki kagtĩg sóg nĩ,” hen kỹ,” he tóg, Jesus ti.

*Ëg tỹ ãg jykre finh ke
(Lc 12.51-53; 14.26-27)*

34 “ãjag hỹn iso: “vẽnh kar tỹ jagnẽ to há han jé tóg ke mũ,” he tĩ. Hã tũ vỹ, ù tỹ hẽn ri ke tỹ jagnẽ to jũ han jé sóg ke mũ, ha vemnĩ.

35 Hã kÿ ù tóg ã panh kato tênh mũ, kÿ ù fi tóg ã mÿnh fi kato tênh mũ gé. Kÿ ù fi tóg ã má fi kato tênh mũ gé, mÿr, ha mẽ.

36 Ti mré ke ag vÿ tÿ ti kato vāsānsān mũ ag nÿtĩnh mũ, kÿ fi mré ke fag tóg fi kato vāsān ke mũ gé, ha mẽ.

37 Iso há kãfor nÿtĩmnĩ, ãjag han mũ fag kri, ke tũ nĩ (mũ) ra ãjag tóg inh mÿ há tũ nÿtĩ. Iso há kãfór nÿtĩmnĩ, ãjag krē kri, ke tũ nĩ (mũ) ra ãjag tóg inh mÿ há tũ nÿtĩ.

38 Isÿ inh cruz va tĩg ri ke han nĩ gé, isÿ tá ter ke ti, hã vÿ: iser ên ri ke han sór mũ, he mũ. Ke tũ nĩ (mũ) ra ãjag tóg inh mÿ há tũ nÿtĩ.

39 Æjag tÿ iser ri ke han sór tũ nÿtĩn kÿ ãjag tóg nũgme ki kutênh mũ, ãjag tÿ ãjag jykre tovānh sór tũ nÿtĩn kÿ. Æjag tÿ isugrĩn kãgter sór kÿ ãjag tóg rĩr krÿg ja tũ ên venh ke mũ, ãjag tÿ ãjag jykre tovānh kÿ,” he tóg, Jesus ti.

*Topẽ tÿ ãg mÿ nén ù há tónh ke
(Mc 9.41)*

40 “Û tÿ ãjag mÿ: hej, hen kÿ tóg inh mÿ: hej, he mũ gé sir, kÿ tóg inh ki rã mũ sir. Ti tÿ inh ki rã kÿ tóg ù tÿ inh jẽnẽg mũ ên ki rã mũ gé sir, hã vÿ: Topẽ, he mũ.

41 Û tóg Topẽ vĩ tó tĩ ag mÿ: “ha kãrã,” he tĩ, ag tÿ Topẽ vĩ tó tĩ tugrĩn. Ti tÿ ag mÿ vĩ há han kÿ tóg Topẽ mÿ há nĩ sir. Kÿ tóg kejẽn ti mÿ nén ù há tónh ke mũ, Topẽ ti, ù tÿ ti vĩ tó tĩ ag mÿ: “ha kãrã,” he mũ ên mÿ. Û tóg ùn jykre kuryj ag mÿ: “ha kãrã,” he tĩ, ag jykre kuryj nÿtĩ tugrĩn. Ên mÿ tóg nén ù há tónh ke mũ gé, Topẽ ti.

42 Û tóg kejĕn ũn sĭ mÿ nĕn ũ nĭm tĭ, goj hĕn ri ke mŭn. Ûn sĭ tÿ inh ki rã nĭ tugrĭn tóg ti mÿ nĕn ũ nĭm tĭ. Ĕn mÿ tóg nĕn ũ há tónh ke mŭ gé, Topĕ ti. Ti pi(jé) to nĕn ũ há venh ke tŭ nĭ’,” he tóg, Jesus ti.

11

João Batista tÿ Jesus ki jĕmĕ (Lc 7.18-35)

1 Jesus tÿ ã mré mŭ tĭ ag mÿ tó kãn kÿ tóg tá kãkutĕ mŭ sir, ũ tÿ 12 (ke) ag mré. Kÿ tóg cidade kar mĭ tĭ mŭ sir, vĕnh kar kanhrãn kÿ, ag mÿ Topĕ vĭ tón kÿ.

2 Kÿ kejĕn João tóg ti kãme mĕg mŭ. Se kÿ tóg nĭ nĭ, João ti, hã ra tóg Jesus tÿ nĕn han mŭ mĕg mŭ sir. Kÿ tóg Jesus mÿ vĕnh vĭ jĕnĕg mŭ, ã mré mŭ tĭ ag tÿ, João ti.

3 Kÿ tóg Jesus mÿ: “ã hã mÿ’?” he mŭ. “Ĕg tÿ ũn jãvãnh mŭ mÿ tÿ ã nĭ’? Topĕ tÿ ũn jĕnĕg mŭ hã mÿ tÿ ã nĭ’?” he tóg. “Ĕg mÿ ũ jãvãnh mãn ke tŭ nĭ ha’, ã pãte’?” he tóg, João Batista ti, Jesus mÿ.

4 Kÿ Jesus tóg ti mÿ vĕnh vĭ jĕnĕg mŭ gé sir. “Ha João mÿ ãjag tÿ nĕn vég mŭ tag ti tómnĭ, ãjag tÿ nĕn mĕg mŭ tag ti, ha mĕ,” he tóg.

5 “Tag han inh tĭ, ha mĕ: ũn kyvó ag vÿ isugrĭn ĕvãnh há nÿtĭ. Ûn kãnhgrĭ ag vÿ mŭ há han mŭ, ũ tÿ vĕnh kaga kren vãnh han mŭ ĕn ag krenkren han inh tĭ, lepra han mŭ ag. Ûn kutu ag vÿ ĕmĕ há nÿtĭ ha, ũn kãgter mŭ ag vÿ rĭnrĭr mãn nÿtĭ. Ûn jagãgtar ag vÿ Topĕ vĭ mĕg tĭ, ũ tÿ kanhkã tá nĭ ĕn tÿ tÿ ĕg pã’i nĭnh ke to.

⁶ Kÿ tóg ti tÿ iso jykrén kónãñ tũ nÿñ kÿ há' he mũ. Kÿ Topê tóg ti ve há han mũ. Tag tómnĩ, João mÿ,” he tóg, Jesus ti.

⁷ Kÿ ag tóg sir mũ mũ, João mÿ tó jé, ti mré mũ tĩ ag.

Ag mũñ kÿ Jesus tóg vëñh e ag mÿ João kãmén mũ. “Ăjag tÿ ěmã tũg ja ra mũñ kÿ, ti ve jé, kÿ ti jykre hÿñ ne ri ke nĩ, Ăjag mÿ?” he tóg. “Kejën kãka tóg goj jagma krã tÿ man man ke tĩ. João jykre mÿ Ăjag mÿ tag ri ke tũ nĩ? Hÿ, ri ke tũ ti nĩ.

⁸ Kÿ ti jykre hÿñ ne ri ke nĩ, Ăjag mÿ? Ti mÿ Ăjag mÿ ũñ kur sÿñvĩ ag jykre ri ke nĩ? Vó, ũñ kur sÿñvĩ ag vÿ cidade mág tá nÿtĩ, pã'i mág ĩñ krëm.

⁹ Kÿ ti jykre hÿñ ne ri ke nĩ, Ăjag mÿ? Ti jykre mÿ Ăjag mÿ Topê vĩ tó tĩ jykre ri ke nĩ? Hÿ, Topê vĩ tó tĩ vë mÿr. Hã ra tóg Topê vĩ tó tĩ ag kãfór kar nĩ, João ti.

¹⁰ Topê vÿ João jënë, ti tÿ ijo tũg jé. Hã kÿ tag tóg ti to rán kÿ nĩ, Topê vĩ ki, ha mẽ. “Ha vé, ĩ jo sóg ũ jënëñh mũ, ti tÿ vëñh kar jykre tÿ há' hen jé, ĩ tũg ken jo,” he ja tóg nĩ, Topê ti, João to, iso ke gé,” he tóg, Jesus ti. “Ag jyvën jé tóg ke mũ, kÿ tóg ěpry kure ri ke nĩ, ěmÿñ kurynh ri ke,” he ja tóg nĩ, Topê vĩ tÿ rán kÿ nĩ ki, João to.

¹¹ Ki hã sóg tó mũ, hã kÿ sóg ke mũ, ha mẽ. ěprã ke ag kãfór kar ti nĩ, João ti, Topê vĩ tón ki. Ũ tÿ ga kri mũ ag kãfór kar ti nĩ. Hã ra ũ tÿ hën ri ke ag tóg ũ tÿ kanhkã tá nĩ ěñ tÿ tÿ ěg pã'i nÿñh ke ěñ venh ke mũ. Ag tÿ venh ke mũ (hã) ra ag tóg kãsir nÿtÿñh mũ. Ũñ kãsir ěñ ag tÿ ěgno pë ěñ tóg João kãfór nÿñh mũ, hã ra,” he tóg, Jesus ti.

¹² “João Batista kãtũg kar kÿ ěg tóg vãsãñ kÿ (ěg

tóg) ù tỹ kanhkã tá nĩ ên tỹ tỹ êg pã'i nĩ venh ke mũ. Êg vãsãn kỹ êg tóg venh ke mũ.

¹³ Topê vĩ tó tĩ ag kar vỹ Topê vĩ tó ja nĩgtĩ. Kỹ tóg rán kỹ nĩ gé, Topê tỹ êg jyvẽn mũ ti. Kỹ João tóg tó ja nĩ, ag nón.

¹⁴ João vỹ Elias ri ke nĩ. Tag to jykrén. Rán kỹ tóg nĩ, Topê vĩ tỹ rán kỹ nĩ ki, Elias kãtĩg mãn ke ti, Cristo kãtĩg ken jo. Ti hã vễ, João hã vễ, Elias kãtĩg mãn ên ti.

¹⁵ Û nĩgrêg nỹtĩ tỹ tỹ jẽmẽ jé, to jykrén jé,” he tóg, Jesus ti.

¹⁶ “Ûri ke ag vỹ ge nỹtĩ gé, ha mẽ. Gĩr ag ri ke ag tóg nỹtĩ. Gĩr ag vỹ jagnê mré kanhinnhir mũgtĩ. Kỹ ag tóg ãjag mré ke ag jé prêr tĩgtĩ, “mũ nỹ, kanhinnhir jé,” hen kỹ. Kỹ ag tóg kejẽn jũgũ tĩ.

¹⁷ “Ãjag mỹ êg tóg vãkyn, kanhinnhir kỹ, hã ra ãjag ne vẽnh gringrén jãvãnh nỹtĩ,” he ag tóg tĩ, gĩr ag, jagnê mỹ. “Ãjag vẽnh gringrén jãvãnh nỹtĩn kỹ êg tóg vêsỹrénh mũ sir, êg kanhinnhir kỹ, hã ra ãjag tóg êg mré fỹ jãvãnh nỹtĩ gé,” he ag tóg tĩ gé, ón kỹ jagnê to jũ kỹ, gĩr ag.

¹⁸ Gĩr tag ag ri ke ãjag nỹtĩ, João to, iso ke gé. João vỹ vãkre ja nĩgtĩ, jẽn mág tũ, kron tũ. Kỹ ãjag tóg ti to: “jagrê kórég ti nĩ,” he ja nĩgtĩ, ti vãkre to.

¹⁹ Ti jãvo sóg vãkrég tũ nĩgtĩ, jêg sóg nĩgtĩ, kron sóg nĩgtĩ, kỹ ãjag tóg iso: “ti hã ne jẽn mág nĩgtĩ', ti hã ne kronkron nĩgtĩ', ti hã ne governo mỹ jãnkamy mág tĩ ag to há nĩgtĩ', ti hã ne Topê vĩ mranh tĩ ag hã to há nĩgtĩ',” he ãjag tóg sir, iso, êprã ke fi kósin to. Kỹ João jykre tóg ãjag mỹ kórég nỹ, ti vãkre to. Jãvo inh jykre tóg ãjag mỹ kórég nỹ gé, inh vãkrég tũ to. Hã ra êg tỹ ù jykre tugnỹm kỹ êg tóg ti jykre há ên ki

kanhró nýtĩ sir. Kĩ tóg tỹ Topẽ krẽ nĩ sir, ùn jykre há ti, kũ ãg tóg ti ki Topẽ jykre ki kanhró nýtĩ sir,” he tóg, Jesus ti. Ti tỹ ag mỹ João kãmén hã vẽ.

*Jesus tỹ cidade ù tá ke ag mỹ vỹ kónãn
(Lc 10.13-15)*

²⁰ Kũ Jesus tóg cidade tá ke ag mỹ vỹ kónãn mũ sir. Cidade tỹ hên ri ke ki tóg ãg tỹ nén han vãnh hyn han ja nĩgtĩ, milagre ti, hã ra ag tóg ãjag jykre tovãnh sór ja tũ nĩgtĩ, ti ki ag tóg ge sór ja tũ nĩgtĩ. Hã kũ tóg sir ag to vỹ kónãn ja nĩ, ha mẽ.

²¹ “Sỹ cidade tỹ Corazim ki ke ag mỹ tag tó sór mũ, ha mẽ,” he tóg. “Kórég ve jé ãjag tóg ke mũ,” he tóg. “Sỹ cidade tỹ Betsaida ki ke ag mỹ tag tó sór mũ, ha mẽ,” he tóg. “Kórég ve jé ãjag tóg ke mũ gé,” he tóg. “Milagre tỹ hên ri ke hyn han isóg ãjag mỹ, hã ra ãjag tóg ãjag jykre tovãnh sór tũ nĩgtĩ,” he tóg. “Cidade tỹ Tiro tá, cidade tỹ Sidom tá sóg ãg tỹ nén han vãnh ên hyn han ja tũ nĩ. Sỹ tá milagre ên hyn han mũ ra ag tóg ãjag jykre tovãnh mũ vẽ, vãsỹ,” he tóg. “Kygfỹ ag mũ vẽ, ãjag mỹ e tĩn kũ, ag jykre pãno ên, sỹ ag mỹ tó (hã) ra. Ag jãvo ãjag tóg tovãnh sór tũ nĩ, to jykrén sór tũ nĩ,” he tóg.

²² “Tiro tá ke ag vỹ vêsỹrénh ke mũ, kurã tỹ ãgno ên ki, Sidom tá ke ag ke gé, ag jykre pãno to. Hã ra ãjag tóg ag vêsỹrénh kãfór han ke mũ, ha vemnĩ, ãjag tỹ inh vég mũ ra inh ki ge sór ja tũ nĩn kũ. Ki hã sóg tó mũ,” he tóg, Jesus ti.

²³ “Sỹ cidade tỹ Cafarnaum ki ke ag mỹ tag tó sór mũ, ha mẽ,” he tóg. “Ûri tóg ver ãjag mỹ sér tĩ,” he tóg. “Ãjag tỹ kanhkã jykre vég nýtĩ ra ãjag tóg to jykrén tũ nĩ, hã kũ ãjag tóg nũgme ki vár ke kãn mũ. Cidade tỹ Sodoma tá ke ag vỹ ãjag jykre pãno

to kãgter. Ag tỹ sỹ ãjag mỹ nén han mũ vég mũ ra ag vãsỹ to jykrén mũ vē, kỹ ag kãgter ke tũ nĩ vē. Kỹ ěg tỹ ũri ag jamã ve vē vē.

²⁴ Kurã tỹ ěgno ki ag tóg vėsỹrénh ke mũ, Sodoma tá ke ag. Hã ra ãjag tóg ag vėsỹrénh kãfór han ke mũ, sỹ vėnh kar jykre tugnỹm ke kurã ěn kã, ãjag tỹ inh vég mũ ra inh ki ge sór tũ nỹtĩn kỹ,” he tóg, Jesus ti.

*Jesus tỹ ěg krĩ tỹ kãnhvy' henh ke
(Lc 10.21-22)*

²⁵ Kỹ Jesus tóg tag tó mũ gé, ha mẽ. “Jóg,” he tóg. “Tỹ ã tóg kanhkã tân ag kãfór kar nĩ, kar ã tóg tỹ ěprã ke ag kãfór kar nĩ gé,” he tóg. “Inh mỹ tóg há tĩ, ã tỹ nén han mũ ti. Ũ tỹ: “ki kanhró mág inh nĩ,” he mũ ag mỹ ã tóg ã jykre ven ja tũ nĩ. Ag mỹ ã tóg kãmén ja tũ nĩ. Ũ tỹ gĩr ri ke ki kagtĩg ag hã mỹ ã tóg ven ja nĩ, ã jykre ti,” he tóg.

²⁶ “Hỹ, hã vē. ã tỹ nén to jykrén mũn hã vē, hã kỹ ã tóg ag hã mỹ ã jykre ti nĩm. Hã ra tóg há tãvĩ nĩ, jóg,” he tóg, Jesus ti.

²⁷ Kỹ tóg ag mỹ: “inh jóg tóg inh mỹ tovãnh kãn, ã tỹ nén han ja kar ti,” he mũ. “Kỹ ũ pi(jé) ti kósin ki kanhró nĩ!. Inh jóg hã ne inh ki kanhró nĩ!. Kỹ ũ pi(jé) inh jóg ki kanhró nĩ gé!. Inh hã ne ti ki kanhró nĩ!, isỹ tỹ ti kósin nĩn kỹ. Hã ra sóg ãjag mỹ ti kãmén jé kãtĩ mũ, inh jóg ti. Isỹ tag to ũn kuprėg mũ ag hã mỹ sóg ti kãmén tĩ, inh jóg ti,” he tóg.

²⁸ “ãjag jagãgtar nỹtĩn kỹ, ãjag tỹ Topě vĩ ki króm ki kagtĩg nỹtĩn tugrĩn jagtar nỹtĩn kỹ iso kãmũ jėg. Nén ũ tỹ ãjag mỹ jagy tĩn kỹ iso kãmũ jėg. ãjag krĩ tỹ sóg kãnhvy' henh mũ mỹr, ha mẽ,” he tóg.

²⁹ “Inh mré kāmũ jĕg. Ājag kanhrān jé sóg ke mũ. Komēr hã sóg vĩ tĩ. Inh pi(jé) vĕsỹ ũn mág han tĩ', vĩ tar han vānh sóg nĩgtĩ. Ājag tỹ iso kāmũ kỹ ājag krĩ tóg há' henh mũ, ha vemnĩ. Kuprã' he jé tóg ke mũ, ājag krĩ ti, ha vemnĩ,” he tóg.

³⁰ “Inh jykre pi(jé) kufy nĩ', ājag mỹ'. Isỹ ājag mỹ nén tó mũ pi(jé) han kórég nĩ',” he tóg, Jesus ti.

12

Jesus tỹ vĕnhkán ke kurã to pã'i
(Mc 2.23-28; Lc 6.1-5)

¹ Kejĕn Jesus tóg trigo jo ĕpỹ mũ tĩ mũ, ti mré mũ tĩ ag tóg ti mré mũ mũ. Vĕnhkán ke kurã ki ke vĕ, hã ra ag tóg kókĩnkĩr mũ, vĕjĕn vég tũ nĩn kỹ. Hã kỹ ag tóg trigo mó ĕn tỹ kam ke kỹ ko mũ sir.

² Kỹ Fariseu ag tóg ag vég mũ. Kỹ ag tóg Jesus mỹ vĩ mũ. “Ha vé,” he ag tóg mũ ti mỹ. “Ā mré mũ tĩ ag ne tóg ājag tỹ nén han ke tũ han mũ ha', vĕnhkán ke kurã ki'. Vĕnh rānrāj vĕ mỹr, ag tỹ trigo tỹ kam ke ti,” he ag tóg, Jesus, mỹ.

³ Hã ra Jesus tóg ag mỹ: “vó,” he mũ. “Davi tỹ nén han mũ to jykrén nĩ,” he tóg. “Ti kókĩr nĩn kỹ tóg Ā tỹ nén han ke tũ han gé, ti mré mũ tĩ ag mré, hã ra Topĕ pi(jé) ti to jũ mũ', ti tỹ Ā tỹ nén han ke tũ han mũ ra.

⁴ Tag han ja ti nĩ, ha mĕ. Topĕ jo ĩn kãra rã kỹ tóg tá Topĕ jamĩ ĕn kó, tỹ Ā tỹ konh ke tũ ra. Kỹ tóg Ā mré mũ tĩ ag mỹ vin gé, Topĕ jamĩ ĕn. Topĕ tũ ki rĩr tĩ ag tỹ konh ke ja vĕ vĕ, Topĕ jamĩ ĕn, hã ra tóg ko ja nĩ, ti tỹ tỹ Topĕ tũ ki rĩr tĩ tũ ra, Davi ti. Hã kỹ tóg rán kỹ nĩ, Topĕ vĩ tỹ rán kỹ nĩ ki,” he tóg, Jesus ti.

⁵ “Kỹ Topê tũ ki rĩr tĩ ag jykre to jykrén nĩ gé. Tỹ vėnhkán ke kurã ra ag tóg rãnrãj mũgtĩ, Topê jo ĩn krēm, hã ra ag tóg Topê tũ ki rĩr tĩ. Hã kỹ ag tóg tỹ vėnhkán ke kurã ra ki vėnhkán tũ nĩgtĩ gé, ge ra ag jykre tóg há nĩ, Topê mỹ. Hã kỹ tóg rán kỹ nĩ gé, Topê vĩ tỹ rán kỹ nĩ ki.

⁶ Ha mẽ, Topê jo ĩn vỹ tỹ Topê tũ nĩ. Kỹ ag tóg ti tũ ki rĩr tĩ, tỹ vėnhkán ke kurã ra. Hã ra sóg Topê jo ĩn kãfór nĩ, Topê mỹ. Hã kỹ inh mré mũ tĩ ag tóg Topê mỹ há nỹtĩ, ag tỹ vėnhkán ke kurã ki vėnhkán tũ ra,” he tóg, Jesus ti.

⁷ “Kỹ Topê vĩ tag to jykrén nĩ gé, ha mẽ. “Ăjag tỹ jagnė jagãgtãn kỹ tóg inh mỹ há tĩ,” he ja tóg nĩ. Topê ti. “Kỹ tag tóg inh mỹ ăjag tỹ inh mỹ nén ũ pũn kãfór nĩ, ăjag tỹ jagnė jagãgtãn tag ti,” he ja tóg nĩ. Topê ti. Ăjag tỹ tag to jykrén mũ ra ăjag tóg inh mré ke ag to jũnh ke tũ nĩ vė. Ag kókĩr vė mỹr. Nén ũ kórég han ja tũ ag tóg nĩ,” he tóg, Jesus ti.

⁸ “Hã ra sóg tỹ vėnhkán ke kurã to pã'i nĩ. Tỹ sóg ẽprã ke fi kósin nĩ” he tóg, Jesus ti, Fariseu ag mỹ.

*Jesus tỹ ũn nĩgé tóg tỹ há' he
(Mc 3.1-6; Lc 6.6-11)*

⁹ Kỹ tóg ẽmã ẽn tá kutė kỹ ẽmã ũ ra tĩ mũ, kỹ tóg ẽg vėnh kanhrãn jafã kãra rã mũ sir.

¹⁰ Tã ũ tóg nĩ nĩ, ti nĩgé tóg tóg ja nĩ. Kỹ ag tóg Jesus mỹ: “mỹ há nỹ vỹ, ẽg tỹ vėnhkán ke kurã ki ũ kygtãg ke ti?” he mũ. Hã ra ag tóg pã'i ag mỹ: “vėnhkán ke kurã ki tóg Topê vĩ mranh tĩ, ũ kygtãg kỹ,” he sór mũ. Hã kỹ ag tóg ti ki jẽmẽg mũ. Ag mỹ tóg tỹ vėnh rãnrãj nĩ, ũ kygtãg ti. Vėnhkán ke kurã ki ẽg nẽji ũ kygtãg ke tũ nĩ.

11 Hã ra Jesus tóg ag mÿ: “ãjag mÿg tÿ vÿnhkán ke kurã ki kãgnó ki kutÿ kÿ, ãjag mÿ ti kunÿnh ke tÿ nÿ, tÿ vÿnhkán ke kurã nÿn kÿ?” he mÿ. “Ti kunÿnh jé ãjag tóg ke mÿ. Kÿ to jykrén nÿ.

12 Ëg mré ke vÿ Ëg mÿg kãfór nÿ,” he tóg. “Kÿ tóg há nÿ, Ëg tÿ Ëg mré ke kÿgtãg kÿ, tÿ vÿnhkán ke kurã ra,” he tóg.

13 Kÿ tóg ùn nÿgé tóg ãn mÿ: “ã nÿgé tÿ krÿg' hé,” he mÿ. Kÿ tóg tÿ krÿg' he mÿ sir. Hã ra tóg há' he mÿ. Ti nÿgé há ãn hã ri ke tóg nÿ, ti nÿgé kórég ja ti.

14 Kÿ Fariseu ag tóg jÿgÿ kÿ pa mÿ sir, ïn ãn ki. “Ëg hÿn hÿ ri kenh mÿ, ti tén jé?” he ag tóg mÿ, Jesus to.

15 Hã ra Jesus tóg ki kanhró nÿ, ag tÿ ti tén sór mÿ ti. Kÿ tóg sir tá kãkutÿ mÿ, ãmã ù ra tÿg jé.

Isaías tÿ Jesus kãmén ja

Ti tÿg kÿ ùn tÿ hÿn ri ke ag tóg ti nón mÿ mÿ sir, ùn kagyga ag ke gé, fag ke gé. Kÿ tóg ag tÿ há' he kãn mÿ sir, fag tÿ ke gé, Jesus ti.

16 Kÿ tóg ag mÿ: “ker isÿ ãjag tÿ há' he kãmén hÿ,” he mÿ.

17 Hã ra tóg rán kÿ nÿ gé, ti tÿ ag tÿ há' he mÿ tag ti. Isaías ti, ù tÿ vãsÿ Topÿ vÿ rán tÿ ãn hã vÿ Jesus to tag rán ja nÿ, ti tÿ Topÿ vÿ tó kÿ.

18 Topÿ vÿ tag tó ja ti nÿ, ha mÿ: “ha vé, sÿ ùn kuprÿg mÿ ãn,” he tóg, Topÿ ti,” he ja tóg nÿ, Isaías ti. “Inh camarada ri ke ti nÿ, ti tÿ isÿ nÿn tó mÿ ãn ki króm há han kÿ. Inh fe pÿ vÿgtÿ, sÿ ti ve kÿ tóg inh mÿ sér tÿ. Ti hã mÿ sóg inh kuprÿg jÿnÿnh mÿ, kÿ tóg inh vÿ tónh mÿ sir. Fóg ag mÿ tóg tónh mÿ, kanhgág ag mÿ ke gé, isÿ ag jykre tugnÿm ke ti,” he tóg, Topÿ ti,” he ja tóg nÿ, Isaías ti.

19 “Vĩ jũ han ke tũ ti nĩ, jũ kũ vĩ tar han ke tũ ti nĩ gé. Re tá ag tóg ti vĩ mẽnh ke tũ nĩ gé. Koměr hã tóg vĩnh mũ,” he tóg, Topẽ ti.

20 “Ĕprã ke ag tỹ inh vĩ mranh kũ ag tóg vãn tỹ ã tỹ tóg' he kũ kam ke ěn ri ke nỹtĩ. Hã ra ti pi(jé) ag tỹ kam ke kãn ke mũ', isỹ ũ to: inh fe, he mũ ěn ti. Nėj gru tỹ nhyn ke sór ri ke ag nỹtĩ gé. Ti pi(jé) ag tỹ nhyn kenh ke mũ', hã ra'. Ag mỹ tóg vĩ há han ke mũ. Tag kar kũ sóg kejẽn vẽn kar jykre tugnyĩm ke mũ.

21 Ĕn kã ũ tỹ ti ki ge kũ nỹtĩ ag hã vĩ krenkren ke mũ, fóg ag mré hã, kanhgág ag mré hã,” he tóg, Topẽ ti,” he ja tóg nĩ, Isaías ti, Jesus to. Hã ra tóg ge nỹgtĩ.

*Jesus tỹ Japo jykre tó
(Mc 3.20-30; Lc 11.14-23)*

22 Kejẽn ag tóg Jesus to ũ pére kãmũ mũ, ũn kyvó. Vĩ vãn hã tóg nĩ gé. Hã ra tóg jagrẽ kórég nĩ gé, hã kũ tóg ge nỹgtĩ. Kũ Jesus tóg ti tỹ há' he mũ sir. Kũ tóg vĩ há' he mũ sir. Ve há' he tóg mũ gé sir.

23 Kũ tóg vẽn kar mỹ e tãvĩ tĩ. Kũ ag tóg jagně mỹ: “Davi kósin ěn tũ mỹ'?” he mũ sir, Jesus to. “Ũ tỹ vãsỹ rán kũ nĩ ěn tũ mỹ'?” he ag tóg mũ. Ag mỹ tóg ti hã nĩ ve nĩ.

24 Kũ Fariseu ag tóg mẽg mũ sir, Jesus tỹ ti tỹ há' he mũ ti. Hã ra ag tóg Jesus to: “jagrẽ kórég ti nĩ,” he mũ. “Nén-Kórég ag pã'i tỹ ti jagrẽ nĩ, Belzebu ěn tỹ,” he ag tóg mũ. “Hã kũ tóg Nén-Kórég ag pan tĩ, hã kũ tóg ag jagrẽ kórég ag pan tĩ. Nén-Kórég ag pã'i jykre tỹ tóg ag pan tĩ,” he ag tóg, Fariseu ag.

25 Hã ra Jesus tóg ki kanhró nĩ, ag tỹ nén to jykrén mũn ki. Kũ tóg ag mỹ: “pã'i pir krēm ke ag tỹ jagně

kato tēgtēn kǵ ag tóg jagnē kāgtén kǵn ke mǵ,” he mǵ. “Ēmǵ pír ki ke ag tǵ jagnē kato tēgtē kǵ, ĩn pír krēm ke fag tǵ jagnē kato tēgtē kǵ fag tóg vēnh kǵpǵm kǵ nǵtǵnh mǵ, kǵ fag tóg jagnē kāgtén kǵn ke mǵ.

²⁶ Ge ti nǵ gé, Nén-Kórég ag. Nén-Kórég tǵ Nén-Kórég ũ kutēm kǵ tóg Nén-Kórég ag tǵ jagnē kato tēgtē han mǵ sir. Kǵ ag tóg jagnē tǵ tǵ' henh ke mǵ gé, Satanás ag.

²⁷ “Belzebu tǵ tóg Nén-Kórég ag pan tǵ,” he ājag tóg tǵ iso. Jǵvo ājag mré ke ag hǵn vēnh jykre tǵ ne tǵ vēnh jagrē kórég ag pan tǵ? Ag mǵ Nén-Kórég ag jykre ki ag pan mǵ gé', Topē jykre ki mǵ vó? Topē jykre ki ag tóg ag pan tǵ. Ājag tǵ tag to jykrén kǵ ājag tóg inh jykre há ki kanhrǵn ke mǵ vē,” he tóg ag mǵ, Jesus ti.

²⁸ “Topē kuprǵg jykre tǵ sóg Japo ag pan tǵ mǵr. Topē kuprǵg tǵ Japo ag pan kǵn kǵ Topē tóg tǵ ěg pǵ'i nǵ vē mǵr. Tag to jykrén nǵ,” he tóg, Jesus ti.

²⁹ mǵn sór kǵ, ti ĩn tá, kǵ ěg tóg ti se vén tǵ, ke tǵ nǵ (mǵ) ra tóg ā tǵ ki rǵr ke mǵ, kǵ ěg tóg ti tǵ mǵn tǵ hē ri kenh ke tǵ nǵgtǵ, ti tar nǵn kǵ. ěg tǵ ti se kar kǵ ěg tóg ti tǵ mǵg mǵ sir,” he tóg. “Ge ti nǵgtǵ, sǵ nén han mǵ ti. Tar ti nǵ, Japo ti. Hǵ ra sóg hur ti sé, hǵ kǵ sóg ti tǵ ag kygvǵn ke mǵ sir. Ag jagrē kórég pan sóg mǵ sir,” he tóg, Jesus ti.

³⁰ “Ājag tǵ tǵ inh mré ke tǵ nǵtǵn kǵ ājag tóg inh kato tēgtē mǵ. Ājag tǵ inh mré ěprǵ ke ag tǵ Topē to kǵmǵ han tǵ nǵn kǵ ājag tóg ag kǵmǵ kamēg mǵ,” he tóg.

³¹ “Hǵ kǵ sóg ājag mǵ tó mǵ. Ājag tǵ Topē vǵ mranh mǵ ra tóg ājag mǵ vēnh pǵte fón sór mǵ,

Topě ti. Ājag tỹ Topě to vī kónān mũ ra tóg ājag mỹ vėnh pāte fón sór mũ gé. Ājag tỹ hã ra Topě kuprīg to: “Japo tỹ ěg jagrē vē,” hen kỹ tóg ājag mỹ vėnh pāte fón mǎn ke tũ nĩ ha sir, Topě ti,” he tóg, Jesus ti.

³² “Ājag tỹ iso vī kónān mũ. Ājag tỹ hã ra Topě kuprīg to vī kónān kỹ tóg ājag mỹ vėnh pāte fón mǎn ke tũ nĩ ha. Ājag tỹ ga kri mũn kỹ tóg ājag mỹ vėnh pāte fón mǎn ke tũ nĩ, Topě ti, ājag ter kar kỹ tóg ājag mỹ vėnh pāte fón mǎn ke tũ nĩ gé,” he tóg, Jesus ti.

Ka to comparação (Lc 6.43-45)

³³ “Ěg tỹ ka kanē ko há krān kỹ ti kanē vỹ ko há nĩ, ěg tỹ ka kanē ko vānh krān kỹ ti kanē vỹ ko kórég nĩ gé. Ěg tỹ ti kanē ve kỹ ěg tóg: “ŭn kanē ko vānh ja vē,” henh ke mũ. Ge ti nĩgtĩ, ěg jykre ti. Ŭn jykre há tóg há nĩ, ŭn jykre kórég tóg kórég nĩ gé.

³⁴ Pỹn ri ke ājag nỹtĩ. Kórég tǎvĩ ājag nỹtĩ, hã ra ājag tóg ón kỹ nén ũ há tó sór tĩ. Ěg jėnky ki tóg kutě tĩ, ěg tỹ nén to jykrén mũ ti. Ěg jykre kórég tǎvĩ nĩn kỹ ěg tóg nén ũ kórég tǎvĩ tó tĩ. Hã kỹ ājag pi(jé) tó há han tĩ’.

³⁵ Ŭn jykre há vỹ nén ũ há kar to jykrén tĩ, kỹ tóg ěg mỹ tó há han tĩ gé sir, Ŭn jykre kórég vỹ nén ũ kórég kar to jykrén tĩ, kỹ tóg ěg mỹ tó kónān tĩ gé sir,” he tóg, Jesus ti.

³⁶ “Ki hã sóg tó mũ ājag mỹ, hã kỹ sóg ke mũ kurã tỹ ěgno ki, sỹ vėnh kar jykre tugnỹm ke kurã ěn ki sóg ājag vī tugnỹm ke mũ. Kỹ ājag tỹ ón kỹ vī ja nĩn kỹ sóg ěn venh ke mũ gé. Ājag tỹ nén tó ja kar tugnỹm jé sóg ke mũ, ha vemnĩ,” he tóg, Jesus ti.

37 “Ājag tỹ vĩ há han ja nĩn kỹ ājag tóg inh mỹ há nỹtĩ gé. Ājag tỹ vĩ kórég han ja nĩn kỹ ājag tóg inh mỹ kórég nỹtĩ. Kỹ ā kato tẽ mũ ag mỹ Topẽ jykre tón hã vễ.

*Ag tỹ milagre ve sór
(Mc 8.11-12; Lc 11.29-32)*

38 Kỹ Topẽ vĩ to professor ù ag tóg Fariseu ù ag mré Jesus mỹ: “Senhor,” he mũ. “Ēg tỹ ã tỹ milagre han venh há tóg tĩ,” he ag tóg mũ, Jesus mỹ.

39 Kỹ Jesus tóg ag mỹ: “kórég ājag nỹtĩ,” he mũ. “Topẽ ki ge sór vãnh ājag tóg nỹtĩ,” he tóg. “Ājag tỹ milagre ve sór mũ tag venh ke tũ ājag tóg nĩ. Nén pir hã ve jé ājag tóg ke mũ, hã vỹ: Jonas tỹ nén ve ja ên ri ke, he mũ, vẫsỹ Topẽ vĩ tó tĩ ên tỹ nén ve ja ên ri ke.

40 Jonas ên vỹ goj tân nug kākã nĩ ja nĩ, kurã tăgtũ ki, kuty tăgtũ ki ke gé. Tag ri ke ve jé sóg ke mũ gé. Ga krẽm sóg nỹnh mũ, kurã tăgtũ ki, kuty tăgtũ ki ke gé. Tỹ sóg ẽprã ke fi kósin nĩ,” he tóg, Jesus ti.

41 “Kỹ Nínive tá ke ag vỹ ājag kato vĩnh ke mũ sir, kurã tỹ ẽgno ki, ha vemnĩ. Ag tỹ Jonas vĩ mẽ kỹ ag tóg ājag jykre kórég tovãnh, Nínive tá ke ag. Tỹ sóg Jonas kãfór nĩ, hã ra ājag tóg ājag jykre kórég tovãnh sór tũ nĩ, sỹ Nínive tá ke ag jãvo ājag mỹ tó mũ ra. Hã kỹ ag tóg ājag jykre kórég tónh ke mũ, kurã ên kã, ha vemnĩ.

42 Kỹ pã'i mág ên fi, pã'i tỹ rainha ên fi, ù tỹ kanhkã fyn ja tá kãtĩg ja ên fi vỹ nĩnh ke mũ gé, kurã tỹ ẽgno kã. Ājag mré fi tóg jẽnh ke mũ, kỹ fi tóg ājag to vĩ kónãn ke mũ gé. Kanhkã fyn ja tá fi tóg kãtĩg ja nĩ, vẫsỹ, fi tỹ Salomão vĩ mẽ jé. Salomão kãfór vỹ

tỹ inh nĩ, hã ra ãjag tóg inh vĩ jẽmẽ jãvãnh nỹtĩ,” he tóg, Jesus ti.

*Vẽnh jagrẽ kórég jykre
(Mc 11.24-26)*

⁴³ “Kejẽn sóg vẽnh jagrẽ kórég ù kutẽm mũ. Kỹ sóg ga kórég mũ tĩ mũ, ti jagrẽ ẽn ti. Goj venh ke tũ tóg nĩ tá. Vẽnhkán ke tũ tóg nĩ gé, ti tỹ hẽ ri ken kỹ vẽnhkán ke tũ tĩn kỹ.

⁴⁴ Kỹ tóg vãhã to jykrẽn mũ sir. “Inh hỹn ẽn ra tũg mãn ha, sỹ ù tá kãkutẽ ja ẽn ra. Inh mỹ tóg tỹ ãn ri ke ja nĩ. Kỹ inh hỹn tóg ti kãra rã mãn ha,” he tóg mũ sir, ti jagrẽ ja ẽn ti. Kỹ tóg ti venh tĩ mũ sir. Hã ra tóg sir krĩ há nĩ, kỹ tóg ti mỹ ãn há ri ke nĩ sir, in prur, ãn kuprã, ãn sĩnvĩ ri ke.

⁴⁵ Kỹ tóg Nẽn-Kórég tỹ 7 (ke) ag mỹ tónh tĩ mũ sir. “Ha kãmũ jẽg he tóg mũ sir. Hã ra ag jykre pãno tóg ti jykre pãno kãfór nĩ. Kỹ ag kar tóg ù ẽn kãge mũ, tỹ ag ti jagrẽ nỹtĩ, isỹ ùn mỹ ti jagrẽ pir kutẽm ja ẽn ti. Hã kỹ to, kórég tãvĩ nĩ sir. Ti jagrẽ pir kutẽm inh nĩ vẽ, hã ra tỹ 8 (ke) ag tóg sir tỹ ti jagrẽ nỹtĩ, ti tỹ inh ki rã tũ nĩn kỹ. ãjag mỹ tóg ge nĩnh mũ, kurã tỹ ẽgno ki. Ûri ãjag jykre vỹ pãno nỹ. Hã ra kurã ẽn ki tóg sir pãno kãfór nỹnh mũ. Kỹ ãjag tóg sir to jagtar tãvĩ nỹtĩnh mũ,” he tóg, Jesus ti.

*Jesus mré ke pẽ fag
(Mc 3.31-35; Lc 8.19-21)*

⁴⁶ Ti tỹ ver tỹ vẽnẽn kỹ ti mỹnh fi tóg tá jun mũ sir, ti jãvy ag mré. Ti mỹ fag tóg vẽnh vĩ jẽnẽg mũ, fag tỹ ti mré vẽnẽn jé.

47 Kÿ ù tóg ti mÿ tónh kãtĩ mũ. “Ă mÿnh fi vÿ re tá jê, ă jãvy ag mré. Fag tÿ ă mré vēmén ke nêji,” he tóg, Jesus mÿ.

48 Kÿ tóg ù tÿ ti mÿ tó mũ ên mÿ: “inh mÿnh fi mÿ inh ve sór mũ', inh jãvy ag mré?” he mũ. “Inh mÿnh pẽ fi pijé', inh jãvy pẽ ag pijé',” he tóg.

49 Kÿ tóg ti mÿ ă mré mũ tĩ ag ven mũ sir, ă nĩgé tÿ. Kÿ tóg ti mÿ: “inh mÿnh pẽ fi hã vê, inh jãvy pẽ ag hã vê,” he mũ, ă mré mũ tĩ ag to.

50 “Û tÿ inh panh tÿ kanhkã tá nĩ ên vĩ ki króm mũ vÿ tÿ inh jãvy pẽ ag nÿtĩnh mũ, inh ve pẽ fag ke ge, inh mÿnh pẽ fi ke gé,” he tóg, Jesus ti.

13

Nén fy to comparação

(Mc 4.1-9; Lc 8.4-8)

1 Kurã ên kã Jesus tóg ãn tá kãkutẽ mũ, kÿ tóg goj nig ra tĩ mũ. Tá tóg nĩ nĩ sir.

2 Kÿ ù tÿ hên ri ke ag vÿ tá vênh măn mũ sir, ti rã hã, kÿ tóg canoa kãkã nĩ mũ sir, jo ùn e ên ag tóg nig fyr tá nÿtĩ.

3 Kÿ tóg ag kanhrãn mũ sir. Ag mÿ tóg comparación tÿ hên ri ke hyn han mũ. Kÿ tóg ag mÿ: “Û tÿ Topẽ vĩ tó mũ vÿ ge nÿtĩnh mũ, ha mẽ,” he mũ. “Kejên ù tóg nén ù fy vãvãm tĩ mũ,” he tóg.

4 “Ti tÿ vãvãm kÿ ti fy ù tóg êpry kri, êmĩn kri kutẽ mũ, kÿ sêĩ tóg ti ko mũ sir.

5 Ti fy ù tóg pãró kri kutẽ mũ, ga e tũ ki. Kÿ tóg kãnhmar mur mũ vê, ga sĩ ên ki.

6 Hã ra rã tóg ă tÿ êg nĩno kã sa kÿ (tóg) ti pũn mũ. Ti jãre han tũ nĩn kÿ tóg tóg mũ.

⁷ Ti fy ũ tóg sónh kâki kutě mũ, kŷ sónh tóg ti mré mur mũ, kŷ tóg ti kri rŷm mũ. Kŷ tóg tũ' he mũ sir.

⁸ Ti fy ũ tóg ga há kri kutě mũ, kŷ tóg mur há han mũ, mog há han tóg mũ, kaně há han tóg mũ gé. Ũ tóg kaně tŷ 100 (ke) han, jo ũ vŷ tóg kaně tŷ 60 (ke) han, jo ũ vŷ tóg kaně tŷ 30 (ke) han.

⁹ Ũn nŷgrĕg nŷtŷ tŷ tŷ jĕmĕ jĕ,” he tóg, Jesus ti.

*Ĕg tŷ comparaçāo to vĕnh kanhrān ke
(Mc 4.10-12; Lc 8.9-10)*

¹⁰ Kŷ ti mré mũ tŷ ag tóg ti to kāmũ mũ, kŷ ag tóg ti mŷ: “ã tŷ ne tó nĕ?” he mũ.

¹¹ Kŷ Jesus tóg ag mŷ: “ãjag hā ne ũ tŷ kanhkā tá nŷ ĕn tŷ tŷ ĕg pã'i nŷ ĕn ki kanhró nŷtŷnh mũ!,” he mũ, “ũ tŷ inh jo nĕn tó ja tũ ĕn ti,” he tóg mũ. “Hā ra ũn e ĕn ag vŷ ki kanhrān kãn ke tũ nŷ,” he tóg.

¹² “Hā kŷ tóg ge nŷ. Ũ tŷ nĕn to jykrĕn há han kŷ tóg ũ to jykrĕn mãn', ũ to jykrĕn mãn' he mũ. Komĕr hā tóg to jykrĕn kãn ke mũ. Ũ tŷ nĕn to jykrĕn tũ nŷn kŷ tóg ti mŷ tũ' he mũ, ti tŷ to jykrĕn sŷ han kŷ.

¹³ Hā kŷ sóg ũn e ĕn ag mŷ comparaçāo han mũ, ag tŷ mĕ há han sór tũ nŷtŷnh kŷ. Kŷ ag tóg ón kŷ mĕg mũ ra ki kagtŷg nŷtŷ, to jykrĕn tũ ag nŷtŷ sir.

¹⁴ Hā ra tóg rán kŷ nŷ gé. Isaías tŷ vāsŷ Topĕ vŷ tó kŷ tóg tag tó ja nŷ, ha mĕ. “Mĕ jĕ ãjag tóg ke mũ ón kŷ, hā ra ãjag tóg to jykrĕn tũ nŷnh mũ, kŷ ãjag tóg ki kagtŷg nŷtŷnh mũ.

¹⁵ Povo tag ag vŷ krŷ tũ nŷtŷ, nŷgrĕg kutu ag tóg nŷtŷ gé, kaně kyvó ag tóg nŷtŷ gé, ag tŷ nĕn ũ ve sór tũ nŷtŷnh kŷ, ag tŷ jĕmĕ sór tũ nŷtŷnh kŷ, ag tŷ to jykrĕn sór tũ nŷtŷnh kŷ ke gé. Hā kŷ ag tóg inh ki ge sór tũ

nýtĩ gé, ký sóg ag tỹ há' henh ke tũ nĩ gé," he ja tóg nĩ, Isaías ti, povo tag to," he tóg, Jesus ti.

¹⁶ "Ag jãvo ãjag hã vỹ nĩgrẽg há nýtĩ, hã ký ãjag tóg ag jãvo jẽmẽ há han mũ.

¹⁷ Ha mẽ, ù tỹ hẽn ri ke ag vỹ inh ve sór e ja nĩgtĩ, vãsỹ, ãjag tỹ ùri vég mũ tag ti. Hã ra ag tóg inh kãtĩg ke jo kãgter. Topẽ vỹ tó tĩ ag vẽ. Jykre kuryj ag nýtĩ ja nĩ, hã ký ag tóg ãjag tỹ nén vég mũ tag ve sór e ja nĩgtĩ. Hã ra ag tóg ve ja tũ nĩgtĩ, mẽ ja tũ ag nĩgtĩ, ãjag tỹ ùri nén mẽg mũ ti. Ag tỹ vég tũ ra ag tóg kãgter. Æjag hã ne mẽg mũ', inhhã'," he tóg, Jesus ti. Ti mré mũ tĩ ag mỹ tóg ke mũ.

*Jesus tỹ nén fy to comparação kãmén
(Mc 4.13-20; Lc 8.11-15)*

¹⁸ "Kỹ sóg ãjag mỹ kãmén mũ, nén fy kanẽ tag ti, ha mẽ.

¹⁹ Û tóg kejẽn ón ký Topẽ vỹ mẽg mũ, ti tỹ tỹ ãg pã'i nĩ ti. Hã ra tóg to jykrén tũ nĩ, ã tỹ ón ký mẽn ký. Ký Nén-Kórég vỹ ti mỹ tỹ tũ' he mũ sir, ti tỹ mẽ ja ti tỹ. Kã jatu tóg nĩ sir. Êpry kri, emĩn kri kutẽ mũ ãn hã vẽ.

²⁰ Ký ti fy ù tóg pãró kri kutẽ mũ. Û vẽ gé. Topẽ vỹ mẽg tóg mũ gé. Ký tóg kãnhmar: "hej," he mũ sir. Ti mỹ tóg sér tĩ.

²¹ Hã ra tóg tỹ nén kré jãre tũ ri ke nĩ mỹr. Ký tóg tĩg sĩ han mũ, Topẽ mré. Nén ù jagy kutẽ ký tóg Topẽ tovãnh mũ sir, ù tỹ Topẽ vỹ tũgrĩn ti kato tẽ ký. Kãnhmar tóg tovãnh mũ.

²² Ti fy ù tóg sónh kãki kutẽ mũ. Û vẽ gé. Topẽ vỹ mẽg tóg mũ gé. Hã ra tóg ã rãnhraj hã mũ ãkrég mũ sir. Nén kar to énn tóg mũ sir, ón ký rico nĩ sór jé. Hã

kỹ Topẽ vĩ tóg ti mỹ katy tĩ sir. Kĩ tóg han tũ nĩ sir, kanẽ ti.

²³ Ti fy ù tóg ga há kri kutẽ mũ. Û vễ gé. Topẽ vĩ mễg tóg mũ gé. Mễ kỹ tóg to jykrén mũ sir. Kĩ tóg kanẽ han mũ sir. Kĩ ù vĩ tóg kanẽ tỹ 100 (ke) han, jo ù vĩ tóg kanẽ tỹ 60 (ke) han, jo ù vĩ tóg kanẽ tỹ 30 (ke) han,” he tóg, Jesus ti.

Vãnh to comparação

²⁴ Kĩ tóg comparación ù han kỹ: “Nén-Kórég tỹ inh rãnrãj kókén sór mũ vĩ ge nỹnh mũ, ha mễ,” he mũ. Kĩ tóg: “ù tỹ kanhkã tá nĩ ẽn tỹ tỹ ẽg pã'i nĩ vĩ ge nĩ, ha mễ,” he mũ. “Kejẽn ù tóg nén fy vẫvãm mũ, ti japỹ tá, tỹ ti jakré nỹ jé.

²⁵ Kĩ tóg nũr tĩ mũ, ti camarada ag ke gé. Kĩ ti kato tẽ mũ ẽn tóg kutyg kỹ ra tĩ mũ, ti japỹ ẽn ra, kỹ tóg vãnh fy vẫvãm mũ, trigo fy ẽn kãmĩ. Kĩ tóg tĩ mũ sir, vãnh fy ẽn vẫvãm kar kỹ.

²⁶ Kĩ trigo tóg mur mũ, mog tóg mũ, kanẽ han tóg mũ sir. Hã ra vãnh tóg ti mré mur mũ gé.

²⁷ Kĩ ti camarada ag tóg ãjag patrão mỹ tónh mũ mũ. “Trigo fy vẫvãm ẽg tóg mũ vễ, hã ra vãnh tóg ti mré mur mũ. Ne nễ hỹn?” he ag tóg ti mỹ.

²⁸ Kĩ tóg ag mỹ: “ẽg kato tẽ mũ ẽn rãnrãj hã vễ,” he mũ. “Èn hã ne isũ kókég’,” he tóg. Kĩ ag tóg ti mỹ: “kỹ ẽg mỹ vãnh ẽn kunũnh ke tũ nĩ?” he mũ.

²⁹ Kĩ tóg ag mỹ: “hỹ,” he mũ. “Ãjag tỹ vãnh ù kunũnh kỹ tóg ãjag tỹ ti pẽn ù kunũnh ha mễ tĩ, vãnh mré. Kĩ kunũnh tũg nĩ.

³⁰ Vãnh hỹn tóg trigo mré mog mũ gé. Kĩ ẽg tỹ kre kỹ sóg ù tỹ krég mũ mỹ tónh ke mũ. “Vãnh kre vén nĩ,” he jé sóg ke mũ. “Ti kre kar kỹ ti tógfĩ, ẽg tỹ ti pũn jé. Kar kỹ ãjag tóg trigo krenh ke mũ, sỹ pãjó

krēm vin han jé,” he jé sóg ke mũ,” he tóg, ag patrão ti,” he tóg, Jesus ti. Ti tỹ ù tỹ ón kỹ Topẽ ki ge kỹ nỹtĩ ãn ag tó jan hã vễ.

Mostarda fy to comparação
(Mc 4.30-32; Lc 13.18-19)

³¹ Kỹ tóg ag mũ nén ù tó mũ gé sir. “Ủ tỹ kanhkã tá nĩ tỹ tỹ ẽg pã'i nĩ vỹ ge nĩnh mũ, ha mẽ,” he tóg. “Ka tỹ mostarda fy ri ke tóg nĩ. Ti krãn ẽg tóg tĩ, ẽg japỹ ki, ka tỹ mostarda fy ti.

³² Kãsir ti nỹtĩ, ti fy ti. Ủ fy vỹ ti sĩ ri ke tũ nĩ. Ti krãn kar kỹ tóg mog mũ. Kỹ tóg ẽgóho ag kãfór nĩ. Pẽ mág ti nỹtĩ, hã kỹ sēsĩ ag vỹ kri krẽg tĩ, ti pẽ kri,” he tóg, Jesus ti. Ti tỹ ẽg tỹ ti vĩ tó vén kar kỹ vễnh kar kri rũm ke mũ kãmén hã vễ.

Fermento to comparação
(Lc 13.20-21)

³³ Kỹ tóg ag mũ comparação ù tó mũ gé sir, kỹ tóg: “Topẽ tỹ tỹ ẽg pã'i nĩ vỹ tag ri ke nĩnh mũ, ha mẽ,” he mũ. “Ủn tỹtá fag tóg pão han tĩ. Pão han jé fag tóg pão jẽgja jafã tỹ fermento ẽn tỹ farĩnh mré jẽgjãg tĩ. Fermento sĩ ẽn tỹ pão kar ẽn tóg són ke kãn tĩ,” he tóg, Jesus ti. Ti vĩ tỹ vễnh kar kri rũm ke kãmén hã vễ.

Jesus tỹ comparación tỹ ẽg kanhrãn
(Mc 4.33-34)

³⁴ Comparação tỹ ge han tóg tĩ, Jesus ti, vễnh kar mũ. “Topẽ tỹ tỹ ẽg pã'i nĩnh ke mũ vỹ ge nĩnh mũ,” he tãvĩ han tóg tĩ ag mũ.

³⁵ Hã ra tóg rán kỹ nĩ gé, Jesus tỹ comparación han ke mũ ti. Vãsỹ Topẽ vĩ tó tĩ ù tóg Jesus kãmén kỹ tag tó ja nĩ ti to, ha mẽ. “Comparação han jé sóg ke mũ.

Inh jo tó ja tũ ãn tó jé sóg ke mũ. Ủ vỹ tag mẽ ja tũ nĩ ver, sỹ tónh ke mũ tag,” he ja tóg nĩ, Topẽ vỹ tó tĩ ãn, Jesus to. Hã ra tóg hã tó tĩ, Jesus ti.

Jesus tỹ vãnh to comparação kãmén

³⁶ Ag mỹ kãmén kãn kar Jesus tóg vãnh e ãn ré kỹ ãn kãra rã mũ. Kỹ ti mré mũ tĩ ag tóg ti to kãmũ mũ, ti ki jẽmẽ jé. “Ëg mỹ ã tỹ ag mỹ kãmén ja ãn ti tó mãn nĩ, ã tỹ ag mỹ trigo mré vãnh tó ja ãn ti. Ëg tỹ ver to jykrén tũ tóg tĩ,” he ag tóg mũ, Jesus mỹ.

³⁷ Kỹ tóg ag mỹ kãmén mũ. “Ëprã ke fi kósin vỹ trigo fy vãvãm mũ. Inh hã vễ,” he tóg mũ.

³⁸ “Ga hã to sóg: ẽpỹ, he mũ. Kỹ trigo ãn vỹ Topẽ krẽ ag ri ke nỹtĩ, kỹ vãnh vỹ Nén-Kórég krẽ ag ri ke nỹtĩ.

³⁹ Ủ tỹ ag han mũ vỹ tỹ Japo ti nĩ, Nén-Kórég ãn krẽ ag. Ti colher ke kurã hã vỹ: kurã tỹ ẽgno, he mũ. Ủ tỹ trigo colher ke mũ ag vỹ tỹ Topẽ tỹ jẽgnẽ jafã ag nỹtĩ.

⁴⁰ Kurã tỹ ẽgno ki ag tóg ẽg tỹ vãnh pũn ãn ri ke han ke mũ, Japo tũ ag tỹ.

⁴¹ Ëprã ke fi kósin ãn, inh hã vỹ isỹ jẽgnẽ jafã ãn ag jẽgnẽnh ke mũ sir, kỹ ag tóg ã tỹ vãnh jykre pãno han mũ kar ag génh kãn ke mũ, ã tỹ ã ag mỹ: “ha jatun mỹ Topẽ vỹ mranh,” he mũ kar ag ke gé.

⁴² Ag génh kỹ ag tóg pĩ gru mág ãn ki ag vãm ke mũ sir. Tá ag tóg vêsýrénh tãvĩ han tĩ. ãjag jã tỹ ag tóg gyngyn henh ke mũ, gangan ke jé ag tóg ke mũ, jũ kỹ, vêsýrénh kỹ ke gé.

⁴³ Kỹ ãn jykre kuryj ag vỹ há pẽ nỹtĩnh mũ, sĩnvĩ, kókov, rã gru ri ke, ag tỹ ãjag jóg tá nỹtĩnh ken kỹ sir,

ag tỹ ù tỹ kanhkã tá nĩ ãn tỹ tỹ ãg pã'i nĩ ven kỹ. Ûn nĩgrẽg nỹtĩ tỹ tỹ jẽmẽ jé,” he tóg, Jesus ti.

Ëpỹ ki jãnkamy to comparaçã

44 “Kỹ ãg tỹ ù tỹ kanhkã tá tỹ ãg pã'i nĩ venh ke vỹ tag ri ke nĩ gé, ha mẽ. Û tỹ ã patrão japỹ tá jãnkamy ne kunũnh kỹ péju mãn kỹ nĩm ri ke tóg nĩ. Ti péju mãn kỹ tóg ã tỹ nén kar fón kãn mũ sir, ti kaja to ãpỹ ãn vyn jé sir. Ëpỹ ãn vyn kar kỹ jãnkamy ãn vỹ tỹ ti tũ nĩ sir,” he tóg, Jesus ti. Ti tỹ ãg mũ ãg tỹ ti ki rã sór kỹ ãg tũ fón kãn tón hã vẽ.

Pérola to comparaçã

45 “Ëg tỹ ù tỹ kanhkã tá nĩ ãn tỹ tỹ ãg pã'i nĩ venh ke vỹ tag ri ke nĩ gé, ha mẽ,” he tóg mũ gé. “Negociante ù tóg jãnka han jafã tỹ negociar he tĩ, pérola tỹ. Hã kỹ tóg ãn há kuprẽg tĩgtĩ.

46 Kejẽn tóg ãn há pẽ ù vэг mũ sir, ãn kaja e. Kỹ tóg ã tũ vãm kãn mũ sir, ã tỹ ãn sĩnvĩ pẽ ãn kajãm jé, ti tỹ tỹ tũ nĩ jé,” he tóg, Jesus ti. Ti tỹ ãg mũ ãg tỹ ti ki rã sór kỹ ãg tũ vãm kãn tó mãn hã vẽ gé.

Rede to comparaçã

47 “Ëg tỹ ù tỹ kanhkã tá nĩ ãn tỹ tỹ ãg pã'i nĩ venh ke to comparaçã vẽ gé, ha mẽ,” he tóg mũ gé. “Rede ri ke tóg nĩ, ãg tỹ tỹ pirã kugmĩ jafã ãn. Ti fig ãg tóg tĩ, goj kãkã, ãg tỹ pirã kugmĩ jé, kãkofár ke gé.

48 Ki ti fón kar kỹ ãg tóg nỹgnỹn mũ sir, goj ki ãg tóg pirã mré kãkofár gég tĩ. Génh kỹ ãg tóg ãn mág ag hã kuprẽg tĩ, ma mũ jé. Ûn kãsir ãn togvãnh ãg tóg tĩ.

49 Ge ti nĩgtĩ, kurã tỹ ěgno ki. Topẽ tỹ jěgně jafã ag tóg ùn jykre kuryj ag kuprěg ke mũ, Topẽ mỹ.

50 Ûn jykre pãno ag vãvãm jé ag tóg ke mũ, pĩ gru mág ěn ki. Tá ag vėsỹrénh vễ sir. Ājag jã tỹ ag tóg gyngyn henh ke mũ, tỹ ag gangan kej ke mũ, jũ kỹ, vėsỹrénh kỹ,” he tóg, Jesus ti. Ti tỹ ag mỹ ěg tỹ ti ki rã sór jé kãmén hã vễ.

Ěg panh to comparação

51 Kỹ tóg ã mré mũ tĩ ag mỹ: “ãjag mỹ tag to jykrén kãn mũ, sỹ ãjag mỹ nén kãmén mũ tag ti?” he mũ. Kỹ ag tóg ti mỹ: “hỹ,” he mũ sir.

52 Kỹ tóg ag mỹ: “kỹ tóg há tĩ,” he mũ. “Û tỹ Topẽ vĩ to professor ěn, ti tỹ kanhkã tá nĩ ěn jykre ki rãn kỹ tóg ge nĩ, ha mẽ,” he tóg. “Ěg panh ri ke tóg nĩ, ti tỹ tỹ nén ù mág nĩn kỹ. Ěg panh tóg kejěn ěg mỹ ã tỹ nén sĩnvĩ ven tĩ, ti tỹ ùri mǎg mũ ti, ti tỹ vãsỹ mǎn ja ěn ke gé,” he tóg, Jesus ti. Ti tỹ ěg mỹ ěg tỹ Topẽ vĩ ki kanhrãn ke tó vễ. Ěg tỹ to estudo han kỹ ěg tóg vãsỹ rán kỹ nĩ ěn tónh ke mũ, kỹ ěg tóg ù tỹ ùri tó mũ tag tónh ke mũ gé. Jesus tỹ tag to ěg mỹ comparação han hã vễ.

Jesus tỹ Nazaré ra vỹn ke (Mc 6.1-6; Lc 4.16-30)

53 Ag mỹ kãmén kãn kar kỹ tóg tá kãkutě mũ sir.

54 Kỹ tóg ã jamã ra tĩ mũ sir. Tá jun kỹ tóg ěg vễnh kanhrãn jafã ki ag kanhrãn mũ. Kỹ tóg ag mỹ e tĩ, ti vĩ ti. Kỹ ag tóg ti to vĩ kónãn mũ. “Hěn tán hỹn ki kanhrãn, vễnh jykre tag ki? Û nỹ hỹn ti kanhrãn, ti tỹ nén han vǎnh tag hyn han jé?” he ag tóg ti to.

55 “Īn han tĩ ěn kósin vĕ mÿr,” he ag tóg. “Ti mÿnh fi vÿ tÿ Maria fi nĩ, kÿ tĩ jãvy ag vÿ ki nÿtĩ, Tiago, José, Simão, Judas.

56 Kÿ ti ve fag vÿ tag ki nÿtĩ gé, ěg mré. Ti tÿ ne jé ěg kãfór nĩ sór nĕ hÿn?” he ag tóg mũ sir, Jesus to.

57 Kÿ tóg ag mÿ tÿ ũ nÿ. Kÿ Jesus tóg ag mÿ: “ĕmã ũ tá ke ag tóg Topĕ vĩ tó tĩ to é he tũ nĩgtĩ mÿr,” he mũ. “Ti jamã tá ke ag tóg ti to é he tĩ jãvo, ti mré ke ag, ti kanhkã ag,” he tóg.

58 Kÿ tóg tá milagre e hyn han tũ nĩ. Ũn kaga nÿtĩ pir ag tÿ há' he tóg, ũn e tÿ há' he tũ ti nĩ, ag tÿ ti ki ge jãvãnh nÿtĩn kÿ.

14

João Batista ter

(Mc 6.14-29; Lc 9.7-9)

1 Kÿ kejĕn pã'i mág tÿ governador tÿ Herodes vÿ mĕg mũ, Jesus kãme ti.

2 Kÿ tóg ã camarada ag mÿ: “João Batista vĕ hÿn, ãjag tÿ inh mÿ ũ tó mũ ti,” he mũ. “Ti hÿn tóg rĩr mãn, sÿ ti tén kar kÿ, hã kÿ tóg milagre tÿ hĕn ri ke hyn han tĩgtĩ,” he tóg, Herodes ti, ã camarada ag mÿ, Jesus to.

3 Herodes vÿ João se ja nĩ, vĕse ja kãki tóg ti fón ja nĩ, Herodias fi tugnĩn. Ti jãvy tÿ Filipe prũ fi ja vĕ, hã ra tóg fi kunũnh kÿ fi tÿ prũg mũ, Herodes ti. Kÿ João tóg ti mÿ.

4 “ã hã ne tóg ã mrĕ ke prũ fi tÿ prũg mũ',” he ja nĩ. “Fi ki ã tóg Topĕ vĩ mranh mũ,” he tóg, João ti, Herodes mÿ.

⁵ Kÿ Herodes tóg ti tén sór mũ, hã ra tóg vãnh kar kamẽg mũ. Vãnh kar tóg João to: “Topẽ vĩ tó tĩ ù vễ,” he tĩ. Kÿ Herodes vỹ ag kamẽg mũ.

⁶ Hã ra tóg kejẽn Herodes mur ja kurã tá krỹg mũ. Kÿ festa ên kã Herodias fi kósin fi vỹ ag jo vãnh grén mũ sir, ti mré jẽg mũ ag jo. Kÿ tóg Herodes mỹ sĩnvĩ tĩ.

⁷ Kÿ tóg fi mỹ: “ã tỹ nén to vĩ kar nĩm jé sóg ke mũ ã mỹ, sỹ ke há vễ,” he mũ, Herodes ti.

⁸ Kÿ fi tóg ã mỹnh fi mỹ ke mũ. Kÿ fi mỹnh fi tóg fi krĩn mũ, fi tỹ João krĩ to vĩ jé. Kÿ fi tóg to vĩ mũ sir. “Inh mỹ ùri João Batista krĩ tỹ pénky kãkã nĩm,” he fi tóg mũ, Herodes mỹ.

⁹ Kÿ tóg ti mỹ e tĩ sir, ti tỹ ti tén jé. Hã ra tóg fi mỹ: “sỹ ke há vễ,” he ja nĩ, kÿ ti mré jẽg mũ ag vỹ mẽ kãn ja nĩ. Kÿ tóg fi mỹ: “hej,” he mũ sir.

¹⁰ Kÿ tóg soldado jẽnẽg mũ sir, ti tỹ João krĩ kym jé. Hã ra João tóg vễse ja kãkã nĩ nĩ.

¹¹ Kÿ tóg ti krĩ kym mũ sir. Pénky kãkã nĩm kÿ tóg fi mỹ nĩm mũ, tátãg fi mỹ, ti krĩ ti. Kÿ fi tóg fi mỹnh fi mỹ ma tĩ mũ.

¹² Kÿ ti mré mũ tĩ ag tóg mẽ kÿ ti vyn kãmũ mũ, vãnh kej tá ti fón jé. Tĩ fón kar kÿ ag tóg Jesus mỹ tónh kãmũ mũ.

Jesus tỹ ùn e jẽn

(Mc 6.30-44; Lc 9.10-17; Jo 6.1-14)

¹³ Jesus tỹ João ter mẽ kÿ tóg tá kãkutẽ mũ, canoa kãmĩ. Kÿ tóg êmã tũg ja ra tĩ mũ sir, ã pir mỹ nĩ jé. Hã ra vãnh e ên tóg ti tũg mẽg mũ. Kÿ ag tóg ti nón mũ mũ, ãjag pẽn kã, êmã kar tá kãmũ kÿ.

¹⁴ Kÿ Jesus tóg kafã ù tá vag ke mũ, kÿ tóg tá ùn e ên ag vég mũ sir, ti nón kãmũ mũ ag. Kÿ ag tóg ti

mỹ jagãgtar nỹtĩ. Ag jagãgtãn kỹ tóg ùn kagyga ag tỹ há' he mũ sir.

¹⁵ Ti tỹ ùn e tỹ hághá' hen kỹ tóg rãké nỹ sir, ti tỹ ag kanhrãn ki. Kỹ ti mré mũ tĩ ag tóg ti mỹ tó jé kãmũ mũ. “Rãké ti nỹ ha,” he ag tóg mũ, ti mỹ. “Tag mũ tóg ãmã tũ tĩ. Kỹ tóg ã tỹ ag jẽgnẽnh há tĩ, ag tỹ ãmã ù ra mũ jé, vễjẽn comprar he jé,” he ag tóg mũ, Jesus mỹ.

¹⁶ Hã ra Jesus tóg ag mỹ: “ha inhhã ag jẽn, kỹ ag tóg hẽ ra mũnh ke tũ nĩ.” he mũ.

¹⁷ Kỹ ag tóg ti mỹ: “hã ra tóg tũ tĩ, vễjẽn tĩ,” he mũ. “Pão tỹ 5 (ke) vỹ ki nỹtĩ, pirã régre ke gé,” he ag tóg.

¹⁸ Kỹ tóg ag mỹ: “inh mỹ ma kãmũ jẽg ge,” he mũ.

¹⁹ Kỹ tóg ùn e ãn ag mỹ tó mũ, ag tỹ re tá nĩgnĩ kỹ nỹtĩ jé. Kỹ tóg pão tỹ 5 (ke) ãn mág mũ, pirã régre ãn ke gé. Kỹ tóg kankã ki ẽvãnh mũ sir, vễjẽn ãn to tóg Topẽ mré vĩ mũ sir. Kỹ tóg pão kénh kỹ ã mré mũ tĩ ag mỹ vin mũ sir, ag tỹ vễnh ken jé sir, ùn e ãn ag mỹ.

²⁰ Kỹ vễnh kar tóg ko kãn kỹ funfór mũ sir. Hã ra tóg kén mũ. Kễ tỹ 12 (ke) fãn ag tóg mũ, ti ke tỹ.

²¹ Pão ko mũ ãn ag tóg tỹ mil tỹ 5 (ke) nỹtĩ, ùn tỹtá mré tó tũ, fag krẽ mré tó tũ, hã ra fag tóg tá e nỹtĩ gé mỹr, ha mẽ.

Jesus tỹ goj kri tĩg

(Mc 6.45-52; Jo 6.15-21)

²² Kỹ tóg ã mré mũ tĩ ag mỹ tó mũ, ag tỹ canoa kãmĩ mũ jé, ag tỹ ti jo kafã ù ra mũ jé. “Isỹ ver ùn e tag ag mỹ: ha mũjẽg, henh ke vễ,” he tóg ag mỹ.

²³ Kỹ tóg ùn e ag mỹ: “ha mũjẽg,” he mũ sir. Kỹ tóg pãnónh to tãpry mũ, Topẽ mré vĩ jé. ã pir mỹ tóg tá

nĩ nĩ. Kĩ tóg kutyg mũ sir. Hã ra Jesus tóg pãnónh tá nĩ nĩ.

²⁴ Kĩ canoa tóg nig kãmĩ tĩ mũ sir, kafã ù ra. Nig fyr tóg kór gy nĩ sir, kuvar gy ti nĩ ha. Kĩ goj tóg krém krém ke sa nĩ, kũ tóg ag kutân kũ nĩ nĩ, goj ti. Kãka vỹ ag kato tẽ mũ, hã kũ ag tóg mũ kónãn mũ.

²⁵ Kĩ kurã ke ra Jesus tóg ag to kãtĩ mũ, goj kri tĩg kũ, ã pẽn kã.

²⁶ Kĩ ti mré mũ tĩ ag tóg ti vég mũ, ti tỹ goj kri tĩg kũ, kũ ag fe tóg jũrũn ke mũ. “Vẽnh kuprĩg vỹ,” he ag tóg mũ. Kamẽg kũ ag tóg vễkrẽnkřẽ mũ sir.

²⁷ Hã ra Jesus tóg ag mré vēmén mũ sir. “Kamẽg tũg nĩ, inh hã vỹ,” he tóg. “Jũrũn ke tũg nĩ,” he tóg.

²⁸ Kĩ Pedro tóg ti mỹ: “ã hã mỹ?” he mũ. “Kỹ inh mỹ tó, isỹ ã to tĩg jé, goj kri tĩg kũ,” he tóg, Pedro ti, Jesus mỹ.

²⁹ Kĩ Jesus tóg ti mỹ: “kunĩg ge,” he mũ. Kĩ Pedro tóg canoa ki kutẽ kũ goj kri tĩ mũ sir, Jesus to.

³⁰ Goj kri tĩg kũ tóg vãhã kãka ki êvãnh mũ, kũ tóg kamẽg mũ sir. Kamẽg kũ tóg goj ki pun ke mũ. Kĩ tóg prẽr mũ. “Senhor, inh kren han nĩ,” he tóg mũ, prẽr kũ.

³¹ Kĩ Jesus tóg vễsỹmér ti kãgmĩg mũ. Kĩ tóg ti mỹ: “inh ki rã há han tũ ã tóg nĩ, vỹ,” he mũ. “Ã hã ne tóg: inh mỹ tá jun mũ vỹ? he mũ!, hã kũ ã tóg ki pun ke kren mũ,” he tóg, Jesus ti, Pedro mỹ.

³² Kĩ ag tóg canoa kãki ge mũ sir. Ag tỹ ki ge kũ kãka tóg tũ! he mũ, kóho ên.

³³ Kĩ tóg ag mỹ há tĩ, canoa kãki nỹtĩ ag mỹ. Kĩ ag tóg Jesus ki ge há han kũ ti mỹ vỹ há han mũ sir. “Topẽ kósin vỹ tỹ ã nĩ, mỹr,” he ag tóg mũ sir ti mỹ.

*Jesus tỹ Genesaré tá jun**(Mc 6.53-56)*

³⁴ Kỹ ag tóg kafã ù tá junjun kỹ (ag tóg) vag ke mũ sir, emã tỹ Genesaré tá.

³⁵ Tá ke ag tóg ãjag tỹ Jesus ve kỹ ti ki kanhrãn mũ. Kỹ ag tóg ti to vãnh vĩ jẽnẽg mũ sir, vãnh kar mỹ, ga kar ẽn mĩ hã. Kỹ ag tóg ùn kagyga ag tañ kãmũ mũ, Jesus to.

³⁶ Kỹ ag tóg Jesus mỹ to vĩ mũ, ag tỹ hẽn ri ke mũn ti kur mráj mẽ jé. Kỹ ag tóg há' há' he kãn mũ sir, ag tỹ ti kur mẽn kỹ.

15*Judeu ag jykre si**(Mc 7.1-13)*

¹ Kỹ kejẽn Fariseu ù ag tóg Jerusalém tá junjun mũ, Jesus tá, Topẽ vĩ to professor ag mré hã. Jesus mỹ ag tóg vĩ mũ.

² “Á mré mũ tĩ ag ne tóg ẽg jykre si mranh tĩ,” he ag tóg. “Ëg jykre si ki ẽg tóg nĩgpég tĩ, ẽg jẽn ke jo, hã ra ag tóg nĩgpég tũ ra jẽg tĩ,” he ag tóg.

³ Kỹ Jesus tóg ag mỹ: “ãjag hã vĩ Topẽ vĩ mranh tĩ, ãjag tỹ ãjag jykre si han kỹ,” he mũ.

⁴ “Topẽ tỹ ẽg mỹ tón hã vễ, ha mẽ: “ã mỹnh fi mré ã panh kamẽg nĩ, fag jagãgtãn nĩ,” he ja tóg nĩ. Kỹ tóg tag tó gé, ha mẽ: “ũ tỹ ã han mũ fag mỹ vĩ kónãn mũ ẽn tén jé ã tóg ke mũ,” he ja tóg nĩ gé, Topẽ ti.

⁵ Ti jãvo ãjag tóg tag tó tĩ, ha mẽ: “ã panh mỹ nén ù nĩm tũg nĩ, ã mỹnh fi mỹ nén ù nĩm tũg nĩ, ã tỹ fag mỹ: “sỹ ãjag mỹ nén ù nĩm ke vễ vễ, hã ra sóg Topẽ mỹ nĩm sór mũ,” hen kỹ. Û tỹ tag han kỹ tóg há tĩ,” he ãjag tóg tĩ.

⁶ Hã kȳ ãjag tóg Topě vī tỹ tũ' he tĩ, ãjag tỹ ãjag jykre si hã han kȳ," he tóg, Jesus ti.

⁷ "Krĩ régre ãjag nỹtĩ, ha mẽ. Hã kȳ Isaías vỹ ãjag to vī ja nĩgtĩ, ti tỹ tag tó kȳ, ha mẽ.

⁸ "Povo tag vỹ ãjag nũnẽ hã tỹ inh mỹ vī há han tĩ, hã ra ag jykre pi(jé) tỹ inh jykre nỹ'," he ja tóg nĩ.

⁹ "Fagrĩnh mỹ ag tóg iso grĩnh ke tĩ, hã ra ag tóg ěpra ke ag jykre to: Topě tỹ tón hã vẽ, he tĩ," he ja tóg nĩgtĩ, Isaías ti," he tóg, Jesus ti. "Ki hã tó ja tóg nĩ, ãjag to, ãjag krĩ régre nỹtĩn kȳ," he tóg, Jesus ti.

*Ne tỹ ěg kavénh
(Mc 7.14-23)*

¹⁰ Kȳ tóg vėnh kar jé prěr mũ sir, ag tỹ ti rã hã nỹtĩ jé, ti vī jėmẽ há han jé. Kȳ tóg ag mỹ: "ha mẽ, sỹ nén tó mũ ti, kȳ to jykren nĩ gé," he mũ.

¹¹ "Ěg jėn pi(jé) ěg kavénh tĩ'," he tóg. "Ěg jėnky kã ra ěg tóg rãg tĩ, vėjėn ti. Nén ũ tỹ ěg ki kãpa hã vỹ ěg kavénh tĩ, ha mẽ," he tóg.

¹² Kȳ ti mré mũ tĩ ag ti to kãmũ kȳ ti mỹ: "ha mẽ," he mũ. "Fariseu ag vỹ ã to jũ nỹtĩ, ã tỹ ag mỹ: vėjėn pi(jé) ěg kavénh tĩ', hen kȳ," he ag tóg ti mỹ.

¹³ Kȳ tóg ag mỹ: "ěg jóg mág tỹ nén krãn ja tũ vãm kȳ nĩ kãn ke vẽ, ěg jóg tỹ kanhkã tá nĩ tỹ nén krãn ja tũ ěn ti," he mũ. "Ag pi(jé) tỹ Topě krě nỹtĩ', Fariseu ěn ag, hã kȳ tóg ag vãm ke mũ," he tóg.

¹⁴ "Hã kȳ ag to jykren tũg nĩ. Ũn kyvó ag mỹ ag tóg: "sỹ ã jãmĩ tĩg ke vẽ," he tĩ, hã ra ag tóg ti kóm kyvó nỹtĩ gé, kȳ ũn kyvó tỹ ũn kyvó jãmĩ tĩg kȳ ag tóg kãgnó ki vár ke mũ, ha vemnĩ," he tóg, Jesus ti. Ag tỹ nũgme ki vár to ken hã vẽ, hã vỹ: kãgnó ki vár ke mũ, he mũ.

15 Kÿ Pedro tóg ti mÿ: “Ëg mÿ kãmén há han nÿ, ã vÿ tag,” he mÿ.

16 Kÿ Jesus tóg ti mÿ: “kÿ ãjag mÿ ver ki kanhrãn tũ nÿtÿ?” he mÿ.

17 “Mÿ ãjag tÿ to jykrén tũ tÿ?” he tóg. “Ha vé, Ëg tÿ Ëg jën tÿ Ëg jënky kãra rãg kÿ tóg Ëg nug kãra rã mÿ, kar Ëg tóg gón mÿ sir.

18 Nén ù tÿ Ëg ki kãpa vÿ tÿ Ëg jykre nÿ, hã kÿ tóg Ëg kavénh tÿ.

19 Nén ù tÿ Ëg ki kãpa hã vÿ, ha mÿ: jykrén kónãn, ù tén, ã prũ tũ fi mré nÿ, ã mén tũ mré nÿ, ùn mén tũ fag to én, nén ù péju, ù to ón, ù to vÿ kónãn.

20 Nén ù tÿ Ëg ki kãpa hã vÿ, Ëg kavénh tÿn hã vÿ. Ëg tÿ nÿgpég tũ ra jën kÿ ti pi(jé) Ëg kavénh tÿ,” he tóg, Jesus ti.

*Canaã tá ke fi tÿ Jesus mré vëmén
(Mc 7.24-30)*

21 Kÿ Jesus tóg tá kutë kÿ (tóg) ga ù ra tÿ mÿ, cidade tÿ Tiro ra, cidade tÿ Sidom ra.

22 Ti tÿ tá jun kÿ ù fi tóg ti venh kãtÿ mÿ. Ga tÿ Canaã tá ke fi vÿ. Kÿ fi tóg Jesus tá jun mÿ, kÿ fi tóg prër mÿ. “!..Senhor, Davi kósin..!” he fi tóg. “!..Inh jagãgtãn ra..!” he fi tóg. “!..Inh kósin fi vÿ jagrë kórég tãvÿ nÿ, ã tÿ inh mÿ ti kutëm há tóg te..!” he fi tóg, prër kÿ.

23 Hã ra Jesus tóg fi mÿ vÿ tũ nÿ. Kÿ ti mré mÿ tÿ ag tóg ti to kãmÿ kÿ ti mÿ: “ã mÿ fi ve sór tũ nÿ, fi tÿ kar kÿ ã ñn ra tÿg jé?” he mÿ. “Ëg nón fi tóg Ëg jé prër mÿ, kÿ tóg Ëg mÿ e tÿ,” he ag tóg, Jesus mÿ.

24 Hã ra tóg ag mÿ: “vó,” he mÿ. “Topë vÿ inh jënë, sÿ Israel ag tÿ há' he jé inhhã, ù tÿ Israel kãmÿ Topë

vĩ mranh mũ ag tỹ,” he tóg, Jesus ti. Hã ra fi tóg tỹ fóg nĩ, hã kỹ tóg fi ve sór tũ nĩ.

²⁵ Kỹ fi tóg ti tá jun mũ sir. Ti krêm fi tóg grĩnh ke mũ. Kỹ fi tóg ti mỹ: “Senhor,” he mũ. “Ã mỹ inh jagãgtãn ke tũ?” he fi tóg.

²⁶ Hã ra Jesus tóg fi mỹ: “há tũ tóg nĩ, ã tỹ nén to vĩ mũ ti,” he mũ. “Ëg krẽ jamĩ vỹ tỹ ãg krẽ tũ nĩ, kỹ ãg tóg cachorro mỹ fón vanh nĩgtĩ, ãg krẽ jamĩ ti,” he tóg, Jesus ti.

²⁷ Kỹ fi tóg ti mỹ: “hỹ,” he mũ. “Hã ra cachorro sĩ ag tóg ãmĩ mru ãn ko tĩ, mesa krêm,” he fi tóg, Jesus mỹ. “Hã kỹ inh kósın fi tỹ há' hemnĩ, ãg tỹ tỹ cachorro ãn ri ke nỹtĩ kỹ,” he fi tóg, Jesus mỹ.

²⁸ Kỹ tóg ãn tỹtá ãn fi mỹ: “inh ki rã tãvĩ han ja ã tóg nĩ,” he mũ. “Hã kỹ sóg ã mỹ han mũ, ã tỹ inh mỹ nén to vĩ mũ tag,” he tóg fi mỹ. Ti tỹ tag tó kỹ fi kósın fi tóg há' he mũ, hora ãn kã.

Jesus tỹ ãn e ag tỹ há' he

²⁹ Kỹ Jesus tóg cidade tá kãkutẽ kỹ (tóg) goj nig fyr jagma tĩ mũ, nig tỹ Galiléia ãn fyr jagma. Kỹ tóg pãnónh to tãpny mũ, kỹ tóg nĩ mũ.

³⁰ Kỹ ãn tỹ hẽn ri ke ag vỹ junjun mũ, ãn kagyga ag ke gé, ãn kãnhgrĩ ag ke gé, ãn tĩg vanh ag ke gé, ãn kaga ã ag ke gé. Ti ki ag tóg junjun mũ, kỹ tóg ag tỹ hághá' he kãn mũ.

³¹ Kỹ tóg vãnh kar ãn mỹ e tĩ, ag tỹ tag ven kỹ. ãn vĩ vanh ag tóg vĩ há nỹtĩ, ãn kónhgrĩ ag tóg mũ há nỹtĩ, ãn kyvó ag tóg ãvãnh há nỹtĩ. Kỹ ag tóg Topẽ mỹ vĩ há han mũ sir, Israel ag.

Jesus tỹ ãn e ã jẽn mãn (Mc 8.1-10)

³² Kÿ Jesus tóg ã mré mũ tĩ ag jé prër mũ. Kÿ tóg ag mÿ: “inh mÿ ag tóg jagãgtar nÿtĩ, ùn e tag ag,” he mũ. “Kurã tãgtũ han ag tóg mũ ãg mré. Hã ra ag tóg vjẽn ve ja tũ nĩgtĩ. Kÿ tóg sÿ ag jęg tũ ra ag jëgnë jãvãnh tĩ, ag jamã ra. Ag mũn kÿ ù ag hÿn kãgter ke mũ, kókĩnkĩr kÿ,” he tóg.

³³ Kÿ ti mré mũ tĩ ag tóg ti mÿ: “ki ti ãmã tũ nĩ, ki ti ga kórég nĩ,” he mũ. “Ëg hÿn hẽ tá vjẽn venh mũ, ãg tÿ ùn e tag ag jẽn jé?” he ag tóg ti mÿ.

³⁴ Kÿ Jesus tóg ag mÿ: “ẽmĩ tÿ hẽ ri ke nÿ ki nÿtĩ ge?” he mũ. Kÿ ag tóg: “ũ tÿ 7 (ke) vë, kãkufár pipir ke gé,” he mũ.

³⁵ Kÿ tóg ùn e ag mÿ tó, ag tÿ nĩgnĩ kÿ nÿtĩ jé, ga kri.

³⁶ Kÿ tóg ẽmĩ tÿ 7 (ke) mãg mũ, pirã mré, kÿ tóg to Topë mré vĩ mũ. Kÿ tóg vënh kãkénh mũ, ẽmĩ ti. Kÿ tóg ã mré mũ tĩ ag mÿ vìn mũ, ag tÿ vënh kar mÿ kã vënh ken jé. Kÿ ag tóg kã vënh ken mũ mũ.

³⁷ Kÿ ag tóg ko kãn mũ, funfór ag tóg mũ, hã ra tóg kén mũ. Kre tÿ 7 (ke) ẽn fãn tóg mũ sir, ẽmĩ kén ti, Jesus mré mũ tĩ ag tÿ génh kÿ.

³⁸ Û tÿ ko mũ ag vÿ ù tÿ 4 mil (ke) nÿtĩ, ag tâvĩ, ùn tÿtã mré tó tũ, ag krë mré tó tũ. Hã ra fag tóg tá e nÿtĩ gé.

³⁹ Kÿ Jesus tóg ag jëgnëg mũ sir, ag jamã ra. Kÿ tóg canoa ki rã mũ sir, ẽmã tÿ Magadã tá ga ra tĩg jé, ã mré mũ tĩ ag mré.

16

*Ag tÿ Jesus mÿ milagre to vĩ
(Mc 8.11-13; Lc 12.54-56)*

¹ Kÿ Fariseu ù ag tóg Jesus tá junjun mũ, Saduceu ag mré há. Ag tÿ òn kÿ ti ki jëmẽ sór vë, ag tÿ kar ti kato vï jé. Kÿ ag tóg ti mÿ milagre to vï mũ. Ag tÿ ti jykre to: “Topê jykre mÿ vÿ?” he sór vë.

² Hã ra Jesus tóg ag mÿ: “ta to jykrén há ãjag nÿtĩ, ãmé to ke gé,” he mũ. “Rãkãnh kÿ ãjag tóg kanhkã ki êvãnh tĩ. Rãren kÿ ãjag tóg: “ẽmãnh ke vë,” he tĩ.

³ Kÿ kusã ki ãjag tóg kanhkã ki êvãnh tĩ gé. Kanhkã pÿr kÿ ãjag tóg sir: “ta vÿ kutẽnh mũ, kanhkã vÿ pÿr mũ,” he tĩ. Tó há han ãjag tóg tĩ, rãre ve kÿ, kanhkã pÿr ven kÿ ke gé. Hã ra ãjag tóg inh ki kagtĩg nÿtĩ, ãjag tÿ sÿ nén han mũ vég mũ ra. Hã kÿ ãjag tóg: “Topê jykre mÿ vÿ?” he tĩ.

⁴ Kórég ãjag nÿtĩ, ãjag tÿ Topê ki ge jãvãnh nÿtĩn kÿ. Ûri ke kar vÿ ãjag ri ke kórég nÿtĩ. Milagre venh ke tũ ãjag tóg nĩ. Vãsÿ Topê vï tó tĩ ù tóg nĩgtĩ, há vÿ: Jonas, he mũ. Jonas tÿ nén ve ja ri ke há ve jé ãjag tóg ke mũ, ùri,” he tóg, Jesus ti. Kÿ tóg ag ré kÿ tĩ mũ sir.

*Fermento to comparação ù
(Mc 8.14-21)*

⁵ Kÿ tóg ã mré mũ tĩ ag mré tĩ mũ, goj nig kafã ù ra. Ag tÿ kafã ù tá junjun kÿ ag tóg ẽmĩ to jykrén mũ sir, Jesus mré mũ tĩ ag. Kã jatun kÿ ag tóg nÿtĩ ja nĩ, kÿ tóg tũ tĩ sir, ẽmĩ tĩ.

⁶ Kÿ Jesus tóg ag kanhrãnh mũ. “Fariseu ag tÿ fermento há(r) kamẽg nĩ, Saduceu ag tÿ fermento há(r) ke gé,” he tóg mũ, Jesus ti.

⁷ Kÿ ag tóg jagnẽ mré vï mũ sir, Jesus vï tag to. “Tĩ tÿ ẽg tÿ pão mãg tũ ẽn tó hÿn,” he ag tóg mũ, jagnẽ mÿ.

⁸ Hã ra Jesus tóg ki kanhró nĩ, ag tỹ nén tó mũn ki. Kĩ tóg ag mỹ tó mãn mũ. “Inh ki ge há han tũ ãjag tóg nĩ ver,” he tóg. “Hã kĩ ãjag tóg jagně mỹ: pão tũ, he mũ.

⁹ Ver tóg ãjag tỹ to jykrén tũ tĩ'. Pão tỹ 5 (ke) ěn mĩ ěkrén nĩ. Ũ tỹ mil tỹ 5 (ke) ag tóg ko kãn, hã ra tóg kén, ag kar tỹ ko mũ ra. Ti ke hỹn kěj tỹ hě ri ke fãn?” he tóg. Kĩ ag tóg ti mỹ tó mũ sir.

¹⁰ Kĩ tóg ag mỹ: “jo pão tỹ 7 (ke) ěn ti. Ũ tỹ mil tỹ 4 (ke) ag vỹ kó, hã ra tóg kén, ag kar tỹ ko mũ ra. Ti ke hỹn kěj tỹ hě ri ke fãn?” he tóg. Kĩ ag tóg ti mỹ tó mũ gé sir.

¹¹ Kĩ tóg ag mỹ: “kỹ inh vĩ to jykrén nĩ,” he mũ. “Pão tó tũ sóg nĩ. Fermento pě tó tũ sóg nĩ. To jykrén há han nĩ, ha mẽ. Fariseu ag tỹ fermento há(r) kaměg nĩ, Saduceu ag tỹ fermento há(r) kaměg nĩ gé, he sóg mũ ãjag mỹ,” he tóg, Jesus ti.

¹² Kĩ ag tóg to jykrén há han mũ sir vãhã. Ti tỹ fermento pě tó pijé'. Ti tỹ Fariseu ag jykre tó ja vě, Saduceu ag jykre ke gé. Ag jykre hã to tóg: “ěn kaměg nĩ,” he ja nĩ, Jesus ti.

*Pedro tỹ Jesus kãmén
(Mc 8.27-30; Lc 9.18-21)*

¹³ Kĩ Jesus tóg cidade tỹ Cesaréia Filipe tá ga ra tĩ mũ, ti mré mũ tĩ ag mré. Kĩ tóg ag mỹ: “tỹ sóg ěprã ke fi kósín nĩ,” he mũ. “Kĩ ag iso hě ri ke tĩ?” he tóg mũ, ag mỹ.

¹⁴ Kĩ ag tóg ti mỹ. “ũ ag tóg ã to: João Batista vě, he tĩ,” he mũ. “Jãvo ũ ag tóg: Elias vě, he tĩ, ã to. Jãvo ũ ag tóg: Jeremias vě, he tĩ gé, jãvo ũ ag tóg: Topě vĩ tó tĩ ũ vě, he tĩ gé, ã to,” he ag tóg, Jesus mỹ.

15 Kÿ tóg ag mÿ: “ag jãvo ãjag hẽ ri ke tĩ, iso?” he mũ.

16 Kÿ Simão Pedro tóg ti mÿ: “tÿ ã Cristo nĩ,” he mũ. “Topẽ kósin vÿ tÿ ã nĩ. Topẽ vÿ rĩr nĩ, kÿ ã hã vÿ tÿ ti kósin nĩ,” he tóg, Pedro ti, Jesus mÿ.

17 Kÿ Jesus tóg ti mÿ: “Simão!,” he mũ, “João kósin!,” he tóg. “Ëprã ke tÿ ã mÿ tó pijé!,” he tóg. “Inh jóg tÿ kanhkã tá nĩ ên tÿ ã mÿ tó vẽ, isÿ tÿ ti kósin nĩ ti. Hã kÿ tóg ã ve há han mũ, Topẽ ti,” he tóg, Pedro mÿ.

18 “Ha mẽ, tÿ ã Pedro nĩ, hã vÿ: pó, he mũ. Pãró tag kri sóg isũ han mũ, tÿ ãn ri ke ên, hã vÿ: ã tÿ ag mÿ inh vĩ tó tigrĩn ag tóg inh ki genh ke mũ, he mũ. Kÿ ù tÿ inh ki ge kÿ nÿtĩ ag vÿ tÿ igreja ri ke nÿtĩ. Ag fár tÿ tũ! he mũ ra ag tóg rĩnrĩr mãn ke mũ. Tũ! henh ke tũ ag nĩ.

19 Ëprã ke ag vÿ kanhkã ra mũnh mũ, ã vĩ ki. Jãnkã ri ke ti nĩ, kanhkã ra ge jafã ti, kÿ sóg ã hã mÿ ti nón jafã ti fig mũ sir, ti chave ti. Kÿ ã tÿ ù mÿ: “kanhkã ra tĩg ke tũ ã tóg nĩ,” hen kÿ tóg ra tĩg ke tũ nĩ. Kÿ ã tÿ ù mÿ: “kanhkã ra ã tóg tĩg ke mũ,” hen kÿ tóg ra tĩg ke mũ,” he tóg, Jesus ti, Pedro mÿ.

20 Kÿ tóg ã mré mũ tĩ ag mÿ tó mũ, ag tÿ ti kãmén tũ nĩ jé ver. “Ker ù mÿ sÿ tÿ Cristo nĩ tó hẽ!” he tóg mũ ag mÿ.

*Jesus tÿ ã ter ke tó vén
(Mc 8.31-9.1; Lc 9.22-27)*

21 Kÿ tóg ag mÿ ã jagtar ke kãmén nĩ nĩ. ã mré mũ tĩ ag mÿ tóg komẽr hã tó mũ. “Kãnhmar sóg Jerusalém ra tĩg mũ ha,” he tóg mũ. “Tá sóg hã ra jagtar ke mũ. Kófa ag vÿ iso kórég nÿtĩnh mũ, ha vemnĩ, Topẽ tũ ki rĩr tĩ to pã'i ag, Topẽ vĩ to

professor ag ke gé. Ag tỹ isén ke vē, kỹ sỹ kurã tãgtũ ki rĩr mãn ke vē,” he tóg, Jesus ti.

22 Kỹ Pedro tóg ti pin kỹ ti mré vĩ mũ, ti tỹ tag to jykrén tũ nĩ jé. “Senhor,” he tóg, “Topẽ jé ã jy nĩgãn, ã tỹ ã jagtar ke tag vég tũ nĩ jé,” he tóg, Pedro ti, Jesus mỹ.

23 Hã ra Jesus tóg vēsỹjãm ěvãnh kỹ ti mỹ vĩ tar han mũ sir, ti to jũ kỹ. “Kutĩg, Satanás,” he tóg, Pedro mỹ. “Isỹ Topẽ vĩ mranh han sór ã tóg mũ,” he tóg. “Ã pi(jé) Topẽ jykre tó mũ! Ěprã ke jykre vē, ã tỹ inh mỹ nén tó mũ tag ti,” he tóg, Jesus ti, Pedro mỹ.

24 Kỹ tóg ã mré mũ tĩ ag mỹ vĩ mãn mũ. “Ãjag tỹ inh mré kãmũ kỹ tóg há tĩnh mũ,” he tóg. “Kỹ ãjag jykre tovãnh nĩ, ãjag tỹ isũ tãvĩ hã han jé. Ha vé, ag tỹ inh cruz tỹ inh kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vẽnh nenh ke tũ sóg nĩ. Isỹ tag han ri ke han nĩ, ãjag tỹ inh mré mũ sór nỹtĩn kỹ,” he tóg.

25 “Ãjag tỹ ãjag jykre hã han kỹ ãjag tỹ nũgme ki vár ke vē. Jãvo ãjag tỹ isugrĩn ãjag jykre tovãnh kỹ ãjag krenkren ke vē, ãjag kãgter ke mũ (hã) ra.

26 Hẽn ri ke mũn ãjag hỹn mundo ki nén ù kar ganhar henh ke mũ, hã ra ãjag kuprĩg vỹ vãfor ke mũ. Kỹ tóg kórég nỹ. Ěg tỹ ne tỹ ěg kuprĩg kajãm ke tóg tũ tĩ, ěg tỹ ti ve mãn jé,” he tóg.

27 “Tỹ sóg ěprã ke fi kósin nĩ. Kãtĩg mãn jé sóg ke mũ, kanhkã tá, isỹ jěgně jafã ag mré, inh jóg tỹ isỹ ùn mág han ti kỹ. Kỹ sóg vẽn h kar mỹ ãjag tỹ nén han ja kaja ěn ven ke mũ.

28 Ha vé, ki hã sóg tó mũ. ãjag kãmĩ ù ag tóg Topẽ tỹ tỹ ěg pã'i nĩ venh ke mũ, ãjag ter ke to hã, tag ki

ẽg mré nýtĩ ù ag. Ęprã ke fi kósin ẽn ve jé ag tóg ke mũ, ti tỹ tỹ pã'i nĩ ti. Inh hã vễ," he tóg, Jesus ti.

17

Jesus tỹ Moisés mré Elias mré vēmén
(Mc 9.2-13; Lc 9.28-36)

¹ Kar kurã tỹ 6 (ke) tũg kỹ Jesus tóg ag mỹ: “mũ nỹ, vyr mỹ,” he mũ. Pedro mỹ tóg ke mũ. Tiago mỹ ke gé, ti jãvy tỹ João mỹ ke gé. Ag hã mré tóg tĩ mũ, pãnónh ra.

² Kỹ tóg ag jo vễnh ve ù han mũ sir, kỹ ti kakã tóg kókov nĩ. Rã ri ke tóg nĩ, ti kakã ti. Ti kur vỹ kóprėj nĩ gé, jẽngrẽ ri ke.

³ Kỹ vãhã Moisés tóg ag mỹ vễnh ven mũ sir, Elias ti ke gé. Jesus mré ag tóg vēmén mũ.

⁴ Kỹ Pedro tóg Jesus mỹ: “Senhor,” he mũ. “Tag ki tóg sér tĩ,” he tóg. “Ęg mỹ pãjó tãgtũ han mũ', ã mỹ', Moisés mỹ', Elias mỹ ke gé'?” he tóg, Pedro ti, Jesus mỹ.

⁵ Pedro tỹ ver vēmén mũ ra kanhkã góg kókov tóg ag kri rũm ke mũ. Kỹ vễnh vĩ tóg mễ há' he mũ, kanhkã góg kãtã, kỹ tóg: “inh kósin pir hã vễ,” he mũ. “Ti vĩ jẽmễ ra,” he tóg, Topẽ ti.

⁶ Kỹ Jesus mré mũ tĩ ag tóg mễg mũ, kỹ tóg ag mỹ e tĩ. Ag mỹ e tĩn kỹ ag tóg mũg ke mũ sir.

⁷ Kỹ Jesus tóg ag to kãtĩg kỹ ag mễg mũ sir, ã nĩgé tỹ, kỹ tóg ag mỹ: “nĩgnĩ ra,” he mũ. “Mũmễg tũg nĩ,” he tóg mũ.

⁸ Kỹ ag tóg mĩ ẽvãnh mũ, hã ra ag tóg Jesus hã vэг mũ. Ti mré vēmén mũ ag ve mãn tũ ag tóg nĩ, kanhkã tá kãmũ ẽn ag.

⁹ Kÿ ag tóg pãnónh tá kãre mũ sir. Ag mũn kÿ Jesus tóg ag mẽ: “ker ù mẽ tó hẽ’,” he mũ. “Ăjag tÿ ùri nén vég mũ tag tó tũg ñi ver,” he tóg. “Sÿ iser ja tá vÿn ke kar hã kãmén ñi,” he tóg, Jesus ti.

¹⁰ Kÿ ti mré mũ tĩ ag tóg ti mẽ: “hã ra Topẽ vĩ to professor ag tóg Elias tó tĩ,” he mũ. “Kãtĩg jé tóg ke mũ ñeji, Cristo kãtĩg ke to hã, Elias ti. Hã mẽ’?” he ag tóg mũ, Jesus mẽ.

¹¹ Kÿ tóg ag mẽ: “hÿ,” he mũ. “Kãtĩg jé tóg ke mũ mẽr, nén kar han mãn jé, Elias ti.

¹² Ha mẽ, kãtĩg ti huri. Hã ra ag tóg ti ki kagtĩg ja nÿtĩgtĩ. Hã kÿ ag tóg ti vóg kónãn ja ñĩgtĩ, ag tÿ ti vóg kónãn sór kÿ. Hã kÿ ãprã ke fi kósin ên tóg, inh hã tóg ag tugrĩn jagtar ke mũ gé, ag tÿ inh vóg kónãn ken kÿ,” he tóg, Jesus ti.

¹³ Kÿ ag tóg vãhã ti tÿ nén tó mũ to jykrén mũ, ti mré mũ tĩ ag. “João Batista to ke ja vẽ, êg kygpég tĩ ên to ke ja vẽ, hã vÿ: Elias, he mũ, ti tÿ Elias ên ri ke ja ñĩn kÿ,” he ag tóg mũ sir, Jesus mré mũ tĩ ag.

*Jesus tÿ kyrũ tÿ há' he
(Mc 9.14-29; Lc 9.37-43a)*

¹⁴ Kÿ ag tóg vẽn h e ên tá junjun mũ sir. Kÿ ù tóg Jesus to kãtĩ mũ, ag kãmĩ ù. Ti krêm tóg grĩnh ke mũ, ã jakrĩ tÿ, kÿ tóg ti mẽ:

¹⁵ “Senhor,” he mũ. “Inh kósin jagãgtãn ñi,” he tóg. “Ter tĩ tóg ñĩgtĩ, to tóg jagtar tãvĩn tĩ. Kejẽn tóg pĩ ki kutẽ tĩ, ter tĩ ên han kÿ, kejẽn tóg goj ki kutẽ tĩ,” he tóg.

¹⁶ “Kÿ sóg ã mré mũ tĩ ag mẽ ti ven ja ñĩgtĩ, ag tÿ ti tÿ há' he jé, hã ra ag tóg ti tÿ hẽ ri ke tũ ñi,” he tóg, Jesus mẽ.

17 Kÿ Jesus tóg ti mÿ: “ãjag ne tóg inh ki rã há han tũ nÿgtĩ,” he mÿ. “Jykre pãno ãjag tóg nÿtĩ,” he tóg. “Kysã tÿ hën ri ke ki inh hÿn ãjag mré tÿnh ke mÿ?” Kysã tÿ hën ri ke ki inh hÿn ãjag to fe tÿnh mÿ?” he tóg. “Inh mÿ ti pére kãtÿg,” he tóg, Jesus ti, ti panh mÿ.

18 Ag tÿ ti mré kãmÿ kÿ Jesus tóg ti jagrê mÿ vÿ jũ han mÿ sir, ti tÿ ti tovãnh jé. Kÿ tóg vësÿmér ti ki kãkutê mÿ sir, kÿ tóg há' he mÿ vãhã, kyrũ ti.

19 Kÿ Jesus mré mÿ tÿ ag tóg ti ki jëmê sór mÿ. Vyr mÿ ag tóg Jesus mÿ: “ëg ne tóg ti tÿ há' he ja tũ nÿ,” he mÿ. “Hë ri ken kÿ hÿn?” he ag tóg mÿ, Jesus mÿ.

20 Kÿ tóg ag mÿ: “ãjag tÿ inh ki ge tũ nÿtĩ tugnÿn ke vë, ãjag tÿ inh vÿ kri fig tũ tugerÿn ke vë,” he mÿ. “Ha mẽ, ãjag tÿ inh ki ge sÿ han kÿ nÿtĩ ra ãjag tóg pãnónh tag mÿ: “ha tag ra tÿg,” he há nÿtÿnh mÿ vë. Æjag tÿ pãnónh mré vÿ kÿ tóg tÿg ke mÿ vë, ha mẽ, ãjag tÿ inh ki ge sÿ nÿtĩ ra. Ka tÿ mostarda fy vÿ sÿ tãvÿ nÿ. Æjag tÿ inh ki ge sÿ nÿtĩ ra, ka tÿ mostarda fy sÿ ên ri ke nÿtĩ ra tóg há tÿnh mÿ vë. Kÿ ãjag tóg pãnónh tÿn há nÿtÿnh mÿ vë. Nén kar han há ãjag nÿtÿnh mÿ vë, ãjag tÿ inh ki ge kÿ nÿtĩ ra.

21 Hã ra vënh jagrê kórég tÿ ge kutêm tóg jagy nÿ. Topê mré ëg tóg vÿnh ke mÿ, kÿ ëg tóg ti mré vÿ kÿ vãkrenh ke mÿ gé, nén ù ko tũ jé ëg tóg ke mÿ, kÿ tóg vãhã kutênh mÿ, vënh jagrê kórég tÿ ge ti,” he tóg, Jesus ti.

*Jesus tÿ ã ter ke tó mãn
(Mc 9.30-32; Lc 9.43b-45)*

22 Tag kar kÿ ag tóg ga tÿ Galiléia tá nÿtĩ. Kÿ Jesus tóg ag mÿ: “ëprã ke fÿ kósin vÿ jagtar nÿnh mÿ. Inh

hã vễ,” he măn mữ. “Ēprã ke ag vỹ ãjag tỹ isỹ nén han sór mữ ěn han ke mữ.

²³ Ag tỹ isén ke vễ. Ag tỹ isén kar kỹ sóg hã ra rĩr măn mữ, kurã tãgtũ tũg kỹ,” he tóg, Jesus ti. Ag tỹ ti vĩ tag mễ kỹ tóg ag mỹ e tãvĩ tĩ sir. Fe kaj ag tóg mữ sir, ti mré mữ tĩ ag.

Jesus tỹ imposto kajãm

²⁴ Kỹ ag tóg mữ măn kỹ (ag tóg) cidade tỹ Cafarnaum tá junjun mữ sir. Kỹ imposto kaja mãg tĩ ag tóg Pedro mỹ vĩ mữ, Topẽ jo ĩn jé imposto mãg tĩ ag. Imposto ěn kaja hã vỹ: jãnkamy régre, he mữ. Pedro mỹ ag tóg: “ãjag Senhor mỹ kajãm tũ nĩgtĩ?” he mữ.

²⁵ Kỹ tóg ag mỹ: “vó, kajãm ti tĩ,” he mữ. Kỹ tóg ã ĩn tá jun mữ sir, Pedro ti. Kỹ Jesus tóg ti mỹ vĩ mữ, imposto to, hã ra Pedro tóg ti mỹ nén ù tó ja tũ nĩ ver. Kỹ Jesus tóg ti mỹ: “Simão’,” he mữ. “Pã'i ag mỹ ã mỹ: “ha imposto kajãm,” he ja tũ nĩ?” he tóg, Jesus ti. “Tag to jykrén, ha mễ. Ag mỹ ãjag krẽ mỹ: “kajãm nĩ,” henh ke mữ', ãjag mré ke tũ ag mỹ, vó?” he tóg, Jesus ti, Pedro mỹ.

²⁶ Kỹ Pedro tóg ti mỹ: “ãjag mré ke tũ ag mỹ ag tóg: “kajãm nĩ,” he tĩ,” he mữ. Kỹ Jesus tóg ti mỹ: “hỹ, hã vễ,” he mữ. “Kỹ ag krẽ hỹn kajãm ke tũ nĩ vễ.

²⁷ Hã ra ag tóg ěg to jykrén kónãn sór mữ, ěg tỹ kajãm tũ to, ěg tỹ tỹ Topẽ mré ke nỹtĩ ra. Ag tỹ ěg to jykrén kónãn sór kỹ ěg hỹn tóg kajãm ke mữ, Topẽ jo ĩn jé imposto ěn, ěg tỹ tỹ Topẽ krẽ nỹtĩ ra, Israel krẽ ke gé. Hã kỹ pirã sygsam tũg, nig ěn tá. Sygsam kỹ jẽ kỹ ã tóg pirã kãgmĩnh mữ. Ā tỹ ùn kãgmĩ vén mữ ěn jẽnky tugnỹm nĩ. Jãnkamy vỹ kãkã nĩ, ti jẽnky

kākā, ã tỹ ãg jo kajãm jé, ã jo, ijo ke gé,” he tóg, Jesus ti. Kỹ Pedro tóg tĩ mũ sir. Jãnkamy vég tóg mũ sir. Kỹ tóg tỹ imposto kajãm tĩ mũ, Pedro ti.

18

Û tỹ ãg kãfór nĩ

(Mc 9.33-37; Lc 9.46-48)

¹ Kejẽn Jesus mré mũ tĩ ag tóg ti mỹ vĩ mũ, kỹ ag tóg: “kejẽn ãg tóg Topẽ tỹ tỹ ãg pã'i nĩ venh ke mũ,” he mũ. “Ëg tỹ ti ve kỹ ù tỹ hẽ nỹ hỹn ãg kãfór kar nĩ?” he ag tóg, Jesus mỹ.

² Kỹ Jesus tóg gĩr ù jé prẽr mũ, kỹ tóg ag kuju kã ti fẽg mũ, gĩr ti.

³ Kỹ tóg ag mỹ tag tó mũ, ha mẽ. “Gĩr ri ke han nĩ, ãjag tỹ Topẽ tỹ tỹ ãg pã'i nĩ ve sór kỹ, ke tũ nĩ (mũ) ra ãjag tóg venh ke tũ nĩ. Hã kỹ ãjag jykre tovãnh nĩ, gĩr jykre han jé,” he tóg.

⁴ “Gĩr pi(jé) ùn sanh kãfór sór nĩ'. Kỹ ti ri ke han nĩ. Jagnẽ kãfór nĩ sór tũg nĩ. “Ûn sĩ vĩ tỹ inh nĩ, gĩr ri ke vĩ tỹ inh nĩ,” hemnĩ, ãjag tỹ kar kỹ tỹ ùn mág kãfór kar nỹtĩ jé, Topẽ tỹ tỹ ãg pã'i nĩn kỹ,” he tóg.

⁵ “Ãjag hã vĩ tỹ inh mré ke nỹtĩ. ãjag tỹ inh mré ke nỹtĩn tugnĩn gĩr tỹ ge jẽ'ỹn nĩ, to há nỹtĩmnĩ, isugrĩn. ãjag tỹ isugrĩn ù tỹ ge to há nỹtĩn kỹ ãjag tóg iso há nỹtĩ gé,” he tóg, Jesus ti.

Inferno ki kutẽ mũ vĩ jagy pẽ nĩ

(Mc 9.42-48; Lc 17.1-2)

⁶ “Ûn sĩ tag tóg inh ki rã kỹ jẽ. Kejẽn ù tóg ùn sĩ tỹ inh vĩ mranh han sór mũ. Ën jykre vĩ kórég tãvĩ nĩ. Ën hã mỹ tóg há nỹnh mũ vễ, ù tỹ pó mág tỹ ti nunh

to sa kÿ goj nig ki ti fón jé, ti tÿ goj ki ter jé. Jagy tâvĩ tóg tĩ, ù tÿ gĩr tÿ isovãnh han kÿ,” he tóg, Jesus ti.

⁷ “Topê vÿ ag ve kónãn pẽ han ke mũ, ag tÿ ù tÿ iso há nÿtĩ ag krĩn kónãn kÿ. Ag tÿ ag krĩn kónãn kÿ tóg ag tÿ inh vĩ mranh ha mẽ tĩ. Û tÿ hẽn ri ke ag tóg ag krĩn kónãn tĩ. Hã ra ag tóg to jagãgtar tâvĩ han ke mũ gé. Topê vÿ ag ve kónãn pẽ han ke mũ, ag tÿ ù krĩn kónãn kÿ,” he tóg, Jesus ti.

⁸ “Ã tÿ nén ù vóg kÿ Topê vĩ mranh kÿ ã nĩgnó kym nĩ, ã tÿ ke mãn tũg jé. Ã tÿ hẽ kã tá tũg kÿ Topê vĩ mranh kÿ ã pẽn kym nĩ, ã tÿ ke mãn tũg jé. Jagy ti nÿ, ã nĩgnó pir ti, ã tũg vãnh ti ke gé. Ã tÿ nĩgnó régre ra nũgme ki kutê kÿ tóg jagy kãfór nĩ, ã tÿ pẽn régre ra inferno ki kutên kÿ, pĩ nhyr vãnh ên ki kutên kÿ mÿr. Ã tÿ rĩr krÿg ja tũ venh ke tóg hã ra há tĩ,” he tóg.

⁹ “Ã tÿ nén ù ki vễ'ĩ kÿ Topê vĩ mranh kÿ ã kanê ù nám nĩ, ã tÿ ke mãn tũg jé. Jagy ti nÿ, ã kyvó ti. Ã tÿ kanê régre ra nũgme ki kutê kÿ tóg jagy kãfór nĩ, ã tÿ inferno ki kutên kÿ, ã tÿ pĩ nhyr vãnh ên ki kutên kÿ. Ã tÿ rĩr krÿg ja tũ ên ve kÿ tóg hã ra há tĩ,” he tóg, Jesus ti.

*Carneiro vãfor to comparação
(Lc 15.3-7)*

¹⁰ “Hã kÿ gĩr to é he tũg nĩ. Û tÿ ag ki rĩr mũ ag vÿ kanhkã tá nÿtĩ, mÿr, ha mẽ. Topê tÿ jẽnê jafã ù ag vễ, ù tÿ gĩr ag ki rĩr mũ ag. Inh jóg mré ag tóg nÿtĩ, ti vég ag tóg nÿtĩ, ù tÿ gĩr ag ki rĩr mũ ag. Hã kÿ gĩr ag to é he tũg nĩ.

11 Tỹ sóg ěprã ke fi kósin nĩ. Ũn vãgfor mũ ěn ag krenkren han hã jé sóg jun ja nĩ, mýr, ha mẽ,” he tóg, Jesus ti.

12 “Tag to jykrén nĩ. Ũ tóg carneiro tỹ 100 (ke) tỹ mĕg nĩ. Kejĕn ti mĕg pir tóg vãfor ja nĩ. Kỹ tóg ũn pir ěn kanĕnh tĩ mũ sir, ti jãvãnh tĩ tóg mũ sir. Ti mĕg e ěn tóg pãnónh tá nýtĩ. Ag ré kỹ tóg tĩ mũ sir, ũn vãfor mũ ěn jãvãnh jé, ũn pir ěn ti.

13 Kỹ tóg ti vég mũ sir. Kỹ tóg ti mý sér pĕ tĩ sir, ha mẽ. Ti mĕg e ěn tóg ti mý há nýtĩ, ũ tỹ 99 (ke) ěn. Hã ra ti tỹ ũn pir ěn ve mãn kỹ tóg ti mý há tãvĩ nĩ sir, ũn e ěn tỹ ti mý há nýtĩ kãfór. Kỹ ti fe tóg mrin ke mũ.

14 Hã kỹ tóg Topĕ mý kórég nĩ, ũn sĩ pir vãfor kỹ, ti kren tũ nĩn kỹ, gĩr sĩ pir mýr. Topĕ pi(jé) tag to há nĩ', inh jóg tỹ kanhkã tá nĩ ti,” he tóg, Jesus ti.

Ĕg mré ke ũ tỹ Topĕ vĩ mranh

15 “Kejĕn ã régre vỹ Topĕ vĩ mranh mũ. Kỹ ti venh tũg nĩ, ã tỹ ti mré vĕmĕn jé, to. Vyrmy ti mré vĕmĕn vén nĩ. Hĕn ri ke mũn tóg ã vĩ jĕmĕnh mũ, kỹ ã tóg ti kren han mũ sir, ã régre ti.

16 Ti tỹ ã vĩ jĕmĕ sór tũ nĩn kỹ ũ mý: inh mré ti jyvĕn tũg, hemnĩ, ũn pir mý, ke tũ nĩ kỹ ũn régre ag mý. Kỹ ti mré vĕmĕn mãn nĩ, ag rĩnve, ag tỹ ã tỹ ti mré vĩ mẽ jé.

17 Ti tỹ ãjag vĩ mẽ sór tũ nĩn kỹ vĕnh kar mý tómnĩ sir, inh mré ke kar ag mý. Ti tỹ vĕnh kar vĩ mẽ sór tũ nĩn kỹ ti mré vĩ mãn tũg nĩ sir. “Topĕ vĩ ki kagtũg ti nĩ, fóg kórég ag ri ke ti nĩ,” hemnĩ ti to. “Topĕ vĩ mranh sór ti mũ, governo mý jãnkamy mãg tĩ ag ri ke,” hemnĩ ti to.

18 Ki hã sóg tó mũ, hã kÿ sóg ãjag mÿ ke mũ, ha mẽ. ãjag tÿ tag ki ù mÿ: “kanhkã venh ke tũ ã tóg nĩ,” hen kÿ tóg venh ke tũ nĩ. ãjag tÿ ù mÿ: “kanhkã ve jé ã tóg ke mũ,” hen kÿ tóg venh ke mũ,” he tóg, Jesus ti.

19 “Ha mẽ, sÿ ãjag mÿ nén tónh ke mũ ti. Kejën ãjag kãmĩ ùn régre ag tóg nén ù to jykren, ag tÿ Topê mÿ nén to vĩ jé. Kÿ ag tóg ti mÿ nén to vĩ mũ sir. Tÿ ag êprã ke nÿtĩ, hã ra ag tóg Topê mÿ nén ù to vĩ mũ. Kÿ inh jóg tÿ kanhkã tá nĩ tóg ag mÿ han ke mũ, ag tÿ nén to vĩ mũ ên ti,” he tóg.

20 “Kejën ãjag kãmĩ ùn régre ag vÿ iso vēmén tĩ, kejën ùn tăgtũ ag. Inh jiji tó jé ag tóg vênhmãn kÿ nÿtĩ. Kÿ sóg ag mré nĩ nĩ sir, ag tÿ inh vég tũ ra. Hã kÿ Topê tóg ag mÿ han ke mũ, ag tÿ ti mÿ nén to vĩ mũ ti,” he tóg, Jesus ti.

Û camarada kórég to comparação

21 Kÿ Pedro tóg ti to kătĩg kÿ ti mÿ: “Senhor,” he mũ. “Kejën inh régre tóg vênh jykre pãno han ja nĩ. Kÿ inh mÿ ti mÿ vênh pãte fón e han mũ? Vênh pãte fón tÿ hẽ ri ke nÿ hÿn há nĩnh mũ? Ke tÿ 7 (ke) mÿ há nĩ?” he tóg, Pedro ti, Jesus mÿ.

22 Kÿ Jesus tóg ti mÿ: “vó,” he mũ. “Vênh pãte fón tÿ 7 (ke) vÿ pir nĩ,” he tóg. “Vênh pãte fón tÿ 70 tÿ 7 (ke) vÿ pãgsĩ nĩ,” he tóg.

23 “Ha vé, ù tÿ kanhkã tá nĩ ên tÿ tÿ êg pã'i nĩ to comparación ù vẽ, sÿ tónh ke tag, ha mẽ. Pã'i mág ri ke ti nĩ. Camarada e ti nĩ, pã'i mág ên ti. Kÿ tóg kejën ag tũ ve sór mũ, ag tÿ ti mÿ név(e) ti.

24 Kÿ tóg vég mũ. Hã ra ti camarada ù tóg ti mÿ név(e) mág jẽ, hã vÿ: 10 mil (ke), he mũ.

25 Hã ra ti tỹ ne tỹ kajãm ke tóg tũ tĩ, kỹ ti patrão vỹ ti fón sór mũ, jãnkamy to, ti prũ fi ke gé, ti krẽ ke gé, ti tũ kar mỹr, ti tỹ ã kaja to ã név(e) kajãm jé.

26 Hã ra tóg ti mỹ jagy tĩ, kỹ tóg ti krẽm grĩnh ke kỹ ã jakrĩ tỹ jẽ mũ. Ti krẽm grĩnh ke kỹ tóg ti mỹ: “Senhor,” he mũ. “Ver isovãnh sĩ han, kajãm jé sóg (ke) mũ vãhã,” he tóg.

27 Kỹ ti patrão tóg ti jagãgtãn mũ sir, ã camarada ti, kỹ tóg ti tovãnh mũ. Ti mỹ tóg ti név(e) tỹ tũ' he mũ. “Ha tĩg, jatun mỹ,” he tóg mũ sir.

28 Kỹ ti camarada ãn tóg tĩ mũ sir. Kỹ tóg ã mré camarada ù vég mũ sir. Ti ki tóg név(e) sĩ jẽ, cruzeiro pir mỹr. Kỹ tóg ti mãng mũ sir. Ti nunh kã tóg ti kãgũg mũ, kỹ tóg ti mỹ: “inh mỹ kajãm, ã név(e) ti,” he mũ, ùn név(e) mág ja ãn ti, ù tỹ ã mỹ név(e) sĩ ãn mỹ.

29 Kỹ tóg ti krẽm grĩnh ke kỹ ã jakrĩ tỹ jẽ mũ. Kỹ tóg ti mỹ: “ver isovãnh, vãhã sóg kajãm kãn ke mũ ha,” he mũ.

30 Hã ra tóg mẽ jãvãnh nĩ. Kỹ tóg vễse jafã kãtã ti fón mũ sir, ti tỹ ti mỹ kajãm jé, ti név(e) ti.

31 Hã ra ti mré camarada ù ag vỹ vég mũ, kỹ tóg ag mỹ e tĩ. Kỹ ag tóg ãjag patrão mỹ tó kãn mũ sir, ti tỹ nén han mũ ti.

32 Kỹ ti patrão tóg ti jé prẽr mũ sir. Kỹ tóg ti to jũ mũ. “Jykre kórég pẽ han ã,” he tóg. “Ã név(e) mág tỹ sóg tũ' he vễ, ã tỹ inh mỹ to vĩn kỹ.

33 Kỹ ã tỹ ã mré camarada ãn jagãgtãn ke vễ vễ, isỹ ã jagãgtãn ri ke,” he tóg.

34 Kỹ tóg ti to jũ mág han mũ sir, ti patrão ti. Kỹ tóg ti ség mũ. Ag mỹ tóg: “ha ti vóg kónãn,” he mũ

gé, ti tỹ ã patrão mỹ kajãm kãn jé, ti név(e) mág ěn ti,” he tóg, Jesus ti.

³⁵ “Hã han jé tóg ke mũ, inh jóg tỹ kanhkã tá nĩ ti, ãjag tỹ ãjag régre ag mỹ vẽn h pãte fón pẽ han sór tũ nĩn kỹ, ag tỹ kygnẽ ja ti,” he tóg, Jesus ti.

19

Ěg tỹ ěg prũ fón ke tũ
(Mc 10.1-12)

¹ Kỹ Jesus tóg tó kãn ja nĩ, ti tỹ ag mỹ nén tó sór mũ ti. Kỹ tóg Galiléia tá kãkutẽ kỹ goj tỹ Jordão mãra tĩ mũ sir. Israel ag jamã ù vẽ gé.

² Kỹ ùn e ag tóg ti nón mũ mũ. Kỹ tóg tá ag kytgãg kãn mũ sir.

³ Kỹ Fariseu ag tóg ti tá junjun mũ gé sir. Ag tỹ ón kỹ ti vẽme mẽ sór vẽn, vẽn h prũ ke fón to. Kỹ ag tóg ti mỹ: “mỹ ěg tỹ nén ù ù to ěg prũ fag fón jé há nĩ?” he mũ.

⁴⁻⁵ Kỹ tóg ag mỹ kãmén mũ. “Topẽ vĩ rá ki vemnĩ,” he tóg. “Tã tóg rán kỹ nĩ, Topẽ tỹ nén han mũ ti. Ti tỹ nén kar han ve ki tóg ti mré fi han. Hã kỹ tóg tag tó mũ, ha mẽ. “Hã kỹ ùn gré tóg ã prũ fi to ã panh ré kỹ tĩnh mũ, ã mỹnh fi ré kỹ ke gé. ã prũ fi mré tóg tĩnh mũ. Fi mré tóg tỹ ùn pir nĩ sir, ã prũ fi mré,” he tóg, Topẽ ti.

⁶ Hã kỹ fag tóg tỹ ùn pir nỹtĩ. Fag pi(jé) tỹ ùn régre nỹtĩ!. Hã kỹ fag tỹ vẽn h kãpãm tũg nĩ. Topẽ tỹ fag tỹ ùn pir han vẽn mỹr,” he tóg, Jesus ti.

⁷ Kỹ ag tóg ti mỹ ke mãn mũ. “Hã ra Moisés tóg ěg mỹ: “fi mỹ vẽn h rá nĩm kar kỹ fi fón nĩ,” he ja nĩ. Ti tỹ ne jé ěg mỹ tag tó ja nẽ?” he ag tóg mũ, Jesus mỹ.

⁸ Kĩ tóg ag mỹ: “hỹ,” he mũ. “Tag tó ja ti nĩ, ãjag mỹ, ãjag tỹ vãnh kanhrãn sór tũ nỹtĩn kỹ, hã kỹ tóg ãjag mỹ: ha fi fón ge, he ja nĩ. Hã ra Topẽ tóg tag han ja tũ nĩ, ti tỹ nén kar han ve ki.

⁹ Hã kỹ sóg ãjag mỹ ke mũ. ãjag tỹ ãjag prũ fi fón kỹ ù fi tỹ prũg mǎn kỹ ãjag prũ tũ fi vẽ sir, ha mẽ. ãjag tỹ fi tỹ ù mré nỹ tugrĩn fi fón kỹ tag hã ne pãgsĩ nỹ,” he tóg, Jesus ti.

¹⁰ Kỹ ti mré mũ tĩ ag mỹ tóg e tĩ, ti vĩ tag, hã kỹ ag tóg ti mỹ: “ge nĩn kỹ tóg tỹ ù nỹ, ãg prũg kỹ,” he mũ. “Ëg tỹ ãg prũ fi fón sór mũ ra fi fón tũ nĩn kỹ tóg vãnhmỹ nỹ, kỹ ãg hỹn prũg sór tũ nĩ,” he ag tóg.

¹¹ Kỹ tóg ag mỹ: “ũn pipir ag tóg tag han ke mũ,” he mũ. “Topẽ tóg ù ag mỹ: ha prũg tũg, henh ke mũ, ãn ag hã vĩ prũg ke tũ nĩ,” he tóg.

¹² “Û ag tóg kurĩ nỹtĩ, ag mur mũ kã. Kỹ ù ag tóg kurĩ nỹtĩ gé, ag tỹ ag grãfy kym kỹ. Kỹ ù ag tóg kurĩ ri ke nỹtĩ gé, ag tỹ Topẽ to jykrén kỹ, ag tỹ ù tỹ kanhkã tá nĩ ãn tugrĩn prũg sór tũ nỹtĩn kỹ. Û tỹ to jykrén mũ ãn jé to jykrén,” he tóg, Jesus ti.

Jesus tỹ gĩr ag to há nĩ

(Mc 10.13-16; Lc 18.15-17)

¹³ Kỹ fag tóg gĩr tatĩ kãmũ mũ, ti tỹ ã nĩgẽ tỹ ag mẽ jé, ti tỹ ag to Topẽ mré vĩ jé. Hã ra Jesus mré mũ tĩ ag tóg fag to jũ mũ, ù tỹ ag tatĩ kãmũ mũ fag to.

¹⁴ Hã ra Jesus tóg ag mỹ: “vĩ tũg nĩ, gĩr ag mỹ,” he mũ, “gĩr ag tỹ iso kãmũ kamẽg tũg nĩ,” he tóg. “Û tỹ ge hã vĩ ù tỹ kanhkã tá nĩ ãn tỹ tỹ pã'i nĩ ãn krẽm nỹtĩ nĩ,” he tóg.

¹⁵ Kỹ tóg ag mẽgmẽ kãn mũ sir, ã nĩgẽ tỹ. Ag mẽgmẽ kãn kỹ tóg tá kãkutẽ mũ sir.

*Kyrũ rico kãme**(Mc 10.17-31; Lc 18.18-30)*

¹⁶ Kĩ vãhã ù tóg ti tá jun mũ sir. Kĩ tóg ti mũ: “Senhor,” he mũ. “Há ã tóg jẽ,” he tóg. “Sỹ inh rĩr krỹg ja tũ venh há tóg tĩ. Ti ve jé inh hỹn vẽnh jykre há tỹ hẽ ri ke han ke mũ?” he tóg.

¹⁷ Kĩ Jesus tóg ti mũ: “ã tỹ ne jé inh ki vẽnh jykre há jẽmẽ sór nẽ?” he mũ. “Ûn pir tóg há nĩ, ha mẽ. Ti tỹ ẽg jyvẽn ẽn ki króm nĩ, ã tỹ rĩr krỹg ja tũ ve sór kỹ,” he tóg.

¹⁸ Kĩ tóg ti mũ: “ti tỹ ẽg jyvẽn tỹ hẽ ri ke nẽ?” he mũ. Kĩ Jesus tóg ti mũ: “ti tỹ ẽg jyvẽn tag hã vẽ, ha mẽ: ù tén tũg nĩ, ã prũ tũ fi mré nỹ tũg nĩ, nén ù péju(g) tũg nĩ, ù to ón tũg nĩ,

¹⁹ ã nỹ mré ã jóg kamẽg nĩ, ã régre ki rĩr há han nĩ, ã tỹ vẽnh ki rĩr há ri ke han nĩ, ã régre ki,” he tóg, Jesus ti.

²⁰ Kĩ kyrũ tóg ti mũ: “tag kar ki sóg króm tĩ,” he mũ. “Kỹ ne nỹ hỹn ver inh mũ tũ tĩ?” he tóg.

²¹ Kĩ Jesus tóg ti mũ: “ã tỹ vẽnh jykre há han sór kỹ tag han nĩ, ha mẽ,” he mũ. “Ã tũ kar vãm tĩg. Kĩ ùn jagãgtar ag mũ vin, jãnkamy ti, kỹ ã tóg kanhkã tá tũ mág nĩ sir. Kar kãtĩg nĩ, ã tỹ inh mré tũg jé,” he tóg, Jesus ti.

²² Kyrũ ẽn tỹ ti vĩ tag mẽ kỹ tóg fe kaj han kỹ tĩ mũ sir. Ti tũ vỹ e nỹtĩ, hã kỹ tóg ti mũ vẽnhmỹ tĩ.

²³ Kĩ Jesus tóg ã mré mũ tĩ ag mũ kãmén mũ sir. “Sỹ ke há vẽ, hã kỹ sóg ke mũ. Jagy ti nỹ, ùn rico tỹ ù tỹ kanhkã tá nĩ ẽn tỹ tỹ ẽg pã'i nĩ venh ke ti,” he tóg.

²⁴ “Hã kỹ sóg ãjag mũ ke mãn mũ. Cavallo pãnĩ sór vỹ préj nor fĩn kutẽ tũ nĩ mỹr,” he tóg. “Ti tỹ fĩn kutẽ

há nĩ ra tóg ver jagy tĩ vễ, ùn rico tỹ ù tỹ kanhkã tá nĩ ên tỹ tỹ êg pã'i nĩ venh ke ti," he tóg, Jesus ti.

²⁵ Kỹ tóg ti mré mũ tĩ ag mỹ e tĩ, ti vĩ tag. Kỹ ag kanẽ tóg jur mũ. "Kỹ ù hỹn kren ke tũ nĩ," he ag tóg.

²⁶ Kỹ Jesus tóg ag ki êvãnh mũ, kỹ tóg ag mỹ: "êprã ke ag vĩ vễsóg ki tá jun ke tũ nĩ," he mũ. "Topẽ hã tóg ãjag tỹ tá jun han ki kanhró nĩ, ti tỹ nén ù kar tỹ hẽ ri ken há nĩn kỹ," he tóg, Jesus ti.

²⁷ Kỹ Pedro tóg ti mỹ: "ha vé," he mũ. "Nén kar ré kỹ êg mũ mũ, ã mré. Tag to êg hỹn ne venh ke mũ?" he tóg.

²⁸ Kỹ Jesus tóg ag mỹ: "sỹ ke há vễ, hã kỹ sóg tó mũ," he mũ. "Inh mré ãjag tóg mũ mũ. Tỹ sóg êprã ke fi kósın nĩ. Kejẽn sóg inh nĩgja kri nĩnh mũ, isỹ vễnh kar jykre tugnyĩm jé. Sĩnvĩ inh nĩnh mũ, kurã ên kã. Nén kar han mãn jé sóg ke mũ, kurã ên kã. Kỹ ãjag tóg ãjag nĩgja kri nĩgnĩg kỹ nỹtĩnh mũ gé, nĩgja tỹ 12 (ke) kri, ãjag tỹ povo tỹ Israel kar jykre tugnyĩm jé, povo tỹ 12 (ke) tag ag jykre," he tóg.

²⁹ "Jó ù tóg isugrĩn ã jamã ré kỹ tĩ mũ, ã kãke, ã jãvy, ã ve, ã panh, ã mỹnh, ã japỹ ré kỹ tóg tĩ mũ, inh jykre tugrĩn. Ên vĩ tóg vễnh kato ã tỹ êprã ré kỹ tĩg ja ên e ri ke venh ke mũ, tag ki, êprã. Kỹ tóg rĩr krỹg ja tũ ên venh ke mũ gé," he tóg.

³⁰ "Jãvo tag ki ùn mág ù ag kãsir nỹtĩnh ke vễ, tá tére kỹ, kỹ tag ki ùn kãsir ù ag tỹ tỹ ùn mág nỹtĩnh ke vễ, tá tỹ pã'i nĩnh ke vễ," he tóg, Jesus ti. Ti tỹ ag mỹ kanhkã jykre tó vễ.

20

Uva ki rãnrãj tĩ ag to comparação

¹ Kĩ Jesus tóg ag mĩ: “ũ tĩ kanhkã tá nĩ ên tĩ tĩ êg pã'i nĩ vỹ ge nĩ, ha mẽ,” he mũ, to comparação han kĩ. “Patrão ri ke tóg nĩ. Kusã ki tóg tĩ mũ, 6 horas ki, camarada ag jãvãnh jé, ag tĩ ti jakré ki rĩr jé.

² Kĩ tóg ù ag vég mũ sir. Ag mré tóg vënh rãnrãj kaja to jykrén mũ, hã vỹ: jãnkamy pir, he mũ, por dia kaja ti. Kĩ tóg ag mĩ: “ha ki rĩr mũjêg,” he mũ sir.

³ Kĩ ag tóg mũ mũ. Hora tãgtũ tũg kĩ, 9 horas ki tóg tĩg mãn mũ, ù ag jãvãnh jé gé. Kĩ tóg ù ag vég mũ gé sir. Véké ag tóg êmã kaju tá nỹtĩ, rãnrãj tũ kĩ.

⁴ Kĩ tóg ag mĩ: “inh mĩ inh jakré ki rĩr mũjêg,” he mũ gé. “Kajãm jé sóg ke mũ, ti kaja tĩ,” he tóg.

⁵ Kĩ ag tóg mũ mũ.

Hora tãgtũ ù tũg kĩ, meio dia ki tóg ù ag jãvãnh tĩg mãn mũ, 3 horas ki tóg tĩg mãn mũ gé. Ag ve kĩ tóg ag mĩ ke mũ gé, kĩ ag tóg mũ mũ gé, ti jakré ki rĩr jé.

⁶ Vãhã tóg rãkãnh mũ sir. 5 horas ki tĩg mãn kĩ tóg ù ag vég mũ gé, véké jêgê kĩ nỹtĩ ag. Kĩ tóg ag mĩ: “ãjag tĩ ne jé rãnrãj tũ nĩ nẽ?” he mũ. “Kurã kar ki ãjag tóg ki nỹtĩ, rãnrãj tũ nỹtĩ ra,” he tóg ag mĩ.

⁷ Kĩ ag tóg ti mĩ: “hã ra ù tóg êg mĩ: ha inh rãnrãj han, he ja tũ nĩ,” he mũ. Kĩ tóg ag mĩ: “ha inh jakré ki rĩr mũjêg ge,” he mũ sir. Kĩ ag tóg mũ mũ gé.

⁸ Kutu kĩ ag patrão tóg ã tũ ki rĩr tĩ ên mĩ: “ha ag jé prêr,” he mũ, 6 horas da tarde ki. “Ag mĩ ti kaja ti nĩm,” he tóg. “Ûn tĩ rãkãnh kĩ kãmũ mũ ag mĩ nĩm vén, kar kĩ ù tĩ kusã ki kãmũ mũ ag mĩ nĩm rén,” he tóg ti mĩ. Kĩ tóg ke mũ, ti tũ ki rĩr tĩ ti.

9 Kÿ ù tÿ rākānh kÿ junjun mÿ ag vÿ ājag kaja ti mǎn mÿ, hǎ vÿ: jānkamy pír, he mÿ. Ag rānhrāj sǐ ra ag tóg por dia kaja vég mÿ sir.

10 Kÿ ù tÿ kusā ki rānhrāj mÿ ag tóg to jykrén mÿ. “Ti hÿn ěg mÿ ti kaja kāfór han ke mÿ, ěg tÿ kurā kar ki rānhrāj kÿ,” he ag tóg mÿ, to jykrén kÿ. Hǎ ra tóg ag mÿ jānkamy pír ěn nĭm mÿ gé sir, por dia kaja ěn.

11 Ag tÿ jānkamy ěn mǎn kÿ ag tóg ti to jÿ mÿ, ājag patrão to.

12 Kÿ ag tóg ti mÿ vĭ mÿ. “Tag ag vÿ hora pír ki rānhrāj, jāvo ā tóg ag mÿ ěg kaja ri ke han. Kurā kar ki ěg tóg rānhrāj mÿr, to ěg ron, ti rÿ jagy ra ěg tóg to krónh ke ja tÿ nĭ,” he ag tóg, ājag patrão mÿ.

13 Kÿ tóg ag kāmĭ ù mÿ ke mÿ, ag patrão ti. “Sÿ ā ki kygnĕ pijĕ,” he tóg. “Inh mré ā tóg jānkamy pír to jykrén ja nĭ, hǎ kÿ sóg ā mÿ nĭm mÿ, jānkamy pír ti.

14 Kÿ ā tÿ mǎn kÿ tĭg. Hǎ ra sóg ag mÿ nĭm sór mÿ gé, sÿ ā mÿ nĭm ja ěn ri ke.

15 Isÿ vĕ mÿr, jānkamy ti, kÿ sóg sÿ tÿ nĕn han sór mÿ ěn han mÿ. “Ā mÿ jÿ', isÿ ag mÿ vĭ há han to?” he tóg ti mÿ, patrão ti.

16 Hǎ kÿ ěgno tá kāmÿ ag vÿ ùn kāmÿ vén mÿ ag ri ke nÿtĭnh mÿ, tǎpÿr kÿ, jāvo ùn kāmÿ vén mÿ ag vÿ ěgno tá kāmÿ mÿ ag ri ke nÿtĭnh mÿ gé,” he tóg, Jesus ti.

*Jesus tÿ ā ter ke tó mǎn
(Mc 10.32-34; Lc 18.31-34)*

17 Kÿ Jesus tóg Jerusalém ra tĭg sór mÿ. Kÿ tóg vÿrmÿ ù tÿ 12 (ke) ěn ag mré vĕmén mÿ. Ag tÿ ā

mré êpry jagma mũn kÿ tóg ag mré vēmén mũ, ag tÿ ãmĩn jagma mũn kÿ.

18 “Ha vé,” he tóg. “Jerusalém ra ãg tóg mũ mũ,” he tóg. “Êprã ke fi kósın ãn vÿ jagtar ke mũ. Inh hã vẽ. Topẽ tũ ki rĩr tĩ to pã'i ag tóg ãjag tÿ isÿ nén han sór mũ ãn han ke mũ, Topẽ vĩ to professor ag ke gé. Ag tÿ iso: “ter jé tóg ke mũ,” henh ke vẽ.

19 Kÿ ag tóg fóg ag mÿ inh fẽg ke mũ sir, ãn ag tÿ iso é he jé, ag tÿ inh mrãnmrãn jé, ag tÿ ka to isa jé. Kurã tãgtũ ki sóg hã ra rĩr mãn ke mũ,” he tóg, Jesus ti.

*Ûn régre ag tÿ tÿ ãn mág nÿtĩ sór
(Mc 10.35-45)*

20 Kÿ Zebedeu krẽ ag mÿnh fi tóg Jesus venh kãtĩ mũ, fi krẽ ag mré. Ti krẽm fi tóg mũg ke mũ, fi tÿ ti mÿ nén (ũ) to vĩ sór kÿ.

21 Kÿ tóg fi mÿ: “ã tÿ ne to vĩ sór nẽ?” he mũ. Kÿ fi tóg ti mÿ: “kejẽn ã tóg tÿ pã'i nĩnh mũ,” he mũ. “Kÿ inh krẽ tag ag tÿ ã rã hã nÿtĩnh há tóg tĩ, ù tÿ ã pẽgja tá nĩ jé, kÿ ù tÿ ã jakãnh tá nĩ jé,” he fi tóg, ti mÿ.

22 Kÿ Jesus tóg ag mÿ: “ãjag tÿ nén to vĩ mũ ki kagtĩg ãjag tóg nÿtĩ,” he mũ. “Jagy ti nÿ. ãjag mÿ inh ri kén jagtar sór mũ'? ãjag mÿ tovãnh ke tũ nĩ?” he tóg. Kÿ ag tóg ti mÿ: “hÿ,” he mũ. “Tovãnh ke tũ ãg nĩ,” he ag tóg, ti mÿ.

23 Kÿ tóg ag mÿ: “hÿ, jagãgtar jé ãjag tóg ke mũ, inh ri kén,” he mũ. “Hã ra isũ tũ vẽ, sÿ ãjag mÿ: hej, he ti,” he tóg. “Ha inh pẽgja tá nĩ, henh ke tũ sóg nĩ. Ha inh jakãnh tá nĩ, henh ke tũ sóg nĩ gé, isũ tũ vẽ. Topẽ tÿ ãn mÿ: ha ti rã hã nÿtĩ, henh ke mũ ãn ag hã tÿ inh rã hã nÿtĩnh ke vẽ,” he tóg, Jesus ti.

24 Hã ra ù tỹ 10 (ke) ag tóg mēg mũ, ùn régre ag tỹ Jesus mỹ tag to vĩ ja ti. Kỹ ag tóg ag to jũ mũ.

25 Hã ra Jesus tóg ag jé prēr kãn mũ, kỹ tóg ag mỹ: “fóg ag pã'i ag jykre ki kanhró ãjag tóg nỹtĩ,” he mũ. “Vēnh kar jēgnēg ag tóg tĩ mỹr, kỹ ag mág ag tóg vēnh kar mỹ: gemnĩ, ge tũg nĩ, he tĩ, vĩ tar han kỹ,” he tóg.

26 “Ag ri ke han tũg nĩ. ãjag mỹ tỹ ùn mág nỹtĩ sór mũ'? Kỹ tỹ jagnē camarada ri ke nỹtĩmnĩ, jagnē tũ ki rĩr kỹ.

27 ãjag mỹ tỹ pã'i nỹtĩ sór mũ'? Kỹ tỹ jagnē krēm ke nỹtĩmnĩ, tỹ ùn kāsir nỹtĩmnĩ.

28 Hã kỹ sóg camarada tũ nĩ gé. Sỹ tỹ camarada nĩ jé sóg kãtĩg, sỹ ãjag ki rĩr jé. Tỹ sóg ěprã ke fi kósin nĩ. Hã kỹ sóg vēnh kar jagfỹ ter ke mũ, sỹ ag krenkren han jé,” he tóg, Jesus ti.

*Jesus tỹ ùn kyvó ag tỹ há' he
(Mc 10.46-52; Lc 18.35-43)*

29 Hã ki ag tóg Jerusalém ra mũ mũ. Kejēn ag tóg cidade tỹ Jericó fĩn rãm kỹ ag tóg tá pa mũ, hã ra ù tỹ hēn ri ke ag tóg Jesus nón mũ mũ.

30 Ěprỹ ěn tá, ěmĩn ěn tá ùn kyvó ag tóg nĩgnĩ kỹ nỹtĩ nĩ, ùn régre ag. Vãhã ag tóg Jesus tỹ jagma tĩg mēg mũ. Kỹ ag tóg ti jé prēr mũ. “!..Senhor..!” he ag tóg. “!..Davi kósin', ěg jagãgtãn ra..!” he ag tóg.

31 Kỹ ag tóg ag to jũgjũ mũ, ti nón mũ ù ag. “Mē kã nỹtĩ,” he ag tóg mũ. Hã ra ag tóg prēr mãn', prēr mãn' he mũ, jamã hár(a). “!..Senhor, Davi kósin', ěg jagãgtãn ra..!” he ag tóg mũ.

32 Kỹ Jesus tóg krỹg he mũ, kỹ tóg ag jé prēr mũ. Kỹ tóg ag mỹ: “ne to ãjag vĩ, sỹ ãjag mỹ han jé?” he mũ.

33 Kỹ ag tóg ti mỹ: “ěg tỹ ěvãnh há tóg tĩ,” he mũ.

34 Kÿ Jesus tóg ag jagãgtãn mũ sir. Ag kanẽ mẽgmẽg tóg mũ sir. Kÿ ag tóg ẽvãnh há han mũ sir. Ti nón ag tóg mũ mũ sir.

21

Jesus tÿ Jerusalém tá jun

(Mc 11.1-11; Lc 19.28-40; Jo 12.12-19)

¹ Ag mũn kÿ ag tóg Jerusalém kakó tá junjun mũ, ẽmã tÿ Betfagé tá, krĩ tÿ Oliveiras tá. Kÿ Jesus tóg ã mré mũ tĩ régre ag jẽgnẽg mũ, ẽmã ẽn ra.

² Kÿ tóg ag mÿ: “ẽmã ẽn ra mũjẽg, ẽg jo ẽmã nĩ ẽn ra,” he mũ. “Tá ãjag tóg burrica fi venh mũ. Se kÿ fi jẽ. Fi kósin vÿ fi mré jẽ nĩ. Ẽn fi kavãn kÿ fi pére kãmũmnĩ.

³ Hẽn ri ke mũn ag tóg ãjag mÿ vĩ sór mũ, fi to. Kÿ ag mÿ: “ẽg Senhor vÿ fi ve sĩ han sór mũ. Kãnhmar tóg fi jẽnẽ mãn mũ,” hemnĩ,” he tóg, Jesus ti.

⁴ Hã ra tóg rãn kÿ nĩ gé, tag. Topẽ vĩ tó tĩ tóg tag rãn ja nĩ, ha mẽ.

⁵ “Sião tá ke fag mÿ tag tómnĩ, ha mẽ. Hã vé, ã pã'i tÿ rei tóg ã ki jun ke mũ, hemnĩ. Vẽnh kar to tóg fe há nĩ, jũ vãnh nĩn kÿ, ã Senhor ti. Burrica kri tóg nĩ nĩ, fi kósin kri, ẽg tu tĩ ẽn fi kósin kri mÿr,” he tóg, Topẽ vĩ tÿ rãn kÿ nĩ ki. Hã ra tóg ge nĩ.

⁶ Kÿ ti mré mũ tĩ ag tóg mũ mũ, burrica fi mãn jé.

⁷ Fi pére ag tóg kãmũ mũ, fi kósin mré. Kÿ ag tóg ãjag kur tÿ kri vãm mũ, kÿ tóg kri nĩ mũ.

⁸ Kÿ vẽn e ẽn ag tóg ãjag kur tÿ ẽpry kri kugjén mũ, ẽmĩn kri. Kÿ ù ag tóg ka féj kre kÿ ẽpry kri vãvãm mũ sir. Ag tÿ ti jamĩn sĩnvĩ han sór vẽ.

⁹ Kÿ ù ag tóg ti jamĩ mũ mũ, jo ù ag ti nón mũ mũ. Ẽn ag tóg prẽnprẽn mũ sir. “!..Viva, Davi kósin..!” he

ag tóg mũ. “!..Sér tóg tĩ, pã'i vỹ ãg tá jun, ãg Senhor mág tỹ ti jẽnẽn kỹ..! !..Topẽ tá tóg kãtĩg, ù tỹ kynhmỹ nĩ ãn tá, viva..!” he ag tóg, prẽnprẽn kỹ.

¹⁰ Hã ki ag tóg Jerusalém tá junjun mũ. Kỹ tá ke kar ag vỹ ti venh kãmũ mũ. Ag mỹ tóg e tĩ, kỹ ag tóg ti to: “ũ nẽ?” he mũ.

¹¹ Kỹ ti mré kãmũ mũ ag vỹ ag mỹ: “Topẽ vĩ tó tĩ ãn vẽ,” he mũ. “Jesus vẽ, Nazaré tá ke ãn vẽ, Galiléia tá ke ãn,” he ag tóg mũ sir.

*Jesus tỹ Topẽ jo ãn krẽm ag pan
(Mc 11.15-19; Lc 19.45-48; Jo 2.13-22)*

¹² Kỹ Jesus tóg Topẽ jo ãn kãra rã mũ. Kỹ tóg tá ke ag pan kãn mũ sir, nén vender he tĩ ag, nén comprar he tĩ ag ke gé. Topẽ jo ãn krẽm ag tóg negociar he tĩ, jãnkamy trocar he ag tóg tĩ gé. Ag tỹ nén kri vin jafã tỹ tóg vyryn ke mũ sir. Sórãg vender he tĩ ag nĩgnĩ jafã tỹ tóg vyryn ke mũ gé sir.

¹³ Ag mỹ tóg: “Topẽ vĩ rá to jykrén nĩ,” he mũ. “Tag vỹ rán kỹ nĩ, ha mẽ. “Inh ãn jiji vỹ tỹ Topẽ mré vĩ jafã nĩ,” he tóg, Topẽ vĩ rá ki. Hã ra ãjag tóg Topẽ mré vĩ jafã tag krẽm nén kar pigju(g) mũgtĩ, kỹ tóg bandido ag jamã ri ke nĩ sir,” he tóg, Jesus ti. Ag pan kỹ tóg ke mũ, Jesus ti.

¹⁴ Kỹ ùn kyvó ag tóg ti to junjun mũ sir, ùn kónhgrĩ ag ke gé, ti tỹ Topẽ jo ãn krẽm jẽn kỹ. Kỹ tóg ag tỹ há' he kãn mũ sir.

¹⁵ Hã ra Topẽ tũ ki rĩr tĩ ag tóg tá nỹtĩ, Topẽ vĩ to professor ag ke gé. Ti tỹ ag tỹ há' he vég ag tóg mũ. Gĩr ag vĩ mẽg ag tóg mũ gé. Topẽ jo ãn krẽm ag tóg nỹtĩ, gĩr ag, kỹ ag tóg Jesus mỹ prẽnprẽn mũ. “!..Viva, Davi kósin..!” he ag tóg mũ, prẽnprẽn kỹ. Kỹ pã'i ag tóg jũgũ mũ, Jesus to.

16 Hã kÿ ag tóg ti mÿ vÿ mũ. “Ã mÿ ag prẽnprẽn mễg tũ?” he ag tóg. Kÿ Jesus tóg ag mÿ: “vó,” he mũ. “Hã ra Topê vÿ rá to jykrén nĩ,” he tóg. “Ûn kãsir ag vÿ iso vÿ há han tĩ,” he tóg, Topê vÿ ki. “Ûn pafa mũ ag vÿ inh mÿ vÿ há pẽ han tĩ. ã hã ne tag han', ùn kãsir ag tÿ inh mÿ vÿ há han jé,” he tóg, Topê mÿ, Topê vÿ tÿ rán kÿ nĩ ki,” he tóg, Jesus ti.

17 Tag tó kÿ tóg ag ré kÿ tĩ mũ sir. Cidade tá tóg kãkutẽ mũ, ẽmã tÿ Betfagé ra tÿg jé. Tá tóg sir nũr mũ.

*Ka tÿ figueira tóg
(Mc 11.12-14, 20-24)*

18 Tÿ vaj kÿ kusã ki tóg cidade ra tÿg mãn mũ. ã tÿg kÿ tóg kókĩr mũ.

19 Kÿ tóg ka tÿ figueira vэг mũ sir, kÿ tóg ra tĩ mũ, ti kanẽ ko jé. Hã ra tóg kanẽ tũ nĩ. Fėj tãvĩ tóg jẽ, kÿ tóg ti mÿ vÿ mũ. “Kanẽ han mãn ke tũ ã nĩ ha,” he tóg mũ. Kÿ tóg tóg mũ sir vễsÿmér, ka ti.

20 Kÿ ti mré mũ tĩ ag tóg vэг mũ sir, ti tóg mũ ti. Kÿ tóg ag mÿ e tĩ. “Vễsÿmér tóg tóg ja nĩ,” he ag tóg. “Ti hẽ ri ké?” he ag tóg.

21 Kÿ Jesus tóg ag mÿ kãmén mũ sir. “Ki hã sóg tó mũ, hã kÿ sóg ke mũ,” he tóg. “Inh ri ke han jé ãjag tóg ke mũ. Isÿ ka tÿ figueira mÿ: “tóg ra,” hen kÿ tóg tóg ja nĩ. Inh vÿ tag ri ke han jé ãjag tóg ke mũ, ãjag tÿ inh ki ge há han kÿ. Hã ra to: “Topê mÿ inh vÿ mễg mũ vÿ?” he tũg nĩ. “Hÿ mÿ vÿ?” he tũg nĩ. Kÿ ãjag tÿ kejẽn pãnónh mÿ: ha kutẽ, goj nig ki, hen kÿ tóg kutẽ mũ, ãjag tÿ ti kutẽnh ke to: “hÿ mÿ vÿ?” he tũ nĩn kÿ.

22 Kŷ ãjag tŷ Topẽ mŷ nén ũ to vĭn kŷ to: “han jé tóg ke mŷ,” hemnĩ. Kŷ tóg ãjag mŷ han mŷ, ãjag tŷ ti mŷ nén to vĭ mŷ ěn ti,” he tóg, Jesus ti.

*Jesus tŷ ũ tŷ ã jĕnĕg mŷ tó tũg
(Mc 11.27-33; Lc 20.1-8)*

23 Kŷ tóg cidade tá jun kŷ (tóg) Topẽ jo ĩn kãra rã mãn mŷ sir. Kŷ Topẽ tũ ki rĭr tĩ to pã'i ag vŷ ti to kãmũ mŷ, kófa ag mré hã. Ag tŷ ti ki jĕmĕ sór vĕ, hã kŷ ag tóg ti mŷ: “ũ nŷ ã mŷ: tag han nĩ, hé?” he mŷ. “Ũ nŷ ã jĕnĕ?” he ag tóg mŷ, Jesus mŷ.

24 Kŷ Jesus tóg ag mŷ: “ãjag ki sóg jĕmĕnh ke mŷ gé, vĕnh kato,” he mŷ. “Ãjag tŷ inh mŷ tó há han kŷ sóg ãjag mŷ ũ tŷ inh jĕnĕg mŷ tónh ke mŷ gé,” he tóg.

25 “João vŷ ag kygpég tĩ ja nĭgtĩ. Kŷ ti mŷ kanhkã tá vĕnh jykre han ja nĭgtĩ', ěprã vĕnh jykre vó? Ũ nŷ ti jĕnĕ?” he tóg, Jesus ti.

Kŷ ag tóg ti vĭ to jykrén mŷ jagnĕ mré. “Ěg tŷ ti mŷ: Topẽ tŷ ti jĕnĕ ja vĕ, hen kŷ tóg ěg mŷ: kŷ ãjag tŷ ne jé ti vĭ kri fig tũ nĩ nĕ? henh ke mŷ.

26 Ěg tŷ hã ra ti mŷ: ěprã ke jykre ja vĕ, hen kŷ ěg tóg vĕnh kar kato tĕ mŷ sir. Ag kar vŷ João to: Topẽ vĭ tó tĩ pĕ ja vĕ, he tĩ. Kŷ ěg tóg ag kamĕg mŷ, vĕnh e ěn,” he ag tóg mŷ, jagnĕ mŷ, pã'i ag.

27 To jykrén kŷ ag tóg Jesus mŷ: “ěg pi(jé) João jykre ki kanhró nŷtĩ',” he mŷ. Ón kŷ ag tóg ke mŷ. Kŷ tóg ag mŷ: “kŷ sóg ãjag mŷ tónh ke tũ nĩ gé, ũ tŷ inh jĕnĕg mŷ ti,” he mŷ. Ā kato tĕ mŷ ag mŷ tóg ke mŷ, Jesus ti.

Ũn krĕ régre to comparação

28 Kÿ tóg ag kanhrãn kÿ ag mÿ: “tag to jykrén nÿ, ha mē,” he mÿ sir. “Û tóg kósin régre nÿ. Kejën tóg ùn sanh to tÿg kÿ ti mÿ: “inh kósin,” he mÿ. “Ûri inh jakré tugnÿgnÿm tÿg,” he tóg.

29 Kÿ tóg ã panh ti mÿ: “vó,” he mÿ. Kar kÿ tóg to jykrén mãn kÿ (tóg) tÿ mÿ sir, ãpÿ ra.

30 Kÿ ti panh tóg ti jãvy mÿ ke mÿ gé sir. “Ûri inh jakré tugnÿgnÿm tÿg,” he tóg mÿ gé. Kÿ ti jãvy tóg: “hej,” he mÿ, ã panh ti mÿ. Hã ra tóg tÿ tÿ nÿ.

31 Kÿ ù tÿ hē nÿ ti panh vÿ ki króm hÿn?” he tóg, Jesus ti. Kÿ ag tóg ti mÿ: “ùn sanh ti,” he mÿ. Kÿ Jesus tóg ag mÿ: “hÿ, hã vē,” he mÿ. “Hã kÿ sóg ãjag mÿ ke mÿ. Û tÿ governo mÿ jãnkamy mäg tÿ ù ag vÿ Topē vÿ mranh, hã ra ag tóg to jykrén mãn kÿ (ag tóg) ãjag jykre tovãnh. Kÿ ùn mén e ù fag vÿ ãjag jykre kórég tovãnh gé. Hã kÿ ag tóg Topē tÿ tÿ ãg pã'i nÿ venh ke mÿ, fag ke gé. Ti kósin sanh ri ke ag hã vē. Ag jãvo ãjag tóg kanhkã venh ke tÿ nÿ, ãjag tÿ ón kÿ Topē mÿ: “hej,” he mÿ ra.

32 João vÿ ãjag mÿ Topē vÿ tó ja nÿgtÿ, ãjag tÿ ti jykre kuryj jagma mÿ jé. Hã ra ãjag tóg ti vÿ kri nÿm ja tÿ nÿ. ãjag jãvo ù tÿ governo mÿ jãnkamy mäg tÿ ag vÿ ti vÿ kri fi ja nÿ, ùn mén e fag ke gé. Tag ve ãjag mÿr. Ge ra ãjag tóg ãjag jykre tovãnh tÿ nÿ, João vÿ kri nÿm tÿ ãjag nÿ,” he tóg, Jesus ti.

*Ûn camarada kórég ag to comparação
(Mc 12.1-12; Lc 20.9-19)*

33 Kÿ Jesus tóg ag mÿ: “sÿ ãjag mÿ ãjag tÿ Topē tovãnh to comparação han mãn ke vē, ha mē,” he mÿ. “Kejën ù tóg nÿgtÿ. Uva krãn tóg nÿgtÿ, nén kanē tÿ vinho han jafã ãn. ã jakré tag to tóg rón mÿ. Kÿ

tóg kũm kŷ uva jĕgmĩ jafã han mũ. Kŷ tóg ki pãjó han mũ gé. Kŷ tóg ũ tŷ ki rĩr tĩ ag mŷ tovãnh mũ, ag tŷ ti mré ti kanĕ vĕnh kãpãm jé. Kŷ tóg tĩ mũ, ga ũ ra.

³⁴ Ti kanĕn kŷ tóg ã camarada ag jĕgnĕg mũ, ag tŷ ag mŷ ti tũ vin jé, uva kanĕ ti.

³⁵ Hã ra ag tóg ag vóg kónãn mũ sir, ti camarada ag. Ũ mrãnmrãn ag tóg mũ, ũ tén ag tóg mũ, ũ pin ag tóg mũ, pó tŷ.

³⁶ Kŷ tóg ag mŷ ã camarada ũ ag jĕgnĕ mãn mũ gé sir, ũn e ag sir, hã ra ag tóg ag vóg kónãn kãn mũ.

³⁷ Vãhã tóg ag mŷ ã kósin jĕnĕg mũ. “Ag hŷn ti kamĕg mũ, inh kósin ti,” he tóg, hã kŷ tóg ti jĕnĕg mũ.

³⁸ Kŷ ag tóg ti vég mũ, ti kósin ti. Kŷ ag tóg jagnĕ mŷ: “kejĕn ĕkré tag vŷ tŷ ti tũ nĩnh ke mũ,” he mũ. “Mũ nŷ, ti tén jé, ti tũ tag tŷ tŷ ĕg tũ nŷnh jé,” he ag tóg mũ, patrão kósin to.

³⁹ Kŷ ag tóg ti kãgmĩg mũ sir. Ró pãte ag tóg ti kutĕm kŷ (ag tóg) ti tén mũ sir.

⁴⁰ Kejĕn ag patrão vŷ kãtĩg ke mũ, ũ tŷ nĕn krãn ja ĕn. Kŷn hŷn hĕ ri kenh mũ, ã camarada ag tŷ?” he tóg, Jesus ti.

⁴¹ Kŷ ũ tŷ ti vĩ mĕg mũ ag tóg ti mŷ: “vĕnh jykre pãno han ag tóg mũ mŷr, uva ki rĩr tĩ ag,” he mũ. “Ag kãgtén jé tóg ke mũ, jũ kŷ, ag patrão ti, kŷ tóg uva kré ĕn tŷ ũ mŷ tovãnh ke mũ, ag tŷ ti mré vĕnh kãpãm jé, ti kanĕ ti,” he ag tóg ti mŷ. Ũ tŷ ti vĩ mĕg mũ ag tóg ke mũ, Jesus mŷ.

⁴² Kŷ tóg ag mŷ: “hŷ,” he mũ. “Kŷ Topĕ vĩ rá tag to jykrén nĩ gé, ha mĕ: pó tŷ ĩn han jafã fón ag tóg, pó tŷ ĩn han tĩ ag. Ag mŷ tóg kórég ja nĩ, pó ĕn ti. Hã

ra Topê tóg pó ên hã tỹ ãn nũna han mũ. Ëg Senhor mág tỹ há vễ mỹr, hã kỹ tóg ãg mỹ e tĩ, ãg tỹ ve kỹ,” he ja tóg nĩ, Topê vĩ rá ki,” he tóg, Jesus ti, vễso pó tỹ comparação ù han kỹ.

⁴³ “Hã kỹ sóg ãjag mỹ ke mũ. ãjag tỹ Topê tỹ tỹ ãg pã'i nĩ venh ke vễ vễ, hã ra ãjag tóg venh ke tũ nĩ. Û ag vĩ venh ke mũ, povo ù ag, ag tỹ inh vĩ kri fi kỹ,” he tóg.

⁴⁴ “Û tỹ hẽn ri ke ag vĩ pó tag kri vár ke mũ, kỹ ag tóg kri vár kỹ tũ' henh ke mũ. Kỹ pó tag vĩ ù tỹ hẽn ri ke ag kri kutênh ke mũ gé, kỹ tóg ag tỹ námnam ke kãn mũ, ag kri kutê kỹ,” he tóg, Jesus ti. Ti tỹ ag tỹ ti ki rá tũ tigrĩn nũgme ki vár ke tón hã vễ.

⁴⁵ Kỹ ag tóg mễg mũ sir, Jesus vĩ ti. Topê tũ ki rĩr tĩ to pã'i ag vĩ mễg mũ, Fariseu ag ke gé. Mễ kỹ ag tóg vãhã to jykrén mũ sir. “Ëg hã to tóg uva ki rĩr tĩ kórég ag to comparação tag han ja nĩ,” he ag tóg mũ sir, ki kanhrãn kỹ.

⁴⁶ Hã kỹ ag tóg ti se sór mũ. Hã ra ag tóg vễnh e ên kamêg mũ. “Topê vĩ tó tĩ pễ vễ,” he ag tóg, Jesus to, vễnh e ên, hã kỹ pã'i ag tóg povo ên ag kamêg kỹ ti ség tũ nĩ ver.

22

Vễnh prũg to comparação (Lc 14.15-24)

¹ Kỹ Jesus tóg ag mỹ comparação ù han mãn mũ sir.

² “Û tỹ kanhkã tá nĩ ên tỹ tỹ ãg pã'i nĩ vĩ ge nĩ, ha mễ,” he tóg. “Tỹ tóg pã'i mág ri ke nĩ. Ti kósin prũg ken kỹ tóg to festa mág han sór mũ, pã'i mág ti.

³ Hã kÿ tóg ã camarada ag jëgnëg mũ, ag tÿ ti tÿ ãn mÿ tó ja ag mÿ: “ha kãmũ jëg, festa kon jé,” he jé. Hã ra ag tóg kãmũ jãvãnh nÿtĩ.

⁴ Kÿ tóg ag mÿ ã camarada ã ag jëgnë mãn mũ. “Ag mÿ: “kãn inh huri, vëjën ti, he ti, ëg patrão ti,” hemnĩ,” he tóg. “Boi kãgtén inh huri, boi tãgy ën mré hã. Nén kar vÿ kynkar kÿ nÿtĩ. Kãmũ jëg ra, inh festa to, he ti, ëg patrão ti,” hemnĩ ag mÿ,” he tóg, pã'i mág ti, ã camarada ag mÿ. Kÿ ag tóg mũ mũ.

⁵ Hã ra ag tóg kãmũ sór tũ nĩ, kÿ ag tóg ti camarada ag to é he mũ. Û tóg ã japÿ ra tĩ mũ, ã tóg ã negócio nón tĩ mũ.

⁶ Û ag tóg hã ra ti camarada ag kugmĩ kÿ (ag tóg) ag vóg kónãn mũ gé sir, ag kãtén ag tóg mũ sir.

⁷ Kÿ pã'i mág tóg ag to jũ mũ. Kÿ tóg ã krëm pã'i ag jëgnë kÿ ag kãgtén mũ gé sir, ã tÿ ti camarada kãgtén ja ën ag. Ag ãn kugprüg ag tóg mũ sir.

⁸ Kÿ tóg ã camarada ag mÿ: “inh festa vÿ kar kÿ nĩ ha,” he mũ. “Hã ra ag tóg kãmũ jãvãnh nÿtĩ, isÿ ãn mÿ vënh vĩ jëñë ja ag, ag kórég nÿtĩn kÿ.

⁹ Ha mÿjëg, ëpÿ ra, ëmĩn vënh kãpóv (ja) ra ke gé. ã jag tÿ ã ve kÿ ti mÿ: “ha festa venh kãtīg,” hemnĩ,” he tóg, pã'i mág ti, ã camarada ag mÿ.

¹⁰ Kÿ ag tóg mũ mũ. ã jag tÿ ëpÿ tá ã ve kÿ ag tóg ag mÿ ke mũ. Vënh kar mÿ ag tóg tó mũ sir, ãn jykre há ag mÿ, ãn jykre kórég ag mÿ ke gé. Hã kÿ tóg fór mũ sir, clube ti.

¹¹ Kÿ pã'i mág tóg kãrã mũ sir, ag vigve jé, ã tÿ festa to kãmũ ag. Kÿ ã tóg tá jë nĩ, hã ra tóg festa to kur tu tũ nĩ.

12 Kÿ tóg ti mÿ: “festa to kur tu tũ ã tóg nĩ, vÿ,” he mũ. “Ã hã ne tóg kur kórég tu sór mũ', inh festa ki',” he tóg, ti mÿ. Hã ra tóg vĩ tũ nĩ sir.

13 Kÿ pã'i mág tóg ã camarada ag mÿ: “ha ti mrĩnh, ti pẽn, ti nĩgé, ha ti fón, re tá,” he mũ. Re tán kuty nĩ. Tá ag tóg jagtar tĩ. ãjag jã tÿ ag tóg gyngyn ke tĩ sir, gangan ke ag tóg tĩ sir, vëso jũgũ kÿ.

14 Ge ti nĩ. Û tÿ hẽn ri ke jé sóg prër tĩ, hã ra ti pipir nÿtĩ, ùn kuprëg kÿ nÿtĩ ag,” he tóg, Jesus ti. Ti tÿ ëg tÿ kanhkã tá festa venh ke tón hã vë.

Ag tÿ imposto to ti ki jëmẽ
(Mc 12.13-17; Lc 20.20-26)

15 Kÿ Fariseu ag tóg jagnë mré Jesus to jykrén mũ sir. Ag tÿ ti vĩ to ti se sór vë. Hã kÿ ag tóg: “ti vĩ tÿ hẽ to ëg hÿn ti senh mũ?” he mũ.

16 Tag to jykrén kÿ ag tóg sir Jesus mÿ ãjag mré ke ù ag jëgnëg mũ, Herodes mré ke ù ag mré hã, ag tÿ ón kÿ ti ki jëmẽ jé, ag tÿ ti vĩ to ti se jé. Ën ag tÿ Jesus tá junjun kÿ ag tóg ti mÿ: “Senhor,” he mũ. “Ã jykre kuryj nĩn ki kanhró ëg tóg nÿtĩ,” he ag tóg. “Hã kÿ ã tóg Topë to ëmĩn ki ëg kanhrãn há han tĩ. Vënh jykre pir hã han ã tóg tĩ. Û tÿ vënh jykre há hã han ve nĩ mũ ra ã tóg ti jykre ki kanhró kar nĩ,” he ag tóg mũ, ón kÿ, Jesus mÿ.

17 “Hã kÿ, ëg mÿ ã tÿ nén to jykrén mũ tómnĩ. Mÿ ha nÿ', ëg tÿ pã'i mág tÿ imperador mÿ jãnkamy ën nĩm ti', imposto kajãm jé'? Ëg mÿ hÿn nĩm mũ', vó mÿ vó?” he ag tóg mũ, ón kÿ ti ki jëmën kÿ.

18 Hã ra Jesus tóg ag jykre pãno ki kanhró nĩ. Hã kÿ tóg ag mÿ: “ãjag ne tóg ón kÿ inh ki jëmẽ sór mũ'.” he mũ. “Jykre régre ãjag nÿtĩ mÿr,” he tóg.

19 “Inh mǝ jǎnkamy jun, imposto kajǎm jafǎ ěn ti,” he tóg. Kǝ ag tóg ti mǝ ũ jun mǝ sir, jǎnkamy ti.

20 Kǝ tóg ag mǝ: “ũ jiji nǝ kǎ nǝ, ũ kǎgrǎ nǝ kǎ nǝ?” he mǝ.

21 Kǝ ag tóg ti mǝ: “pǎ'i mǎg tǝ imperador kǎgrǎ vǝ,” he mǝ. Kǝ tóg ag mǝ: “kǝ pǎ'i mǎg mǝ ti tũ nǝm nǝ, hǎ ra Topǝ mǝ ti tũ nǝm nǝ gé,” he mǝ sir.

22 Ag tǝ ti vǝ mǝ kǝ ti jykre tóg ag mǝ e tǝ sir. Kǝ ag tóg ti tovǎnh kǝ mǝ mǝ sir.

*Ĕg tǝ Ĕg ter ja tá vǝnh kenh ke
(Mc 12.28-34; Lc 10.25-28)*

23 Kǝ kejĕn Saduceu ag tóg Jesus tá junjun mǝ gé, kurǎ ěn kǎ. Ag tǝ ón kǝ ti ki jĕmĕ sór vǝ gé. Hǎ ra Saduceu ag tóg: “Ĕg ter ja tá Ĕg vǝnvǝnh kenh ke tũ nǝ,” he tǝ. “Rǝr mǎn ke tũ Ĕg tóg nǝ,” he ag tóg tǝ. Ĕn ag vǝ ón kǝ Jesus ki jĕmĕ sór mǝ gé.

24 “Senhor,” he ag tóg mǝ gé. “Moisés tǝ Ĕg mǝ vĕnh jykre nǝm kǝ tóg Ĕg mǝ: “ǎ régre tǝ ǎ krĕ tũ ra ter kǝ ǎ tǝ ti prũ fi tǝ prũg ke vǝ,” he mǝ. “ǎ tǝ ǎ régre mǝ ǎ krĕ han ke vǝ, fi ki,” he ja tóg nǝgtǝ, Moisés ti,” he ag tóg mǝ, Saduceu ag, Jesus mǝ.

25 “Kǝ ũ tǝ jagnĕ mré pafa ja tǝ 7 (ke) vǝ nǝtǝgtǝ. Ag kǎke tóg prũg mǝ, hǎ ra tóg ǎ kósin tũ ra ter mǝ. Kǝ ti jǎvy tóg fi tǝ prũg mǝ sir. Hǎ ra tóg ǎ kósin tũ ra ter mǝ gé. Kǝ ti jǎvy ũ tóg fi tǝ prũg mǝ gé sir.

26 Hǎ ra tóg ǎ kósin tũ ra ter mǝ gé, ti jǎvy ũ ke gé, hǎ ki ag kar vǝ kósin tũ ra kǎgter kǎn mǝ sir.

27 Kǝ vǎhǎ ag kar prũ fi tóg ter mǝ gé sir.

28 Kǝ fag kǎgter ja tá rǝnrǝr mǎn kǝ fi hǝn mén tǝ 7 (ke) nǝnh mǝ vǝ. Ag kar vǝ fi tǝ prũg ja nǝ mǝr. Hǎ kǝ tóg vĕnhmǝ nǝ, ag tǝ: rǝr mǎn jé Ĕg tóg ke mǝ, hen kǝ,” he ag tóg, Saduceu ag, Jesus mǝ.

29 Hã ra Jesus tóg ag mÿ: “kygně ãjag huri,” he mÿ. “Ãjag pi(jé) Topě vÿ tÿ rán kÿ nÿ ki kanhró nÿtÿ’, ãjag pi(jé) Topě jykre ki kanhró nÿtÿ’,” he tóg.

30 “Ëg rÿnrÿr mãn kÿ ãg tóg prÿg mãn ke tÿ nÿ sir, kÿ ãg mén mãn ke tÿ nÿ gé. Topě tÿ jěgně jafã ri ke ãg nÿtÿ, kanhkã tá,” he tóg.

31 “Kÿ Topě vÿ rá ù to jykrén nÿ, ti tÿ ãg ter ja tá vÿn ke tó ti. Topě hã ne tÿ vémén ja nÿ mÿr, hã kÿ tóg tag tó ja nÿ, ha mē.

32 “Abraão vÿ iso: Topě, he tÿ, Isaque ke gé, Jacó ke gé,” he ja tóg nÿ, Topě ti. Kãgter ag huri, Abraão, Isaque, Jacó. Hã ra Topě tóg: “tÿ inh ag Topě nÿ,” he ja nÿgtÿ, ag ter kar kÿ. Hã kÿ ag tóg rÿnrÿr nÿtÿ, Topě tÿ ùn rÿnrÿr nÿtÿ ag hã kri ke nÿn kÿ,” he tóg, Jesus ti.

33 Kÿ ag tóg ti vÿ mēg mÿ sir, kÿ ti jykre tóg ag mÿ e pē tÿ, ti vÿ ti.

*Topě tÿ ãg jyvĕn kãfór
(Mc 12.28-34; Lc 10.25-28)*

34 Kÿ Fariseu ag tóg mēg mÿ, Jesus tÿ Saduceu ag mÿ vÿ há han ja ti. Ti tÿ ag mÿ vÿ há han kÿ ag tÿ ti mÿ hē ri ken kÿ kafãn ke tóg tÿ tÿ sir. Hã mēg ag tóg mÿ, Fariseu ag. Kÿ ag tóg Jesus to vĕnhmãn mÿ sir.

35 Kÿ ag kã ù tóg ti mré vÿ mÿ. Topě vÿ to professor vĕ, ù tÿ Jesus mré vÿ mÿ ti. Kÿ tóg Jesus mÿ:

36 “Senhor,” he mÿ. “Topě tÿ ãg jyvĕn tÿ hē nÿ hÿn ti tÿ ãg jyvĕn kar kãfór nÿnh mÿ?” he tóg mÿ sir.

37 Kÿ Jesus tóg ti mÿ: “Topě to, ãg jóg mág to há távÿ nÿtÿmnÿ, ti ki ge há han nÿ, ti to jykre pir nÿtÿmnÿ,” he mÿ.

38 “Topě tÿ ãg jyvĕn kãfór kar hã vĕ.

39 Kÿ ti tÿ ãg jyvën ù tóg hã ri ke nĩ gé, hã vÿ: ãjag régre ki rÿr nÿtĩmnĩ, ãjag tÿ vënh ki rÿr há han ri ke, he mÿ,” he tóg.

40 “Vënh jyvën tag vÿ vënh jyvën kar kãfór nÿtĩ. Régre ti nÿtĩ, Topë tÿ ãg jyvën kãfór nÿtĩ ti. ãg tÿ tag ki króm kÿ ãg tóg Topë jykre ki króm kãn mÿ. Ti tÿ ãg jyvën mÿ han kãn ãg tóg mÿ, Topë vÿ tó tĩ tÿ ãg jyvën mÿ mré hã, ãg tÿ tag ki króm kÿ,” he tóg, Jesus ti.

*Cristo tÿ tÿ Davi kósin nĩ
(Mc 12.35-37; Lc 20.41-44)*

41 Hã ra Fariseu ag vÿ vënh mãn kÿ nÿtĩ, kÿ Jesus tóg ag ki jëmë sór mÿ gé sir.

42 Kÿ tóg ag mÿ: “Cristo to ãjag hë ri ke tĩ?” he mÿ. “Û kósin nẽ hÿn, Cristo ti?” he tóg, Jesus ti. Kÿ ag tóg ti mÿ: “Davi kósin vë,” he mÿ.

43 Kÿ tóg ag mÿ: “hã ra Davi tóg ti to: inh Senhor, he ja nĩ,” he mÿ. “Topë kuprÿg tÿ ti krÿn kÿ tóg tag tó ja nĩ, ha mẽ:

44 “ãg jóg tÿ Topë vÿ inh Senhor mÿ: “nĩ ra ver, inh pëgja tá,” he mÿ, “sÿ ã kato vãsãnsãn mÿ ag tÿ ã krëm vin ke vë, kÿ ag sigse vë sir. Tag jãvãnh nĩ ver,” he tóg mÿ, Topë ti, inh Senhor mÿ,” he ja tóg nÿgtĩ, Davi ti,” he tóg mÿ, Jesus ti.

45 “Hã kÿ Davi tóg Cristo to: “inh Senhor,” he ja nĩ. Ti tÿ tÿ ti kósin nĩ ra ti kósin mÿ tÿ ti kri ke nÿnh mÿ vë?” he tóg, Jesus ti. Ti tÿ Fariseu ag ki jëmëg mÿn hã vë.

46 Hã ra ag tÿ ti mÿ ne tónh ke tóg tũ tĩ, ag tÿ ti vÿ kafãn sór mÿ ra. Vãhã ag tóg ti ki jëmë sór mãn tũ nĩ. Ti kamëg ag tóg mÿ, hã kÿ ag tóg ti ki jëmë sór mãn tũ nĩ.

23

*Ón kÿ Topě vĭ to professor ag jykre
(Mc 12.38-39; Lc 11.43-46; 20.45-46)*

¹ Kÿ Jesus tóg vĕnh kar kanhrãn mũ sir, ti mré mũ tĩ ag mré hã. Kÿ tóg ag mÿ:

² “Moisés vÿ ěg jóg ag kanhrãn ja nĭgtĩ,” he mũ. “Ti nón Topě vĭ to professor ag tóg ěg kanhrãn sór mũ, Fariseu ag ke gé,” he tóg.

³ “Ag tÿ ājag mÿ nĕn tó mũ ěn ki króm nĩ. Ag vĭ kri fimnĩ. Ag tÿ nĕn han mũ ri ke han tũg nĩ jāvo, ag jykre kórég ěn han tũg nĩ. Ājag kanhrãn há han ag tóg tĩ, hã ra ag tóg ki króm sór tũ nĭgtĩ, ājag vĭ há ěn ki.

⁴ Ājag mÿ ag tóg vĕnh jykre kufy vin tĩ, hã ra ag hã tóg han sór tũ nĭgtĩ, vĕnh jykre kufy ěn ti.

⁵ Ag tÿ nĕn ũ há han kÿ ag tóg tÿ ũn mág nÿtĩ sór mũ sir, vĕnh kar tÿ ag vĭgve jé. Ag tÿ Topě mré vĭ jé ag tóg ti vĭ rá tÿ ājag nĭgé tógfĭg tĩ, ājag kakã ke gé. Vĕsógfĭn ja tãpér tÿ ag tóg vĕsógfĭg tĩ. Topě jykre han jé ag tóg kur tóv mág tu tĩ gé.

⁶ Festa ki ag tóg jĕn vén sór tĩ. Vĕnh kanhrãn jafã krĕm ag tóg vĕnh kãpov kÿ nÿtĩ.

⁷ Cidade kuju ki vĕnh kar tóg ag mÿ: “ã mÿ há?” he tĩ, kÿ tóg ag mÿ sér tĩ. Kÿ ag tóg ag to: “Senhor,” he tĩ gé, kÿ tóg ag mÿ sér tĩ.

⁸ Ag jāvo jagnĕ mÿ: “Senhor,” he sór tũg nĩ, kÿ ag tÿ ājag mÿ: “Senhor,” he mũ ra ag mÿ: “inh pi(jé) tÿ ũn mág nĩ’,” hemnĩ. Ũn pir vÿ tÿ ājag kri ke nĩ, hã vÿ: Topě, he mũ, jó ājag tóg tÿ jagnĕ mré ke nÿtĩ.

⁹ Kÿ ũ mÿ: “ěg jóg,” he tũg nĩ gé, ěprã. Ũn pir vÿ tÿ ājag jóg nĩ, hã vÿ: Topě, he mũ, kanhkã tá nĩ ěn ti.

10 Kĩ ù tỹ ãjag mỹ: “ẽg kri tỹ ùn mág nĩmnĩ,” he kỹ ag mỹ: “vó, kenh ke tũ inh nĩ,” hemnĩ gé. Ûn pir vỹ ãjag kri tỹ ùn mág nĩ, hã vỹ: Cristo, he mũ.

11 ãjag kãmĩ ùn mág ag jé ãjag ki rĩr há han, ãjag camarada tỹ ãjag ki rĩr há han tĩ ẽn ri ke.

12 ãjag tỹ tag ki vēsỹ tỹ ùn mág han sór nỹtĩn kỹ ãjag tóg tá térenh ke mũ, ha vemnĩ. ãjag tỹ hã ra: “tỹ inh ùn sĩ nĩ,” hen kỹ ãjag tóg tá jãprynh ke mũ, tỹ ùn mág ãjag nỹtĩnh mũ, ha vemnĩ,” he tóg, Jesus ti.

*Topẽ vĩ to professor ag jagtar ke
(Mc 12.40; Lc 11.39-42, 52; 20.47)*

13 “Ón kỹ Topẽ vĩ to professor’,” he tóg. “Fariseu’,” he tóg. “Jykre régre ãjag nỹtĩ,” he tóg. “Topẽ vỹ ãjag ve kónãn,” he tóg. “Û ag tóg ù tỹ kanhkã tá nĩ ẽn tỹ tỹ ẽg pã'i nĩ ve sór nỹtĩ, hã ra ãjag tóg ag mỹ kanhkã ti nenh tĩ. Ag jãvo ãjag tóg ve sór tũ nĩgtĩ. ãjag tỹ kanhkã ve sór tũ nĩn kỹ ãjag tóg ù ag mỹ nenh tĩ gé, ag tỹ vég tũ nĩ jé, ãjag ri ke,” he tóg, Jesus ti.

14 “Ón kỹ Topẽ vĩ to professor’,” he tóg. “Fariseu’,” he tóg. “Jykre régre ãjag nỹtĩ,” he tóg. “Topẽ vỹ ãjag ve kónãn,” he tóg. “ãjag ne tóg ùn mén ter ja fag tũ mãn kãn tĩ'. Kar kỹ ãjag tóg ón kỹ Topẽ mré vĩ téj han mũgtĩ, ẽg tỹ ãjag to: “há ag nỹtĩ,” he jé. Hã kỹ Topẽ vỹ ãjag vóg kónãn kãfór han ke mũ,” he tóg, Jesus ti.

15 “Ón kỹ Topẽ vĩ to professor’,” he tóg. “Fariseu’,” he tóg. “Jykre régre ãjag nỹtĩ,” he tóg. “Topẽ vỹ ãjag ve kónãn,” he tóg. “ãjag ne tóg kuvar há ra mũ tĩ', ga mũ, goj mũ ke gé, ãjag tỹ ù tỹ Israel ag jykre han sór mũ ù jãvãnh jé. Hã jé ãjag tóg mũ

mág han tĩ. Kĩ ãjag tỹ ù ven kĩ ãjag tóg ti tỹ Japo krẽ han mũ sir, ti tỹ ón kĩ Topẽ ví mẽ jé, ãjag ri kén, ti tỹ nũgme ki kutẽ jé, inferno ên ki. Kĩ ti jykre pãno vỹ ãjag jykre pãno kãfór nỹ sir,” he tóg, Jesus ti.

¹⁶ “Topẽ vỹ ãjag ve kónãn mỹr,” he tóg. “Kyvó ãjag nỹtĩ, hã ra ãjag tóg ù tỹ ki kagtĩg ag tatĩn mũ sór mũ. Hã kĩ ãjag tóg kygnẽg tĩ. Kĩ ãjag tóg ag kanhrãn kónãn tĩ. “Ëg tỹ ón kĩ: tag han jé sóg ke mũ, he sór kĩ ãg tóg: “Topẽ jo ãn krẽm nĩ ên vỹ ki kanhró nĩ,” henh ke mũ,” he ãjag tóg tĩ. “Ëg tỹ hã ra: Topẽ jo ãn krẽm ouro tân ên vỹ ki kanhró nĩ, hen kĩ ãg tóg ón ke tũ nĩ,” he ãjag tóg tĩ gé.

¹⁷ Vẽnhmỹ ti nĩ, ãjag ví tag. Krĩ tũ ãjag tóg nỹtĩ, kyvó ãjag tóg nỹtĩ. Ouro mỹ Topẽ jo ãn kãfór nĩ? Vó'. Ouro vỹ tỹ Topẽ tũ nĩ, ti tỹ Topẽ jo ãn krẽm nĩn kĩ. Hã kĩ tóg tỹ Topẽ tũ kar nĩ sir, ouro ti, ti jo ãn ti ke gé. Ón kĩ: “Topẽ hã vỹ ki kanhró nĩ,” he tũg nĩ,” he tóg, Jesus ti.

¹⁸ “Ãjag ví vẽnhmỹ ù vỹ nĩ gé. “Ón kĩ ãg tóg: ãg tỹ mesa kri ãn mỹ nén ù pũn mũ ên vỹ ki kanhró nĩ, henh ke mũ,” he ãjag tóg tĩ gé. “Ëg tỹ hã ra: ãg tỹ ãn mỹ ãg mẽg pũn tĩ ên vỹ ki kanhró nĩ, hen kĩ ãg ón ke tũ nĩ,” he ãjag tóg tĩ gé.

¹⁹ Vẽnhmỹ ti nĩ gé, ãjag ví tag ti. Kyvó ãjag nỹtĩ mỹr. Ëg tỹ Topẽ mỹ ãg mẽg pũn mũ mỹ mesa kãfór nĩ? Vó'. Topẽ jo ãn krẽm mesa kri ãg tóg ãg mẽg ti pũn tĩ, hã kĩ tóg Topẽ mỹ há tĩ, ãg mẽg ti, ãg tỹ ti jo ãn tá ti mỹ mesa kri ti pũn tũgrĩn.

²⁰ ãjag tỹ Topẽ jo ãn krẽm mesa tón kĩ, kĩ ãjag tóg ãg tỹ ãg mẽg tỹ mesa ên kri pũn mũ ên tó tĩ gé.

²¹ ãjag tỹ Topẽ jo ãn tón kĩ, kĩ ãjag tóg Topẽ ti tó tĩ

gé.

²² Ājag tỹ kanhkā tón kỹ, kỹ ājag tóg Topē nĩgia tó tĩ gé, kỹ ājag tóg Topē ti tó tĩ gé sir. Nén ũ pir vē, ti kar ti. Hã kỹ ón kỹ: Topē hã vỹ ki kanhró nĩ,” he tũg nĩ,” he tóg, Jesus ti.

²³ “Ón kỹ Topē vĩ to professor’,” he tóg. “Fariseu’,” he tóg. “Krĩ régre ājag nỹtĩ, kỹ Topē vỹ ājag ve kónãn,” he tóg. “Ón kỹ ājag tóg Topē mỹ ājag jakré ki dízimo vin tĩ. Ājag jakré tỹ hortelã tỹ 10 (ke) nỹtĩn kỹ ājag tóg Topē mỹ ũn pir nĩm tĩ, ājag jakré tỹ erva doce tỹ ke gé, ājag jakré tỹ cominho tỹ ke gé. Há ti nĩnh mũ vē. Hã ra ājag tóg ti tỹ ěg jyvẽn mũ ěn han tũ nĩgtĩ. Věnh jykre kuryj han tũ ājag tóg nĩgtĩ. Ũn jagãgtar ag jagãgtãn tũ ājag tóg nĩgtĩ. Topē vĩ kri fig tũ ājag tóg nĩgtĩ. Ājag tỹ ti vĩ ki króm tag tóg inh mỹ há nĩnh mũ vē, ha mẽ. Ājag tỹ ti tỹ ěg jyvẽn ki króm mré hã ājag jakré ki dízimo vin (hã) ra tóg inh mỹ há nĩnh mũ vē, ha mẽ. Hã ra ājag tóg ki króm sór tũ nĩgtĩ.

²⁴ Kyvó ājag nỹtĩ, hã ra ājag tóg ag tatĩn mũ sór nỹtĩ. Topē vĩ ũ ki króm sór ājag tóg tĩ, ti tỹ Topē mỹ tỹ nén ũ sĩ (hã) ra, kỹ ājag tóg ti vĩ ũ mrynhmranh tĩ, ti tỹ Topē mỹ kórég pē (hã) ra. Kỹ tóg goj ki ka ri ke nĩ. Ājag tỹ ka gón tũ nĩ jé ājag tóg kur ki kujĕg tĩ, kỹ tóg pan tĩ, goj ti. Hã ra ājag tóg cavalo tỹ goj ki ter mũ ra (ājag tóg) goj kórég ěn kron tĩ,” he tóg, Jesus ti.

²⁵ “Ón kỹ Topē vĩ to professor’,” he tóg. “Fariseu’,” he tóg. “Krĩ régre ājag nỹtĩ, kỹ Topē vỹ ājag ve kónãn,” he tóg. “Copo venja kupég ājag tóg tĩ, pénky venja, hã ra ti kátá tóg kavéj nĩ. Kỹ ājag

vỹ ge nỹgtĩ gé. Jykre há nĩ ve ãjag tóg nỹgtĩ gé, hã ra ãjag tóg vẽnĥ jykre pãno han tĩ, hã vỹ: jãnkamy to ag lograr he tĩ, he mũ, ãjag prũ tũ fag mré nỹ tĩ, he mũ gé.

²⁶ Kyvó ãjag nỹtĩ, ãjag tỹ tỹ Fariseu nỹtĩ ra. ãjag jykre pãno tovãnh nĩ, ãjag jãnhkri nỹtĩ jé. Kỹ vãhã vẽnĥ kar vỹ ãjag jykre há vég mũ,” he tóg, Jesus ti.

²⁷ “Ón kỹ Topě vĩ to professor’,” he tóg. “Fariseu’,” he tóg. “Krĩ régre ãjag nỹtĩ, kỹ Topě vỹ ãjag ve kónãn,” he tóg. “Vẽnĥ kej sĩnvĩ ri ke ãjag nỹtĩ. Sĩnvĩ nĩ ve ti nĩ, vẽnĥ kej ti, ěg tỹ pó tỹ kri tam kỹ, kar tinta tỹ pó to tĩn kỹ. Ti sĩnvĩ nĩ ve nĩ ra ti kãtã tóg kórég nĩ. Věser vỹ krěm nỹ nĩ, věser vag mũ ti, ti kuka.

²⁸ Tag ri ke ãjag nỹtĩ. Há nĩ ve ãjag nỹtĩ. Jykre kuryj nĩ ve ãjag nỹtĩ, hã ra ãjag kãtã tóg kórég nĩ, ãjag jykre régre nỹtĩn kỹ, ãjag tỹ Topě vĩ ki króm sór tũ nỹtĩn kỹ mỹr, ha mẽ,” he tóg, Jesus ti.

*Ůn jykre régre ag jagãgtar ke
(Lc 11.47-51)*

²⁹ “Ón kỹ Topě vĩ to professor’,” he tóg. “Fariseu’,” he tóg. “Krĩ régre ãjag nỹtĩ, kỹ Topě vỹ ãjag ve kónãn,” he tóg. “ãjag jóg'jóg ag vỹ Topě vĩ tó tĩ ag kãgtén ja nỹgtĩ. Jãvo ãjag tóg ag kej sĩnvĩ han tĩ, ůn jykre kuryj han ja ag kej ti.

³⁰ Kỹ ãjag tóg ag to: “ěg tỹ ěg jóg'jóg ag mré ga kri mũ hã ra ěg tóg ag kãgtén ke tũ nĩ vě,” he ti. “Ag mré ěg ag vóg ke tũ nĩ vě,” he ãjag tóg tĩ, ón kỹ.

³¹ Hã ki ãjag tóg ãjag jóg'jóg ag tó tĩ. “Ěg jóg'jóg ag vỹ ag kãgtén, Topě vĩ tó tĩ ag,” he ãjag tóg tĩ. “Ů tỹ ag kãgtén mũ ag krě'krě vỹ tỹ ěg nỹtĩ,” he ãjag tóg tĩ.

³² Kuri ājag jóg'jóg ag ri ke han nĩ, kuri ājag jóg'jóg ag tỹ ũn kãgtén ja tũ ěn ag kãgtén nĩ, ājag tỹ tỹ ājag jóg'jóg ag krě'krě nýtĩn kỹ," he tóg, Jesus ti.

³³ "Pỹn ri ke ājag nýtĩ, mĩg ri ke ājag nýtĩ. Ājag pi(jé) nũgme ki vár ke tũ nĩnh ke mũ', inferno ki'," he tóg.

³⁴ "Hã kỹ sóg ājag mỹ Topě vĩ tó tĩ ag jěgněnh ke mũ, věnh vĩ há tó mũ ag, Topě vĩ rán tĩ ag. Ag jěgně jé sóg ke mũ, ag tỹ ājag jyvěnh jé. Kỹ ājag tóg ag kãgtén ke mũ gé, ha vemnĩ. Ka to ājag tóg ag sanh ke mũ. Ag mrãnmrãn jé ājag tóg ke mũ, ājag tỹ věnh kanhrãn jafã krēm. Cidade kar ki ājag tóg ag nón mũnh mũ, ājag tỹ ag vóg kónãnh jé.

³⁵ Hã kỹ tóg ājag tỹ ũn jykre kuryj kar kãgtén mũ ri ke nĩ. ũn tỹ hěnh ri ke ag kãgtén ag tóg huri, ěprã ke ag, hã ra tóg ājag tỹ ag kãgtén kãn ri ke nĩ sir, Abel, Abel nón ke ag mré hã, Zacarias ěn mré hã, Baraquias kósin ěn. ěn tỹ ājag tóg Topě jo ĩn jo ti tén ja nĩ, Topě mỹ nén ũ pũn jafã ěn tá ājag tóg ti tén ja nĩ, Zacarias ěn.

³⁶ Ājag mỹ sóg tó mũ, ha mẽ. Ājag hã to ti jũnh ke mũ, Topě ti, ājag jóg'jóg ag tỹ ag kãgtén tigrĩn, ājag tỹ ag kãgtén tigrĩn ke gé," he tóg, Jesus ti.

Jesus tỹ Jerusalém tá ke ag to há nĩ

(Lc 13.34-35)

³⁷ Kỹ tóg Jerusalém ki ke ag to vēmén mũ. Fe kaj han tóg, ag to, kỹ tóg: "Jerusalém tá ke ag mỹ sóg tag tó sór mũ, ha mẽ," he mũ. "Topě vĩ tó tĩ ag kãgtén ag tóg tĩ. Topě tỹ ag mỹ ũn jěgněg tĩ ag pin ag tóg tĩ, pó tỹ, ag tỹ ag kãgtén jé. Isỹ ag věnh mãn há tóg tĩ vě, isỹ ag ki rĩr jé, Jerusalém tá ke ag, hã kỹ sóg ag jé prěr tỹ hěnh ri ke han mũ. Garĩnh fi jykre ri ke han

sór isóg mũ vễ, ag mỷ. Garĩnh fi vỹ ã krẽ kri jẽ nĩ, fi tỹ ag vễsỹrẻnh tũ nĩ jẻ ke vễ. Ẽn ri ke han sóg sóg mũ vễ, hã ra ag tóg ke jãvãnh nỹtĩ.

³⁸ Hã kỡ ag tóg ag jamã pũn kãn ke mũ, kỡ vãpũr vễ sir. Ủ vỹ kãnmar tá nĩg mãn ke tũ nĩ ha, ag tỹ cidade kókẻn ja tá.

³⁹ Hã kỡ sóg ag mỷ ke mũ. Inh ve mãn ke tũ ag nĩ ha (mỷr). Kejẻn ag tóg iso: “Topẻ tỹ ti jẻnẻ ja vễ,” hẻnh ke mũ. “Topẻ vỹ ti ve há han, ti tỹ ti jiji tó kãtĩg kỡ,” he jẻ ag tóg ke mũ iso, kejẻn. Ẽn kã ag tóg inh ve mãn ke mũ,” he tóg, Jesus ti.

24

*Topẻ jo ỉn kókẻn kỡ nĩnh ke
(Mc 13.1-2; Lc 21.5-6)*

¹ Kỡ Jesus tóg Topẻ jo ỉn tá kãkutẻ kỡ tĩ mũ sir. Kỡ ti mrẻ mũ tĩ ag tóg ti tá junjun mũ, kỡ ag tóg ti mỷ Topẻ jo ỉn ẻn ag venven mũ sir.

² Kỡ Jesus tóg ag mỷ: “ãjag mỷ pó tỹ ỉn mág tag ag vigvẻg mũ!” he mũ. “Kejẻn pó tóg jagnẻ kri nỹtĩ mãn ke tũ nĩ ha. Ag tỹ gũm ke kãn ke vễ. Ki hã sóg tó mũ,” he tóg, Jesus ti.

*Ẽg jagtar ke
(Mc 13.3-13; Lc 21.7-19)*

³ Kar kỡ tóg krĩ tỹ Oliveiras ra tĩ mũ sir. Ti tỹ tá nĩ kỡ ti mrẻ mũ tĩ ag tóg vyr mỷ ti ki jẻmẻnh kãmũ mũ. Kỡ ag tóg ti mỷ: “Ẽg mỷ ti kurã ti tó,” he mũ. “Ẽg tỹ ne ve kỡ ẻg ti kurã ki kanhró nỹtĩnh mũ, ã kãtĩg mãn ke kurã ẻn ti, nẻn kar tũg ke kurã ẻn ti?” he ag tóg ti mỷ.

⁴ Kỡ tóg ag mỷ: “ker ử ãjag lograr hẻ hẻ’,” he mũ.

5 “Cristo vỹ tỹ inh nĩ,” he jé ag tóg ke mũ, inh jyjy tó ky. Û tỹ hên ri ke ag tóg tag tónh ke mũ, ky ù tỹ hên ri ke ag tóg ag vĩ kri nĩm ke mũ.

6 Vênh génh to vême mẽ jé ãjag tóg ke mũ, tag ki vênh génh to, kuvar há tá vênh génh to ke gé. To jũrũn ke tũg nĩ, hã ra. Vênh génh enh ke vê. Hã ra kurã tỹ êgno to hã ke vê ver.

7 Nação ag tỹ jagnê kato têtênh ke vê, pã'i krêm ke ag tỹ pã'i ù krêm ke ag to jũnh ke vê. Ky ga tỹ ragra ke tỹ hên ri ke han ke vê, êmã tỹ hên ri ke ki. Vêjên tỹ tũ' henh ke vê gé.

8 Hã ra ãjag jagãgtar ke vênh ven vén vê ver,” he tóg, Jesus ti.

9 “Kar ky ãjag jagtar ke mũ, ãjag tỹ inh ki ge ky nỹtĩ tugrĩn. ãjag vóg kónãn jé ag tóg ke mũ, ãjag kãgtén jé ag tóg ke mũ gé. Nação kar vỹ ãjag to vĩ kónãn ke mũ gé, ãjag tỹ inh jiji tó tugrĩn.

10 Ky ù tỹ hên ri ke ag vỹ isogvãnh ke mũ sir, ên kã. ãjag mré ke fag tó jé ag tóg ke mũ, inh kato vãsãnsãn mũ ag mỹ, ky ag tóg jagnê to vĩ kónãn tãvĩ han ke mũ gé.

11 Ón ky inh vĩ tó tĩ ag vỹ junjun ke mũ gé, ky ag tóg ùn e krĩnkrĩn ke mũ sir, ag tỹ isogvãnh jé.

12 Ky vênh kar vỹ vênh jykre pãno to há nỹtĩnh mũ, hã ky ù tỹ ón ky iso há sĩ nỹtĩ ên ag tóg isogvãnh ke mũ gé, ùn e ag.

13 Hã ra ù tỹ isovãnh tũ pẽ ên ag tóg krenkren ke mũ.

14 Ky nação kar vỹ vênh vĩ sér mẽnh mũ, ga kar mĩ hã, ky ag tóg Topê tỹ tỹ êg pã'i nĩnh ke ên mẽnh mũ ha. Ag tỹ mẽ kãn ky kurã tỹ êgno vê sir,” he tóg, Jesus ti.

*Ĕg jagãgtar mág pẽ ti
(Mc 13.14-23; Lc 21.20-24)*

15 “Kejẽn ãjag tóg vãhã sir ãjag tỹ nẽn (ũ) kamẽg tĩ ãn venh ke mũ, ãg kavẽnh mũ ãn ti,” he tóg. “Topẽ vĩ tó tĩ tỹ Daniel vỹ ti tó ja nĩgtĩ. Topẽ jo ãn tá tóg jẽnh mũ, ãg kavẽnh mũ ãn ti,” he tóg, Jesus ti. (Ũ tỹ vẽnh rá tag to ke mũ ãn jé ki kanhró nĩ.)

16 ãjag tỹ ti ve kỹ ga tỹ Judéia ki ke kar ag jé vẽnh pigjunh mũjẽg, pãnónh ra, fag mré hã.

17 Ũ tỹ re tá nĩ ãn jé kãra rã tũg nĩ, ti ãn ki, ti tũ mãn jé.

18 Kỹ ũ tỹ ã japỹ tá jẽ ãn jé vỹn ke tũg nĩ gé, ti kur mãn jé.

19 Ũn kufy fag jagtar mág ke vẽ, kurã ãn kã, ũ tỹ gĩr pygfãm mũ fag ke gé.

20 Topẽ mré vĩmĩ, ti tỹ kusa kã vẽnh ven tũ nĩ jé, ti tỹ vẽnhkãn ke kurã kã vẽnh ven tũ nĩ jé.

21 Jagtar mág tỹ ge han ja tũ ãg tóg nỹtĩ, Topẽ tỹ mundo han jãn ki. Kỹ ãg ge han mãn ke tũ nĩ gé, kar kỹ.

22 Ĕg tỹ kurã ki jagtar ke mũ ãn vỹ e nỹtĩnh mũ vẽ, hã ra tóg térem kỹ nỹtĩ nĩ, Topẽ tỹ ãn kuprẽg ja ãn ag tigrĩn. Ti tỹ térem tũ nĩ (mũ) ra ũ vỹ kren ke tũ nĩ vẽ, ag jagtar mág ãn to,” he tóg, Jesus ti.

23 “Ĕn kã ũ tỹ ãjag mỹ: Cristo vỹ tag kã jẽ nĩ, he mũ ra kri nĩm tũg nĩ, ag tỹ: tátá ti jẽ nĩ, he mũ ra.

24 Ón kỹ Cristo ag vỹ vẽnh venven ke mũ, ón kỹ Topẽ vĩ tó tĩ ag ke gé. Ĕg tỹ nẽn han vãnh hyn han jé ag tóg ke mũ, milagre tỹ hẽn ri ke ti, ón kỹ Cristo ãn ag. Ag tỹ vẽnh kar krĩn kónãn sór vẽ, ag tỹ kygnẽ jé, Topẽ tỹ ãn kuprẽg ja ãn ag mré hã, hẽn ri ke mũn.

25 Æjag mÿ sóg tó kãn mÿ, ti kutēnh ke to hã,” he tóg, Jesus ti.

26 “Kejēn ag tóg ãjag mÿ: ěmã kórég tá tóg jē, Cristo ti, henh ke mÿ. Ra ti venh mÿ tÿg. Ag tÿ ãjag mÿ: ĩn kátá tóg nĩ nĩ, he mÿ ra kri fi tÿg nĩ.

27 Inh kãtĭg mãn ke vÿ ta tÿ kóm kóm ke ri ke nĩ. Ti tÿ kóm kóm ke kÿ ěg tóg nén kar vég tĩ, rã jur ja tá, rã pur ja tá ke gé. Inh kãtĭg mãn ke vÿ ri ke nĩnh mÿ. Tÿ sóg ěprã ke fi kósin nĩ,” he tóg, Jesus ti.

28 “Nén ũ ter nÿgja ri ke ti nĩ gé. Hã tá tóg vėnh mãn tĩ, jãtã ti. Tag ri ke ti nĩnh mÿ, inh kãtĭg mãn ke ti,” he tóg, Jesus ti.

Topě kósin kãtĭg mãn ke

(Mc 13.24-27; Lc 21.25-28)

29 “Jagtar ěn kar kÿ rã vÿ nhyr ke mÿ, kÿ kysã vÿ jėngrė he mãn ke tũ nĩ gé. Krĭg vÿ vár ke mÿ gé, kanhkã krēm. ěg tÿ kanhkã tá nén vég tũ kar ěn vÿ ragra ke kãn mÿ gé.

30 Kÿ vãhã ěprã ke fi kósin vÿ vėnh ven ke mÿ, kanhkã tá. Kÿ ga kri mÿ kar ag vÿ kygfÿ kãn ke mÿ sir, povo kar ti, ag tÿ inh kãtĭg ven kÿ. Kanhkã góg kãmĩ sóg térenh ke mÿ. Kÿ sóg tar pė nĩnh mÿ, ha vemnĩ, kÿ inh ve vÿ kókov pė nĩnh mÿ gé.

31 Kÿ sóg isÿ jėgnė jafã ag jėgnėnh mÿ, ag tÿ ténéntén kynkyn jé, kÿ ag tóg isÿ ũn kuprėg mÿ ag jé prėnprėr kãn ke mÿ sir, ga kar mĩ hã, kanhkã fyr mĩ hã,” he tóg, Jesus ti.

Ka tÿ figueira to comparação

(Mc 13.28-31; Lc 21.29-33)

32 “Ka tÿ figueira to ki kanhrãn nĩ, to comparação han kÿ. Ka tÿ figueira pė tánh kÿ, ti féj tãg han kÿ tóg kakó tĩ sir, ěkré tygtánh kurã ti.

³³ Ri ke ti nĩ, ãjag tỹ inh kãtĩg mãn ke kurã ki kanhró nỹtĩnh ke mũ ti. ãjag tỹ isỹ ãjag mỹ nén tó mũ tag ve kỹ tóg sir kakó tĩnh ha, kakó tãvĩ tóg tĩnh ha, inh kãtĩg mãn ke ti, ên kã.

³⁴ Sỹ ke há vễ, hã kỹ sóg tag tó mũ, ha mẽ: ùri ùn rĩnrĩr mũ ag tỹ nén kar ên venh ke vễ, ag kãgter ke to hã.

³⁵ Kanhkã vỹ tũ' henh ke mũ, ga ti ke gé. Jãvo inh vỹ vỹ tũ' henh ke tũ nĩ," he tóg, Jesus ti.

Jesus kãtĩg mãn ke kurã

(Mc 13.32-37; Lc 17.26-30, 34-36)

³⁶ “Hã ra ù pi(jé) isỹ kurã ki kãtĩg mãn ke mũ ki kanhró nĩ', hora ki ke gé. Topẽ tỹ jěgně jafã ag pi(jé) ki kanhró nỹtĩ'. Inh pi(jé) ki kanhró nĩ gé. Ęg jóg mág hã vỹ ã pin kỹ ki kanhró nĩ, kurã kã nén kutěnh ke mũ ên ki.

³⁷ Inh kãtĩg mãn ke kurã vỹ Noé tỹ ga mũ tĩg ja ên ri ke nĩnh mũ.

³⁸ Ta kutě to hã ag tóg jěnh ja nĩgtĩ, kron ja nĩgtĩ, jagně tỹ prũg ja nĩgtĩ, jagně tỹ mén ja nĩgtĩ, Noé mré ke ag. Ęn kã kejěnh Noé tóg barco tỹ ĩn kãra rã mũ.

³⁹ Hã ra tóg ag mỹ tỹ nén ù tũ tĩ, ti tỹ barco kãra rã mũ ti. Kejěnh ta tóg kutě mũ, kỹ goj tóg var mũ sir. Kỹ ag tóg kãgter kãn mũ sir vãhã. Ge ti nĩnh mũ, ěprã ke fi kósin kãtĩg mãn kỹ, inh kãtĩg mãn kỹ mỹr.

⁴⁰ Ęn kã ùn régre ag vỹ ãjag japy ki rãnrãj ke mũ. Inh kãtĩg mãn kỹ sóg ùn pir jé prěr ke mũ, jãvo ti régre vỹ tá jěnh mũ sir.

⁴¹ ùn régre fag vỹ ěgtynyn nỹtĩnh mũ, jagně mré, kurã ên kã. Kỹ sóg ùn pir fi jé prěr ke mũ, jãvo fi régre fi vỹ tá jěnh mũ gé sir.

42 Vēnh ki ěmēmñĩ, nũr tũ ri ke han nĩ. Inh kãtĩg ke hora ki kagtĩg ãjag tóg nỹtĩ. ãjag Senhor vỹ tỹ inh nĩ,” he tóg.

43 “Kỹ tag to jykrén nĩ, ha mẽ. Ęg pi(jé) ù tỹ ěg tỹ nén péju sór mũ kãtĩg ke ki kanhró nỹtĩ'. Ęg tỹ ti kãtĩg ke tỹ hora ki kanhró nỹtĩ ra ěg tóg to ěg tỹ nén ki rĩr mũ vễ, kỹ ù pi(jé) ěg ãn kãra rãnh ke mũ vễ'. Hã ra ěg tóg ki kagtĩg nỹtĩ.

44 Ge ti nĩ, inh kãtĩg mãn ke ti. Ha vễnh kãn, ha vễnh ki ěmễ. Ęprã ke fi kósin vỹ kãtĩg ke mũ, ãjag tỹ inh kãtĩg ke to jykrén tũ ra,” he tóg, Jesus ti.

Ûn camarada ag to comparação (Lc 12.41-48)

45 Kỹ tóg ag mỹ ã kãtĩg mãn ke tó mãn mũ. “Kejẽn patrão ù tóg hễ ra tĩg sór mũ,” he tóg. “Kỹ tóg ã camarada ag kã ù tỹ pã'i han mũ, ti tỹ ti jo ã mré camarada ag ki rĩr jé. Û tỹ ã rãnhrãj ki rĩr há han tĩ ěn kuprẽg tóg mũ, ti tỹ ag mỹ vễjẽn ven jé, vễjẽn ke horan ki.

46 Ti tỹ ag ki rĩr há han kỹ ti patrão vỹ ti mỹ vĩ há han ke mũ, ti kãtĩg mãn ken kã.

47 Ti tỹ pã'i han jé tóg ke mũ, ti tỹ ti tũ ki rĩr kãn jé sir. Kĩ hã sóg tó mũ, ha mẽ.

48 Kejẽn ti camarada ù tóg hã ra jykre pãno nĩ. Kỹ tóg tag to jykrén mũ. “Ęg patrão vỹ kãtĩg vãnh han mũ,” he tóg mũ sir, ùn jykre pãno ěn.

49 Kỹ tóg ã mré camarada ag vóg kónãn mũ sir, ag mrãnmrãn kỹ. Kỹ tóg ùn kronkron tĩ ag mré kron mũ gé sir, jẽn mág han tóg mũ gé sir.

50 Kÿ ti patrão vỹ ti kãnhmỹ kãtĩg ke mũ sir, ti tỹ ti kãtĩg ke kurã ki kagtĩg nĩn kỹ, ti horan ke gé, ùn jykre kórég ên ti.

51 Æ kãtĩg kỹ tóg ti kapãn ri ke han ke mũ sir, kỹ tóg ti fón ke mũ gé sir, ùn jykre régre ag mré. Tá ag tóg jagtar ke mũ, ãjag jã tỹ ag tóg gyngyn ke mũ, tỹ ag tóg gangan ke mũ, jũ kỹ, ùn jykre kórég ên ag,” he tóg, Jesus ti. Ti tỹ ù tỹ ti rãnhraj han kónãn mũ kãmén hã vë.

25

Tátãg tỹ 10 (ke) fag to comparação

1 Kÿ Jesus tóg ag mỹ ã kãtĩg mãn ke ên kãmén mãn mũ, kỹ tóg ag mỹ: “ên kã ù tỹ kanhkã tá nĩ ên tỹ tỹ êg pã'i nĩnh ke vỹ ge nĩnh mũ, ha mẽ,” he mũ. “Tátãg fag ri ke ti nĩnh mũ. Û tỹ 10 (ke) fag vỹ nỹtĩ, tátãg fag. Vënh kyprũg ve jé fag tóg lampião vyn kỹ mũ mũ, ùn prũg mũ ên kato.

2 Fag tỹ 5 (ke) fag vỹ jykre kórég nỹtĩ, jãvo ù fag vỹ jykre há nỹtĩ, ù tỹ 5 (ke) ù fag.

3 Kÿ ùn jykre kórég fag vỹ virmỹ azeite ma mũ ja tũ nĩ, hã ra tóg sĩn kỹ lampião kãkã nĩ nĩ.

4 Fag jãvo ùn jykre há fag vỹ azeite ma mũ mũ, virmỹ.

5 Hã ra tóg kãtĩg vãnh han mũ, ùn prũg mũ ti. Kÿ tóg kejên fag nũgnũr há tĩ sir, ti jun tũg ki, kỹ fag tóg nũgnũr kãn mũ sir.

6 Meia noite ki vënh vĩ tóg mẽ há tĩ, kỹ tóg: “!..nĩgnĩ ra..!” he mũ. “!..Ûn prũg mũ vỹ kãteg..!” he tóg. “!..Ha ti venh kãmũ jeg..!” he tóg.

7 Kÿ tátãg ên fag vỹ nĩgnĩg kỹ fag lampião grug-grug mũ sir.

8 Kÿ ùn jykre kórég fag vỹ ùn jykre há fag mỹ azeite to ví mũ. “Ëg mỹ ãjag azeite vënh kãpãm. Nhyn ke ti nỹtĩ ha, ãg lampião ti,” he fag tóg mũ.

9 Hã ra ùn jykre há fag tóg fag mỹ: “vó!,” he mũ. “Ëg tỹ ãjag mỹ vënh kãpãm kỹ tóg ãg mỹ kã kyn ke mũ gé, ãjag ri kén. Negócio ra mũjãg, ãjag tỹ azeite ven jé,” he fag tóg mũ.

10 Kÿ fag tóg mũ mũ. Fag gunja tá tóg jun mũ sir, ùn prũg mũ ti. Kÿ fag tóg ti mré mũ mũ sir, ùn lampião gru nỹtĩ fag. Vënh kyprũg ve jé fag tóg mũ mũ, kÿ ag tóg jãnkã ti nĩfënh mũ sir, ùn jykre kórég fag jy.

11 Kÿ vãhã tátãg ù fag vỹ tá junjun mũ gé sir, kÿ fag tóg ti mỹ: “Senhor’, Senhor’,” he mũ sir. “Ëg mỹ nón,” he fag tóg.

12 Hã ra tóg fag mỹ: “ãjag ki kagtĩg sóg nĩ, mÿr, ha mẽ,” he mũ,” he tóg, Jesus ti.

13 “Hã kÿ sóg ãjag mỹ: vënh ki rĩr, nũr tũ ri ke han kÿ, he mũ. Kãtĩg jé sóg ke mũ. Hã ra ãjag tóg inh kãtĩg ke kurã ki kagtĩg nỹtĩ, inh hora ki ke gé. Hã kÿ inh jãvãnh to krónh ke tũg nĩ,” he tóg, Jesus ti.

Û camarada ag to comparação

(Lc 19.11-27)

14 Kÿ Jesus tóg: “inh kãtĩg mãn ke vỹ tag ri ke nĩnh mũ gé, ha mẽ,” he mũ. “Kejën ù tóg ga ù venh tĩg sór mũ, kÿ tóg ã camarada ag jé prër mũ, ti tỹ ag mÿ ã tỹ nén kar vënh kãpãm jé, ã jãnkamy kar.

15 Û mÿ tóg jãnkamy kãmur tỹ 5 (ke) vin mũ, ù mÿ tóg ti kãmur régre vin mũ, ù mÿ tóg ti kãmur pir nĩm mũ. Ûn krĩ há ën mÿ tóg ti kãmur e vin mũ, ùn krĩ pãgsĩ ën mÿ tóg ti kãmur pir nĩm mũ.

16 Kÿ ù tÿ ti kãmur tÿ 5 (ke) mǎg mũ ěn vÿ tĩ mũ. Jǎnkamy ěn tÿ rǎnhrǎj mǎg han kÿ tóg kejĕn ù tÿ 5 (ke) ù mǎg mũ, kÿ ti tũ vÿ tÿ ti kãmur tÿ 10 (ke) nÿtĩ sir.

17 Kÿ ù tÿ ti kãmur régre mǎg mũ ěn vÿ tÿ rǎnhrǎj mũ gé. Ti kãmur régre ù mǎg tóg mũ sir, ã rǎnhrǎj to, kÿ tóg tÿ 4 (ke) nÿtĩ.

18 Ag jǎvo ù tÿ ti kãmur pir mǎg mũ ěn vÿ ã tũ nég tĩ mũ sir. ã patrǎo tÿ ti mÿ jǎnkamy nĩm ěn nég tóg mũ, mÿr, ha mẽ.

19 Kejĕn ag patrǎo vÿ vÿn ke mũ sir, si há tĩ kÿ.

20 Kÿ ti camarada tóg ti venh kǎtĩ mũ, ù tÿ ti kãmur tÿ 5 (ke) mǎn ja ěn ti. Kÿ tóg ti mÿ ù tÿ 5 (ke) ù ěn ven mũ sir, ti ganho ti, kÿ tóg ã patrǎo mÿ: “ù tÿ 5 (ke) vin ã tóg inh mÿ,” he mũ, “hǎ ra sóg tÿ rǎnhrǎj kÿ ù tÿ 5 (ke) ù mǎn ja nĩ,” he tóg.

21 Kÿ ti patrǎo tóg ti mÿ: “jÿkre há ã tóg nĩ,” he mũ. “ã tũ ki rĩr há han ã tóg nĩ mÿr. Nén sĩ ki rĩr há han ja ã tóg nĩgtĩ, kÿ sóg ã mÿ nén ù e vin sór mũ, ã tÿ ki rĩr jé. ã patrǎo fe tÿ mrin ke ã mÿr. Hǎ inh mré kǎtĩg,” he tóg, ti patrǎo ti.

22 Kÿ ti camarada ù tóg jun mũ gé, ù tÿ ti kãmur régre mǎn ja ěn ti. Kÿ tóg ti mÿ: “inh mÿ ã tóg ti kãmur régre vin ja nĩ,” he mũ. “Tÿ rǎnhrǎj kÿ sóg ùn régre ù mã. Hǎ vĕ ha,” he tóg.

23 Kÿ ti patrǎo tóg ti mÿ: “jÿkre há ã tóg nĩ,” he mũ gé. “ã tũ ki rĩr há han ã tóg nĩ mÿr. Nén sĩ ki rĩr há han ja ã tóg nĩgtĩ, kÿ sóg ã mÿ nén ù e vin sór mũ, ã tÿ ki rĩr jé. ã patrǎo fe tÿ mrin ke ã mÿr. Ha inh mré kǎtĩg,” he tóg, ti patrǎo ti.

24 Kÿ ti camarada ù tóg jun mũ gé sir, ù tÿ ti kãmur pir mǎn ja ěn ti. Kÿ tóg ti mÿ: “Senhor’,” he mũ. “Vĩ

tar han ã tóg tĩgtĩ, ki kanhró sóg nĩ. Æ tỹ nén krãn ja tũ ãn mǎg ã tóg tĩgtĩ, ã tỹ ti fy vǎm tũ ra ã tóg ti kanẽ ve sór tĩgtĩ.

²⁵ Hǎ kỹ sóg mũmẽg kỹ ti kǎmur né. Æ tũ ti hǎ vẽ ha,” he tóg, ti patrão mỹ.

²⁶ Kỹ ti patrão tóg ti mỹ: “jykre kórég ã tóg nĩ,” he mũ. “Æ tũ ki rĩr kónǎn ã tóg nĩ mỹr. Inh mỹ isỹ nén krãn ja tũ mǎg tĩgtĩ? Inh mỹ isỹ nén ã fy vǎm tũ ra ti kanẽ ve sór tĩgtĩ? Hǎ ki kanhró ã mỹ nĩ’?

²⁷ Æ tỹ ne jé inh jǎnkamy tỹ banco ki rǎnhrǎj tĩ ag mỹ vin ja tũ nĩ nẽ? Kỹ sỹ ti juro ven kỹ sóg isũ kǎfór mǎn ke vẽ vẽ.

²⁸ Tĩ tũ ma ra,” he tóg mũ sir, polícia ag mỹ. “Inh camarada ã mỹ nĩm, sỹ ti mỹ nĩm ja ãn ti. Æ tỹ ti kǎmur tỹ 10 (ke) mǎg mũ ãn mỹ nĩm, ti kǎmur pir tỹ, sỹ ãn jykre kórég tag mỹ nén nĩm ja ãn ti,” he tóg, ag patrão ti, polícia ag mỹ,” he tóg, Jesus ti.

²⁹ “Ge ti nĩ. Æn tũ mǎg vỹ mǎn mǎn mũ, kỹ tóg ti mỹ tũ' henh ke tũ pẽ nĩ. Æn tũ tũ ãn tũ sĩ mǎn jé ag tóg ke mũ, kỹ tóg tỹ tũ tũ nĩ sir,” he tóg, patrão ti.

³⁰ “Kỹ inh camarada kórég tag fón, kutyg ja ãn kǎkǎ. Tá ag tóg jagtar tĩ, ãjag jǎ tỹ ag gyngyn ke tĩ, vẽso jũ kỹ,” he tóg, patrão ti,” he tóg, Jesus ti, ã tỹ ã kǎtĩg mǎn ke kǎmẽn kỹ.

Jesus tỹ vẽn kar jykre tugnỹm ke

³¹ Kỹ Jesus tóg ag mỹ: “ẽprǎ ke fi kósın ãn kǎtĩg mǎn kỹn ge nĩnh mũ, ha mẽ,” he mũ. “Inh kǎtĩg mǎn kỹ sóg tar pẽ kǎtĩ mũ, sĩnvĩ. Isỹ jěgnẽ jafǎ ag vỹ inh mré kǎmũnh ke mũ. Kỹ sóg inh nĩgja kri nĩnh ke mũ sir, kỹ inh jykre tar vỹ vẽn ven ke mũ.

³² Kĩ ěprã ke kar vỹ inh jo vĕnh mãn kãn ke mũ sir. Kĩ sóg vĕnh kar vĕnh kãpãm ke mũ sir, ha mẽ. Carneiro mré cabrito ki rĩr tĩ ěn vỹ kejĕn ã mẽg vĕnh kãpãm tĩ. Carneiro ag tỹ tóg vyrmỹ vin tĩ, cabrito ag tỹ ke gé.

³³ Kĩ tóg carneiro ag tỹ ã pĕgja tá vin tĩ, jó tóg cabrito ag tỹ ã jakãnh tá vin tĩ. Tag ri ke han jé sóg ke mũ.

³⁴ Tỹ sóg vĕnh kar kri pã'i mág nĩnh mũ, kurã ěn kã. Kĩ sóg inh pĕgja tá nỹtĩnh ke mũ ag mỹ: “ha inh mré kãmũ jĕg,” henh ke mũ. “Inh panh vỹ ãjag to vĩ há han mũ mỹr. Topĕ tỹ ga tãg mré kanhkã tãg venh kãmũ jĕg. Topĕ tỹ ga han kurã ěn kã tóg ãjag hã kuprĕg ja nĩ, ãjag tỹ ti tỹ ga tãg mré kanhkã tãg tag ve jé.

³⁵ Kejĕn sóg kókĩr nĩ ja nĩgtĩ, kỹ ãjag tóg inh jĕn. Isỹ kron há nĩn kỹ ãjag tóg inh mỹ goj jun. Isỹ ãjag ĩn tá jun kỹ ãjag tóg inh mỹ: “ha kãrã, ěg mré nĩ,” he ja nĩgtĩ gé.

³⁶ Inh kur tũ nĩn kỹ ãjag tóg inh mỹ kur vin. Inh kaga nĩn kỹ ãjag tóg inh venh kãmũ ja nĩgtĩ. Ise kỹ jĕ kỹ ãjag tóg inh venh kãmũ ja nĩgtĩ gé,” he jé sóg ke mũ ag mỹ,” he tóg.

³⁷ “Kỹ ũn jykre kuryj tag ag vỹ inh mỹ: “Senhor’,” henh ke mũ. “Ěg hĕ kã ã kókĩr vé, ěg tỹ ã mỹ vĕjĕn ven jé? Ěg hĕ kã ã kron há tĩ vé, ěg tỹ ã mỹ goj ven jé?

³⁸ Ā hĕ kã ěg ĩn tá jun, ěg tỹ ã mỹ: “ha kãrã,” he jé? Ěg hĕ kã ã kur tũ vé, ěg tỹ ã mỹ kur vin jé?

³⁹ Ěg hĕ kã ã kaga vé, ěg hĕ kã ã se vé, ěg tỹ ã venh kãmũ jé? Ki kagtĩg ěg nỹtĩ,” he jé ag tóg ke mũ, inh mỹ.

40 Kÿ sóg ag mÿ: “ũn jagãgtar ag jagãgtãn ja ãjag tóg nĩgtĩ, inh mré ke ag, hã ra tóg ãjag tÿ inh jagãgtãn ri ke nĩ, ãjag tÿ ag jagãgtãn ja ti, ki hã sóg tó mũ,” he jé sóg ke mũ, isÿ tÿ pâ'i mág nĩn kÿ,” he tóg, Jesus ti.

41 “Kÿ sóg inh jakãnh tá nÿtĩ ag mÿ: “ha mÿjẽg, tãra,” henh ke mũ gé. “Inh panh vÿ ãjag mÿ vĩ kónãn. Pĩ nhyr vãn̄h ra mÿjẽg. Nén-Kórég mÿ tóg kar kÿ nĩ, pĩ nhyr vãn̄h ên ti, Nén-Kórég tÿ jẽgnẽ jafã ag mÿ tóg kar kÿ nĩ gé. Ên ra mÿjẽg.

42 Inh kókĩr ra ãjag pi(jé) inh mÿ vễjẽn ven'. Isÿ kron há ra ãjag pi(jé) inh mÿ goj jun'.

43 Isÿ ãjag ãn tá jun mũ ra ãjag pi(jé) inh mÿ: “ha kãrã,” he ja nĩgtĩ'. Isÿ kur tũ ra ãjag pi(jé) inh mÿ ù vin'. Inh kaga nÿ ra, ise kÿ jẽ ra ãjag pi(jé) inh venh kãmũ ja nĩgtĩ',” he jé sóg ke mũ,” he tóg.

44 “Kÿ ag tóg inh mÿ kenh ke mũ gé. “Senhor',” he jé ag tóg ke mũ gé. “Ëg hẽ kã ã kókĩr vé, ã kron ha ti? Æ hẽ kã ãg ãn tá jun'? Ëg hẽ kã ã kur tũ vé', ã kaga ti', ã se ti', ãg tÿ ã ki rĩr jé? Ki kagtĩg ãg nÿtĩ',” he jé ag tóg ke mũ gé.

45 Kÿ sóg ag mÿ: “ũn jagãgtar ag jagãgtãn ja tũ ãjag tóg nĩgtĩ,” henh ke mũ, “hã kÿ tóg ãjag tÿ inh jagãgtãn tũ ri ke nĩ, ki hã sóg tó mũ, mÿr, ha mẽ,” he jé sóg ke mũ.

46 Kÿ ag tóg jagãgtar kenh ke mũ, hã ra tóg tũ' henh ke tũ nĩ, ag jagtar ke ti. Ag jãvo ùn jykre há ag vÿ rĩr krÿg ja tũ venh ke mũ,” he tóg, Jesus ti.

26

Ag tÿ Jesus tén sór

(Mc 14.1-2; Lc 22.1-2; Jo 11.45-53)

¹ Vãhã tóg tó kãn ja nĩgtĩ, ti tỹ nén tónh ke ja ti, Jesus ti. Kĩ tóg ã mré mũ tĩ ag mĩ:

² “kurã régre tũg kũ tóg ãg festa mág tỹ Páscoa nĩ,” he mũ. “Ën kã ag tóg ãprã ke fi kósin ti senh ke mũ, kũ ag tóg ti fẽg ke mũ, ka to ti sa jé. Inh hã vẽ,” he tóg, Jesus ti.

³ Hã ra Topẽ tũ ki rĩr tĩ to pã'i mág ag vỹ vẽn h mãn mũ sir, Topẽ vĩ to professor ag mré hã, kófa ag mré ke gé. Pã'i mág ãn tá ag tóg vẽn h mãn mũ sir, pã'i ãn jijin hã vỹ: Caifás, he mũ.

⁴ Kĩ ag tóg Jesus se to jykrén mũ sir. Ag tỹ ti vatánh tá ti kãgmĩ sór vẽ, ti se jé, ti tén jé.

⁵ Kĩ ag tóg to jykrén kũ: “festa tag to mẽ jé ãg tóg ke mũ ver,” he mũ. “Ëg tỹ festa kã ti se kũ vẽn h génh mág hỹn tóg kutẽn h mũ, ha vemnĩ,” he ag tóg mũ sir jagnẽ mĩ.

*Jesus tỹ Betânia tá nĩ
(Mc 14.3-9; Jo 12.1-8)*

⁶ Ën kã Jesus tóg kejẽn ãmã tỹ Betânia tá nĩ nĩ, Simão ãn krẽm, vẽn h kaga kren vãn h han ja ãn ãn krẽm.

⁷ Ti jẽg nĩ ra ã fi tóg tá jun mũ, garrafa mãn kũ. Pó kupri tânãj tỹ tóg há nĩ, garrafa ti. Ti ki nĩ vỹ tỹ nén kar tãg nĩ, ger há ãn, ãn kaja e ãn. Ti gãn h tãg fi tóg mũ, ger há ãn tỹ.

⁸ Kũ ti mré mũ tĩ ag tóg fi vég mũ, hã ra tóg ag mĩ kórég nĩ. Fi to jũ kũ ag tóg: “fi tỹ ne jé nén kaja e kókén nẽ?” he mũ.

⁹ “Ëg tỹ ger há tag fón ke vẽ vẽ, kaja há to, ãg tỹ ãn jagãgtar ag mĩ vin jé,” he ag tóg mũ.

¹⁰ Kÿ Jesus tóg mễg mũ, ag vĩ ti, kÿ tóg ag mÿ: “ãjag tÿ ne jé fi mÿ kaga han nễ?” he mũ. “Inh jykre ki króm fi tóg.

¹¹ Inh hã tóg ver nĩ sĩ han mũ, ãjag mré, jãvo ùn jagãgtar ag vĩ kurã kar ki ãjag mré nÿtĩ nĩ.

¹² Fi tÿ inh kãn vễ, ag tÿ vễnh kej tá inh fón jé hã jé fi tóg ger há tag tÿ inh kri kujẽg.

¹³ Ag tÿ vễnh vĩ sér tugtón kÿ ag tóg fi tÿ nén han mũ tag tónh ke mũ gé, ga kar mĩ hã, kÿ vễnh kar vĩ fi tÿ nén han mũ mễnh ke mũ, ha vemnĩ. Ki hã sóg tó mũ,” he tóg, Jesus ti.

Judas tÿ pã'i ag mÿ Jesus ven ke

(Mc 14.10-11; Lc 22.3-6)

¹⁴ Kar kÿ ù tÿ 12 (ke) ag kã ù tóg Topẽ tũ ki rĩr tĩ to pã'i ag venh tĩ mũ. Ûn tĩg mũ jyjyn hã vĩ: Judas Iscariotes, he mũ.

¹⁵ Tá jun kÿ tóg ag mÿ: “sÿ ãjag mÿ Jesus ven ke vễ, ãjag tÿ ti se jé,” he mũ. “Ãjag mÿ inh mÿ kajãm ke tũ, sÿ ãjag mÿ ti ven ke ti?” he tóg. Kÿ ag tóg ti mÿ: “vó,” he kÿ jãnkamy tÿ 30 (ke) tÿ kajãm mũ sir.

¹⁶ Ti tÿ jãnkamy ẽn mãn kar kÿ tóg to jykrén mũ. “Inh hÿn hẽ ri kenh mũ, isÿ vễnh kar vatánh tá ag mÿ Jesus ven jé?” he tóg mũ sir, Judas ti, ón kÿ Jesus mré tĩ mũ ẽn ti.

Jesus tÿ Páscoa ko

(Mc 14.12-21; Lc 22.7-14, 21-23; Jo 13.21-30)

¹⁷ Kejẽn tóg pão jẽgja tũ konh ke kurã tá krÿg mũ, kÿ Jesus mré mũ tĩ ag tóg ti mÿ: “ẽg hÿn hẽ tá ã mÿ carneiro sĩ tân h mũ, ẽg tÿ kon jé?” he mũ.

¹⁸ Kÿ tóg ag mÿ: “ẽmã mág tag ra mũjẽg,” he mũ. “Tá ù tóg nĩ nĩ. Ti mÿ: “ẽg Senhor vĩ ã mÿ vễnh vĩ jẽnẽg mũ,” hemnĩ. “Inh kurã vĩ kakó tĩ ha, kÿ sÿ

ã ãn krēm Páscoa konh há tóg tĩ, inh mré mũ tĩ ag mré,” he tóg mũ,” hemnĩ ti mĩ,” he tóg, Jesus ti.

¹⁹ Kĩ ag tóg mũ mũ sir, ti mré mũ tĩ ag. Ti tỹ ag mỹ tó mũ han ag tóg mũ sir. Cordeiro tân ag tóg mũ sir, ag tỹ Páscoa kã ko tĩ ěn.

²⁰ Rã pur kar kĩ tóg tá jun kĩ ù tỹ 12 (ke) ag mré nĩ mũ sir, jĕn jé.

²¹ Ag jĕn kã tóg ag mỹ: “ãjag kãmĩ ù tóg pã'i ag mỹ inh ven ke mũ, ag tỹ ise jé, ki hã sóg tó mũ,” he mũ.

²² Kĩ tóg ag fe kaj tĩ sir, kĩ ag tóg ti mỹ: “inh mỹ vó'? Inh mỹ vó'?” he kãn mũ sir.

²³ Kĩ tóg ag mỹ: “ũ tỹ inh mré pão tỹ kã punpun mũ ěn hã vĕ,” he mũ. “Û tỹ ã nĩgé tỹ pĕnky kãki pão tỹ kã punpun mũ ěn hã vĕ. Ěn hã vỹ ag mỹ inh ven ke mũ,” he tóg.

²⁴ “Tĩg jé sóg ke mũ, isỹ tỹ ěprã ke fi kósin nĩn kĩ. Hã kĩ tóg rán kĩ nĩ, isĩg ke ti. Hã ra ù tỹ ag mỹ inh ven ke mũ ěn mỹ tóg vĩ kónãn tãvĩ han ke mũ, Topĕ ti. Ti tỹ mur ja tũ nĩ ra tóg ti mỹ há tĩ vĕ,” he tóg, Jesus ti.

²⁵ Kĩ Judas tóg ti mỹ ke mũ gé sir, ù tỹ pã'i ag mỹ ti ven ke mũ ěn ti. Ěn tóg ti mỹ: “Senhor', inh hã mỹ'?” he mũ gé. Kĩ tóg ti mỹ: “ki hã ã tóg tó mũ,” he mũ, Jesus ti.

Santa Ceia

(Mc 14.22-26; Lc 22.15-20; 1Co 11.23-25)

²⁶ Kĩ ag tóg jĕg mũ. Ag jĕn nỹtĩ ra Jesus tóg ěmĩ mãg mũ sir. Topĕ mré tóg vĩ mũ sir, ěmĩ to, kĩ tóg vĕnh kã kugpãn kĩ ag mỹ vĕnh kãpãm mũ sir, ti mré mũ tĩ ag mỹ. Kĩ tóg: “té, ha kó,” he mũ. “Inh hã vĕ,” he tóg, ěmĩ to.

27 Kar kÿ tóg copo vãg mũ gé sir, vinho tÿ ki jën kÿ. To tóg Topẽ mré vÿ mũ gé. Ag mÿ copo jun kÿ tóg: “ha kronkron,” he mũ.

28 “Inh kyvénh hã vễ,” he tóg, vinho to. “Inh kyvénh tÿ vễnh kar jagfy kutên hã vễ. Sÿ vễnh e mré vễnh jykre tãg han to ke hã vễ, hã vÿ tÿ inh kyvénh ti nĩ. Inh kyvénh tag to Topẽ vÿ ãjag mÿ vễnh pãte fón ke mũ, ãjag tÿ ti vÿ mranh ja ti,” he tóg.

29 “Ha mẽ, uva me kron măn ke tũ inh nĩ ha. Kejën sóg kron măn ke mũ, inh panh tÿ tÿ ãg pã'i nĩnh ke kurã ên kã. Kÿ sóg ãjag mré kron măn ke mũ, ha vemnĩ,” he tóg, Jesus ti.

30 Kÿ ag tóg jãn mũ gé sir, ag jën kar kÿ. Ag tÿ Topẽ jé tó kar kÿ ag tóg krĩ tÿ Oliveiras ra mũ mũ sir.

Jesus tÿ Pedro mÿ tó

(Mc 14.27-31; Lc 22.31-34; Jo 13.36-38)

31 Ag tÿ ra mũn kÿ Jesus tóg ag mÿ kãmén mũ. “Kuty tag kã ãjag tóg inh fón kÿ mũ kãn ke mũ,” he tóg mũ, ã mré mũ tĩ ag mÿ. “Hã kÿ tóg rán kÿ nĩ. “Û tÿ carneiro ki rĩr tĩ ên tânj jé sóg ke mũ, kÿ ti mẽg ag vÿ krig ke kãn ke mũ,” he tóg, Topẽ vÿ tÿ rán kÿ nĩ ki,” he tóg, Jesus ti. “Hã ve jé ãjag tóg ke mũ.

32 Hã ra sóg iser kar kÿ rĩr măn ke mũ. Ên kã sóg ãjag jo tĩg ke mũ, ga tÿ Galiléia ra,” he tóg, Jesus ti.

33 Kÿ Pedro tóg ti mÿ: “inh pi(jé) ã fón kÿ tĩg ke mũ', ag kar tÿ ã ré kÿ mũ mũ ra,” he mũ.

34 Hã ra Jesus tóg ti mÿ: “ha vé,” he mũ. “Ûri, kuty tag kã ã tóg iso: ti ki kagtĩg sóg nĩ, he tãgtũ han ke mũ, galo kyr to hã. Ki hã sóg tó mũ,” he tóg, Jesus ti.

35 Hã ra Pedro tóg ti mý: “sỹ ã mré ter ke mũ ra sóg ã to: ti ki kagtũg sóg nĩ, henh ke tũ pẽ nĩ,” he mũ. Kĩ ti mré mũ tĩ ag tóg hã tó kãn mũ gé sir.

*Getsêmani tá
(Mc 14.32-42; Lc 22.39-46)*

36 Kĩ Jesus tóg ka krãn ja tá jun mũ sir, ag mré, ka krãn ja ãn jijin hã vỹ: Getsêmani, he mũ. Kĩ tóg ã mré mũ tĩ ag mý: “ha ver nĩgnĩ, tag ki,” he mũ. “Sỹ ver Topẽ mré vĩnh ke vễ, tãtã,” he tóg.

37 Kĩ tóg Pedro mré Zebedeu krẽ ag mý: “inh mré kãmũ jẽg,” he mũ. Kĩ tóg fe kaj nĩ sir. Mũmẽg tóg mũ sir.

38 Kĩ tóg ag mý: “inh fe kaj mág tóg tĩ,” he mũ, “kỹ inh fe kaj tóg inh mý iser ri ke nĩ,” he tóg. “Tag ki nỹtĩmnĩ, nũgnũr tũg nĩ, inh ri kén,” he tóg, Jesus ti.

39 Kĩ tóg tũg sĩ han mãn kỹ mũg ke mũ sir, Jesus ti, kỹ tóg ga kri nỹ mũ. Topẽ mré tóg vĩ mũ. “Panh’,” he tóg mũ. “Mỹ ã tỹ inh jagtar ke tag tỹ tũ' he jãvãnh?” he tóg. “Hã ra isỹ ã mý nén to vĩ mũ tag han tũg nĩ. ã tỹ nén han ke mũ ãn hã han nĩ,” he tóg, Jesus ti.

40 Kar kỹ tóg ã mré mũ tĩ ag venh tĩ mũ sir, hã ra ag kar tóg nũgnũr ja nĩ. Kĩ tóg Pedro mý: “mỹ ãjag mý hora pir ki nũr tũ kórég?” he mũ.

41 “Nũr tũg nĩ, Topẽ mré vĩmnĩ, ãjag tỹ ti vĩ mranh tũ nĩ jé, ã tỹ ãjag kutãn mũ ra. ãjag tỹ mranh sór tũ vễ vễ, hã ra ãjag tóg to krój nỹtĩ, hã kỹ ãjag tóg mranh ke mũ,” he tóg, Jesus ti.

42 Kĩ tóg tũg mãn mũ sir, kỹ tóg Topẽ mré vĩ mãn mũ. Kĩ tóg: “panh’,” he mãn mũ. “ã tỹ inh jagtar ke tag tỹ tũ' henh jãvãnh nĩn kỹ sóg jagtar ke mũ. ã tỹ isỹ nén han ke mũ ãn hã han nĩ,” he tóg.

⁴³ Kÿ tóg ag venh tīg mǎn mũ gé sir, hǎ ra ag tóg nũgnũr mǎn nỹtĩ, ag nũr há pẽ tĩn kÿ.

⁴⁴ Kÿ tóg ag mÿ vĩ tũ ra tĩ mũ sir, Topẽ mré vĩ mǎn jé. Ti mÿ tóg ǎ tỹ tó ja ẽn tó mǎn mũ.

⁴⁵ Kÿ tóg ǎ mré mũ tĩ ag venh tīg mǎn mũ gé sir, kÿ tóg ag mÿ: “ǎjag ne tóg nũgnũr ja nĩ” he mũ, “vẽnhkán ja ǎjag tóg nĩ,” he tóg mũ. “Pétẽm ti huri, hora ti. Ti tỹ ag mÿ inh fêg ke nẽ ha, Topẽ vĩ mranh tĩ ag mÿ, isỹ tỹ ẽprǎ ke fi kósin nĩn kÿ,” he tóg.

⁴⁶ “Nĩgnĩ ra, mũ jé ha. Û tỹ ag mÿ inh ven mũ vĩ jun ke mũ ha,” he tóg, Jesus ti.

Ag tỹ Jesus se

(Mc 14.43-50; Lc 22.47-53; Jo 18.3-12)

⁴⁷ Ti tỹ ver tỹ vēmén jẽ ra Judas tóg jun mũ sir. Û tỹ 12 (ke) ag kǎ ù ẽn vẽ, Judas ti. Ti mré polícia ag tóg kǎmũ mũ. Rógro génh kÿ ag tóg kǎmũ mũ, ka kykyv génh kÿ ke gé. Topẽ tũ ki rĩr tĩ to pǎ'i ag tỹ ag jẽgnẽ vẽ, kófa ag tỹ ke gé.

⁴⁸ Hǎ ra ù tỹ ag mÿ Jesus ven ke mũ ẽn tóg ag mÿ: “ti ki sóg nhun kenh mũ,” he ja nĩ. “Sỹ ùn ki nhun ke mũ ẽn hǎ semnĩ,” he ja tóg nĩ ag mÿ.

⁴⁹ Hǎ kÿ tóg vėsÿmér Jesus to grẽn ke kÿ ti mÿ: “ǎ mÿ há, Senhor'?” he mũ. Kÿ tóg ti ki nhun ke mũ, Judas ti.

⁵⁰ Hǎ ra Jesus tóg ti mÿ: “régre',” he mũ. “ǎ tỹ nén han ke mũ ẽn han nĩ,” he tóg.

Kÿ polícia ag tóg vėsÿmér ti to ge kÿ ti ség mũ sir, Jesus ti.

⁵¹ Kÿ Jesus mré tĩ tĩ ù tóg rógro kunũnh kÿ polícia ù nĩgrêg kym mũ sir. Topẽ tũ ki rĩr tĩ to pǎ'i mág camarada vẽ, ti tỹ ùn nĩgrêg kym mũ ẽn ti.

52 Hã ra Jesus tóg ti mÿ: “ã rógro fêg han ra,” he mÿ. “Ëg tÿ rógro tÿ ke kÿ ag tóg rógro tÿ ãg tén ke mÿ gé, ha vemní,” he tóg.

53 “Isÿ inh panh mÿ to vÿ mÿ ra tóg inh mÿ ã tÿ jêgnê jafã ag jêgnênh ke mÿ vê, ãn e ên, 12 mÿl (ke) kãfór, ag tÿ iÿy nÿgãn jé.

54 Hã ra sóg ve sór mÿ, nén tÿ iso rán kÿ nÿ ên ti, hã kÿ sóg ti mÿ tag to vÿ tÿ nÿ. Ve jé sóg ke mÿ ha, inh jagtar ke ti,” he tóg, Jesus ti.

55 Ên kã tóg polícia ag mÿ: “ãjag ne tóg rógro génh kÿ kãmÿ mÿ', ka kykyv mré', ãjag tÿ ise jé',” he mÿ. “Inh pi(jé) tÿ bandido nÿ'. Kurã kar ki sóg ãjag mré jê ja nÿgtÿ, Topê jo ãn krêm. Vênh kar kanhrãn kÿ sóg tá nÿ ja nÿgtÿ, hã ra ãjag tóg tá iség tÿ nÿ vê mÿr,” he tóg.

56 “Hã ra sóg nén tÿ iso rán kÿ nÿ ên vэг mÿ, Topê vÿ tó tÿ ag tÿ iso nén rán ja ên ti, hã kÿ ãjag tóg ke mÿ,” he tóg, Jesus ti.

Kÿ ti mré mÿ tÿ ag tóg ti ré kÿ pétê kãn mÿ sir, vênh pigju jé, mÿr, ha mê.

Pã'i ag tÿ Jesus ki jê mê

(Mc 14.53-65; Lc 22.54-55, 63-71; Jo 18.12-14, 19-24)

57 Kÿ ã tÿ ti ség mÿ ag tóg ti pére mÿ mÿ, Topê tÿ ki rÿr tÿ to pã'i mág ra, hã vÿ: Caifás, he mÿ. Tá ag tóg vênh mãn kÿ nÿtÿ, Topê vÿ to professor ag, kófa ag ke gé.

58 Hã ra Pedro tóg Jesus nón kãtÿ mÿ, kuvar há tá, kÿ tóg Topê tÿ ki rÿr tÿ to pã'i mág ãn kãra rã mÿ sir. Polícia ag mré tóg tá nÿ nÿ. Ti tÿ ag tÿ Jesus tÿ hên ri kenh ke mÿ ên ve sór vê.

59 Kÿ Topẽ tũ ki rĩr tĩ to pã'i ag tóg ù ag jãvãnhvãnh mũ, ag tỹ Jesus jykre kórég tó jé. Ti vĩ to ag tóg ti tén sór mũ, kófa ag, vênh jyvên tĩ kar ag.

60 Hã ra ag tóg ù tỹ ki hã tó mũ vég tũ nĩ. Û tỹ hên ri ke ag tóg ón kÿ ti jykre kórég tó mũ, hã ra tóg ag mÿ ki krov tũ nĩ. Kÿ vãhã ùn rêgre ag tóg tá junjun kÿ ón kÿ ti to vĩ mũ.

61 Ên ag vĩ tóg sir: “ti vĩ vênhmÿ mẽ êg,” he mũ. “Topẽ jo ìn kókén há inh nĩgtĩ, he ja tóg nĩ. Kókén kar sóg ù han măn ke mũ. Kurã tãgtũ ki tóg kar kÿ nĩ, ìn ti, ha vemnĩ, he ja tóg nĩ, Jesus ti,” he ag tóg mũ, ón kÿ ti to vĩ kÿ.

62 Kÿ Topẽ tũ ki rĩr tĩ to pã'i mág vĩ jêgnê mũ sir, kÿ tóg ti mÿ: “ã tỹ nén tónh ke mÿ tũ'?” he mũ. “Ag hã ne ã vĩ kónãn tag tó ja nĩ gé!” he tóg.

63 Hã ra Jesus tóg hun ke mũ, nén ù tó mẽ kã. Kÿ pã'i mág tóg ti mÿ: “Topẽ vĩ rĩr nĩ,” he mũ. “Ûn rĩr nĩ vĩ êg vég mũ. Ti rĩnve sóg ã ki jêmêg mũ. ã mÿ tỹ Cristo nĩ', ã mÿ tỹ Topẽ kósin nĩ'? Ha êg mÿ tó,” he tóg, pã'i mág ti.

64 Kÿ Jesus tóg ti mÿ: “ki hã ã tóg tó mũ,” he mũ. “Kÿ sóg ãjag mÿ tag tó mũ gé, ha mẽ. Êprã ke fi kósin ên vĩ tỹ inh nĩ,” he tóg. “Kÿ ãjag tóg ù tỹ nén (ũ) kar han mũ ên pẽgja tá inh venh ke mũ. Kÿ sóg kanhkã góg kãmĩ kátêrenh ke mũ gé,” he tóg, Jesus ti.

65 Kÿ pã'i mág ên tóg ã kur tỹ jaran' ke mũ sir, jũ kÿ. Kÿ tóg: “Topẽ kato vĩ kónãn ti huri,” he mũ. “Mẽ kãn êg mÿr, kÿ êg tóg ù tỹ ti jykre kórég tónh ke ù jãvãnh măn ke tũ nĩ ha,” he tóg.

66 “Êg hÿn ti tỹ hê ri kenh mũ ha?” he tóg. Kÿ ag tóg ti mÿ: “ter jé tóg ke mũ, ti vĩ tag to,” he kãn mũ sir.

⁶⁷ Kÿ ag tóg ti kakã to sugrug mũ sir, ti kakã ki tãnh ag tóg mũ gé sir. Ag kã ù tóg ti vatánh tá ti tãnh kÿ ti mÿ:

⁶⁸ “Cristo nēji tÿ ã jē, kÿ ã nēji nén kar ki kanhró nĩ,” he mũ. “Û nÿ ã tãnh?” he tóg mũ gé. Ti tãnh kÿ tóg ke mũ. Gen kÿ ag tóg ti to é he mũ.

Pedro tÿ Jesus to ón

(Mc 14.66-72; Lc 22.56-62; Jo 18.15-18, 25-27)

⁶⁹ Hã ra Pedro vÿ re tá nĩ nĩ, ãn vãso kã. Kÿ pã'i camarada ù fi tóg ti ve jé kãkutẽ mũ, kÿ fi tóg ti mÿ: “Jesus mré ã tóg tÿg mũ gé, Galiléia tá ke ãn mré,” he mũ.

⁷⁰ Hã ra tóg: “vó,” he mũ. “Ã tÿ ne tó nē hÿn'?” he tóg mũ, Pedro ti. Kÿ ag kar vÿ ti vĩ mẽg mũ.

⁷¹ Kÿ tóg jãnkã fĩn rãm sór mũ. Hã ra ù fi tóg ti vég mũ gé, kÿ fi tóg tá ke ag mÿ: “Jesus mré ke ù vë, Nazaré tá ke ãn mré ke ù vë,” he mũ gé.

⁷² Hã ra tóg: “vó,” he mãn mũ. “Ti ki kagtÿg sóg nĩ, Topẽ vÿ ki kanhró nĩ,” he tóg, Pedro ti.

⁷³ Si há ke tũ ra ù tÿ tá nÿtĩ ag kã ù ag tóg ti venh kãmũ kÿ ti mÿ hã tó mãn mũ gé. Kÿ ag tóg Pedro mÿ: “ha mẽ, ag kã ù vÿ tÿ ã nĩ,” he mũ. “Ã vĩ ki ãg tóg ã ki kanhrãn mũ,” he ag tóg mũ.

⁷⁴ Hã ra tóg: “vó,” he mãn mũ. “Inh pi(jé) ti ki kanhró nĩ'. Inh ón mũ ra Topẽ vÿ inh vóg kónãn mũ vë,” he tóg, Pedro ti. Hã ra vësÿmér galo tóg kyr mũ.

⁷⁵ Kÿ Pedro tóg Jesus vĩ to jykrén mũ, ti tÿ ti mÿ: “iso ã tóg: ti ki kagtÿg sóg nĩ, he tãgtũ han ke mũ, galo kyr ke to hã,” he ja ãn mĩ. Tag mĩ ãkrén kÿ tóg tá kãkutẽ mũ sir, hã ra tóg fÿ jagy han mũ sir, Pedro ti.

27

Ag tỹ Pilatos mỹ Jesus ven

(Mc 15.1; Lc 23.1-2; Jo 18.28-32)

¹ Tỹ vaj kỹ kusã ki ag tóg Jesus to jykrén mũ sir, Topẽ tũ ki rĩr tĩ to pã'i ag, kófa ag mré hã. Ag tỹ ti tén sór vễ.

² Kỹ ag tóg ti mrĩnh mũ sir. Ti pére mũn kỹ ag tóg pã'i mág tỹ governador mỹ ti fẽg mũ sir, Pilatos ẽn mỹ.

Judas ter

(Hk 1.16-19)

³ Hã ra Judas tóg vég mũ. Pã'i ag mỹ tóg Jesus ti ven ja nĩ, ag tỹ ti se jé. Kỹ tóg ag tỹ ti tén sór mũ tag vég mũ, Judas ti. Kỹ tóg to jykrén mãn mũ sir. Vãhã tóg ti mỹ e tĩ. Kỹ tóg jãnkamy tỹ prata ẽn ma kãtĩ mũ sir, ũ tỹ 30 (ke) ẽn. Ma kãtĩg kỹ tóg Topẽ tũ ki rĩr tĩ to pã'i ag mỹ ven mũ, kófa ag mỹ.

⁴ Kỹ tóg ag mỹ: “ti kórég han inh,” he mũ. “Ti pi(jé) nén ũ kórég han ja nĩgtĩ', hã kỹ tóg vẽnhmỹ nĩ, ti tỹ inh vĩ to ter kỹ,” he tóg.

⁵ Hã ra ag tóg ti mỹ: “ẽg tũ pijé',” he mũ. “Ã tũ hã nễ',” he ag tóg mũ. Kỹ tóg jãnkamy ẽn vãm mũ sir, Topẽ jo ỉn krêm, kỹ tóg hên ra tĩ mũ sir. Tá tóg ã nunh kã vênh jãján mũ sir, kỹ tóg ter mũ sir.

⁶ Kỹ Topẽ tũ ki rĩr tĩ to pã'i ag vỹ jãnkamy ẽn mãn kỹ to jykrén mũ. “Ëg tỹ Topẽ mỹ jãnkamy tag vin kỹ tóg vẽnhmỹ tĩ. Vênh kyvênh kajãm ja ti nĩ, hã kỹ ẽg tóg Topẽ mỹ vin sór tũ nĩ,” he ag tóg mũ sir, jãnkamy ẽn to.

⁷ Kỹ ag tóg to vênh mãn kỹ to jykrén mũ. To jykrén kỹ ag tóg tỹ ẽpỹ kajãm mũ, ag tỹ tá go'or

vég tĩ ên. Tá ag tóg fóg ag kej han sór mũ, fóg tỹ Jerusalem ra pasa tĩ ag mũ.

⁸ Hã kỹ êg tóg êpỹ ên to: “êpỹ kyvénh,” he tĩ.

⁹ Hã ra Topê vĩ tó tĩ tỹ Jeremias vĩ Judas to tag rán ja nĩ, ha mẽ: “jãnkamy tỹ 30 (ke) tỹ ag tóg êpỹ kajãm ke mũ. Jãnkamy ên tỹ ag tóg êprã ke ù kajãm vén ke mũ, Israel ag, ti kaja tag tỹ ag mũ há nỹn kỹ.

¹⁰ Êprã ke ên tỹ kajãm kar kỹ ag tóg tỹ êpỹ kajãm mũ sir, ag tỹ tá go'or vég tĩ ên. Hã tó ja tóg nĩ, inh mũ, êg jóg tỹ Topê ti,” he ja tóg nĩgtĩ, Jeremias ti. Hã ra tóg ge nĩ.

Pilatos tỹ Jesus ve

(Mc 15.2-5; Lc 23.3-5; Jo 18.33-38)

¹¹ Hã ra Jesus tóg fóg tỹ pã'i mág rã jê nĩ. Kỹ pã'i mág tóg ti ki jẽmẽ sór mũ, kỹ tóg: “ã mũ tỹ Judeu ag pã'i nĩ?” he mũ. Kỹ Jesus tóg ti mẽ: “ki hã ã tóg tó mũ,” he mũ.

¹² Kỹ Topê tũ ki rĩr tĩ to pã'i ag tóg ti kato vĩ mág han mũ, kófa ag ke gé, hã ra tóg hun ke kỹ jê nĩ.

¹³ Kỹ Pilatos tóg ti mẽ: “mỹ ã mũ tỹ nén ù tũ nĩ, ag tỹ ã kato vĩ mág han mũ tag ti?” he mũ.

¹⁴ Hã ra Jesus tóg vĩ mãn tũ nĩ, kỹ tóg Pilatos mẽ e tĩ sir.

Ag tỹ Jesus to: ter jé tóg ke mũ, he

(Mc 15.6-15; Lc 23.13-25; Jo 18.39-19.16)

¹⁵ Hã ra Pilatos tóg ag mũ vése ag kar kã ùn pir kavãg tĩ, festar tỹ Páscoa kar ki. Ti jykre vễ. Ag tỹ ùn to vĩ mũ ên kyvãg tóg tĩ.

¹⁶ Kỹ ù tóg se kỹ jê nĩ, ên kã. ùn vẽnhmỹ vễ, ù tỹ ag ri ke tũ, ti jijin hã vĩ: Barrabás, he mũ.

¹⁷ Jãvo ag tóg tá vẽnhmãn kỹ nỹtĩ, Judeu kar ag. Kỹ Pilatos tóg ag mẽ: “inh hỹn ù kavãn ha?” he mũ.

“Û nỹ ãjag mỹ há nĩ? Barrabás mỹ, Jesus mỹ vó, ag tỹ ù to: “Cristo vỹ tỹ ti nĩ,” he tĩ ěn?” he tóg, Pilatos ti.

18 Pã'i ag tỹ véké Jesus to jũ nỹtĩn ki kanhró tóg nĩ, Pilatos ti. Ti há nĩn hã kỹ ag tóg ti to jũ mũ, hã kỹ tóg ti kavãn sór mũ, Pilatos ti.

19 Fóg tỹ pã'i ěn tỹ vĕnh jyvĕn jafã tá nĩn kỹ ti prũ fi tóg ti mỹ vĕnh vĩ jĕnĕg mũ, kỹ fi tóg ti mỹ: “vĕnh jykre kuryj han ti tĩ,” he mũ, Jesus to. “Hã kỹ ti vóg sór tũg nĩ. Kutý tag kã sóg ti to vĕnh péti kónãn, ěg jagtar ke ti ve inh, inh vĕnh péti ki,” he fi tóg, Pilatos mỹ vĕnh vĩ jĕnĕn kỹ, hã kỹ tóg ti kavãn sór tãvĩ han mũ, Pilatos ti.

20 Hã ra Topĕ tũ ki rĩr tĩ to pã'i ag tóg vĕnh kar krĩn mũ sir, kófa ag mré, vĕnh kar ag tỹ Barrabás kavár kỹ jĕ ve sór jé, ag tỹ Jesus ter ve sór jé.

21 Kỹ fóg tỹ pã'i tóg ag ki jĕmĕ mãn mũ. “Inh hỹn ùn régre tag ag kã ù tỹ hĕ kavãn mũ ha?” he tóg. Kỹ ag tóg ti mỹ: “Barrabás ti,” he mũ.

22 Kỹ Pilatos tóg ag mỹ: “kỹ inh Jesus tỹ hĕ ri kenh mũ?” he mũ. “Ag tỹ ù to: “Cristo vỹ tỹ ti nĩ,” he tĩ ěn tỹ inh hĕ ri kenh mũ?” he tóg. Kỹ ag tóg ti mỹ: “cruz to ti sã,” he kãn mũ sir.

23 Kỹ fóg tỹ pã'i tóg ag mỹ: “ti kórég tỹ ne han ti?” he mũ. Hã ra ag tóg prĕnprĕr mũ sir. “!..Cruz to ti sã..!” he ag tóg mũ sir, prĕnprĕr kỹ.

24 Ag tỹ hĕ ri ke tũ tóg nĩ, Pilatos ti, hã kỹ tóg ag mỹ hã han sór mũ. Vĕnh génh kutĕ nĩ ve tóg nĩ, hã kỹ tóg goj jé prĕr mũ. Kỹ tóg kã nĩgpég mũ sir, vĕnh kar rĩnve, Pilatos ti, kỹ tóg ag mỹ: “inh jykre pijé,” he mũ. “Inh nĩgé kavĕnh ke tũ ti nĩ, ti kyvĕnh ti. Ûn

jykre kuryj vĕ, kŷ sóg ti tén jãvãnh nĩ. Ājag jykre vĕ,” he tóg, Pilatos ti.

²⁵ Kŷ vĕnh kar ag tóg ti mŷ: “ĕg jykre vĕ,” he kãn mŷ. “Ēg hã ne ti tén sór mŷ!. Kŷ Topĕ ĕg hã vóg kónãn ke mŷ, ĕg krĕ ag ke gé, ti tŷ ti ter to ũ vóg kónãn ken kŷ,” he ag tóg, vĕnh kar ĕn ag.

²⁶ Kŷ Pilatos tóg Barrabás kavãn mŷ sir. Jesus to tóg soldado ag mŷ: “ha ti mrãnmrãn,” he mŷ sir. Ag tŷ ti mrãnmrãn kar kŷ Pilatos tóg ag mŷ ti fĕg, soldado ag tŷ ka to ti sa jé.

*Soldado ag tŷ Jesus vóg kónãn
(Mc 15.16-20; Jo 19.2-3)*

²⁷ Kŷ fóg tŷ pã'i krĕm soldado ag tóg Jesus pére mŷ mŷ, pã'i ĩn ra, ĩn tŷ Palácio do Governador ĕn ra. Kŷ ag tóg soldado ũ ag jé prĕr kãn mŷ.

²⁸ Ti kur kunŷg ag tóg mŷ, kŷ ag tóg kur kusŷg tŷ ti kri fón mŷ.

²⁹ Sónh pirĭn kŷ ag tóg tŷ ti krĭ tógfĭg mŷ sir, krĭ tógfĭn ja rĕr tŷ. Vãn tŷ ag tóg ti nĭgé kã fĕg mŷ, ti pĕgja tá. Kŷ ag tóg ti krĕm grĭnhgrĭnh ke mŷ sir, ón kŷ. Ti to é he ag tóg mŷ, hã kŷ ag tóg: “viva, Judeu ag pã'i!” he mŷ.

³⁰ Kŷ ag tóg ti to sugrug mŷ gé. Vãn ĕn tŷ ag tóg ti krĭ mŷ mrãnmrãn mŷ sir.

³¹ Ag tŷ ti nyg kar kŷ ag tóg ti ki kunŷg mŷ, kur ĕn ti. Kŷ ag tóg ti tũ pĕ tŷ ti kãra rãg mãn mŷ sir. Kŷ ag tóg ti pére mŷ mŷ, ag tŷ cruz to ti san jé sir.

*Jesus tŷ cruz to sa
(Mc 15.21-32; Lc 23.26-43; Jo 19.17-27)*

³² Ag mŷn kã ag tóg ũ kato tĕ mŷ, Cirene tá ke ũ, ti jijin hã vŷ: Simão, he mŷ. Ēn mŷ ag tóg vŷ tar han

mũ, ti tỹ Jesus cruz vyn jé ti jo, hã kỹ tóg vyn kỹ tĩ mũ.

³³ Gen kỹ ag tóg Gólgota tá junjun mũ sir. Gólgota to ěg tóg: vĕnh krĩ kuka, he tĩ, ěg vĩ ki.

³⁴ Tá junjun kỹ ag tóg ti mỹ vinagre ven mũ, nĕn ũ tỹmĕ jynh mré ha. Kỹ tóg kron sĩ han mũ, hã ra tóg kron sór tũ nĩ, vĕnhkagta tag.

³⁵ Kỹ ag tóg cruz to ti sãg mũ sir. Ti kur tỹ ag tóg jagnĕ mỹ vĕnh kãpãm mũ sir, to ag tóg jogar he mũ gé, ti kur to, soldado ag.

³⁶ Kỹ ag tóg nĩgnĩg kỹ nỹtĩ, ti ki rĩr jé, soldado ag.

³⁷ Ag tỹ nĕn tỹ ti kato vĩ mũ vĩ rán kỹ nĩ, hã vỹ: “Jesus, Judeu ag pã'i tỹ rei vĕ,” he mũ. Ti kri tóg sa, vĕnh rán ti. Ti tỹ nĕji vĕsỹ pã'i tỹ rei han mũ to ag tóg ti tén mũ.

³⁸ Ti kóm ag tóg ũn régre ag tỹ cruz to sãg mũ gé, bandido ag. Kỹ ũ tóg ti pĕgja tá sa, jó ũ tóg ti jakãnh tá sa.

³⁹ Kỹ ũ tỹ mĩ mũ mũ ag tóg ti nyg' he mũ gé, vỹn vỹn hen kỹ.

⁴⁰ “Ă mỹ Topĕ jo ĩn kókĕn sór mũ'?” he ag tóg mũ. “Ă mỹ kurã tãgtũ ki ũ han mãn sór mũ'? Vĕnh kren han ra kema', cruz to kãtére kema', ģ tỹ tỹ Topĕ kósin nĩn kỹ,” he ag tóg ti mỹ.

⁴¹ Ge ag tóg mũ gé. Topĕ tũ ki rĩr tĩ to pã'i ag, Topĕ vĩ to professor ag mré hã, kófa ag mré hã. Ti nyg ag tóg mũ gé, kỹ ag tóg jagnĕ mỹ:

⁴² “ũ ag krenkren han tóg, hã ra tóg vĕnh hã kren han ki kagtĩg nĩ,” he mũ. “Israel pã'i tỹ rei jé cruz to kãtére kema', ěg tỹ ve jé, ěg tỹ ti ki ge jé,” he ag tóg.

⁴³ “Topĕ ki ti nĕji rã kỹ jĕ, kỹ Topĕ jé ti kren han, ti tỹ ti to há nĩn kỹ. “Topĕ kósin vỹ tỹ inh nĩ,” he ti

mÿr,” he ag tóg ti to, ti nyg kÿ, Judeu pã'i ag.

⁴⁴ Kÿ bandido ag, ù tÿ ti kóm cruz to nÿtĩ ên ag tóg ti nyg mÿ gé.

Jesus ter

(Mc 15.33-41; Lc 23.44-49; Jo 19.28-30)

⁴⁵ Rã tÿ ãg nÿno kã sa ra tóg kuty' he mÿ sir, ga kar mĩ há. Kuty ên tóg hora tãgtũ tũg mÿ.

⁴⁶ 3 hora ki Jesus tóg prër mÿ sir, kÿ tóg: “Eli, Eli, lemá sabactani?” he mÿ. Ëg vĩ ki ãg tóg tag to: “Topẽ, Topẽ, ã tÿ ne jé isovãnh nẽ?” he mÿ.

⁴⁷ Kÿ ù tÿ tá nÿtĩ ag tóg mẽg kÿ (ag tóg) jagnẽ mÿ: “Elias jé tóg prër mÿ,” he mÿ.

⁴⁸ Kÿ ù tóg vënhvãg mÿ sir, kÿ tóg esponja tÿ vinho prãg mÿ, vinho kaja pir tÿ. Ka jurÿn kÿ tóg tÿ kusón kÿ vinho kãra rãg kÿ ti mÿ ven mÿ sir, ti tÿ ki ùnh' ùnh' ke jé.

⁴⁹ Hã ra ù ag tóg: “toreg',” he mÿ. “Hën ri ke mÿn Elias kãtĩg mÿ, ti kren han jé,” he ag tóg.

⁵⁰ Hã ra Jesus tóg prër mág han mãn kÿ hun ke mÿ sir.

⁵¹ Hã ra Topẽ jo ïn krëm kur tÿ jãnkã nife tóg jaran ke mÿ, ha mẽ, ti jar tóg vënh kãkym ke kãn mÿ sir, ha mẽ.

⁵² Kÿ ga tóg ragra ke mÿ gé sir, pãró vÿ gÿm ke mÿ, vënh kej tÿ hën ri ke vÿ nugnor mÿ, kÿ ù tÿ Topẽ ki ge kÿ nÿtĩ tÿ hën ri ke ag tóg rĩnrĩr mãn mÿ gé, ùn kãgter ja ag. ãjag kej tá ag kãpa mÿ.

⁵³ Ën ag vÿ Jesus rĩr mãn kar kÿ tá kãpa kÿ cidade tÿ Jerusalém kãra ge mÿ, kÿ ag tóg ùn mÿ vënh venven mÿ sir, kÿ ù tÿ hën ri ke ag tóg ag vigvæg mÿ, Jerusalém tá ke ag.

54 Hã ra capitão tóg soldado ag mré Jesus ki rĩr jẽ nĩ. Ga tỹ ragra ke ẽn vég ag tóg mũ, nén kar ti, Jesus ter ẽn kã. Kỹ tóg ag mỹ e ti. Kỹ ag tóg: “hã ja vê,” he mũ. “Topê kósin ja vê mỹr,” he ag tóg mũ, capitão ag.

55 Kỹ ùn týtá fag vỹ tá nýtĩ gé, ù tỹ hẽn ri ke fag. Kuvar há tá nýtĩ kỹ fag tóg ti vég nýtĩ nĩ. Ti mré fag tóg kãmũ ja nĩ, ga tỹ Galiléia tá. Ti ki fag rĩr ja nĩgtĩ.

56 Fag kã ù fi vỹ tóg tỹ Maria Madalena fi nĩ, kỹ ù fi tóg tỹ Maria fi nĩ gé, José mré Tiago mỹnh tag fi. Kỹ ù fi vỹ tỹ Zebedeu krẽ ag mỹnh fi nĩ gé. Fag mré ke ù fag vỹ tá nýtĩ gé.

Ag tỹ vẽnh kej kãkã Jesus fi

(Mc 15.42-47; Lc 23.50-56; Jo 19.38-42)

57 Rãké tóg nỹ ha, kỹ ùn há tóg tá jun mũ. Arimatéia tá tóg kãtĩg ja nĩ. Ti jijin hã vỹ: José, he mũ. Jesus mré ke ù vê gé.

58 Ẽn vỹ tóg Pilatos venh tĩ mũ, kỹ tóg ti mỹ Jesus to vỹ mũ, ti ter kar kỹ. Kỹ Pilatos tóg soldado ag mỹ: “ha ti mỹ ti fi,” he mũ.

59 Kỹ José tóg Jesus va tĩg kỹ ti pãg mũ sir, kur jãnhkri tỹ.

60 Kỹ tóg ã kej kãkã ti fig mũ sir. Pó kãkã tóg han ja nĩgtĩ, vẽnh kej ti, hã ra tóg tãg nĩ. José tũ vê, vẽnh kej ẽn ti. Ẽn kãkã tóg ti fig mũ sir, kỹ tóg pó tãpér tĩn mũ, vẽnh kej jãnkã to, pó ẽn tỹ tóg ti kej nĩfénh mũ sir, José ti. Kỹ tóg tĩ mũ.

61 Hã ra Maria Madalena fi vỹ tá nĩ nĩ, Maria ù ẽn fi ke gé. Ti kej rã fag tóg nĩgnĩ kỹ nýtĩ nĩ.

Ag tỹ ti kej ki rĩr

⁶² Tỹ vaj kỹ, festa kurã kã Topẽ tũ ki rĩr tĩ to pã'i ag tóg vẽnħ mãn mãn mũ sir, Fariseu ag mré hã. Kỹ ag tóg Pilatos venh mũjẽg.

⁶³ Ti mỹ ag tóg: “governador,” he mũ. “Vẽnħ kar krĩn kónãn tĩ ẽn tóg tag tó ja nĩ, ha mẽ: “kurã tãgtũ ki sóg rĩr mãn ke mũ,” he ja ti nĩ. Ęg tỹ tag to jykrén kỹ ẽg tóg ã mỹ nén ũ to vĩ sór mũ gé ver.

⁶⁴ Soldado ag tỹ ti kej ki rĩr há tóg tĩ, kurã tãgtũ ki. Ęg mỹ tóg ti mré mũ tĩ ag tỹ ti to nón kỹ ti péjunh ha mẽ tĩ. Ęg mỹ tóg ag tỹ ti péju kar vẽnħ kar mỹ: “rĩr mãn ti, ã ter kar kỹ,” henh ha mẽ tĩ gé. Kỹ vẽnħ ó tãg tag vĩ ti ón ja ẽn kãfór pẽ nỹnh ke mũ. Hã kỹ soldado ag jẽgnẽ, ag tỹ ti kej ki rĩr jé,” he ag tóg, Pilatos mỹ.

⁶⁵ Kỹ Pilatos tóg ag mỹ: “hej,” he mũ. “Vỹ nỹtĩ, ti kej ki rĩr ke mũ ag,” he tóg, soldado ũ ag to. “Ti kej ki rĩr há han nĩ, ge kỹ,” he tóg.

⁶⁶ Kỹ ag tóg mũ kỹ ti kej to ag vin mũ, ti kej ki rĩr ti ẽn ag. Ti kej nĩfénh mũ ẽn ség ag tóg mũ gé, vãfe tỹ, pãró to. Kỹ ag tóg go'or tỹ vãfe ẽn kri tỹ tam ke mũ, ũ tỹ ti kej nĩfe kunũg tũ nĩ jé.

28

Jesus rĩr mãn

(Mc 16.1-10; Lc 24.1-12; Jo 20.1-10)

¹ Vẽnħkán ke kurã tỹ vaj kỹ, semana tỹ kurã ve tag ki Maria Madalena fi tóg ti kej venh tĩ mũ, kusã ki, Maria ũ ẽn fi mré hã.

² Hã ra ga tóg ragra ke tar han mũ sir. Kỹ Topẽ tỹ jẽnẽ jafã tóg kanhkã tá kãtére mũ. Ti kej tá jun kỹ tóg pó tỹ jãnkã nĩfe ẽn tĩn mũ, kỹ tóg kri nĩ mũ sir, pó ẽn kri.

³ Hã ra tóg tỹ ta tỹ kóm kóm ke ve nĩ, anjo ên ti. Ti kur vỹ kóprėj nĩ, kukryr kó kupri ri ke.

⁴ Kĩ soldado ag tóg jũrũn ke mũ, kamẽg kũ ag tóg kãgter nỹtĩ ve nĩ.

⁵ Kĩ Topẽ tỹ jẽnẽ jafã tóg ãn tỹtá fag mũ vĩ mũ, kũ tóg: “kamẽg tũg nĩ,” he mũ. “Jesus jãvãnh ãjag nỹtĩ, ag tỹ cruz to ãn sãg mũ ên ti.

⁶ Ki ti tũ nĩ, rĩr ti huri, hã kũ tóg ãjag mũ tó ja nĩgtĩ. Ki ti nỹ ja nĩgtĩ, ha kãge jẽg, ãjag tỹ ti nỹgja ve jé,” he tóg mũ, fag mũ, anjo ti.

⁷ “Kuri, ti mré mũ tĩ ag mũ tónh mũjẽg, ti rĩr mãn ti, ti ter kar kũ. Ha vé, ãjag jo tóg tĩg mũ, Galiléia ra. Tá ãjag tóg ti venh mũ, ha vemnĩ. Inh vĩ kã jatu' he tũg nĩ,” he tóg, Topẽ tỹ jẽnẽ jafã ti.

⁸ Kĩ fag tóg ti kej tá kãpa mũ sir, to fũrũrũn kũ. Fag mũ tóg e tĩ. Fag mũ tóg sér pẽ tĩ, hã kũ fag tóg pêtẽ mũ sir, fag tỹ Jesus mré mũ tĩ ag mũ tó jé.

⁹ Fag mũ ra Jesus hã ne fag kato jun ke mũ', kũ tóg fag mũ: “mũ sér nỹtĩmĩ,” he mũ. Kĩ fag tóg ti to grẽn ke mũ, ti pẽn kãgmĩg fag tóg mũ sir. Tĩ krẽm fag tóg mũg ke mũ gé.

¹⁰ Kĩ Jesus tóg fag mũ: “kamẽg tũg nĩ,” he mũ. “Ha mũjẽg, inh régre ag mũ tónh mũjẽg, ag tỹ ga tỹ Galiléia ra mũ jé. Tá ag tóg inh venh ke mũ,” he tóg, Jesus ti. Kĩ fag tóg mũ mũ.

Soldado ag ón

¹¹ Fag mũn kũ soldado ên ag tóg cidade ra mũ mũ, soldado tỹ Jesus kej ki rĩr mũ ên ag. Tá junjun kũ ag tóg Topẽ tũ ki rĩr tĩ to pã'i ag mũ tó kãn mũ, ag tỹ nén vég mũ ên ti. Kĩ tóg ag mũ e tĩ.

¹² Kĩ ag tóg kófa ag mré vẽn hãn mũ sir, ag tỹ to jykrén jé. “Ëg hỹn hẽ ri kenh mũ, vẽn kar tỹ ti rĩr

mãn tag to: ag ón vë, he jé?” he ag tóg mũ jagnë mÿ. Ag tÿ to jykrén kar kÿ ag tóg soldado ag mÿ jãnkamy e ven mũ sir.

¹³ “Jãnkamy tag to vënh kar mÿ un'ón,” he ag tóg mũ, pã'i ag, soldado ag mÿ. “Un'ón kÿ vënh kar mÿ: êg nũgnũr mũ jãvo Jesus mré mũ tĩ ag tóg ti péju ja nĩ, kuty si há tá, hã kÿ tóg ki tũ nĩ ha, hemnĩ,” he ag tóg, pã'i ag, soldado ag mÿ.

¹⁴ “Hën ri ke mũn ãjag pã'i tÿ governador tóg mënũ mũ, ãjag nũgnũr ja ti. Kÿ êg tóg ti mré vëmén ke mũ, ti tÿ ãjag vóg kónãn tũ nĩ jé,” he ag tóg, Topë tũ ki rĩr tĩ to pã'i ag, soldado ag mÿ.

¹⁵ Kÿ soldado ag tóg jãnkamy ên mãn kÿ mũ mũ sir. Vënh kar mÿ ag tóg un'ón mũ mũ sir, Jesus mré mũ tĩ ag to. Hã kÿ Judeu ag tóg ver tag tó tĩ, ùnri.

Jesus tÿ ã mré mũ tĩ ag mÿ vënh ven

(Mc 16.14-18; Lc 24.36-49; Jo 20.19-23; Hk 1.6-8)

¹⁶ Hã ra ti mré mũ tĩ ag tóg ga tÿ Galiléia ra mũ mũ, pãnónh ù ra, Jesus tÿ ag mÿ: “ên ra mũjêg,” he ja ên ra.

¹⁷ Kÿ ag tóg tá ti vég mũ sir, kÿ ag tóg ti krëm mũgmũg ke mũ sir. Hã ra ag kãmĩ ù ag mÿ tóg vënhmÿ tĩ, ag tÿ ti vég mũ ra, kÿ tóg ag mÿ ki hã ke tũ nĩ.

¹⁸ Kÿ Jesus tóg ag rã hã jun mũ, kÿ tóg ag mré vëmén mũ sir. “Nën kar vÿ tÿ inh krëm ke nĩ ha, kanhkã tá ke kar, ga tá ke kar ke gé,” he tóg, Jesus ti.

¹⁹ “Hã kÿ mũjêg, povo kar kanhrãn jé, ag tÿ inh ki ge jé. Ag tÿ inh ki ge kÿ nÿtĩn kÿ ag kygpemñĩ gé. Inh panh jiji tómnĩ, ag kygpe kÿ, kÿ tĩ kósin jyjy tómnĩ gé, kÿ Topë kuprĩg jiji tómnĩ gé, ãjag tÿ ag kygpe kÿ.

²⁰ Kĩ isỹ ãjag mỹ nén tó mũ kãmén kãn nĩ gé, ag tỹ ki króm jé. Ha mẽ, ãjag mré sóg jẽ nĩ, kurã kar ki, ga tũg ke kurã ki ke gé. ãjag tovãnh ke tũ sóg nĩ ha,” he tóg, Jesus ti. Ti tỹ ã mré mũ tĩ ag jẽgnẽg mũn hã vễ.

Topẽ vĩ rá
New Testament in Kaingang (BR:kgp:Kaingang)

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

